

*Mon liv*  
**ZISTWAR  
LABIB**





SA LIV I POUR




*Mon liv*

ZISTWAR  
LABIB

© 1978, 2004  
WATCH TOWER BIBLE AND TRACT SOCIETY  
OF PENNSYLVANIA  
*My Book of Bible Stories*  
Tou drwa rezerve

© 2002, 2008  
WACHTTURM BIBEL- UND TRAKTAT-GESELLSCHAFT DER ZEUGEN  
JEHOVAS, E.V., SELTERS/TAUNUS  
*Mon liv zistwar Labib*  
Alle Rechte vorbehalten



Bann sitasyon dan sa liv in  
ganny mete dan en lot form.  
Zot in ganny ekrir dan en lan-  
gaz senp afen ki bann zanfan i  
kapab konpran. Alafen sak zis-  
twar i annan bann teks Labib  
lo ki sa bann zistwar i baze.

Enprimen an 2012

Sa piblikasyon pa ganny vann me i form parti en travay  
edikasyonnel lo Labib dan lemonn antye ki ganny soutenir  
par bann kontribisyon volonter.

*My Book of Bible Stories*  
Seychelles-Creole (*my-SC*)

Made in Germany  
Druck und Verlag: Wachturm-Gesellschaft, Selters/Taunus

# MON LIV ZISTWAR LABIB

**S**A I en liv ki kontyen bann vre zistwar ki'n ganny retire dan sa pli bon liv dan lemonn, Labib. Sa bann zistwar i rakont bann levennman ki'n arive dan lemonn depi kreasyon ziska nou letan. I osi koz lo bann keksoz ki Bondye in promet pour fer dan lavenir.

Ou pou kapab aprann en bon pe keksoz ki annan dan Labib. I koz lo bann personnaz Biblik e lo bann keksoz ki zot ti fer. Ou pou dekouver sa lespwar manifik ki Bondye in ofer imen: sa lespwar pour viv pour touzour dan paradi lo later.

I annan 116 zistwar dan sa liv. Zot in ganny groupe dan 8 parti. Okonmansman sak parti i annan en rezimen an bref lo bann keksoz ki ou pou kapab lir dan sa parti. Sa bann zistwar in ganny met dan lord ki bann levennman ti arive dan listwar. Sa pou ed ou pour aprann kan, an relasyon avek lezot levennman ki bann keksoz ti arive dan listwar.

I'n ganny ekrir dan en langaz senp. Donk, menm si ou en zanfani pou fasil pour ou lir sa liv lo ou menm. Konman en paran, ou pou dekouver ki ou bann pli pti zanfani pou kontan antann sa bann zistwar souvan. Ou pou osi dekouver ki serten pwenn pou enteres bann adilt osi byen ki bann zenn.

Bann pasaz Labib in ganny mete alafen sak zistwar. Zot ganny ankouraze pour lir sa bann porsyon Labib lo ki sa bann zistwar i baze. Ler ou fini en zistwar, ou kapab osi revwar bann kestyon pour sa zistwar ki trouve apre Zistwar 116 e esey rapel larepons.

# KONTENI

## PARTI 1 KREASYON ZISKA DELIZ

- |                               |                            |
|-------------------------------|----------------------------|
| 1 Bondye ti kree bann Keksoz  | 6 En bon ek en move Garson |
| 2 En zoli Zarden              | 7 En Zonm brav             |
| 3 Adan ek Ev                  | 8 Bann Zean lo Later       |
| 4 Zot an deor Zarden          | 9 Noe ti konstri en Lars   |
| 5 En Lavi difisil ti konmanse | 10 Gran Deliz              |

## PARTI 2 DELIZ ZISKA DELIVRANS AN LEZIP

- |                                  |                                    |
|----------------------------------|------------------------------------|
| 11 Premye Larkansyel             | 23 Bann Rev Faraon                 |
| 12 Bann Zonm ti fer en Latour    | 24 Zozef ti teste son bann Frer    |
| 13 Abraam, Zanmi Bondye          | 25 Sa Fanmiy ti al Lezip           |
| 14 Lafwa Abraam ti ganny teste   | 26 Zob ti fidel avek Bondye        |
| 15 Madanm Lot ti get deryer      | 27 En move Lerwa ti pe domin Lezip |
| 16 Izaak ti ganny en Madanm      | 28 Konman ki Moiz ti ganny sove    |
| 17 De Zimo byen diferan          | 29 Akoz Moiz ti pe taye            |
| 18 Zakob ti al an Arann          | 30 Brousay ti pe brile             |
| 19 Gran Fanmiy Zakob             | 31 Moiz ek Aaron ti al vwar Faraon |
| 20 Dina ti dan Problemn          | 32 Sa dis Fleo                     |
| 21 Bann move Frer Zozef          | 33 Travers Lanmer Rouz             |
| 22 Zozef ti ganny met dan Prizon |                                    |

## PARTI 3 DELIVRANS AN LEZIP ZISKA

### PREMYE LERWA IZRAEL

- |                                 |                                  |
|---------------------------------|----------------------------------|
| 34 En nouvo Kalite Manze        | 37 En Latant kot pour adore      |
| 35 Zeova ti donn son bann Lalwa | 38 Sa douz Espyon                |
| 36 Bef annor                    | 39 Baton Aaron ti pous bann Fler |

- |    |                          |    |                               |
|----|--------------------------|----|-------------------------------|
| 40 | Moiz ti tap Ros          | 48 | Bann Gibeonnit ti malen       |
| 41 | Serpan an kwiv           | 49 | Soley pa ti bouze             |
| 42 | En Bourik ti koze        | 50 | De Madanm brav                |
| 43 | Zozye ti vin Sef         | 51 | Rit ek Naomi                  |
| 44 | Raab ti kasyet de Espyon | 52 | Gideonn ek son 300 Zonm       |
| 45 | Travers Larivyèr Zourden | 53 | Promes Yifta                  |
| 46 | Miray Zeriko             | 54 | Sa Zonm pli for               |
| 47 | En Voler an Izrael       | 55 | En pti Garson ti servi Bondye |

## **PARTI 4      PREMYE LERWA IZRAEL ZISKA**

### **LANPRIZONNMAN AN BABILONN**

- |    |                           |    |                                    |
|----|---------------------------|----|------------------------------------|
| 56 | Sail, premye Lerwa Izrael | 67 | Yeosafat ti met Konfyans dan Zeova |
| 57 | Bondye ti swazir David    | 68 | De Garson ki ti resisite           |
| 58 | David ek Golyat           | 69 | En pti Fiy ti ed en Zonm for       |
| 59 | Akoz David ti bezwen sove | 70 | Yona ek sa gro Pwason              |
| 60 | Abigail ek David          | 71 | Bondye in promet en Paradi         |
| 61 | David ti vin Lerwa        | 72 | Bondye ti ed Lerwa Izkiya          |
| 62 | Problenm dan Lakour David | 73 | Dernyen bon Lerwa Izrael           |
| 63 | Lerwa Salomon ti malen    | 74 | En Zonm ki pa ti per               |
| 64 | Salomon ti konstri Tanp   | 75 | Kat Garson an Babilonn             |
| 65 | Rwayonm ti divize         | 76 | Zerizalenm ti ganny detri          |
| 66 | Zezebel, en move Larenn   |    |                                    |

## **PARTI 5      LANPRIZONNMAN AN BABILONN ZISKA**

### **REKONSTRIKSYON MIRAY ZERIZALENM**

- |    |                            |    |                          |
|----|----------------------------|----|--------------------------|
| 77 | Zot pa ti oule salye       | 81 | Annan Konfyans dan Zeova |
| 78 | Lekritir lo Miray          | 82 | Mordekai ek Ester        |
| 79 | Danyel dan Trou Lyon       | 83 | Miray Zerizalenm         |
| 80 | Pep Bondye ti kit Babilonn |    |                          |



## PARTI 6 NESANS ZEZI ZISKA SON LANMOR

- |    |                                       |     |                                |
|----|---------------------------------------|-----|--------------------------------|
| 84 | En Lanz ti vizit Mari                 | 93  | Zezi ti nourri en Lafoul       |
| 85 | Zezi ti ne dan en Park Bef            | 94  | Zezi ti kontan bann pti Zanfan |
| 86 | Bann Zonm ti ganny gide par en Zetwal | 95  | Fason ki Zezi ti Ansennyen     |
| 87 | Zezi ti al dan Tanp                   | 96  | Zezi ti geri bann Malad        |
| 88 | Zan ti batiz Zezi                     | 97  | Zezi ti vin konman Lerwa       |
| 89 | Zezi ti pous zot dan Tanp             | 98  | Lo Montanny Zolivye            |
| 90 | Zezi avek en Madanm kot pwi           | 99  | Dan en Lasanm anler dan Letaz  |
| 91 | Zezi lo en Montanny                   | 100 | Zezi dan Zarden                |
| 92 | Zezi ti resisit bann Mor              | 101 | Zezi ti ganny touye            |

## PARTI 7 REZIREKSYON ZEZI ZISKA KI

### POL TI GANNY MET DAN PRIZON

- |     |                                       |     |                                |
|-----|---------------------------------------|-----|--------------------------------|
| 102 | Zezi ti vivan                         | 108 | Lo Semen ki al Damas           |
| 103 | Dan en Lasanm fermen                  | 109 | Pyer ti vizit Korney           |
| 104 | Zezi ti retourn dan Lesyel            | 110 | Timote, nouvo Zanmi Pol        |
| 105 | Bann Disip ti pe espere an Zerizalenm | 111 | En Garson ti ganny sonmey      |
| 106 | Zot ti ganny large dan Prizon         | 112 | Bato ti koule pros avek en Zil |
| 107 | Etyenn ti ganny saboule               | 113 | Pol an Ronm                    |

## PARTI 8 SA KI LABIB I DIR I VIN VRE

- |     |                          |     |  |
|-----|--------------------------|-----|--|
| 114 | Lafen tou move Keksoz    | 116 | Ki nou kapab fer pour viv pour touzour |
| 115 | En nouvo Paradi lo Later |     |  |

Kestyon pour letid  
dan *Mon liv zistwar Labib*

Bann kestyon pour sa 116 zistwar i alafen sa liv apre Zistwar 116.

## *Kreasyon ziska Deliz*

*Kote lesyel ek later i sorti? Konman ki soley, lalin ek bann zetwal, ek sa kantite keksoz ki lo later in egziste? Labib i donn vre larepons kan i dir ki zot ti ganny kree par Bondye. Alor nou liv i konmans avek bann zistwar Labib konsernan kreasyon.*

*Premye kreasyon Bondye ti bann personnaz envizib, zot ti en pe parey Bondye. Zot ti bann lanz. Me later ti ganny kree pour bann dimoun parey nou viv lo la. Bondye ti kree en msye ek en madanm, zot ti apel Adan ek Ev. I ti met zot dan en zoli zarden. Me zot ti dezobei Bondye e zot ti perdi sa drwa pour kontinyen viv.*

*An tou, depi kreasyon ziska sa gran deliz, ti annan 1,656 lannen. Pandan sa letan ti annan bokou move dimoun ki ti pe viv. Dan lesyel, ti annan sa bann personnaz envizib, Satan ek son bann move lanz. Lo later, ti annan Kaen ek en kantite lezot move dimoun, enkli bann zonm ki ti tre for. Me ti annan osi bann bon dimoun lo later—Abel, Enok ek Noe. Dan sa premye parti nou pou aprann en pe lo sa bann dimoun e sa ki zot ti fer.*

# BONDYE TI KREE BANN KEKSOZ

1

**T**OU bann bon keksoz ki nou annan ozordi i sorti kot Bondye. I'n kree soley pour donn nou lalimyer pandan lazournen, lalin ek bann zetwal pour ekler nou pandan lannwit, e later pour nou kapab viv lo la.

Me soley, lalin, bann zetwal ek later pa ti bann premye keksoz ki Bondye ti kree. Eski ou konnen ki Bondye ti kree premye? I ti kree bann personnaz envizib parey li. Nou pa kapab vwar zot, zis parey nou pa kapab vwar Bondye. Dan Labib sa bann personnaz i ganny apele bann lanz. Bondye ti kree zot pour viv avek li dan lesyel.

Sa premye lanz ki Bondye ti kree ti vreman spesyal. I ti premye Garson Bondye, e i ti travay avek son Papa. I ti ed Bondye pour fer tou lezot keksoz, konman soley, lalin, bann zetwal e osi nou later.

Me ki mannyer later ti ete? Okonmansman, personn pa ti kapab viv lo later akoz delo sale ti kouver later antye. Me Bondye ti oule ki dimoun i viv lo later. Alor i ti konmans prepar bann keksoz pour nou. Ki i ti fer?

Tou dabor, ti bezwen annan lalimyer lo later. Alor Bondye ti fer ki soley i eklere lo later. I ti fer li en fason pour ki i annan lizour ek lannwit. Apre sa, Bondye ti fer later mont parlao delo.

Okonmansman, ti napa nanryen lo later: ni fler, ni pye dibwa, ni zannimo, i ti parey sa portre ki ou vwar la. Ni menm pwason ti napa dan delo sale. Bondye ti annan ankor en kantite travay pour fer avan ki later ti vin en zoli landrwa pour bann zannimo ek dimoun viv lo la.

Zeremi 10:12; Kolosyen  
1:15-17; Zenez 1:1-10.






# EN ZOLI ZARDEN

2

**R**EGARD later aprezan! Tou keksoz i vreman zoli! Get bann zerb ek bann pye dibwa, bann fler ek bann zannimo. Eski ou vwar lelefan ek bann lyon?

Konman ki sa zarden manifik in aparet? Byen, annou vwar konman ki Bondye ti prepar later pour nou.

Premyerman, Bondye ti kree zerb ver pour kouver later. E i ti kree tou sort kalite pti plant, bann brousay ek bann pye




dibwa. Sa bann vezetasyon i pouse e ede pour fer nou later zoli. Me pa zis sa, serten i osi donn nou bann fri ek legim delisye.

Plitar Bondye ti kree pwason pour naz dan delo ek bann zwazo pour anvole dan lesyel. I ti kree lisyen, sat ek seval; bann gro zannimo ek bann pti zannimo. Ki zannimo ki viv dan ou vwazinaz? Pa nou vreman kontan ki Bondye in kree tou sa bann keksoz pour nou?

Finalman, Bondye ti fer en parti later vin en landrwa tre spesyal. I ti apel sa landrwa zarden Edenn. Ti en landrwa vreman merveye, tou keksoz ti manifik. Bondye ti oule ki later antye i vin parey sa zoli zarden.

Me get ankor enn fwa portre sa zarden. Bondye ti vwar ki i mank en keksoz dan sa zarden. Eski ou konnen kwa? Annou vwar.

Zenez 1:11-25; 2:8, 9.



**K**I OU vwar aprezan dan sa portre? Nou vwar dimoun dan sa zarden. Sa i premye zonn ek premye madanm. Lekel ki'n kree zot? Se Bondye. Eski ou konnen konman Bondye i apele? I apel Zeova. Sa zonn ti ganny apele Adan e sa madanm Ev.

Vwala konman Zeova ti kree Adan. I ti pran en pe lapousyèr dan later e i ti form en lekor perfe, lekor en zonn. Apre i ti soufle dan nennen sa zonn, e Adan ti vin vivan.

Zeova ti donn Adan en louvraz. I ti dir li donn sak diferan zannimo en non. I tre probab ki Adan ti obzerv sa bann zannimo pour en bon pe letan avan ki i ti donn zot en non apropiye. Letan i ti pe donn bann zannimo zot non, Adan ti remark en keksoz. Eski ou konnen kwa?

I ti remarke ki tou sa bann zannimo ti annan en konpany. Ti annan papa



lelefan ek manman lelefan, papa lyon ek manman lyon. Me li, Adan, i ti tousel. Alor Zeova ti andormi Adan, e i ti pran enn son kot. Avek sa kot, Zeova ti kree en madanm pour Adan, e i ti vin son madanm.

Adan ti vreman kontan. Ev ti vreman kontan pour viv dan sa zoli zarden. Aprezan zot ti kapab annan zanfan e viv ere ansanm.

Zeova ti anv i ki Adan ek Ev i viv pour touzour. I ti anv i ki zot fer later antye vin en zoli paradi parey zarden Edenn. Adan ek Ev ti vreman kontan letan zot ti aprann sa. Eski ou ti pou'n kontan pour ede fer later vin en zoli zarden? Me zot lazwa pa ti dire. Annou vwar akoz.

Psonm 83:18; Zenez 1:26-31; 2:7-25.







**A**NNOU vwar ki ti arive aprezan. Adan ek Ev i ganny retire dan sa zoli zarden. Ou konnen akoz?

Akoz zot ti'n fer en keksoz ki ti tre mal. Alor Zeova pe pini zot. Eski ou konnen kwa sa keksoz mal ki zot ti fer?

Zot ti fer en keksoz ki Bondye ti dir zot pa fer. Bondye ti permet zot pour manz fri tou pye dibwa dan zarden. Me ti annan en sel pye dibwa ki zot pa ti kapab kas son fri. Si zot ti manz son fri zot ti pou mor. Bondye ti rezerv sa pye dibwa pour li. Nou konnen ki i mal pour pran en keksoz ki pa pour nou. Me ki ti arive?

En zour Ev ti li tousel dan Zarden. Ou konnen ki ti arive, en serpan ti koz avek li. I ti dir li manz fri dan sa pye dibwa ki Bondye ti dir zot pa manze. Kan Zeova ti kree serpan, i pa ti kree zot avek abilite pour koze. Alor ti bezwen annan en lot dimoun ki ti pe fer sa serpan koze. Lekel?

Pa ti Adan. Donk, ti bezwen enn parmi sa bann personnaz ki Bondye ti kree byen lontan avan ki i ti kree later. Sa se bann lanz, nou pa kapab vwar zot. Enn parmi sa bann lanz ti vin fyer. I ti panse ki i devret vin en sef parey Bondye. I ti oule ki dimoun i obei li plito ki obei Zeova. Se li ki ti fer sa serpan koze.

Sa lanz ti reisi tronp Ev. I ti asir li ki si i manz sa fri i pou vin parey Bondye. Ev ti krwar li. Alor i ti manze, e Adan osi. Alor Bondye ti retir zot dan sa zoli zarden akoz zot ti'n dezobei li.

Me en zour, Bondye pou fer later antye vin zoli parey zarden Edenn. Plitar ou pou aprann konman ou kapab ede pour fer later vin zoli. Me aprezan, annou vwar ki ti arive avek Adan ek Ev.

# EN LAVI DIFISIL TI KONMANSE

5

**A**N DEOR zarden Edenn, Adan ek Ev ti rankontre bokou difikilte. Zot ti bezwen travay dir pour ganny zot manze. Olye viv dan en zarden avek bann pye fri delisyè, zot ti vwar otour zot bann move zerb ek bann touf pikan. Se sa ki ti arive kan zot ti dezobei Bondye. Zot ti nepli Son zanmi.

Pli grav ankor, zot ti konmans mor. Bondye ti averti zot ki zot ti pou mor si zot manz fri



dan en serten pye dibwa. Alor, menm zour ki zot ti manze zot ti konmans mor. Konman zot ti bet pour pa ekout Bondye!

Tou zot zanfan ti ne apre ki Bondye ti'n retir zot dan zarden Edenn. Alor zot zanfan osi ti pou vin vye e mor.

Zot ti pou viv ere si selman zot ti'n obei Bondye. Zot tou zot ti pou kapab rezwir boner lavi pour touzour lo later. Personn pa ti pou bezwen tonm malad, vin vye e mor.




Bondye i anvi ki tou dimoun i viv pour touzour dan lazwa, e l'n promet ki en zour zot pou viv pour touzour. Later antye pou vin en paradi e tou dimoun pou an bonn sante. Tou dimoun pou zanmi avek kanmarad e zot pou osi zanmi avek Bondye.

Me Ev ti nepli zanmi Bondye. Kan i ti donn nesans son zanfan i ti ganny bokou douler. Son dezobeisans anver Bondye in koz li bokou soufrans, pa i vre?

Adan ek Ev ti annan en kantite fiy ek garson. Kan zot premye garson ti ne, zot ti apel li Kaen e zot dezyenm garson ti apel Abel. Eski ou konnen ki ti arive avek zot?

Zenez 3:16-23; 4:1, 2; Revelasyon 21:3, 4.




**R**EGARD Kaen ek Abel aprezan. Zot in gran. Kaen in vin en fermye. I plant bann sereal, bann fri ek bann legim.

Abel in vin en gardyen mouton. I kontan pran swen avek bann zenn pti mouton. Zot grandi e vin bann gro mouton, alor dan en pti lespas letan Abel i annan en gran troupo mouton pour veye.

En zour Kaen ek Abel ti anmenn en kado pour Bondye. Kaen ti anmenn serten bann keksoz ki i ti plante, e Abel ti anmenn bann meyer mouton ki i ti annan. Zeova ti dakor avek Abel ek son kado, me i pa ti dakor avek Kaen ek son kado. Eski ou konnen akoz?


I pa ti akoz kado  
Abel ti pli meyer ki  
pour Kaen. Se akoz



Abel ti en bon dimoun. I ti kontan Zeova ek son frer. Me Kaen ti en move dimoun; i pa ti kontan son frer.

Bondye ti demann Kaen pour sanz son fason azir. Kaen pa ti ekout Bondye. I ti vreman ankoler aköz Bondye ti prefer Abel. Alor Kaen ti dir avek Abel: 'Annou al dan laplenn.' Kan zot ti tousel dan laplenn i ti tap son frer britalman e i ti mor. Eski sa pa i en keksoz terib pour Kaen fer?

Menm si Abel in mor, Bondye i touzour mazin li. Abel ti en bon dimoun, e Zeova pa zanmen oubliy bann dimoun parey li. En zour Zeova pou fer Abel reviv ankor. Kan i pou reviv, i pa pou bezwen mor ankor, i pou kapab viv pour touzour lo later. Eski pa i pou gou pour konn bann dimoun parey Abel?



Me Bondye pa kontan bann dimoun parey Kaen. Apre ki i ti'n touy son frer, Bondye ti pini li par anvoy li lwen avek son fanmiy. Kan i ti ale, i ti pran enn parmi son bann ser, e fer li vin son madanm.

Apre Kaen ek son madanm ti konmans annan zanfan. Lezot fiy ek garson Adan ek Ev ti marye, e zot osi zot ti annan zanfan. Apre sa, later ti konmans ranpli avek dimoun. Annou vwar en pe lo serten sa bann dimoun.

Zenez 4:2-26; 1 Zan 3:11, 12; Zan 11:25.

**D**IMOUN ti konmans miltipliye lo later, laplipar zot ti fer bann move keksoz parey Kaen. Me, ti annan en zonm ki pa ti fer parey lezot. I ti apel Enok. I ti en zonm brav. Memm si otour li dimoun ti pe fer bann move keksoz, Enok ti kontinyen servi Zeova.

Eski ou konnen akoz sa bann dimoun ti fer bann move keksoz? Byen, mazine lekel ki ti fer Adan ek Ev dezobei Bondye e manz sa fri ki Bondye ti dir zot pa bezwen manze? Wi, ti en move lanz. Labib i apel li Satan. I pe esey fer tou dimoun vin move.

En zour, Zeova ti fer Enok anons bann dimoun en keksoz ki zot pa ti anvi tande. Enok ti dir zot: 'En zour Bondye pou detri tou bann move dimoun.' Petet bann dimoun ti tre ankoler pour antann





sa. Petet zot ti menm esey touy Enok. Alor Enok ti bezwen byen brav pour averti bann dimoun konsernan sa ki Bondye pou fer.

Bondye pa ti permet Enok viv pour bokou letan parmi sa bann move dimoun. I ti viv pour selman 365 an. Akoz nou dir “selman 365 an”?

Akoz pandan sa letan dimoun ti bokou pli for ki konmela e zot ti viv pour bokou letan. Metouse la, garson Enok, ti viv pour 969 an!

Kan Enok ti mor, bann dimoun ti vin deplizanpli move. Labib i dir ki ‘zot ti touzour pe pans bann keksoz ki mal,’ e ki ‘later ti

ranpli avek vyolans.’

Eski ou konn en rezon akoz ti annan sitan bokou vyolans lo later. Akoz Satan ti annan en nouvo fason pour fer dimoun fer bann keksoz mal. Nou pou aprann en pe lo la dan sa lot zistwar ki swiv.

Zenez 5:21-24, 27; 6:5;  
Ebre 11:5; Zid 14, 15.





**S**I OU vwar en dimoun pe marse pour vin kot ou, i gran i kapab tous plafon ou lakaz, ki ou ti pou mazine? Sa dimoun i en zean! Pandan en letan ti annan zean lo later. Labib i montre ki zot papa ti bann lanz. Me konman ki sa ti posib?

Mazine, sa move lanz Satan ti touzour pe kree problemm. I ti menm esey fer bann lanz Bondye vin move. Avek letan, serten sa bann lanz ti konmans ekout Satan. Zot ti aret sa travay ki Bondye ti'n donn zot dan lesyel. Zot ti vin lo later, e zot ti sanz zot dan bann lekor imen. Eski ou konnen akoz?

Labib i dir ki bann garson Bondye ti vwar bann zoli fiy lo later e zot ti anvi viv avek zot. Alor zot ti vin lo later e marye avek sa bann fiy. Labib i dir ki sa ti mal, akoz Bondye ti'n kree bann lanz pour viv dan lesyel.

Kan sa bann lanz ek zot madanm ti ganny bann pti baba, sa bann pti baba ti diferan. Okonmansman, zot pa ti paret tro diferan avek lezot pti baba. Me anmezir ki zot ti grandi zot ti vin gro e for, ziska ki zot ti vin bann zean.

Sa bann zean ti move. E akoz zot ti gro e for, zot ti fer ditor bann dimoun. Zot ti esey fors tou dimoun pour vin move parey zot.

Enok ti'n mor, me aprezan ti annan en zonm lo later ki ti fer sa ki byen. I ti apel Noe. I ti toultan fer sa ki Bondye ti oule i fer.

En zour Bondye ti dir Noe ki letan in arive pour Li detrir tou bann move dimoun. Me Bondye ti pou sov Noe, son fanmiy ek en kantite zannimo. Annou vwar konman Bondye ti fer sa.





**N**OE ti annan en madanm ek trwa garson. Son bann garson ti apel Sem, Kam ek Zafet. Sakenn sa bann garson ti annan en madanm. Alor ti annan 8 dimoun dan fanmiy Noe.

Aprezan Bondye ti fer Noe fer en keksoz drol. I ti dir li konstri en gran lars. Sa lars ti gran parey en bato, me i ti parey en gro bwat. Bondye ti demann Noe pour fer li an trwa letaz avek bann lasanm. Sa bann lasanm ti pour Noe ek son fanmiy, pour bann zannimo, e pour met manze ki zot ti pou servi.

Bondye ti dir Noe aranz sa lars byen afen ki delo pa pou kapab antre. Bondye ti dir: ‘Mon pe al anmenn en gran deliz e detri lemonn antye. Tou bann ki pa dan lars pou mor.’

Noe ek son bann garson ti obeir Zeova e zot ti konmans konstri lars. Me lezot dimoun ti zis riye. Zot ti kontinyen fer move. Personn pa ti krwar Noe kan i ti dir zot sa ki Bondye ti pe al fer.





Ti pran bokou letan pour konstri lars akoz i ti sitan gro. Me finalman, apre plizyer lannen, i ti fini. Aprezan Bondye ti demann Noe pour anmenn bann zannimo dan lars. Serten kalite zannimo Bondye ti demann Noe pour anmenn de dan sak, en mal ek en femel. Me lezot kalite, Bondye ti demann Noe pour anmenn set. Bondye ti osi demann Noe pour anmenn tou sort kalite zwazo. Noe ti fer egzaktman sa ki Bondye ti dir li.

Apre sa, Noe ek son fanmiy ti antre dan lars. Bondye ti ferm laport. Anndan, Noe ek son fanmiy ti espere. Mazin ou dan lars avek zot, pe espere. Eski pou vreman annan en deliz parey Bondye ti'n dir?

Zenez 6:9-22; 7:1-9.

**A**N DEOR lars, dimoun ti kontinyen viv parey avan. Zot pa ti oule krwar ki deliz ti pou arive. Petet zot ti riy plis ki avan. Me byento zot ti pou aret riye.

Toudenkou lapli ti konmans tonbe. Lapli ti tonbe sorti dan lesyel parey ler ou pe vid delo ki dan en seo. Noe ti'n byen dir! Me ti'n tro tar aprezan pour okenn dimoun antre dan lars. Zeova ti'n fini ferm laport byen sere.

En pti moman, bann landrwa pli ba lo later antye ti'n kouver. Delo ti'n vin parey bann gro larivyer. I ti zet bann pye dibwa e roul bann gro ros, e i ti fer en ta tapaz. Bann dimoun ti per. Zot



ti grenp pli o. Zot ti regrete ki zot pa ti'n ekout Noe e antre dan lars kan laport ti ankor ouver. Me aprezan ti'n tro tar.

Delo ti kontinyen monte, monte. Pour 40 zour ek 40 lannwit lapli ti tonbe. Delo ti antour bann montanny e monte ziska ki bann pli o montanny ti kouver. Parey Bondye ti'n dir, tou dimoun ek zannimo ki ti an deor lars ti mor. Me bann ki ti dan lars ti sen e sof.

Noe ek son bann garson ti'n fer en bon travay par konstri sa lars. Delo ti lev li anler, e i ti flote parlao delo. Apre sa, en zour, apre ki lapli ti aret tonbe, soley ti konmans tape. Ti en spektak manifik! Delo ti kouver later antye. Zis lars ki ti pe flote parlao delo.





Bann zean ti'n disparet. Zot ti nepli la pour fer ditor bann dimoun. Zot tou zot ti'n mor, ansanm avek zot manman ek larestan bann move dimoun. Me ki ti arive avek zot papa?

Zot papa pa ti vreman imen parey nou. Zot ti bann lanz ki ti'n vin lo later pour viv parey imen. Alor kan deliz ti arive, zot pa ti mor avek larestan bann dimoun. Zot ti aret servi sa lekor imen ki zot ti'n fer, e zot ti retourn dan lesyel konman bann lanz. Me zot pa ti ganny permet pour form parti fanmiy bann lanz Bondye. Alor zot ti vin bann lanz Satan. Dan Labib zot ganny apele bann demon.

Aprezan Bondye ti fer en divan soufle, e delo ti konmans desann. Senk mwan plitar lars ti repoz anler lo en montanny. Plizyer zour ti pase, e bann ki ti dan lars ti kapab get deor e vwar latet montanny. Delo ti kontinyen desann.

Apré sa Noe ti larg en zwazo nwar ki apel korbo an deor lars. I ti anvole pour en pe letan e apre i ti retournen, aköz i pa ti kapab trouv en bon landrwa pour apoze. I ti kontinyen fer sa e sak fwa i ti retournen, i ti apoz lo lars.

Noe ti anvi konnen si delo in sek lo later, alor i ti larg en pizon. Me sa pizon osi ti retournen aköz i pa ti kapab trouv en landrwa pour apoze. Noe ti larg li pour en dezyenm fwa, e i ti anmenn en fey dan son labek. Alor Noe ti konnen ki delo ti'n konmans sek. Noe ti larg sa pizon pour en trwazyenm fwa, e finalman i ti trouv en landrwa sek pour apoze.

Aprezan Bondye ti koz avek Noe. I ti dir: 'Sorti dan lars. Pran ou fanmiy antye ek bann zannimo avek ou.' Zot ti'n reste dan lars pour plis ki en lannen antye. Alor nou kapab mazine konman zot ti vreman kontan pour kapab al deor ankör e kontan ki zot ti vivan!

## *Deliz ziska Delivrans an Lezip*

*Ti annan selman wit dimoun ki ti sirviv Deliz, me avek letan zot ti ogmante pour vin en kantite. Abraam ti ne 352 an apre Deliz. Nou pou aprann konman ki Bondye ti gard son promes par donn Abraam en garson ki ti apel Izaak. Apre, se Zakob enn ant sa de garson Izaak ki ti ganny swazir par Bondye.*

*Zakob ti annan 12 garson ek detrwa fiy. Dis son bann garson pa ti kontan zot pti frer Zozef. Zot ti vann li konman en lesklav an Lezip. Plitar, Zozef ti vin en sef tre enportan Lezip. Kan en lafamin tre dir ti arive, Zozef ti teste son bann frer pour vwar si zot leker ti'n sanze. Finalman, fanmiy antye Zakob ki ti bann Izraelit, ti vin reste Lezip. Sa ti arive 290 an apre ki Abraam ti ne.*


*Pour sa prosen 215 lannen bann Izraelit ti viv Lezip. Apre ki Zozef ti mor zot ti vin lesklav laba. Apre, Moiz ti ne e Bondye ti servi li pour sov bann Izraelit an Lezip. Dan sa dezyenm parti nou pou vwar listwar pour 857 lannen.*



**E**SKI ou konn sa premye keksoz ki Noe ti fer apre ki li ek son fanmiy ti'n sorti dan lars? I ti ofer Bondye en kado. Ou kapab vwar li pe fer sa dan sa portre la anba. Noe ti ofer Bondye bann zannimo pour remersye Li pour sov lavi son fanmiy dan sa gran deliz.

Eski ou krwar ki Zeova ti kontan sa kado? Wi, i ti kontan. Alor i ti promet Noe ki i pa pou zanmen detrir lemond ankore par en deliz.

Later pa ti tarde pour sek. Noe ek son fanmiy ti konmans en nouvo lavi an deor lars. Bondye ti beni zot e dir zot: 'Zot bezwen ganny bokou zanfan. Zot devret vin bokou ziska ki dimoun i ranpli later antye.'





Me plitar, kan dimoun ti pou tann koz lo sa gran deliz, zot ti pou kapab per ki en lot deliz parey sa enn i ariv ankor. Alor Bondye ti donn bann dimoun en siny ki i pa pou zanmen anmenn deliz lo later ankor. Eski ou konnen kwa sa siny? Ti en larkansyel.

Souvan-d-fwa, ou kapab vwar en larkansyel dan lesyel kan soley i tape apre ki lapli in tonbe. En larkansyel i annan diferan zoli kouler. Eski ou'n deza vwar enn? Eski ou vwar sa enn dan sa portre?

Sa i sa ki Bondye ti dir: 'Mon promet ki zanmen ankor dimoun ek bann zannimo pou ganny detri par en deliz. Mon pe met mon larkansyel dan nyaz. E kan sa larkansyel i aparet, mon pou vwar li e rapel mon promes.'

Alor kan ou vwar en larkansyel, ki i devret rapel ou? Wi, promes Bondye ki i pa pou zanmen detrir lemonn ankor par en gran deliz.

Zenez 8:18-22; 9:9-17.

# BANN ZONM TI FER EN LATOUR


12

**P**LIZYER lannen in pase. Bann garson Noe ti annan en kantite zanfan. E zot bann zanfan in grandi e annan plis zanfan. Alor pa ti pran bokou letan pour annan bokou dimoun lo later.

Enn sa bann dimoun ti en aryer pti zanfan Noe ki ti apel Nimrod. I ti en move dimoun, i ti sas e touy bann zannimo ensi ki zonm. Nimrod ti osi fer li vin lerwa pour li domin lo lezot dimoun. Bondye pa ti kontan Nimrod.

Dan sa letan tou dimoun ti koz menm langaz. Nimrod ti anvi gard tou dimoun ansanm afen ki i kapab domin zot. Eski ou konnen ki i ti fer? I ti demann bann dimoun pour konstri en lavil ek en gran latour ladan. Get zot dan sa portre pe fer blok.


Zeova pa ti dakor avek sa konstriksyon. I ti oule ki dimoun i fannen e viv partou lo later. Me bann dimoun ti dir: ‘Vini! Annou konstri en lavil ek en latour si gran ki son bout anler pou tous lesyel. Apre nou a vin popiler!’ Sa bann dimoun ti oule loner pour zot menm, pa pour Bondye.



Alor Bondye ti fer sa bann dimoun aret konstri sa latour. Eski ou konnen konman i ti fer sa? Par fer bann dimoun koz diferan langaz, olye ki zis enn. Zot ti nepli konpran kanmarad. Se pour sa ki zot lavil ti ganny apele Babel, oubyen Babilonn, ki vedir “Konfizyon.”

Aprezan bann dimoun ti konmans kit Babel. Bann group dimoun ki ti koz menm langaz ti al viv ansanm dan lezot parti later.

Zenez 10:1, 8-10; 11:1-9.





**E**NN bann landrwa kot bann dimoun ti al viv apre deliz ti apel Our. Our ti vin en lavil enportan kot ti annan bann zoli lakaz. Me bann dimoun laba ti ador bann fo bondye. Zot ti fer menm keksoz ki zot ti fer an Babel. Bann dimoun ki ti reste Our ek Babel pa ti parey Noe ek son Garson Sem, ki ti kontinyen servi Zeova.

Finalman, 350 an apre deliz, Noe sa zonn fidel ti mor. Zis de an plitar, sa zonn ki ou vwar dan sa portre ti ne. I ti en dimoun vremen spesyal pour Bondye. I ti apel Abraam. I ti viv avek son fanmiy dan sa lavil Our.

En zour Zeova ti dir Abraam: ‘Kit Our ek ou fanmiy, e al dan en pei ki mon pou montre ou.’ Eski Abraam ti obeir Bondye e kit deryer tou sa bann bon keksoz Our? Wi, i ti fer li. Se akòz Abraam ti toultan obeir Bondye ki i ti ganny rekonnèt konman zanmi Bondye.

Serten son bann fanmiy ti al avek li kan i ti kit Our. Parmi bann ki ti ale ti son papa Tera, son neve Lot, ek son madanm Sara. Apre en gran vwayaz zot ti ariv dan en lavil ki ti apel Arann. Tera ti mor an Arann. Zot ti lwen avek Our.

Apre en sertèn letan Abraam ek son fanmiy ti kit Arann e al dan en pei ki ti apel Kanaan. La Zeova ti dir: ‘Sa i sa pei ki mon pou donn ou bann zanfan.’ Abraam ti reste an Kanaan e viv dan latant.

Avek led Bondye Abraam ti annan bann gran troupo mouton ek lezot zannimo ek en kantite serviter. Me li ek Sara ti napa okenn zanfan pour zot menm.

Kan Abraam ti ganny 99 an, Zeova ti dir: ‘Mon promet ki ou pou vin papa bokou nasyon.’ Me konman ki sa ti pou kapab arive, lefe ki Abraam ek Sara ti’n tro vye pour annan zanfan?

# LAFWA ABRAAM TI GANNY TESTE

**E**SKI ou vwar ki Abraam pe fer la? I annan en kouto dan son lanmen, e i paret ki i pe al touy son garson. Me akoz i pou fer sa? Premyerman, annou vwar konman ki Abraam ek Sara ti ganny zot garson.

Mazinen ki Bondye ti promet zot ki zot pou ganny en garson. Me sa ti paret enposib, akoz Abraam ek Sara ti vreman vye. Toutfwa, Abraam ti krwar ki Bondye i kapab fer sa ki paret enposib. Alor ki ti arive?

En lannen antye ti'n pase apre ki Bondye ti'n fer son promes. Apre, kan Abraam ti annan 100 an e Sara 90 an, zot ti ganny en pti baba, ki ti apel Izaak. Bondye ti'n gard son promes!

Me kan Izaak ti grandir, Zeova ti teste lafwa Abraam. I ti apel li an dizan: 'Abraam!' E Abraam ti reponn: 'La mon la!' Apre sa Bondye ti dir: 'Pran ou garson, ou sel garson, Izaak, e al lo en montanny ki mon pou montre ou. Laba touy ou garson e ofer li konman en sakrifis.'

Konman sa bann parol ti fer Abraam tris, akoz Abraam ti kontan son garson bokou. Mazinen, Bondye ti'n promet ki bann zanfan Abraam ti pou viv an Kanaan. Me konman ki sa ti pou arive si Izaak ti mor? Abraam pa ti konpran, me i ti kontinyen obeir Bondye.

Kan i ti ariv lo montanny, Abraam ti anmar Izaak e met li lo en lotel ki i ti'n konstri. Apre i ti pran son kouto pour touy son garson. Me sa menm moman lanz Bondye ti apel li an dizan: 'Abraam, Abraam!' E i ti reponn: 'La mon la!'

'Pa fer ditor sa garson, les li,' Bondye ti dir. 'Aprezan mon konnen ki ou annan lafwa dan mwan, akoz ou pa'n refiz mwan ou garson, ou sel garson.'

Pa Abraam ti annan en gran lafwa dan Bondye! I ti konnen ki napa nanryen ki enposib pour Zeova, e ki Zeova i menm kapab lev Izaak dan lanmor. Me Bondye pa ti vreman anvi ki Abraam i touy Izaak. Alor

Bondye ti fer en mouton pri lanmenm la obor dan brousay, e i ti demann Abraam pour sakrifye sa mouton dan plas son garson.

Zenez 21:1-7; 22:1-18.





# MADANM LOT TI GET DERYER 15

**L**OT ek son fanmiy ti viv ansanm avek Abraam an Kanaan. En zour Abraam ti dir avek Lot: ‘Napa ase later isi pour tou nou bann zannimo. Silvouple, annou separe. Si ou al en direksyon, alor mon pou al lot direksyon.’

Lot ti get sa pei. I ti vwar en zoli landrwa ki ti annan delo ek en kantite zerb ki ti bon pour son bann zannimo. Sa ti Distrik Zourden. Alor Lot ti al reste laba avek son fanmiy ek son bann zannimo. Zot ti finalman reste dan lavil Sodonm.

Bann dimoun an Sodonm ti tre move. Sa ti trakas Lot, akoz i ti en bon dimoun. Bondye osi ti dezapwente. Finalman, Bondye



ti anvoy de lanz pour enform Lot ki i ti pe al detri Sodonm ek sa lavil ki ti obor li, Gomor, akoz zot ti move.

Bann lanz ti dir Lot: ‘Degaze! Pran ou madanm ek ou de fiy e sorti dan sa landrwa!’ Lot ek son fanmiy ti en pe tarde pour sorti, alor bann lanz ti atrap zot lanmen e diriz zot an deor sa lavil. Apre, enn ant sa de lanz ti dir: ‘Taye e sov zot lavi! Pa get deryer. Taye ziska kot montanny, afen ki zot pa ganny touye.’

Lot ek son de fiy ti obeir e zot ti tay lwen avek Sodonm. Zot pa ti arete pour en moman, ni menm get deryer. Me madanm Lot ti dezobei. Apre ki zot ti’n ariv en serten distans avek Sodonm, i ti arete e get deryer. Alor madanm Lot ti vin en pilye disel. Eski ou vwar li dan sa portre?


Nou kapab aprann en bon leson dan sa zistwar. I montre nou ki Bondye i sov bann ki obeir li, me bann ki pa obeir li pou perdi zot lavi.

Zenez 13:5-13; 18:20-33; 19:1-29; Lik 17:28-32; 2 Pyer 2:6-8.



**E**SKI ou konnen lekel sa madanm ki la dan sa portre? I apel Rebeka. E sa zonn ki pe vin rankontre li i apel Izaak. Rebeka pe vin madanm Izaak. Konman ki sa ti arive?

Byen, Papa Izaak, Abraam, ti oule en bon madanm pour son garson. I pa ti oule ki Izaak i marye avek en madanm an Kanaan, akòz sa bann dimoun ti ador bann fo bondye. Alor Abraam ti apel



son serviter e dir: ‘Retourn dan sa lavil kot mon bann fanmiy i reste, an Arann, e swazir en madanm pour mon garson Izaak.’

Toudswit serviter Abraam ti pran dis samo e fer sa gran vwayaz. Kan i ti ariv pre avek sa landrwa kot bann fanmiy Abraam ti reste, i ti aret kot en pwi. Ti tar dan apremidi, ler kot bann madanm dan sa lavil ti pou vin sers delo dan sa pwi. Alor serviter Abraam ti fer en lapriyer avek Zeova: ‘Sa madanm ki tir en pe delo pour mwan ek bann samo i sa enn ki ou swazir pour vin madanm Izaak.’

En pti moman apre, Rebeka ti vin sers delo. Kan sa serviter ti demann li en pe delo pour bwar, i ti donn li. Bann samo osi ti swaf e Rebeka ti al donn zot osi en pe delo pour bwar. Sa ti en travay dir akoz bann samo i bwar en kantite delo.

Kan Rebeka ti fini fer sa, serviter Abraam ti demann li konman ki son papa i apele. I ti osi demann li si i kapab pas lannwit kot zot. Rebeka ti dir: ‘Mon papa i apel Betouel, e i annan lasanm pour ou reste avek nou.’ Serviter Abraam ti konnen ki Betouel ti garson Naor, frer Abraam. I ti azenou e remersye Zeova pour gid li kot fanmiy Abraam.

Sa zour swar serviter Abraam ti rakont Betouel ek frer Rebeka Labann akoz ki i ti’n vin la. Zot tou le de zot ti dakor ki Rebeka i al avek li e marye avek Izaak. Ki Rebeka ti dir kan i ti ganny demande pour ale? I ti dir, ‘Wi,’ i oule ale. Alor son lannmen, zot ti mont lo samo e konmans sa gran vwayaz pour retourn an Kanaan.

Kan zot ti arive, ti’n konmans fernwar. Rebeka ti vwar en msye pe marse dan laplenn. Ti Izaak. I ti byen kontan pour vwar Rebeka. Son manman Sara ti’n mor trwa an pase, e i ti ankor dan sagren. Me aprezan Izaak ti kontan Rebeka bokou, e i ti vin ere ankor.

**S**A DE garson ki ou vwar dan sa portre zot tre diferan, pa i vre? Eski ou konn zot non? Sa enn ki en saser i apel Ezai, e sa enn ki pe pran swen avek bann mouton i apel Zakob.

Ezai ek Zakob ti de garson zimo Izaak ek Rebeka. Izaak ti kontan Ezai en kantite, akoz i ti en bon saser e i ti anmenn manze kot lakour pour son fanmiy. Me Rebeka ti kontan Zakob plis, akoz i ti en garson trankil e pezib.

Zot granpapa Abraam ti ankor vivan, e zis mazine konman ki Zakob ti kontan ekout li koz lo Zeova. Finalman, Abraam ti mor alaz 175 an kan sa de zimo ti annan 15 an.

Kan Ezai ti annan 40 an i ti marye avek de madanm an Kanaan. Sa ti fer Izaak ek Rebeka vreman tris, akoz sa de madanm pa ti ador Zeova.

En zour, en keksoz ti arive ki ti fer Ezai tre ankoler avek son




frer Zakob. Ti'n ariv ler pour Izaak beni son premye garson. Lefe ki Ezai ti pli vye ki Zakob, se li ki devret resevwar sa benediksyon. Me pli boner i ti'n vann son drwa pour resevwar sa benediksyon avek Zakob. Deplis, kan sa de garson ti ne Bondye ti dir ki Zakob pou resevwar sa benediksyon. E se sa ki ti arive, Izaak ti beni son garson Zakob.

Plitar, kan Ezai ti aprann sa i ti ankoler avek Zakob. I ti sitan ankoler ki i ti dir ki i pou touy Zakob. Kan Rebeka ti antann sa, i ti tre enkyet. Alor i ti dir avek son msye Izaak: 'I pou vreman terib si Zakob osi i marye avek enn sa bann fiy an Kanaan.'

Alor Izaak ti apel son garson e dir li: 'Pa marye avek en fiy an Kanaan. Plito al kot ou granpapa Betouel an Arann. Marye avek enn bann fiy son garson Labann.'

Zakob ti ekout son papa, e toudswit i ti konmans fer sa gran vwayaz pour al kot son bann fanmiy ki reste an Arann.

Zenez 25:5-11, 20-34; 26:34, 35;  
27:1-46; 28:1-5; Ebre 12:16, 17.



**E**SKI ou konnen lekel sa bann zonn ki Zakob pe koz avek? Apre ki i ti'n vwayaz pour plizyer zour, Zakob ti rankontre zot kot en pwi. Zot ti pe pran swen avek zot bann mouton. Zakob ti demann zot: 'Kote zot sorti?'

Zot ti reponn: 'An Arann.'

'Zot konn Labann?' Zakob ti demande.

'Wi,' zot ti reponn. 'Zisteman, la son fiy Rassel pe vini avek son troupo mouton.' Eski ou vwar Rassel pe vini dan lwen?

Kan Zakob ti vwar Rassel avek bann mouton son tonton Labann, i ti ale e roul sa ros ki ti lo sa pwi afen ki bann mouton i kapab bwar delo. Apre Zakob ti anbras Rassel e i ti dir li lekel li. Rassel ti vreman eksite, i ti al kot li e rakont son papa Labann.


Labann ti byen kontan pour Zakob reste avek li. Kan Zakob ti demande pour marye avek Rassel, Labann ti kontan. Me i ti demann Zakob pour



travay pour li set an pour ganny Rassel. Akoz i ti telman kontan Rassel, Zakob ti travay. Eski ou konnen ki ti arive kan ti'n ariv ler pour zot marye?

Labann ti donn li son premye fiy Lea olye Rassel. Kan Zakob ti dakor pour travay ankor set an pour li, Labann ti donn li Rassel osi konman son madanm. Dan sa letan Bondye ti permet bann msye pour annan plis ki en madanm. Me aprezan, parey Labib i montre en msye i devret annan en sel madanm.

Zenez 29:1-30.







**G**ET sa gran fanmiy. Sa i sa 12 garson Zakob, e i annan bann fiy osi. Eski ou konn non enn sa bann zanfan? Annou aprann en pe lo serten parmi zot.

Lea ti ganny kat garson, zot ti apel Ribenn, Simeon, Levi ek Zida. Kan Rasel ti vwar ki i ti napa okenn zanfan i ti vreman tris. Alor i ti donn Zakob son servant Bila, e Bila ti ganny de garson ki ti apel Dann ek Naftali. Apre sa Lea osi ti donn Zakob son servant Zilpa, e Zilpa ti ganny de garson Gad ek Aser. Finalman Lea ti ganny ankor de garson ki ti apel Isakar ek Zeboulonn.

Anfen Rasel ti kapab ganny en zanfan. I ti apel li Zozef. Plitar nou pou aprann en kantite keksoz lo Zozef, akoz i ti vin en dimoun tre enportan. Sa ti sa 11 garson ki Zakob ti gannyen kan i ti pe viv avek Labann papa Rasel.

Zakob ti annan bann fiy osi, me Labib i mansyonn non zis enn. Son non ti Dina.

En zour Zakob ti deside pour kit Labann e retourn an Kanaan. Alor i ti rasanble ansanm son gran fanmiy ek tou son bann zannimo, troupo mouton ek bef, e i ti konmans en gran vwayaz.

En pe letan, apre ki Zakob ek son fanmiy ti'n retourn an Kanaan, Rasel ti ganny en lot garson. Sa ti arive kan zot ti pe vwayaze. I ti rankontre difikilte, e finalman i ti mor pandan ki i ti pe ganny son pti baba. Me son pti baba ti byen. Zakob ti apel li Benzamen.

Rapel byen non sa 12 garson Zakob akoz nasyon Izrael antye ti vin atraver zot. Annefe, sa 12 tribi Izrael ti ganny nonmen dapre 10 garson Zakob ek de garson Zozef. Izaak ti viv pour plizyer lannen apre ki sa bann garson ti'n ne, e i ti byen kontan pour annan sa kantite pti zanfan. Me annou vwar ki ti arive avek enn son pti zanfan, Dina.



**E**SKI ou vwar lekel sa bann dimoun ki Dina pe al vizite? I pe al vizit serten bann fiy ki ti reste dan sa pei Kanaan. Eski son papa Zakob pou kontan sa? Pour kapab reponn sa kestyon, esey mazine ki Abraam ek Izaak ti panse lo sa bann fiy an Kanaan.

Eski Abraam ti oule ki son garson Izaak i marye avek en fiy an Kanaan? Non. Eski Izaak ek Rebeka ti oule ki zot garson Zakob i marye avek en fiy an Kanaan? Non. Ou konnen akoz?

Akoz sa bann dimoun ti ador bann fo bondye. Zot pa ti bann bon dimoun pour annan konman msye ek madanm, e zot pa ti bann bon dimoun pour fer bon zanmi avek. Alor nou kapab asire ki Zakob pa ti pou oule ki son fiy i fer zanmi avek sa bann fiy an Kanaan.

Dina ti sirman ganny problem. Eski ou vwar sa garson Kananeen dan sa portre ki pe get Dina? I apel Sekenm. En zour kan Dina ti al vizit son bann zanmi, Sekenm ti pran li e fors li pour dormi avek li. Sa ti mal, akoz se selman bann dimoun ki'n marye ki devret dormi ansanm. Sa move aksyon ki Sekenm ti fer ti anmenn en kantite problem.

Kan bann frer Dina ti antann sa ki ti'n arive, zot ti tre ankoler. De parmi zot, Simeon ek Levi ti sitan ankoler ki zot ti pran zot sab e al dan sa lavil e atak bann zonn par sirpriz. Zot avek zot bann frer ti touy Sekenm ek tou lezot zonn. Zakob ti tre ankoler akoz son bann garson ti fer sa.

Konman ki sa bann problem ti konmanse? Ti akoz Dina ti fer zanmi avek bann dimoun ki pa ti obeir lalwa Bondye. Pa i vre ki nou osi nou pa pou anvil fer zanmi avek sa bann dimoun koumsa?

# BANN MOVE FRER ZOZEF

**G**ETE konman sa garson dan sa portre i fer lapenn. Sa se Zozef. Son bann frer fek vann li avek sa bann zonm ki pe al Lezip. Laba i pou ganny trete konman en lesklav. Akoz ki son bann frer ti'n fer sa move keksoz? Akoz zot ti zalou.

Zot papa Zakob ti kontan Zozef bokou. I ti telman kontan li ki en zour i ti fer koud en zoli kot pour li. Kan son 10 frer ti vwar konman ki Zakob ti kontan Zozef, zot ti zalou e zot pa ti kontan li. Me ti annan en lot rezon akoz ki zot pa ti kontan li.

Zozef ti rev de rev. Dan sa de rev son bann frer ti salye li. Kan Zozef ti rakont son bann frer sa de rev, zot pa ti kontan li plis ankor.

En zour kan son bann frer ti pe okip mouton zot papa, Zakob ti demann Zozef pour al vwar si zot ti byen. Kan son bann frer ti vwar li pe vini, serten parmi zot ti dir: 'Annou touy li!' Me Ribenn pli vye frer ti dir: 'Non, pa fer sa!' Olye ki zot ti touy li, zot ti met li dan en trou. Apre zot ti deside ki zot pou fer avek li.

Pandan sa letan serten Ismaelit ti pe pase. Zida ti dir avek son bann demi




frer: 'Annou vann li avek sa bann Ismaelit.' E se sa ki zot ti fer. Zot ti vann li pour 20 pyes larzan. Pa sa ti en move keksoz pour fer!

Ki zot pou dir zot papa? Zot ti touy en kabri e zot ti tranp zoli kot Zozef plizyer fwa dan son disan. Apre zot ti al montre zot papa sa kot e zot ti dir: 'Nou'n trouv sa. Gete si pa pour Zozef.'

Zakob ti remarke ki sa ti kot Zozef. I ti dir ki 'en bebet feros ti'n bezwen touy Zozef.' Se zisteman sa ki bann frer Zozef ti oule ki zot papa i krwar. Zakob ti vreman tris. I ti plere pour plizyer zour. Me Zozef pa'n mor. Annou vwar ki ti arive avek li.

Zenez 37:1-35.



# ZOZEF TI GANNY MET DAN PRIZON

**Z**OZEF ti annan selman 17 an kan i ti ganny anmennen Lezip. Laba i ti ganny vann avek en zonn ki ti apel Potifar. Potifar ti travay avek lerwa Lezip ki ti apel Faraon.

Zozef ti travay dir pour son met, Potifar. Alor kan Zozef ti pli vye, Potifar ti met li ansarz son lakaz antye. Me aprezan, akoz ki Zozef ti la dan prizon? Se akoz madanm Potifar.

Zozef ti'n vin gran e vin en zoli garson e madanm Potifar ti anvi ki Zozef i dormi avek li. Me Zozef ti konnen ki sa i mal alor i ti refize. Madanm Potifar ti tre ankoler. Alor kan son msye ti retourn kot lakour, i ti koz lalang avek li e i ti dir: 'Zozef, sa move garson ti oule dormi avek mwan!' Potifar ti krwar son madanm, e i ti tre ankoler avek Zozef. Alor i ti fer met Zozef dan prizon.

Sa zonn ki ti ansarz prizon pa ti tarde pour remarke ki Zozef ti en bon dimoun. Alor i ti fer li ansarz tou lezot prizonnyen. Plitar Faraon ti tre ankoler avek son serviter ki ti servi li diven e osi son boulanze, e i ti fer met zot dan prizon. En zour swar sa de zonn ti rev sakenn en rev, me zot pa konnen ki zot rev ti vedir. Lannmen Zozef ti dir zot: 'Rakont mwan zot rev.' Zot ti rakont li e avek led Bondye Zozef ti eksplik zot ki savedir zot rev.

Zozef ti dir avek sa enn ki ti servi Faraon diven: 'Dan trwa zour ou pou ganny large dan prizon, e ou pou vin serviter Faraon ankor.' Apre Zozef ti azoute: 'Kan ou sorti, koz avek Faraon lo mwan, e ed mwan pour sorti dan prizon.' Me avek sa boulanze, Zozef ti dir: 'Dan trwa zour Faraon pou fer koup ou latet.'

Dan trwa zour sa bann keksoz ti arive parey ki Zozef ti dir. Faraon ti fer koup latet sa boulanze. Tandis ki sa lot serviter ti ganny large dan prizon e i ti konmans servi lerwa ankor. Me sa serviter ti oubliy net konsernan Zozef! I pa ti dir Faraon nanryen lo li, e Zozef ti bezwen reste dan prizon.





**D**E ZAN ti'n pase, e Zozef ti ankor dan prizon. Sa serviter pa'n mazin li. En zour swar Faraon ti rev de rev vreman spesyal, e i ti sey mazine ki zot vedir. Eski ou vwar li pe dormi la? Lannmen bomaten Faraon ti apel son bann zonn ki ti malen e i ti rakont zot bann keksoz ki i ti'n reve. Me zot pa ti kapab dir li ki son bann rev i vedir.

Aprezan sa serviter ti finalman mazin Zozef. I ti dir avek Faraon: 'Kan mon ti dan prizon ti annan en zonn laba ki ti kapab eksplik bann rev.' Toudswit Faraon ti fer retir Zozef dan prizon.

Faraon ti rakont Zozef son bann rev: 'Mon ti vwar set bef gra. Apre mon ti vwar set bef meg. E sa bann ki ti meg ti manz sa bann ki ti gra.'

Dan mon dezyenm rev mon ti vwar set zepi sereal plen e mir ki ti pe pouse




lo menm tiz. Apre mon ti vwar set zepi sereal sek. Sa set zepi sereal sek ti manz sa set bon zepi sereal.’

Zozef ti dir avek Faraon: ‘Sa de rev i vedir menm keksoz. Sa set bef gra ek sa set bon zepi sereal i vedir set lannen, e sa set bef meg ek sa set zepi sereal sek i vedir ankor set lannen. Pour set an pou annan manze an abondans an Lezip. Apre pou annan set an kot pou annan en pti gin manze ki pou pouse.’

Zozef ti dir avek Faraon: ‘Swazir en zonm ki malen e met li an sarz pour anmas manze pandan sa set bon lannen. Alor bann dimoun pa pou mor lafen pandan sa set move lannen ki pou swiv kan en pti gin manze pou pouse.’

Faraon ti dakor avek sa lide. E i ti swazir Zozef pour anmas manze, e pour stok li. Apre Faraon, Zozef ti vin sa zonm pli enportan an Lezip.

An illustration of two wheat stalks with golden grains and green stems, set against a light blue circular background. The stalks are positioned on the left side of the page, partially overlapping the text.

Wit an plitar, pandan lafanmin, Zozef ti vwar serten zonm pe vini. Eski ou konnen lekel zot? Se son 10 gran frer! Zot papa Zakob ti’n anvoy zot Lezip parski ti konmans napa manze an Kanaan. Zozef ti rekonnet zot, me zot, zot pa ti rekonnet li. Eski ou konnen aköz? Se aköz Zozef ti’n grandi e i ti met en diferan kalite lenz.

Zozef ti mazine ki letan i ti ankor en pti garson i ti rev konsernan son bann frer pe salye li. Eski ou rapel lir sa? Alor Zozef ti konpran ki se Bondye ki’n anvoy li Lezip, e pour en bon rezon. Ki ou krwar Zozef ti fer? Annou vwar.


# ZOZEF TI TESTE SON BANN FRER

24

**Z**OZEF ti oule konnen si son 10 gran frer ti ankor malis e pa bon. Alor i ti dir: ‘Zot bann espyon. Zot in vin rod pwen feb nou pei.’

‘Non, nou pa bann espyon,’ zot ti reponn. ‘Nou bann zonn onnet. Nou tou nou frer. Ti annan 12 nou. Me en frer i nepli vivan, e sa enn pli zenn i kot lakour avek nou papa.’

Zozef ti fer konmsi i pa krwar zot. I ti gard Simeon dan prizon, e i ti les larestan pran manze e retourn kot zot. Me i ti dir zot: ‘Kan zot retournen, zot bezwen anmenn zot pti frer avek zot.’



Kan zot ti retourn kot zot an Kanaan, sa bann frer ti rakont zot papa Zakob tou sa ki ti'n arive. Zakob ti vreman tris. 'Zozef nepli vivan,' i ti kriye, 'e aprezan Simeon nepli vivan. Mon pa pou les zot pran Benzamen, mon pli zenn garson.' Me kan zot manze ti pe konmans fini, Zakob ti bezwen les zot anmenn Benzamen Lezip afen ki zot ti a kapab ganny plis manze.

Zozef ti vwar son bann frer pe vini. I ti vreman kontan pour vwar son pti frer Benzamen. Byensir, personn ant zot pa ti konnen ki sa zonn enportan ti Zozef. Zozef ti aprezan fer en keksoz pour teste son 10 demi frer.

I ti fer son bann serviter ranpli zot bann sak plen avek manze. Me san ki i ti les zot konnen, i ti fer met son lakoup spesyal an larzan dan sak Benzamen. Apre ki zot tou zot ti'n ale e ariv en pti distans lo semen, Zozef ti anvoy son bann serviter apre zot. Kan zot zwenn bann frer Zozef, sa bann serviter ti dir: 'Akoz ki zot in vol lakoup an larzan nou met?'

Zot tou zot ti dir: 'Nou pa'n vol son lakoup.' 'Si ou vwar sa lakoup avek enn ant nou, les sa dimoun ganny touye.'

Alor bann serviter ti fouy dan tou bann sak, e zot ti trouv lakoup dan sak Benzamen, zis parey ou vwar la. Bann serviter ti dir: 'Larestan zot, zot kapab ale, me Benzamen i bezwen vin avek nou.' Ki sa 10 demi frer ti pou fer aprezan?

Zot tou zot ti retourn avek Benzamen kot lakaz Zozef. Zozef ti dir avek son bann frer: 'Zot tou zot kapab ale, me Benzamen i devret reste isi konman mon lesklav.'

Zida ti koze, e i ti dir: 'Si mon retourn kot lakour san mon frer, mon papa pou mor aköz i kontan li en kantite. Alor silvouple, gard mwan isi konman ou lesklav, me les sa garson al kot li.'

Zozef ti rekonnet ki son bann frer ti'n sanze. Zot ti nepli malis e pa bon. Annou vwar ki Zozef ti fer aprezan.

**Z**OZEF pa ti kapab kontrol son santiman pli lontan. I ti demann tou son bann serviter pour sorti dan sa lasanm. Kan i ti tousel avek son bann frer, Zozef ti konmans plere. Nou kapab mazine konman ki son bann frer ti sirprann, lefe ki zot pa ti konnen aköz i ti pe plere. Finalman i ti dir: ‘Mwan Zozef. Eski mon papa i ankor vivan?’

Son bann frer ti sitan sirprann ki zot pa ti kapab koze. Zot ti per. Me Zozef ti dir: ‘Silvouple apros pli pre.’ Kan zot ti aprobe, i ti dir: ‘Mwan zot frer Zozef, sa enn ki zot ti vann Lezip.’

Zozef ti kontinyen koze zantiman: ‘Pa blanm zot lekor aköz zot ti vann mwan isi. Ti vreman Bondye ki’n anvoy mwan Lezip pour sov lavi bann dimoun. Faraon in etabli mwan sef dan pei antye. Aprezan degaze retourn kot mon papa e rakont li sa. E dir li vini pour reste isi.’




Aprè Zozef ti anvoy son lanmen otour son bann frer, e i ti may zot e anbras zot tou. Kan Faraon ti antann ki bann frer Zozef in vini, i ti dir Zozef: 'Les zot pran bann saret e al sers zot papa ek zot fanmiy pour ki zot vin reste isi. Mon pou donn zot sa pli bon landrwa dan Lezip antye.'

Se sa ki zot ti fer. La ou kapab vwar Zozef pe rankontre son papa kan i ti vin Lezip avek son fanmiy antye.

Fanmiy Zakob ti'n vreman agrandi. An tou ti annan 70 zot kan zot ti vin Lezip, an kontan Zakob ek son zanfan ek son bann pti zanfan. Me ti osi annan bann madanm son bann garson e petet en kantite serviter. Zot tou zot in vin reste Lezip. Zot in ganny apele konman bann Izraelit, akoz Bondye ti'n sanz non Zakob e apel li Izrael. Bann Izraelit ti vin bann dimoun spesyal pour Bondye, parey nou pou vwar plitar.

Zenez 45:1-28; 46:1-27.



**E**SKI ou pran lapenn pour sa zonn malad? I apel Zob, e sa i son madanm. Ou konnen ki i ti pe dir Zob? ‘Modi Bondye e mor.’ Annou nou vwar akoz ki i ti dir en keksoz koumsa, e akoz ki Zob ti pe soufer en kantite.


Zob ti en zonn fidel ki ti obeir Zeova. I ti reste an Ourz, pa tro lwen avek Kanaan. Zeova ti kontan Zob en kantite, me ti annan en personnaz ki pa ti kontan li. Ou konnen lekel?

Se Satan Dyab. Mazinen, Satan ti sa move lanz ki pa ti kontan Zeova. I ti nobou fer Adan ek Ev dezobei Zeova, e i krwar ki i kapab fer tou dimoun dezobei Zeova osi. Me eski i ti kapab fer li? Non. Zis mazin sa kantite zonn ek fanm fidel ki nou’n aprann lo zot. Ki kantite ki ou kapab nonmen?

Apré ki Zakob ek Zozef ti’n mor Lezip, Zob ti sa dimoun ki ti pli fidel avek Zeova lo later antye. Zeova ti oule fer Satan konnen ki i pa ti pou kapab fer tou dimoun vin move, alor i ti dir: ‘Get Zob. Vwar konman ki i fidel avek mwan.’

‘I fidel,’ Satan ti argimante, ‘akoz ou’n beni li e i annan en kantite bon keksoz. Me si ou pran sa bann keksoz, i pou modi ou.’

Alor Zeova ti dir: ‘Ale. Pran sa bann keksoz. Fer tou bann move



keksoz ki ou anvi avek Zob. Nou pou vwar si i modi mwan. Selman fer sir ki ou pa touy li.'

Premyerman, Satan ti fer bann zonn vol bef ek bann samo Zob, e zot ti touy son bann mouton. Apre i ti touy son 10 garson ek son bann fiy dan en tanpet. Apre, Satan ti frap Zob avek sa maladi terrib. Zob ti pe soufer en kantite. Se pour sa rezon ki son madanm ti dir li: 'Modi Bondye e mor.' Me Zob pa ti pou fer sa. Deplis, trwa fo zanmi ti vin kot li e zot ti dir li ki i'n viv en move lavi. Me Zob ti reste fidel.

Sa ti fer Zeova vreman kontan, e apre i ti beni Zob, parey ou kapab vwar dan sa portre. I ti geri son maladi. Zob ti ganny ankor 10 zoli zanfann, e de fwa plis bef, mouton ek bann samo ki i ti annan oparavan.

Eski ou pou touzour reste fidel avek Zeova parey Zob? Si ou pou reste, Bondye pou beni ou osi. Ou pou kapab viv pour touzour kan later antye pou vin zoli parey zarden Edenn.

Zob 1:1-22; 2:1-13; 42:10-17.





# EN MOVE LERWA TI PE DOMIN LEZIP

**S**A BANN zonn ki ou vwar la pe fors sa bann dimoun pour travay. Get sa zonn ki pe tap enn sa bann travayer avek en fwet! Sa bann travayer zot tou zot sorti dan fanmiy Zakob, e zot bann Izraelit. E sa bann zonn ki pe fors zot pour travay se bann Eziptsyen. Bann Izraelit in vin lesklav bann Eziptsyen. Konman ki sa in arive?

Pour plizyer lannen fanmiy Zakob ti viv anpe an Lezip. Zozef, sa zonn ki ti pli enportan Lezip apre lerwa Faraon ti pran swen avek zot. Me apre Zozef ti mor. E en nouvo Faraon ki pa ti kontan bann Izraelit ti vin lerwa Lezip.



Alor sa move Faraon ti fer bann Izraelit vin lesklav. E i ti fer bann zonn ki ti pa bon e kriyel ansarz zot. Zot ti fors bann Izraelit pour travay dir, konstri bann lavil pour Faraon. Me bann Izraelit ti kontinyen ogmante. Apre en serten letan bann Eziptyen ti konmans per ki bann Izraelit ti pou vin bokou e pli for.

Eski ou konnen ki Faraon ti fer? I ti koz avek bann madanm ki ti ed bann manman Izraelit kan zot ti donn nesans zot pti baba, e dir: ‘Zot devret touy tou bann pti baba garson ki ne.’ Me zot ti bann bon madanm, e zot pa ti pou touy sa bann pti baba.



Alor Faraon ti donn sa konmann avek tou son pep: ‘Pran bann pti baba garson ki pour bann Izraelit e touy zot. Selman les zis bann pti baba fiy viv.’ Eski sa pa i en move keksoz pour komande? Annou vwar konman ki enn sa bann pti baba garson ti ganny sove.

Egzod 1:6-22.

# KONMAN KI MOIZ TI GANNY SOVE

**O**U VWAR sa pti baba pe plere, e pe atrap ledwa sa madanm. Sa i Moiz. Eski ou konnen lekel sa zoli madanm? I en prenses Ezipsyen, fiy Faraon.

Manman Moiz ti kasyet son pti baba ziska ki i ti annan 3 mwan, akoz i pa ti oule ki i ganny touye par bann Ezipsyen. Me i ti konnen ki zot ti kapab trouv Moiz, alor annou vwar ki i ti fer pour nobou sov li.

I ti pran en pannyen e i ti aranz li byen afen ki delo pa pou kapab antre ladan. Apre i ti met Moiz ladan, e i ti depoz sa pannyen dan bann gran zerb obor Larivyer Nil. Miryam, ki ti ser Moiz ti ganny demande pour debout obor e gete ki ti pou arive.

En pti moman apre fiy Faraon ti vin bennyen dan Larivyer Nil. Toudenkou i ti vwar sa pannyen dan sa bann gran zerb. I ti apel enn son serviter: ‘Ale, al sers sa pannyen pour mwan.’ Kan sa prenses ti ouver sa pannyen, i ti vwar en zoli pti baba. Pti Moiz ti pe plere, e sa prenses ti pran pitye pour li. I pa ti oule ki i ganny touye.

Apre Miryam ti vini. Ou kapab vwar li dan sa portre. Miryam ti demann avek fiy Faraon: ‘Eski mon kapab al apel en madanm Izraelit pour pran swen avek sa pti baba pour ou?’

‘Ale,’ prenses ti dir.

Alor Miryam ti taye vitman pour al dir son manman. Kan manman Moiz ti vin kot prenses, i ti dir: ‘Pran sa pti baba e pran swen avek li pour mwan, e mon ava pey ou.’

Manman Moiz ti pran swen avek son prop zanfan. Plitar kan Moiz ti’n pli gran, i ti anmenn li kot fiy Faraon, ki ti adopte li konman son prop garson. Se koumsa ki Moiz in grandi dan lakaz Faraon.



**G**ET Moiz pe taye lwen avek Lezip. Eski ou vwar sa bann zonn ki pe tay deryer li pour atrap li? Eski ou konnen akoz zot oule touy Moiz? Annou vwar.


Moiz ti'n grandi dan lakour Faraon, sef Lezip. I ti'n vin en zonn ki ti vreman malen e enportan. Moiz ti konnen ki i pa ti en Eziptyen, me ki son vre paran ti bann lesklav Izraelit.

En zour, alaz 40 an, Moiz ti deside pour al vwar sitiasyon bann Izraelit. Ti vreman terib lafason ki zot ti pe ganny trete. I ti vwar en Eziptyen pe bat en lesklav Izraelit. Moiz ti get partou, e kan i pa ti vwar personn pe gete, i ti tap sa Eziptyen, e sa Eziptyen ti mor. Apre, Moiz ti kasyet lekor sa Eziptyen dan disab.

Lannmen, Moiz ti al vwar bann Izraelit ankor. I ti panse ki i ti kapab ed zot afen ki zot ti pou nepli lesklav. Me i ti vwar de zonn Izraelit pe lager, alor Moiz ti dir avek sa enn ki annan tor: 'Akoz ou pe bat ou frer?'

Sa zonn ti dir: 'Lekel ki'n etabli ou sef oubyen ziz? Eski ou pou touy mwan parey ou'n touy sa Eziptyen?'

Moiz ti konmans per. I ti konnen ki dimoun ti'n dekouver sa ki i ti'n fer avek sa Eziptyen. Menm Faraon ti'n tann



konsernan sa, e i ti anvoy bann zonn touy Moiz. Se pour sa rezon ki Moiz ti bezwen taye lwen avek Lezip.

Kan Moiz ti kit Lezip, i ti al lwen dan pei Madyann. Laba i ti rankontre fanmiy Yitro, e i ti marye avek enn son fiy ki ti apel Sipora. Moiz ti vin en berze e i ti pran swen avek mouton Yitro. I ti reste an Madyann pour 40 an. Aprezan i annan 80 an. En zour, letan i ti pe pran swen avek mouton Yitro, en keksoz enkrwayab ti arive ki ti sanz son lavi. Vir paz, nou a vwar ki sa keksoz enkrwayab.

Egzod 2:11-25; Akt 7:22-29.



# BROUSAY TI PE 30

## BRILE

**M**OIZ i sorti tou sa zistans ziska montanny Oreb pour li rod zerb pour son mouton. La i ti vwar en brousay pe pran dife, me i pa ti pe brile!

‘Sa i drol,’ Moiz ti dir. ‘Mon pou koste pli pre e get pli byen.’ Kan i ti ale, en lavwa sorti dan sa brousay ti dir: ‘Pa apros pli pre. Tir ou sandalet, akoz ou pe debout lo en later sen.’ Se Bondye ki ti pe koz atraver en lanz, alor Moiz ti kouver son figir.

Aprè Bondye ti dir: ‘Mon’n vwar soufrans mon pep Lezip. Alor mon pe al delivre zot, e ou, ou sa enn ki mon pou anvoye pour gid mon pep pour sorti Lezip.’ Zeova ti pe al anmenn son pep dan sa zoli pei Kanaan.

Me Moiz ti dir: ‘Mon en nanryen ditou. Konman mon pou kapab fer sa? Me sipoze mon ale. Bann Izraelit pou demann mwan, “Lekel ki’n anvoy ou?” Alor ki mon pou dir?’

‘Se sa ki ou pou dir,’ Bondye ti reponn. ‘“ZEOVA Bondye Abraam, Bondye Izaak e Bondye Zakob in





anvoy mwan kot zot.” ’ E Zeova ti azoute: ‘Sa i mon non pour touzour.’

Moiz ti reponn: ‘Me sipoze zot pa krwar mwan kan mon dir zot ki ou’n anvoy mwan.’

‘Kisisa ki dan ou lanmen?’ Bondye ti demande.

Moiz ti reponn: ‘En baton.’

‘Anvoy li ater,’ Bondye ti dir. E kan Moiz ti anvoye, sa baton ti vin en serpan. Apre Zeova ti montre Moiz en lot mirak. I ti dir: ‘Met ou lanmen dan ou rob.’ Moiz ti mete, e kan i ti retir son lanmen, son lanmen ti’n blan parey lanez! Ou a dir ki i ti’n ganny en maladi ki apel lalep. Apre Zeova ti donn Moiz pouvwar pour fer en trwazyenm mirak. Finalman i ti dir: ‘Kan ou pou fer sa bann mirak bann Izraelit pou krwar ki mon’n anvoy ou.’

Apre sa Moiz ti retourn kot li e i ti dir avek Yitro: ‘Silvouple les mwan retourn kot mon fanmiy Lezip pour vwar konman zot ete.’ Alor Yitro ti dir orevwar Moiz, e Moiz ti konmans son vwayaz pour retourn Lezip.

Egzod 3:1-22; 4:1-20.





# MOIZ EK AARON TI AL VWAR FARAON

**K**AN Moiz ti retourn Lezip, i ti rakont son frer Aaron sa bann mirak. E kan Moiz ek Aaron ti montre bann Izraelit sa bann mirak, tou dimoun ti krwar ki Zeova i avek zot.

Aprè Moiz ek Aaron ti al vwar Faraon. Zot ti dir li: ‘Zeova Bondye Izrael i dir, “Les mon pep ale pour trwa zour, afen ki zot ava kapab ador mwan dan dezer.” ’ Me Faraon ti reponn: ‘Mon pa krwar dan Zeova. E mon pa pe les Izrael ale.’

Faraon ti ankoler, akòz bann dimoun ti oule letan lib pour ador Zeova. Alor i ti fors zot pour travay pli dir. Bann Izraelit ti blanm Moiz akòz zot pe ganny trete vreman dir, e Moiz ti sagren. Me Zeova ti dir li pa trakase. ‘Mon pou fer Faraon les mon pep ale,’ Zeova ti dir.

Moiz ek Aaron ti al vwar Faraon ankor. Safwasi zot ti fer en mirak. Aaron ti zet son baton ater, e i ti vin en gro serpan. Me bann zonn Faraon ki ti malen zot osi zot ti zet zot baton ater, e bann serpan ti aparet. Me, gete! serpan Aaron pe manz bann serpan sa bann zonn malen. Faraon ti kontinyen pa les bann Izraelit ale.

Aprèzan ti’n ler pour Zeova fer Faraon aprann en leson. Eski ou konnen ki i ti fer? I ti anmenn 10 fleo oubyen gran maler lo Lezip.

Aprè plizyer fleo Faraon ti anvoy kriy Moiz, e i ti dir: ‘Aret sa fleo, e mon pou les Izrael ale.’ Me kan sa fleo ti pou arete Faraon ti pou sanz son lide. I pa ti pou les sa bann dimoun ale. Me, finalman, aprè dizyenm fleo, Faraon ti les bann Izraelit ale.

Eski ou konn sa 10 fleo? Vir paz e nou a vwar.



**G**ET sa bann portre. Sakenn i montre en fleo ki Zeova ti anmenn lo Lezip. Dan premye portre ou kapab vwar Aaron pe tap Larivyer Nil avek son baton. Kan i ti tap larivyer, delo ti vin disan. Bann pwason ti mor, e larivyer ti konmans pi.

Apré, Zeova ti fer bann grenwi sorti dan Larivyer Nil. Zot partou—dan four, dan bann kastrol, lo lili bann dimoun—partou. Kan bann grenwi ti mor bann Eziptyen ti anmas zot e met zot dan bann gro ta, e sa pei ti pi avek zot.

Apré Aaron ti tap later avek son baton, e lapousyer ti vin bann moustik. Bann moustik ti trwazyenm fleo lo Lezip.

Larestan fleo ti fer ditor bann Eziptyen selman, pa bann Izraelit. Katriyenm fleo ti bann gro mous ki ti anvol par ta partou dan lakaz bann Eziptyen. Senkyenm fleo ti lo bann zannimo. En kantite bef, mouton ek kabri ki ti pou bann Eziptyen ti mor.

Apré, Moiz ek Aaron ti pran enpe lasann e anvoy dan ler. Zot ti fer bann

dimoun ek bann zannimo ganny bann klou lo zot. Sa ti sizyenm fleo.

Apré sa Moiz ti lev son lanmen ver lesyel, e Zeova ti anvoy loraz ek lagrel. I ti sa pli move lagrel ki Lezip ti'n deza gannyen.

Wityenm fleo ti bann sotrel. Zanmen oparavan e ni menm depi sa pa'n annan sa kantite sotrel. Zot ti manz tou keksoz ki lagrel pa ti'n detri.

Nevyenm fleo ti fernwanr. Pour trwa zour fernwanr epe ti kouver pei, me kot bann Izraelit ti reste ti annan lalimyer.

Finalman, Bondye ti demann son pep pour met disan en zenn kabri oubyen en zenn mouton lo lankadremen zot laport. Apré lanz Bondye ti pas parlo Lezip. Kan lanz ti vwar disan, i pa ti touy personn dan sa lakaz. Me dan bann lakaz ki ti napa disan lo lankadremen laport, lanz Bondye ti touy bann premye ne zonn ek bann zannimo. Sa ti dizyenm fleo.

Apré sa dernyen fleo, Faraon ti les bann Izraelit ale. Tou pep Bondye ti'n pare pour ale, e sa swar menm zot ti konmans sorti Lezip.

Egzod sapit 7 ziska 12.



**G**ETE ki pe arive! Sa se Moiz ki pe avans son baton ver Lanmer Rouz. Sa bann dimoun ki avek li sen e sof lo lot kote i bann Izraelit. Me Faraon ek tou son larme pe noye dan lanmer. Annou vwar konman sa in arive.

Parey nou'n aprann, Faraon ti demann bann Izraelit pour kit Lezip apre ki Bondye ti'n anmenn sa 10 fleo lo bann Ezipsyen. Apepre 600,000 zonm Izraelit ti ale, osi byen ki en kantite madanm ek zanfan. Ti osi annan en kantite lezot dimoun, ki ti'n krwar dan Zeova e ki ti'n al ansanm avek bann Izraelit. Zot tou zot ti'n anmenn zot mouton, kabri ek bef avek zot.



Avan zot ti ale, bann Izraelit ti demann bann Eziptyen lenz ek bann keksoz ki ti'n fer avek lor ek larzan. Bann Eziptyen ti vremen per bann Izraelit, akoz sa dernyen fleo lo zot. Alor zot ti donn bann Izraelit tou sa ki zot ti demande.

Enn de zour plitar bann Izraelit ti ariv kot Lanmer Rouz. La zot ti repoze. Pandan sa bann letan, Faraon ek son bann zonn ti konmans regrete ki zot ti'n les bann Izraelit ale. Zot ti dir: 'Nou'n les nou lesklav ale!'

Alor Faraon ti sanz son lide ankor enn fwa. Vitman i ti met pare son bann saret lager ek son bann larme. Apre i ti konmans swiv bann Izraelit avek 600 saret spesyal, osi byen ki tou lezot saret Lezip.



Kan bann Izraelit ti vwar Faraon ek son bann larme pe vini deryer zot, zot ti vreman per. Napa okenn landrwa pour sove. Lanmer Rouz ti akote zot, e la bann Eziptsyen ti pe vini dan lot direksyon. Me Zeova ti met en nyaz ant son pep ek bann Eziptsyen. Alor bann Eziptsyen pa ti kapab vwar bann Izraelit pour atak zot.

Zeova ti demann Moiz pour avans son baton ver Lanmer Rouz. Kan i ti fer sa, Zeova ti fer en divan les soufle. Delo sale ti ouver, e delo ti tenir lo tou le de kote.

Aprè bann Izraelit ti konmans travers lanmer lo later sek. Ti pran plizyer er-d-tan pour sa milyon dimoun ek tou zot zannimo pas atraver lanmer sen e sof pour ariv lo lot kote. Finalman bann Eziptsyen ti kapab vwar bann Izraelit ankor. Zot lesklav ti pe sove! Alor zot ti degaze e swiv zot dan lanmer.

Kan zot ti pe traverse, Bondye ti fer larou zot saret sorti. Bann Eziptsyen ti konmans per e zot ti konmans dir: ‘Zeova pe lager pour bann Izraelit kont nou. Annou sorti isi!’ Me ti’n tro tar.

Se la ki Zeova ti demann Moiz pour avans son baton ver Lanmer Rouz, parey ou vwar dan sa portre. E kan Moiz ti fer sa, bann miray delo ti konmans retournen e kouver bann Eziptsyen ek zot bann saret. Tou larme ti’n swiv bann Izraelit dan lanmer. E ti napa enn bann Eziptsyen ki ti sorti vivan!

Konman ki pep Bondye ti vreman kontan akoz zot sen e sof! Bann zonn ti sant en sanson remersiman pour Zeova, an dizan: ‘Zeova in ranport en laviktwar merveye. I’n zet bann seval ek zot kavalye dan lanmer.’ Ser Moiz Miryam ti pran son tanbouren, e tou bann madanm ti swiv li avek zot tanbouren. Anmezir ki zot ti danse avek lazwa, zot ti sant menm sanson parey bann zonn ti pe sante: ‘Zeova in ranport en laviktwar merveye. I’n zet bann seval ek zot kavalye dan lanmer.’

## *Delivrans an Lezip ziska premye Lerwa Izrael*

*Moiz ti kondwir bann Izraelit depi zot delivrans an Lezip ziska Montanny Sinai, kot Bondye ti donn zot son bann lalwa. Plitar, Moiz ti anvoy 12 zonn pour espyonn Kanaan. Me 10 parmi zot ti retournen avek en move rapor. Zot ti fer bann dimoun anvi retourn Lezip. Akoz zot ti mank lafwa, Bondye ti pini bann Izraelit par fer zot marse dan dezer pour 40 an.*

*Finalman, Zozye ti ganny swazir pour kondwir bann Izraelit an Kanaan. Pour ed zot pour pran sa pei, Zeova ti fer serten mirak. I ti fer Larivyer Zourden aret koule, bann miray Zeriko ti tonbe, e soley pa ti bouze pour en lazournen antye. Apre 6 an, sa pei ti ganny pran avek bann Kananeen.*

*An konmansan avek Zozye, Izrael ti ganny gouvernen par bann ziz pour 356 lannen. Nou pou aprann lo plizyer parmi zot, enkli Barak, Gideonn, Yefte, Sanmson ek Samyel. Nou pou osi aprann lo bann madanm tel konman Raab, Debora, Zael, Rit, Naomi ek Dalila. Dan sa trwazyenm parti nou pou vwar listwar pour 396 lannen.*



**K**I SA bann dimoun pe ramase ater? I parey lanez. I blan, e i kas kase. Me sa pa lanez; i en keksoz pour manze.

Ti fer apepre en mwan depi ki bann Izraelit ti'n kit Lezip. Zot ti dan dezer. Pa pous bokou manze dan dezer, e alor bann dimoun ti konplent, an dizan: 'Plito Zeova ti'n touy nou Lezip. Omwen laba nou ti manz tou sa ki nou ti anvi.'

Alor Zeova ti dir: 'Mon pou fer manze tonm ater sorti dan lesyel.' E se sa ki Zeova ti fer. Lannmen bomaten kan bann Izraelit ti vwar sa keksoz blan ki ti'n tonbe, zot ti demann avek kanmarad: 'Kisisa sa?'

Moiz ti dir: 'Sa i manze ki Zeova in donn zot pour manze.' Bann dimoun ti apel li LAMANN. I ti annan en gou parey bann pti gato ki'n fer avek dimyel.

Moiz ti dir avek bann dimoun: 'Zot devret anmas lakantite ki sakenn i kapab manze.' Alor tou le bomaten se sa ki zot ti fer. Apre, kan soley ti so, lamann ki ti'n reste ater ti fonn.

Moiz ti osi dir: 'Personn pa devret gard lamann pour lannmen.' Me serten parmi bann dimoun pa ti ekoute. Eski ou konnen ki ti arive? Lannmen bomaten lamann ki zot ti'n anmase ti ranpli avek lever, e i ti konmans pi!

Me, ti annan en zour dan lasemenn ki Zeova ti demann bann dimoun pour ramas de fwa plis lamann. Sa ti sizyenm zour. E Zeova ti demann zot pour prezerv serten pour lannmen, aköz i pa ti pou fer lamann tonbe setyenm zour. Kan zot ti prezerv lamann pour son setyenm zour, i pa ti ranpli avek lever e i pa ti pi! Sa ti en lot mirak!

Tan ki bann Izraelit ti reste dan dezer Zeova ti nourri zot avek lamann.



# ZEOVA TI DONN 35 SON BANN LALWA

**D**E MWAN apre ki zot ti'n kit Lezip, bann Izraelit ti ariv lo Montanny Sinai, ki osi apel Oreb. Sa ti menm landrwa kot Zeova ti koz avek Moiz atraver sa brousay brile. Bann Izraelit ti'n vin la e zot ti pe reste en pe letan.

Anmenmtan ki bann dimoun ti pe espere anba, Moiz ti grenp montanny. Anler lo montanny, Zeova ti dir avek Moiz ki i anvi ki bann Izraelit i obeir Li e ki zot vin Son pep spesyal. Kan Moiz ti desann, i ti dir bann Izraelit ki Zeova ti'n dir. E bann dimoun ti dir ki zot pou obeir Zeova, akoz zot anvi vin son pep.

Apre sa Zeova ti fer en keksoz drol. I ti fer lafimen sorti dan bout montanny, e fer gro loraz. I ti osi koz avek bann dimoun: 'Mwan Zeova zot Bondye ki'n retir zot Lezip.' Apre i ti donn sa konmann: 'Zot pa devret ador okenn lezot bondye eksepte mwan.'

Bondye ti donn bann Izraelit ankor nef komannman, oubyen lalwa. Bann dimoun ti vreman per. Zot ti dir avek Moiz: 'Ou koz avek nou, akoz nou per ki si Bondye i koz avek nou, nou kapab mor.'

Plitar Zeova ti dir Moiz: 'Mont kot mwan lo montanny. Mon pou donn ou de ros plat lo ki mon'n ekrir bann lalwa ki mon oule ki bann dimoun i obeir.' Alor Moiz ti retourn ankor lo montanny. I ti reste lo montanny pour 40 zour ek 40 lannwit.



Bondye ti annan en kantite, en kantite lalwa pour son pep. Moiz ti ekrir sa bann lalwa. Bondye ti osi donn Moiz sa de ros plat. Lo sa de ros, Bondye limenm ti'n ekrir sa 10 lalwa ki i ti'n donn tou dimoun pli boner. Zot ganny apele konman Dis Komannman.

Sa Dis Komannman i bann lalwa enportan. Sa kantite lezot lalwa ki Bondye ti'n donn bann Izraelit ti osi enportan. Enn sa bann lalwa ti: 'Ou devret kontan Zeova ou Bondye avek tou ou leker, tou ou lespri, tou ou nanm ek tou ou lafors.' E en lot ti: 'Ou devret kontan ou prosen parey ou menm.' Garson Bondye, Zezi Kri, ti dir ki sa i sa de pli gran lalwa ki Zeova ti'n donn son pep Izrael. Plitar nou pou aprann en kantite keksoz konsernan Garson Bondye ek son bann lansennyman.


Egzod 19:1-25; 20:1-21; 24:12-18; 31:18;  
Deteronnm 6:4-6; Levitik 19:18; Matye 22:36-40.



**K**I BANN dimoun pe fer la? Zot pe priy avek en bef! Akoz zot pe fer sa?

Lefe ki Moiz ti pe reste lo montanny pour en bon pe letan, bann dimoun ti dir: ‘Nou pa konnen ki’n arive avek Moiz. Alor annou fer en bondye pour gid nou pour nou sorti dan sa pei.’

‘Oke,’ Aaron, frer Moiz ti dir. ‘Retir zot zanno lor, e anmenn kot mwan.’ Kan bann dimoun ti anmennen, Aaron ti fer fonn sa bann zanno e i ti fer en bef annor. E bann dimoun ti dir: ‘Sa i nou Bondye,




ki’n fer nou sorti Lezip!’ Apre bann Izraelit ti fer en gran parti, e zot ti ador sa bef annor.

Kan Zeova ti vwar sa, i ti vreman ankoler. Alor i ti dir avek Moiz: ‘Degaze e desann. Bann dimoun pe vreman mal azir. Zot in oubliy mon bann lalwa e zot pe ador en bef annor.’

Moiz ti degaze i ti desann. E kan i ti ariv pros, se sa ki i ti vwar. Bann dimoun ti pe sante e danse otour sa bef annor! Moiz ti vreman ankoler, i ti zet sa de ros plat ki ti annan bann lalwa lo la, e zot ti kas pti bout par pti bout. Apre i ti pran sa bef annor e i ti fer fonn. I ti kraz li anpoud.

Bann dimoun ti'n fer en move keksoz. Alor Moiz ti



demann serten zonn pour pran zot sab. Moiz ti dir: 'Bann move dimoun ki'n ador sa bef annor i bezwen mor.' Alor sa bann zonn ti touy trwa mil dimoun! Eski sa pa i montre nou ki nou bezwen fer atansyon ki nou ador selman Zeova, e non pa okenn lezot bann fo bondye?

**E**SKI ou konnen ki sa batiman ki la? I en latant spesyal pour ador Zeova. I osi apel tabernak. Bann dimoun ti konstri li enn an



apre ki zot ti'n kit Lezip. Eski ou konnen lekel ki ti deside pour konstri li?

Se Zeova ki ti deside pour fer konstri sa latant. Pandan ki Moiz ti lo montanny Sinai, Zeova ti dir li konman pour konstri sa latant. Zeova ti demann li pour fer li dan en fason ki fasil pour demonte. Dan sa fason, zot ti pou kapab anmenn son bann bout dan en lot landrwa, e dan sa landrwa zot ti pou kapab re-azout bann bout ansanm. Alor kan bann Izraelit ti sorti dan en landrwa pour al dan en lot landrwa dan dezer, zot ti anmenn sa latant avek zot.

Si ou get dan sa pti lasanm lo bout latant, ou kapab vwar en bwat, oubyen en kof. Sa i apel lars lalyans. Lo son de bout i annan en lanz oubyen seriben ki'n ganny fer avek lor. Bondye ti'n ekrir ankor sa Dis Komannman lo de ros plat, akoz Moiz ti'n kas sa de premye. E sa de ros ti ganny garde dan lars lalyans. Osi, en potao ki annan lamann ladan ti ganny garde dan lars lalyans. Eski ou mazineen kisisa lamann?

Frer Moiz, Aaron ti sa enn ki Zeova ti'n swazir pour vin gran pret. I ti gid bann pep pour ador Zeova. E son bann garson osi ti pret.

Aprezan get sa pli gran lasanm dan latant. I de fwa pli gran ki sa pti lasanm. Eski ou vwar sa bwat, oubyen sa pti kof, ki lafimen pe sorti avek li? Sa i lotel kot bann pret i bril en kalite lapoud ki apel lansan. I annan en sandelye ki annan set lalanp. E trwazyenm keksoz dan sa lasanm i en latab. Lo sa latab i annan 12 dipen.

Dan lakour toultour sa tabernak i annan en gro resipyan, oubyen basen, ki ranpli avek delo. Bann pret i servi sa delo pour lav zot avek. I annan osi en gran lotel. La bann zannimo i ganny brile konman en lofrann pour Zeova. Latant i zis dan milye kan, e bann Izraelit i viv dan zot latant toultour.



**G**ET sa bann fri ki sa bann zomm pe anmennen. Gete konman sa grap rezen i gro. De zomm i bezwen anmenn li lo en bar dibwa. E get bann fig ek bann grenad. Kote ki tou sa bann zoli fri i sorti? An Kanaan. Mazinen, Kanaan ti sa pei kot Abraam, Izaak ek Zakob ti'n



deza viv. Me akoz ti annan lafamin laba, Zakob ek son fanmiy ti al Lezip. Aprezan, apepre 216 lannen plitar, Moiz ti pe anmenn bann Izraelit an Kanaan. Zot ti'n ariv dan en landrwa dan dezer ki ti apel Kades.

Bann move dimoun ti pe reste an Kanaan. Alor Moiz ti anvoy 12 espyon, e i ti dir zot: 'Rode ki kantite dimoun ki viv la, e gete si zot for. Gete si later i bon pour plant bann keksoz. E fer sir zot anmenn serten fri.'

Kan bann espyon ti retournen sorti Kades, zot ti rakont Moiz: 'I vremen en bon pei.' E pour prouve, zot montre Moiz serten fri. Me 10 sa bann espyon i dir: 'Bann dimoun ki reste la, zot gro e zot for. Nou pou ganny touye si nou esey pran sa pei.'

Bann Izraelit ti per kan zot ti antann sa. 'Ti pou pli bon mor an Lezip oubyen menm dan dezer,' zot ti dir. 'Nou pou mor dan lager, e nou madanm ek nou zanfan pou ganny kaptire. Annou swazir en nouvo sef dan plas Moiz, e nou a retourn Lezip!'

Me de espyon ti met konfyans dan Zeova, e zot ti esey kalme bann dimoun. Zot ti apel Zozye ek Kaleb. Zot ti dir: 'Pa per. Zeova i avek nou. I pou fasil pour pran sa pei.' Me bann dimoun pa ti ekoute. Zot ti menm oule touy Zozye ek Kaleb.

Sa ti fer Zeova vremen ankoler, e i ti dir avek Moiz: 'Napa enn bann dimoun depi laz 20 an e plis ki pou antre dan sa pei Kanaan. Zot in vwar bann mirak ki mon'n fer an Lezip e dan dezer, me zot kontinyen pa met konfyans dan mwan. Alor zot pou trennen dan dezer pour 40 an ziska ki dernyen dimoun i mor. Se selman Zozye ek Kaleb ki pou antre dan pei Kanaan.'



# BATON AARON TI POUS BANN FLER

**G**ET sa bann fler ek sa bann fri mir pe pouse lo sa baton, oubyen baget. Sa i baton Aaron. Sa bann fler ek sa bann fri mir in pouse avek baton Aaron dan zis en lannwit! Annou vwar akoz.

Bann Izraelit ti'n vwayaze dan dezer pour en pe letan. Serten parmi bann dimoun pa ti krwar ki Moiz i devret sef, oubyen Aaron ti devret gran pret. Kora ti enn ki mazin koumsa, e osi Datann, Abiram ek 250 sef. Zot tou zot ti vini e dir avek Moiz: 'Akoz ki ou'n met ou pli o ki larestan nou?'

Moiz ti dir avek Kora ek bann ki ti pe swiv li: 'Demmen bomaten pran bann resipyan dife e met lansan ladan. Apre vin kot tabernak Zeova. Nou pou vwar lekel ki Zeova pou swazir.'

Lannmen Kora ek sa 250 dimoun ki ti pe swiv li ti vin kot tabernak. En kantite lezot ti'n vini pour siport sa bann zonn. Zeova ti vreman ankoler. 'Sorti kot latant sa bann move zonn,' Moiz ti dir. 'Pa tous nanryen ki pour zot.' Bann dimoun ti ekoute, e zot ti dekile avek latant Kora, Datann ek Abiram.

Apre Moiz ti dir: 'Par sa ou pou konnen lekel ki Zeova in swazir. Later pou ouver e anval sa bann move zonn.'

Deswit apre ki Moiz ti aret koze, later ti ouver. Latant Kora ek son bann keksoz, Datann ek Abiram ek bann ki ti avek zot ti desann, e later ti ferm lo zot. Kan bann dimoun ti antann bann ki pe desann dan later pe kriye, zot dir: 'Taye! Later i kapab anval nou osi!'

Kora ek sa 250 dimoun ki ti pe swiv li ti ankor kot tabernak. Alor Zeova ti anvoy dife, e zot tou zot ti ganny brile konpletman. Apre Zeova ti dir avek Eleazar garson Aaron pran resipyan dife sa bann zonn ki'n mor e fer en kouvertir mens pour lotel. Sa kouvertir lotel ti pou ganny servi konman en lavertisman pour bann Izraelit ki

personn apard ki Aaron ek son bann garson pa devret azir konman pret pour Zeova.

Me Zeova ti oule fer byen kler ki se Aaron ek son bann garson ki i ti'n swazir konman pret. Alor i ti dir avek Moiz: 'Fer en sef dan sak tribi Izrael anmenn son baton. Pour tribi Levi, demann Aaron pour anmenn son baton. Apre met sa bann baton dan tabernak devan lars lalyans. Baton sa zonn ki mon'n swazir konman pret pou pous fler.'

Lannmen bomaten kan Moiz ti regarde, baton Aaron ti annan sa bann fler ek bann fri mir pe pouse avek li! Alor eski ou vwar akoz ki Zeova in fer baton Aaron pous fler?

Nonm 16:1-49; 17:1-11; 26:10.



**P**LIZYER lannen ti'n pase—10 an, 20 an, 30 an, 39 an! E bann Izraelit ti ankor dan dezer. Me pandan tou sa bann lannen Zeova ti pran swen avek son pep. I ti nouri zot avek lamann. I ti gid zot pandan lazournen avek en kolonn nyaz, e dan lannwit avek en kolonn dife. E pandan tou sa lannen zot lenz pa ti desire e zot lipye pa ti anfle.


I ti aprezan premye mwan dan karantyenm lannen depi ki zot ti'n kit Lezip. Ankor enn fwa bann Izraelit ti pe kanpe an Kades. Se la ki zot ti ete letan sa 12 espyon ti ganny anvoye pour espyonn Kanaan preski 40 an pase. Ser Moiz Miryam ti mor la an Kades. E parey avan, ti annan problemm an Kades.

Bann dimoun pa ti kapab trouv en landrwa kot i annan delo. Alor zot ti konplent avek Moiz: 'Ti pou pli byen si nou ti'n mor. Akoz ou'n tir nou Lezip e anmenn nou dan sa landrwa terib kot nanryen pa pouse? Napa ni legren, ni fig, ni rezen, ni grenad. Menm delo napa pour bwar.'

Kan Moiz ek Aaron ti al dan tabernak pour priye, Zeova ti dir Moiz: 'Rasanble bann dimoun. Apre, devan zot, koz avek sa ros laba. Pour annan ase delo ki pou koule pour tou dimoun ek zannimo bwar.'

Alor Moiz ti rasanble tou dimoun, e dir: 'Ekoute, zot ki napa konfyans dan Bondye! Eski mwan ek Aaron nou bezwen tir delo dan sa ros pour zot?'

Apre Moiz ti tap sa ros de fwa avek en baton, e en gran toran delo ti sorti dan sa ros. Ti annan ase delo pour tou dimoun ek zannimo bwar.



Me Zeova ti ankoler avek Moiz ek Aaron. Eski ou konnen akoz? Akoz Moiz ek Aaron ti dir ki *zot* pou fer delo sorti dan ros. Me se vreman Zeova ki ti'n fer sa. E vi ki Moiz ek Aaron pa ti'n dir laverite konsernan sa, Zeova ti dir ki i pou pini zot. 'Zot pa pou fer mon pep antre an Kanaan,' i ti dir.

Deswit apre bann Izraelit ti kit Kades. En pe letan apre, zot ti ariv kot Montanny Or. La, anler lo montanny, Aaron ti mor. Aaron ti annan 123 an letan i ti mor. Bann Izraelit ti vreman sagren, alor pour 30 zour tou dimoun ti plere pour Aaron. Son garson Eleazar ti vin lot gran pret nasyon Izrael.


Nonm 20:1-13, 22-29; Deteronnm 29:5.



**E**SKI sa i parey en vre serpan ki'n anpay en potò? I pa vre. Sa serpan in ganny fer avek kwiv. Zeova in demann Moiz pour met li lo sa potò afen ki bann dimoun i get li e kontinyen viv. Me lezot serpan ki ater zot vre. Zot in mord bann dimoun e fer zot malad. Eski ou konnen akòz?

Akòz bann Izraelit ti koz kont Bondye ek Moiz. Zot ti konplent an dizan: 'Akòz ou'n retir nou Lezip pour mor dan dezer? Napa manze ni delo isi. E nou nepli kapab manz sa lamann.'

Me lamann ti en bon manze. Par en mirak Zeova ti donn zot. E i ti donn zot delo osi par fer en mirak. Me bann dimoun pa ti rekonesan pour fason ki Bondye ti'n pran swen avek zot. Alor Zeova ti anvoy sa bann serpan anpwazonnen pour pini bann Izraelit. Bann serpan ti mord zot, e en kantite zot ti mor.



Finalman bann dimoun ti vin kot Moiz e dir: ‘Nou’n fer pese, akoz nou’n koz kont Zeova ek ou. Aprezan priy Zeova pour ki i tir sa bann serpan.’

Alor Moiz ti priy pour sa bann dimoun. E Zeova ti demann Moiz pour fer sa serpan an kwiv. I ti demann li pour met sa serpan lo en potò, afen ki nenport dimoun ki ganny morde i devret get sa serpan. Moiz ti fer egzakteman sa ki Bondye ti dir. E bann dimoun ki ti ganny morde ti get sa serpan kwiv e zot ti vin byen ankòr.

I annan en leson pour aprann atraver sa. Nou tou, dan en fason nou parey bann Izraelit ki ti ganny morde par sa bann serpan. Nou tou nou dan en kondisyon pour mor. Get toultour ou, ou pou vwar bann dimoun ki’n vin vye, ki malad e bann ki’n mor. Sa i akòz, sa premye zonn ek fanm, Adan ek Ev in tourn kont Zeova, e nou tou nou zot zanfan. Me Zeova in fer en fason afen ki nou kapab viv pour touzour.

Zeova in anvoy son Garson, Zezi Kri lo later. Zezi ti ganny mete lo en potò akòz en kantite dimoun ti krwar ki i pa bon. Me Zeova ti anvoy Zezi pour sov nou. Si nou sers li, si nou swiv li, alor nou pou kapab ganny lavi eternel. Me nou pou aprann plis konsernan sa plitar.

Nonm 21:4-9; Zan 3:14, 15.






**E**SKI ou'n deza antann en bourik koze? 'Non,' ou pou dir. 'Bann zannimo pa kapab koze.' Me Labib i mansyonn en bourik ki ti koze. Annou vwar konman sa ti arive.

Bann Izraelit ti preski pare pour antre an Kanaan. Balak, lerwa Moab, ti per bann Izraelit. Alor i ti anvoy sers en zonn malen ki apel Balaam pour donn malediksyon bann Izraelit. Balak ti promet pour donn Balaam en kantite larzan, alor Balaam ti mont lo son bourik e konmans vwayaze pour al vwar Balak.

Zeova pa ti oule Balaam modi Son pep. Alor i ti anvoy en lanz avek en gran sab debout dan semen pour aret li. Balaam pa ti kapab vwar lanz, me son bourik ti vwar. Alor sa bourik ti kontinyen esey say sa lanz, e finalman i ti zis dormi lo

semen. Balaam ti vreman ankoler, e i ti bat son bourik avek en baton.



Aprè Zeova ti fer Balaam antann son bourik koz avek li. ‘Ki mon’n fer ou pour ou bat mwan?’ sa bourik ti demande.

‘Ou’n fer mwan vin parey en bet,’ Balaam ti reponn. ‘Si mon ti annan en sab mon ti pou’n touy ou!’


‘Eski mon’n deza reazir koumsa avek ou?’ sa bourik ti demande.

‘Non,’ Balaam ti reponn.

Aprè Zeova ti les Balaam vwar sa lanz ki pe debout lo semen avek en sab. Lanz ti dir: ‘Akoz ou’n bat ou bourik? Mon’n vin blok ou semen, akoz ou pa devret pe al modi Izrael. Si ou bourik pa ti’n say mwan, mon ti pou’n touy ou, me mon pa ti pou bles ou bourik.’

Balaam ti dir: ‘Mon’n fer pese. Mon pa ti konnen ki ou pe debout lo semen.’ Lanz ti les Balaam ale, e i ti al vwar Balak. I ti kontinyen esey donn malediksyon Izrael, me, plito, Zeova ti fer li beni Izrael trwa fwa.

Nonm 21:21-35; 22:1-40; 23:1-30; 24:1-25.



**M**OIZ ti anvi al Kanaan avek bann Izraelit. Alor i ti demande: 'Zeova les mwan travers Larivyer Zourden, e vwar sa bon pei.' Me Zeova ti dir: 'Ase! Pa mansyonn sa ankor!' Eski ou konnen akoz Zeova i dir sa?

Akoz sa ki ti arive kan Moiz ti tap sa ros. Rapel, ki li ek



Aaron pa ti onor Zeova. Zot pa ti dir bann dimoun ki se Zeova ki'n fer delo sorti dan sa ros. Se pour sa rezon ki Zeova ti dir ki i pa pou les zot antre an Kanaan.

Alor enn de mwan plitar apre ki Aaron ti'n mor, Zeova ti dir Moiz: 'Pran Zozye, e fer li debout devan gran pret Eleazar ek bann dimoun. E la devan tou dimoun, dir zot ki Zozye i nouvo sef.' Moiz ti fer egzakteman sa ki Zeova ti dir, parey ou kapab vwar dan sa portre.


Apre Zeova ti dir avek Zozye: 'Montre ki ou for, e pa bezwen per. Ou pou gid bann Izraelit dan pei Kanaan ki mon'n promet zot, e mon pou avek ou.'

Plitar Zeova ti demann Moiz pour mont anler lo Montanny Nebo dan pei Moab. La anler Moiz ti kapab get lo lot kote Larivyer Zourden e vwar sa zoli pei Kanaan. Zeova ti dir: 'Sa i sa pei ki mon'n promet pour donn bann zanfan Abraam, Izaak ek Zakob.

Mon'n les ou vwar li, me mon pa pou les ou antre dan sa pei.'

Moiz ti mor la anler lo Montanny Nebo. I ti annan 120 an. I ti ankor for, e i ti ankor kapab vwar byen kler. Bann dimoun ti vremen tris e zot ti plere akoz Moiz in mor. Me zot ti kontan pour annan Zozye konman zot nouvo sef.

Nonm 27:12-23;  
Deteronnm 3:23-29;  
31:1-8, 14-23; 32:45-52; 34:1-12.





**S**A BANN zonn i dan problemm. Zot bezwen sove, sankwa zot pou ganny touye. Zot bann espyon Izraelit, e sa madanm ki pe ed zot i apel Raab. Raab i reste la dan en lakaz lo miray lavil Zeriko. Annou vwar aköz sa bann zonn i dan problemm.

Bann Izraelit ti pare pour travers Larivyèr Zourden pour al Kanaan. Me avan ki zot fer sa, Zozye ti anvoy de espyon. I ti dir zot: 'Al get sa pei ek lavil Zeriko.'

Kan sa de espyon ti ariv Zeriko, zot ti al dan lakaz Raab. Me en dimoun ti al dir lerwa Zeriko: 'De Izraelit in vin isi aswar pour espyonn sa pei.' Kan lerwa ti tann sa, i ti anvoy bann zonn kot Raab, e zot ti konmann li: 'Sa de zonn ki dan ou lakaz, fer zot sorti!' Me Raab ti'n kasyet sa de espyon lo son twa. Alor i ti dir: 'I vre ki ti annan de zonn ki'n vin dan mon lakaz, me mon pa konnen kote zot sorti. Zot in ale zis ler fernwar ti pe konmans fer, avan ki baro lavil i fermen. Si zot degaze, zot a kapab tyonbo zot!' Alor sa bann zonn ti tay deryer sa de espyon.

Aprè ki zot ti ale, Raab ti degaze i ti al anler lo twa. 'Mon konnen ki Zeova pou donn zot sa pei,' i ti dir avek sa de espyon. 'Nou'n antann konman ki i'n fer sek Lanmer Rouz kan zot ti pe kit Lezip, e konman zot in touy lerwa Sionn ek Og. Mon'n azir byen anver zot, alor promet mwan, silvouple, ki zot pou azir byen anver mwan. Sov mon papa ek mon manman, ek mon bann frer ek ser.'

Sa de espyon ti promet ki zot pou fer sa, me Raab ti bezwen fer en keksoz. 'Pran sa lakord rouz e anmar li avek ou lafnet,' sa de espyon ti dir, 'e rasanble tou ou fanmiy dan ou lakaz ansanm avek ou. E kan nou tou nou retournen pour pran Zeriko, nou pou vwar sa lakord avek ou lafnet e nou pa pou touy personnan dan ou lakaz.' Kan sa de espyon ti retourn kot Zozye, zot ti rakont li tou sa ki'n arive.

**R**EGARDE! bann Izraelit pe travers Larivyer Zourden! Me oli delo? Lefe ki en kantite lapli ti tonbe pandan sa letan dan lannen, larivyer ti vremen plen zis en pti pe letan avan. Me aprezan tou delo in ale! E bann Izraelit pe travers lo later sek zis parey zot ti fer kot Lanmer Rouz! Kote tou sa bann delo in ale? Annou vwar.

Kan sa zour ti'n arive pour bann Izraelit travers Larivyer Zourden, par lord Zeova, Zozye ti dir avek bann dimoun: 'Bann pret i devret pran lars lalyans e mars par devan nou. O moman ki pou zot met zot lipye dan delo Larivyer Zourden, delo pou aret koule.'

Alor bann pret ti pran lars lalyans, e anmenn li par devan bann dimoun. Kan zot ti ariv kot Zourden, bann pret ti antre dan delo san ezite. Delo ti pe koul vremen for e i ti fon. Me dek ki zot lipye ti tous delo, delo ti aret koule! Ti en mirak! Zeova ti fer delo aret koul en sel kou. Alor, en





pti moman letan apre ti napa okenn delo dan larivyèr!

Bann pret ki ti pe anmenn lars lalyans ti al tou drwat dan milye larivyèr ki'n sek. Eski ou kapab vwar zot dan sa portre? Anmezir ki zot ti debout la, bann Izraelit ti travers Larivyèr Zourden lo later sek!

Kan tou dimoun ti'n fini traverse, Zeova ti fer Zozye dir avek 12 zonnm for: 'Al dan larivyèr kot bann pret pe debout avek lars lalyans. Anmas 12 ros, e met zot an ta kot zot pe reste aswar. Apre, dan lavenir, kan zot zanfan i demann zot ki sa bann ros i sinifye, zot devret dir zot zanfan ki delo ti aret koule kan lars lalyans Zeova ti travers Zourden. Sa bann ros pou rapel zot sa mirak!' Zozye ti osi met 12 ros kot bann pret ti pe debout dan larivyèr.

Anfen Zozye ti ordonn bann pret ki ti pe anmenn lars lalyans: 'Sorti dan Zourden.' Apenn ki zot ti'n sorti, larivyèr ti konmans koul ankor.

Zozye 3:1-17; 4:1-18.



**K**WA ki pe fer miray Zeriko tonbe? I paret konmsi en gro bonm in tap li. Me dan sa letan zot ti napa bonm; ni menm fizi zot ti napa. I en lot mirak par Zeova! Annou vwar konman ki sa in arive.

Ekoute ki Zeova ti dir avek Zozye: ‘Ou avek ou bann zonn lager zot devret mars otour sa lavil. Mars otour sa lavil enn fwa par



zour pour sis zour. Anmenn lars lalyans avek zot. Set pret i devret mars devan lars lalyans e soufle zot tronpet.’

‘Setyenm zour ou devret mars otour lavil *set* fwa. Apre soufle tronpet pour en bon pe letan, e fer tou dimoun kriy en gran kriye lager. E miray pou tonm aplat ater!’

Zoeye ek bann dimoun ti fer sa ki Zeova in demande. Pandan ki zot ti pe marse, tou dimoun ti gard silans. Person pa ti dir en mo. Sel de keksoz ki ou ti pou kapab tande se son tronpet ek tapaz lipye. Bann lennmi pep Bondye an Zeriko ti bezwen per. Eski ou kapab vwar sa lakord rouz anmare avek sa lafnet? Lafnet lekel sa? Wi, Raab ti fer sa ki sa de espyon ti’n demann li pour fer. Tou son fanmiy ti ansanm avek li dan son lakaz. Zot tou zot ti pe espere.

Finalman, setyenm zour, apre ki zot ti mars otour lavil *set* fwa, bann tronpet ti soufle, bann zonm lager ti kriye e miray ti tonbe. Apre Zoeye ti dir: ‘Touy tou dimoun e bril lavil. Bril tou keksoz. Sov selman bann larzan, lor, kwiv ek feray e met zot dan trezor latant Zeova.’

Zoeye ti dir avek sa de espyon: ‘Al dan lakaz Raab, fer li ek tou son fanmiy sorti.’ Raab ek son fanmiy ti ganny sove, zis parey bann espyon ti promet li.

Zoeye 6:1-25.



**G**ETE ki sa zonn pe antere dan son latant! En zoli rob, e en bar annor ek en pe larzan. I'n pran tousala dan lavil Zeriko. Me ki zot ti sipoze fer avek sa bann keksoz an Zeriko? Eski ou mazine?

Zot ti'n sipoze ganny detrir, e lor ek larzan ti sipoze ganny donner avek trezor tabernak Zeova. Alor sa bann dimoun ti dezobei Bondye. Zot ti vol sa ki pour Bondye. Sa zonn ti apel Akan, e sa bann ki avek li i manm son fanmiy. Annou vwar ki ti arive?

Aprè ki Akan ti vol sa bann keksoz, Zozye ti anvoy serten zonn pour lager kont lavil Ai. Me zot ti perdi laviktwar. Serten ti ganny touye, e larestan ti taye. Zozye ti vremen tris. I ti dormi ater e bes son latet ater e priy Zeova: 'Akoz ou'n les sa arive avek nou?'

Zeova ti reponn: 'Leve! Izrael in fer pese. Zot in pran serten keksoz ki ti'n sipoze ganny detrir oubyen ganny donner avek trezor tabernak Zeova. Zot in vol en zoli rob e gard li sekre. Mon pa pou beni ou ziska ki ou detrir sa bann keksoz, e sa enn




ki'n pran sa bann keksoz.' Zeova ti dir ki i pou montre Zozye lekel sa move zonn.

Alor Zozye ti rasanble tou dimoun, e Zeova ti swazir Akan konman sa move zonn. Akan ti dir: 'Mon'n fer pese. Mon'n vwar en zoli rob, e sa bar lor ek sa bann larzan. Mon ti vremen anvi zot ki mon'n pran zot. Ou pou trouv zot antere dan mon latant.'

Kan sa bann keksoz ti ganny trouve e ganny anmennen kot Zozye, alor Zozye ti dir avek Akan: 'Akoz ou'n anmenn problemn lo nou? Aprezan Zeova pou anmenn problemn lo ou!' E tou dimoun ti konmans anvoy ros lo Akan ek son fanmiy ziska zot mor. Eski sa pa i montre nou ki nou pa devret pran okenn keksoz ki pa pour nou?

Apré sa Izrael ti al lager ankor kont Ai. Sa fwa si Zeova ti ed son pep, e zot ti ranport laviktwar.


Zozye 7:1-26; 8:1-29.



**E**N KANTITE lavil an Kanaan ti pe aprezan met zot pare pour lager kont Izrael. Zot ti mazinen ki zot kapab ranport lavik-twar. Me bann dimoun dan lavil Gibeonn pa ti krwar sa. Zot ti krwar ki Bondye pe ed bann Izraelit, e zot pa ti oule lager kont Bondye. Eski ou konnen ki bann Gibeonnit ti fer?

Zot ti deside pour fer bann Izraelit krwar ki zot bann dimoun ki ti sorti dan en pei tre lwen. Alor serten zonn ti met bann lenz desire e bann sandalet ki ti'n ize. Zot ti sarz zot bourik avek bann vye sak, e pran bann vye dipen sek. Apre zot ti al kot Zozye e zot ti dir: 'Nou sorti dan en pei tre lwen, akoz nou'n antann konsernan zot gran Bondye, Zeova. Nou'n antann konsernan tou sa bann keksoz ki i'n fer pour zot Lezip. Alor nou bann sef in demann nou

pour prepar serten manze pour fer en vwayaz e pour vin dir ou: "Nou ou bann serviter. Promet ki ou pa pou lager kont nou." Ou kapab



vwar ki nou lenz in desire atraver sa gran vwayaz e nou dipen in vye e sek.’


Zoeye ek lezot bann sef ti krwar bann Gibeonnit. Alor zot ti fer en promes ki zot pa pou lager kont zot. Me trwa zour plitar zot ti aprann ki bann Gibeonnit ti reste dan zalantour.

‘Akoz zot in dir nou ki zot sorti dan en pei vreman lwen?’ Zoeye ti demann zot.

Bann Gibeonnit ti reponn: ‘Nou’n fer li aköz nou’n ganny dir ki zot Bondye Zeova in promet pour donn zot Kanaan antye. Alor nou per ki zot touy nou.’ Me bann Izraelit ti gard zot promes, e zot pa ti touy bann Gibeonnit. Plito zot ti fer zot vin zot serviter.


Lerwa Zerizalenm ti ankoler aköz bann Gibeonnit in fer lape avek Izrael. Alor i ti dir avek 4 lezot lerwa: ‘Vin ed mwan pour lager kont Gibeonn.’ E se sa ki sa 5 lerwa ti fer. Eski bann Gibeonnit ti malen pour fer lape avek Izrael, ki aprezan ti fer sa bann lerwa vin lager kont zot? Nou pou vwar.

Zoeye 9:1-27; 10:1-5.



**G**ET Zozye. I pe dir: 'Soley, pa bouze!' E soley pa ti bouze. I ti reste la dan milye lesyel en zournen antye. Zeova ki'n fer sa arive! Me annou vwar aköz ki Zozye ti oule ki soley i kontinyen tape.





Kan sa 5 move lerwa dan pei Kanaan ti konmans lager kont bann Gibeonnit, bann Gibeonnit ti anvoy en zonn demann Zozye led. ‘Vin kot nou vitman!’ i ti dir. ‘Sov nou! Tou bann lerwa dan bann rezyon montanny in vin lager kont ou bann serviter.’

Toudswit Zozye ek tou son bann zonn lager ti ale. Zot ti mars lannwit antye. Kan zot ti ariv Gibeonn, bann solda sa 5 lerwa ti per e zot ti konmans taye. Apre Zeova ti fer bann gran lagrel tonbe sorti dan lesyel, e ti annan plis solda ki ti mor par bann kou lagrel ki bann ki ti’n ganny touye par bann zonn lager Zozye.

Zozye ti vwar ki tre byento soley pou desann. I ti pou fernwar, e en kantite solda sa 5 move lerwa ti pou sove. Se pour sa rezon ki Zozye ti priy Zeova e apre i ti dir: ‘Soley, pa bouze!’ E kan soley ti kontinyen tape, bann Izraelit ti kapab fini ganny sa lager.

Ti annan ankor en kantite move lerwa an Kanaan ki ti ay pep Bondye. Zozye ek son bann larme ti pran 6 an pour lager kont 31 lerwa dan sa pei. Apre ki sa ti’n fini arive, Zozye ti partaz sa pei avek bann tribi ki pa ti ankor ganny en teritwar.

En kantite lannen ti pase, e finalman Zozye ti mor alaz 110 an. Tan ki li ek son bann zanmi ti ankor vivan, bann dimoun ti obei Zeova. Me kan sa bann bon zonn ti mor, bann dimoun ti konmans fer bann move keksoz e zot ti rankontre problem. Se dan sa moman ki zot ti vreman bezwen led Bondye.

Zozye 10:6-15; 12:7-24; 14:1-5; Ziz 2:8-13.





**K**AN bann Izraelit ti rankontre problemn, zot ti kriy Zeova. Zeova ti reponn zot par donn zot bann sef ki ti brav pour ed zot. Labib ti apel zot bann ziz. Zozye ti premye ziz, e serten bann ziz apre li ti apel Otnyel, Eoud ek Samgar. Me de dimoun ki ti ed Izrael ti de madanm ki ti apel Debora ek Yael.

Debora ti en madanm profet. Zeova ti donn li lenformasyon konsernan lavenir, e apre i ti dir bann dimoun ki Zeova ti'n dir. Debora ti osi en ziz. I ti asiz anba en serten pye palm e bann dimoun ti vin kot li pour rod led pour zot problemn.

Pandan sa letan Yabin ti lerwa Kanaan. I ti annan 900 saret lager. Son larme ti telman for ki plizyer bann Izraelit ti ganny forse pour vin serviter Yabin. Sef larme Lerwa Yabin ti apel Sisera.

En zour Debora ti anvoy apel ziz Barak, e i ti dir li:



‘Zeova in dir: “Pran 10,000 zonn e gid zot ziska kot Montanny Tabor. Laba mon pou anmenn Sisera kot ou. E mon pou fer ou ranport laviktwar lo li ek son larme.” ’

Barak ti dir avek Debora: ‘Mon pou ale si ou osi ou vin avek mwan.’ Debora ti al ansannm avek li, me i ti dir avek Barak: ‘Pa ou ki dimoun pou aklanmen pour laviktwar, aköz Zeova pou donn Sisera dan lanmen en madanm.’ E se sa ki ti arive.

Barak ti al kot Montanny Tabor pour zwenn larme Sisera. Toudenkou Zeova ti kree en lavalas, e en kantite larme Sisera ti noye. Me Sisera ti sorti lo son saret e taye.


En pe letan apre Sisera ti vin kot latant Yael. I ti envit li pour antre anndan, e i ti donn li enpe dile. Sa ti fer li an sonmey, e dan en pti moman i ti ronfle sonmey. Apre sa, Yael ti pran en pin latant e i ti anfans dan latet sa move zonn. Plitar, kan Barak ti arive, Yael ti montre li Sisera ki ti’n mor! Alor ou kapab vwar ki sa ki Debora ti’n dir ti vin vre.

Finalman Lerwa Yabin ti ganny touye li osi, e ankor enn fwa bann Izraelit ti viv anpe pour en pe letan.

**D**AN Labib ou pou vwar en liv ki apel Rit. I en zistwar baze lo en fanmiy ki ti viv pandan letan kot ti annan bann ziz an Izrael. Rit ti en zenn madanm ki sorti dan pei Moab; i pa ti en Izraelit. Me kan Rit ti aprann konsernan vre Bondye Zeova, i ti kontan li en kantite. Naomi ti en vye madanm ki ti ed Rit pour aprann konn Zeova.

Naomi ti en madanm Izraelit. Li ek son msye ek zot de garson ti'n al viv dan pei Moab letan ti napa ase manze an Izrael. Apre, en zour msye Naomi ti mor. Plitar sa de garson Naomi ti marye avek de fiy Moabit ki ti apel Rit ek Orpa. Me apre 10 an, sa de garson Naomi ti mor. Naomi ek sa de fiy ti vremen sagren. Ki Naomi ti pou fer aprezan?

En zour Naomi ti deside pour fer en gran vwayaz pour retourn kot son prop pep. Rit ek Orpa ti oule reste avek li, e alor zot



osi zot ti ale. Me apre ki zot ti'n ariv en serten distans lo semen, Naomi ti dir avek sa de fiy: 'Retourn kot zot e reste avek zot manman.'

Naomi ti anbras zot e dir zot orevwar. Degre zot ti kontan Naomi en kantite zot ti konmans plere. Zot ti dir: 'Non! Nou pou al avek ou kot ou pep.' Me Naomi ti reponn: 'Zot devret retournen, mon bann fiy. Zot pou pli byen kot zot.' Alor Orpa ti retourn kot li. Me Rit pa ti retournen.

Naomi ti dir avek Rit: 'Orpa in ale. Ou osi retourn kot ou.' Me Rit ti reponn: 'Pa esey fer mwan kit ou! Les mwan al avek ou. Kot ou ale mon pou ale, e kot ou reste mon pou reste. Ou pep pou vin mon pep, e ou Bondye pou vin mon Bondye. Kot ou mor mon pou mor, e se la ki mon pou antere.' Kan Rit ti dir sa, Naomi pa ti esey fer li retourn kot li ankor.

Finalman sa de madanm ti ariv Izrael. Zot ti reste la. Toudswit Rit ti konmans travay dan plantasyon, akòz i ti'n ariv ler pour anmas lagrenn sereal. En zonn ki ti apel Boaz ti les li anmas lagrenn sereal dan son plantasyon. Eski ou konnen lekel manman Boaz? Ti Raab ki ti reste Zeriko.

En zour Boaz ti dir avek Rit: 'Mon'n antann tou konsernan ou, e konman ou'n pran swen avek Naomi. Mon konnen konman ki ou'n kit ou papa ek ou manman ek ou prop pei e konman ou'n vin reste parmi en pep ki ou pa'n zanmen konnen. Fotespere ki Zeova i azir byen anver ou!'

Rit ti reponn: 'Ou vreman zantiy avek mwan, msye. Ou'n fer mwan santi pli byen par sa bon fason ki ou'n koz avek mwan.' Boaz ti kontan Rit en kantite, e pa ti pran bokou letan avan ki zot ti marye. Naomi ti vreman kontan! Me Naomi ti pli kontan ankor kan Rit ek Boaz ti ganny zot premye garson, Obed. Plitar Obed ti vin granpapa David. Nou pou aprann plis lo David plitar.

**E**SKI ou vwar ki pe arive la? Tousala i bann zonn lager. Bann zonn ki pe bese zot pe bwar delo. Sa zonn ki pe debout pre avek zot se Gideonn. I pe gete konman zot bwar delo.

Get byen bann diferan fason ki sa bann zonn pe bwar delo. Serten in koste zot figir pre avek delo. Me enn pe pran delo avek son lanmen, pour li kapab vwar ki pe pase otour li. Sa i enportan,



akoz Zeova ti'n demann Gideonn pour swazir selman bann zonn ki kontinyen veye pandan ki zot bwar delo. Bondye ti dir ki larestan ti devret retourn kot zot. Annou vwar akoz.

Ankor enn fwa bann Izraelit ti rankontre en kantite problem. Rezon se akoz zot pa ti obeir Zeova. Bann dimoun an Madyann ti ganny pouvwar lo zot e ti pe fer zot ditor. Alor bann Izraelit ti demann Zeova led, e Zeova ti ekout zot.

Zeova ti demann Gideonn pour rasanble en larme, alor Gideonn ti rasanble 32,000 zonn lager. Me lakantite larme ki ti'n vin lager kont Izrael ti 135,000 zonn. E alor Zeova ti dir avek Gideonn: 'Ou annan tro bokou zonn.' Akoz Zeova ti dir sa?

Akoz si Izrael ti ranport laviktwar, zot ti pou kapab krwar ki zot ti'n ranport laviktwar par zot menm. Zot ti kapab krwar ki zot pa ti bezwen led Zeova pour ed zot ranport laviktwar. Alor Zeova ti dir avek Gideonn: 'Dir avek bann zonn ki per retourn kot zot.' Kan Gideonn ti fer sa, 22,000 zonn lager ti retourn kot zot. Sa ti fer ki ti reste selman 10,000 zonn pour lager kont sa 135,000 solda.

Me, ekoute! Zeova ti dir: 'Ou ankor annan tro bokou zonn.' Alor i ti demann Gideonn pour fer bann zonn bwar delo dan sa larivyer e fer bann ki bes zot latet pour bwar delo retourn kot zot. Zeova ti promet: 'Mon pou fer ou ranport laviktwar avek sa 300 zonn ki kontinyen veye anmenmtan ki zot bwar delo.'

Zour pour lager ti arive. Gideonn ti diviz son 300 zonn dan trwa group. I ti donn sak zonn en tronpet ek en vaz avek en flanbo ladan. Anviron minwi, zot ti antour kan zot bann lennmi. Apre, anmenmtan, zot tou zot ti soufle zot tronpet e kas zot vaz, e kriye: 'Sab Zeova e Gideonn!' Kan zot bann lennmi ti leve, zot ti konfize e zot ti per. Zot ti konmans taye, e bann Izraelit ti ranport laviktwar.

**E**SKI ou'n deza fer en promes e apre vwar li difisil pour garde? Sa zonm dan sa portre ti fer, e se pour sa rezon ki i tre sagren. Sa zonm i en ziz, i ti apel Yifta.


Yifta ti viv dan en letan kot bann Izraelit pa ti pe ador Zeova. Ankor enn fwa zot ti pe fer sa ki mal. Alor Zeova ti les bann Amonit fer zot ditor. Sa ti fer bann Izraelit kriy ver Zeova: 'Nou'n fer pese kont ou. Silvouple, sov nou!'

Bann dimoun ti regrete pour sa bann move keksoz ki zot ti'n fer. Zot ti montre ki zot regrete par ador Zeova ankor. E ankor enn fwa Zeova ti ed zot.

Bann dimoun ti swazir Yifta pour lager kont bann move Amonit. Yifta ti vreman anvi Zeova ed li dan sa lager.

Alor i ti promet Zeova: 'Si ou fer mwan ranport laviktwar lo bann Amonit, mon pou donn ou sa premye dimoun ki sorti dan mon lakaz pour vin rankontre mwan kan mon retournen sorti lager.'

Zeova ti ekout promes Yifta, e i ti ed li pour ranport laviktwar. Eski ou konnen lekel sa premye dimoun ki ti vin rankontre li kan i ti retourn kot li. Ti son fiy, son sel zanfan. 'Ar, mon fiy!' Yifta ti kriye. 'Ou vreman fer mwan tris. Me mon'n fer en




promes avek Zeova, e mon pa kapab kas li.'

Kan son fiy ti aprann konsernan son promes, okonmansman li osi i ti sagren. Lefe ki i ti pou bezwen kit son papa ek son bann zanmi. Me i ti pou pas larestan son lavi servi Zeova dan son tabernak an Silo. Alor i ti dir avek son papa: 'Si ou'n fer en promes avek Zeova, ou bezwen gard li.'

Alor fiy Yifta ti al Silo, e i ti pas larestan son lavi servi Zeova dan son tabernak. Kat zour tou le zan bann madanm Izrael ti al vizit li laba, e zot ti pas en bon letan ansanm. Bann dimoun ti kontan fiy Yifta akoz i ti en bon serviter Zeova.

Ziz 10:6-18; 11:1-40.







**E**SKI ou konn non sa zonm pli for ki'n deza viv? I ti apel Sanmson. Se Zeova ki ti donn Sanmson son lafors. Menm avan ki Sanmson ti ne, Zeova ti dir avek son manman: 'Ou pou ganny en garson. Se li ki pou sov Izrael kont bann Filisten.'

Bann Filisten ti bann move dimoun ki ti reste an Kanaan. Zot ti annan en kantite zonm lager, e zot ti fer ditor bann Izraelit. En zour, pandan ki Sanmson ti pe al kot bann Filisten ti reste, en gro lyon ki ti pe gronnyen ti sorti e vin ver li. Me Sanmson ti touy sa lyon avek son lanmen selman. I ti osi touy plizyer santenn move Filisten.

Plitar Sanmson ti kontan en fy ki ti apel Dalila. Bann sef




Filisten ti promet ki zot ti pou donn Dalila 1,100 pyes larzan si i ti dir zot kwa ki fer Sanmson telman for. Dalila ti oule tou sa larzan. I pa ti en vre zanmi avek Sanmson, oubyen avek pep Bondye. Alor i ti kontinyen demann Sanmson kwa ki fer li telman for.

Finalman, Dalila ti reisi fer Sanmson dir li sekre son lafors. ‘Mon seve pa’n zanmen ganny koupe,’ i ti dir. ‘Depi ki mon’n ne, Bondye in swazir mwan pour vin en serviter spesyal pour li ki apel en Nazireen. Si mon seve i ganny koupe, mon pou perdi mon lafors.’

Bon, kan Dalila ti antann sa, i ti fer Sanmson dormi lo son lazam. Apre i ti fer en zomm antre e koup seve Sanmson. Kan Sanmson ti leve, i ti’n perdi son lafors. Apre bann Filisten ti vini e atrap li. Zot ti pers tou le de son lizye, e zot ti fer li vin zot lesklav.

En zour bann Filisten ti fer en gro parti pour ador zot bondye Dagonn, e zot ti tir Sanmson dan prizon pour sikann li. Pandan sa letan son seve ti’n konmans pous ankor. Sanmson ti dir avek sa garson ki ti pe anmenn li: ‘Les mwan tous sa bann pilye ki pe tenir sa batiman.’ Apre Sanmson ti priy Zeova pour donn li lafors, e i ti tyonbo sa bann pilye. I ti kriye: ‘Les mwan mor avek bann Filisten.’ Ti annan 3,000 Filisten dan sa parti, e kan Sanmson ti ploy son lekor kont sa bann pilye, sa batiman ti tonbe e touy tou sa bann move dimoun.

Ziz sapit 13 ziska 16.





# EN PTI GARSON TI SERVI BONDYE

**E**SKI sa pa i en zoli pti garson? I apel Samyel. E sa zonm ki'n met son lanmen lo latet Samyel se Eli, gran pret Izrael. Se papa Samyel Elkana ek son manman Ana ki pe anmenn Samyel kot Eli.

Samyel i annan apepre 4 ou 5 an. Me i pou reste la dan tabernak Zeova avek Eli ek lezot pret. Akoz ki Elkana ek Ana ti donn zot garson ki ti ankor tre zenn pour servi Zeova dan tabernak? Annou vwar akoz.

Zis en pe lannen avan ki sa ti'n arive Ana ti vreman tris. Rezon pour sa se akoz i pa ti kapab ganny en pti baba, e i ti vreman anvi enn. Alor, en zour, kan Ana ti pe vizit tabernak Zeova, i ti priye: 'O Zeova, pa oubliy mwan! Si ou donn mwan en garson, mon promet ki mon pou donn ou li afen ki i kapab servi ou tou son lavi.'

Zeova ti reponn lapriyer Ana, e enn de mwan plitar Ana ti donn nesans Samyel. Ana ti kontan son pti garson, e i ti konmans ansenny li lo Zeova kan i ti ankor pti pti. I ti dir avek son msye: 'Dek ki Samyel i vin ase gran, mon pa pou bezwen pran swen avek li ankor, mon pou anmenn li kot tabernak pour servi Zeova.'

Se sa ki nou vwar Ana ek Elkana pe fer dan sa portre. Lefe ki son paran ti'n ansenny li byen, Samyel ti vreman kontan pour servi Zeova dan son latant. Tou le zan Ana ti anmenn en nouvo lenz ki i ti'n fer pour Samyel.

Anmezir ki lannen ti pase, Samyel ti kontinyen servi Zeova dan son tabernak. Zeova ek bann dimoun ti kontan Samyel. Me Ofni ek Fineas, garson Eli, ti pa bon. Zot ti fer en kantite move keksoz, e zot ti fer lezot dimoun dezobei Bondye. Eli ti devret fer zot aret servi konman pret, me i pa ti fer li.

Samyel pa ti les okenn sa bann move keksoz ki ti pe arive kot tabernak fer li aret servi Zeova. Me lefe ki dan sa letan ti annan en pti gin dimoun ki ti vreman kontan Zeova, sa ti fer ki ti annan en kantite letan depi ki Zeova pa ti'n koz avek en dimoun lo later. Kan Samyel ti vin enpe pli gran se sa ki ti arive:

Samyel ti pe dormi dan tabernak kan en lavwa ti kriy li e fer li leve. I ti reponn: 'La mon la.' I ti leve e tay kot Eli, e i ti dir: 'Ou'n apel mwan, la mon la.'

Me Eli ti reponn: 'Mon pa'n apel ou; al dormi.' Alor Samyel ti al dormi.

Apré sa lavwa ti kriy Samyel pour en dezyenm fwa: 'Samyel!' Alor Samyel ti leve e i ti tay kot Eli. 'Ou'n kriy mwan, e la mon la,' i ti dir. Me Eli ti reponn: 'Mon pa'n kriy ou mon garson. Al dormi.' Samyel ti al dormi.

'Samyel!' sa lavwa ti kriye pour trwazyenm fwa. Alor Samyel ti tay kot Eli. 'La mon la, ou'n bezwen kriy mwan safwasi,' i ti dir. Aprezan Eli ti konnen ki ti bezwen Zeova ki ti pe kriy Samyel. Alor i ti dir avek Samyel: 'Al dormi ankor enn fwa, e si i kriy ou ankor, ou bezwen dir: "Koze Zeova, ou serviter pe ekoute." '

Se sa ki Samyel ti dir kan Zeova ti kriy li ankor. Zeova ti dir avek Samyel ki i ti pe al pini Eli ek son de garson. Plitar Ofni ek Fineas ti mor dan lager avek bann Filisten, e kan Eli ti tann sa ki ti'n arive i ti tonbe e kas son likou e i ti mor. Alor parol Zeova ti'n vin vre.

Samyel ti grandi e i ti vin dernyen ziz an Izrael. Kan i ti'n vye, bann dimoun ti demann li: 'Swazir en lerwa pour diriz nou.' Samyel pa ti oule fer sa, aköz se Zeova ki ti zot lerwa. Me Zeova ti demann li pour ekout bann dimoun.

## *Premye Lerwa Izrael ziska Lanprizonnman an Babilonn*

*Sail ti vin premye lerwa Izrael. Me Zeova ti rezet li, e David ti ganny swazir pour vin lerwa dan son plas. Nou pou aprann en kantite keksoz lo David. Ler i ti en zenn garson, David ti lager avek en zean ki ti apel Golyat. Plitar i ti sove akoz lerwa Sail ti zalou li. Apre, Abigail sa zoli madanm ti anpes David fer en move keksoz.*

*Nou pou aprann en kantite keksoz lo garson David, Salomon, ki ti pran plas David konman lerwa Izrael. Sa trwa premye lerwa Izrael ti dirize pour 40 an. Apre ki Salomon ti'n mor, Izrael ti ganny divize an de Rwayonm. Rwayonm nor ek rwayonm sid.*

*Apre 257 an legzistans, rwayonm nor avek son dis tribi ti ganny detrir par bann Asiryen. Apre 133 lannen, rwayonm sid avek son de tribi ti osi ganny detrir. Safwasi bann Izraelit ti ganny anmennen konman prizonnyen an Babilonn. Katriyenm parti i kouver listwar remarkab pour 510 lannen.*

**G**ET Samyel pe vid delwil lo latet sa zonm. Se sa ki zot ti abitye fer avek en dimoun pour montre ki i'n ganny swazir konman lerwa. Zeova ti'n demann Samyel pour vid delwil lo latet Sail. I en delwil spesyal, i santi bon.

Sail ti panse ki i pa merit vin lerwa. 'Mon sorti dan tribi Benzamen, sa enn pli pti an Izrael,' i ti dir Samyel. 'Akoz ou dir ki mon pou vin lerwa?' Zeova ti kontan Sail aköz i pa ti fer krwar ki i ti gran e enportan. Se pour sa rezon ki Zeova ti swazir li pour vin lerwa.

Me Sail pa ti en dimoun pov, e i pa ti pti pti. I ti sorti dan en fanmiy ris, i ti en zoli garson, i ti pli gran ki lezot Izraelit. Sail ti kapab tay vit osi, e i ti en zonm for. Bann dimoun ti vreman kontan ki Zeova ti'n swazir Sail pour vin lerwa. Zot tou zot ti kriye: 'Viv lerwa!'

Bann lennmi Izrael ti vin pli for ki avan. Zot ti pe kontinyen fer en kantite problenm avek bann Izraelit. Apre ki Sail ti'n vin lerwa, bann Amonit ti vin lager kont zot. Me Sail ti rasanble en gran larme, e i ti ranport laviktwar lo bann Amonit. Sa ti fer bann dimoun kontan ki Sail ti lerwa.

Anmezir ki bann lannen ti pase, Sail ti fer bann Izraelit ranport en kantite laviktwar lo zot bann lennmi. Sail ti osi annan en garson brav, ki ti apel Yonatann. Yonatann ti ed Izrael pour ranport en kantite lager. Bann Filisten ti ankor pli move lennmi bann Izraelit. En zour, en kantite Filisten ti vin lager kont bann Izraelit.


Samyel ti demann Sail pour esper li vin ofer en sakrifis oubyen ofer en kado avek Zeova. Me Samyel ti tarde vini. Sail ti per ki bann Filisten pou konmans lager, alor i ti ofer sa sakrifis

limenm. Finalman kan Samyel ti arive, i ti dir avek Sail ki i ti'n dezobei. 'Zeova pou swazir en lot dimoun pour vin lerwa Izrael,' Samyel ti dir.

Plitar Sail ti dezobei ankor. Alor Samyel ti dir avek li: 'I pli bon pour obei Zeova ki pour ofer li en kado, en pli bon mouton. Akoz ou pa'n obei Zeova, I pa pou gard ou konman lerwa Izrael.'

Nou kapab aprann en bon leson atraver sa. I montre nou konman i enportan pour toutan obei Zeova. I osi montre nou konman ki en bon dimoun parey Sail ti ete i kapab sanze e vin en move dimoun. Nou pa ti a kontan vin pa bon nou osi, pa i vre?

1 Samyel sapit 9 ziska 11;  
13:5-14; 14:47-52; 15:1-35;  
2 Samyel 1:23.







**E**SKI ou kapab vwar ki'n arive la? Sa garson in sov sa pti mouton dan labous sa lours. Sa lours ti'n vin pran sa mouton pour manze. Me sa garson in tay deryer zot, e sov sa mouton dan labous sa lours. Sa lours ti vreman ankoler e i ti debout lo son lapat, sa garson ti atrap li e tap li ziska ki i ti mor. En lot zour i ti sov en mouton dan labous en lyon. Pa i en garson brav? Ou konnen lekel li?

Sa se zenn David. I ti reste dan lavil Betleenm. Son granpapa ti Obed, garson Rit ek Boaz. Eski ou mazin zot? Papa David se Zese. David ti pran swen avek mouton son papa. David ti ne 10 an apre ki Zeova ti'n swazir Sail konman lerwa.

En zour Zeova ti dir avek Samyel: 'Pran enpe delwil spesyal e al kot lakaz Zese an Betleenm. Mon'n swazir enn son garson pour vin lerwa.' Kan Samyel ti vwar premye garson Zese, Eliab, i ti dir dan limenm: 'Sirman i sa enn ki Zeova in swazir.' Me Zeova ti dir li: 'Pa gete konman i zoli e gran. Mon pa'n swazir li pour vin lerwa.'

Alor Zese ti apel son garson Abinadab e i ti anmenn li devan Samyel. Me Samyel ti dir: 'Non, ni menm li Zeova pa'n swazir.' Apre, Zese ti anmenn son garson Sama. 'Non, Zeova pa'n swazir li osi,' Samyel ti dir. Zese ti anmenn set son bann garson kot Samyel, me Zeova pa ti swazir okenn ant zot. 'Eski se tou garson ki ou annan?' Samyel ti demande.

'I reste sa enn pli zenn,' Zese ti dir. 'Me i pe pran swen avek bann mouton.' Kan Zese ti anmenn David kot Samyel, i ti vwar ki i ti en zoli garson. 'Se sa enn,' Zeova ti dir. 'Vid delwil lo son latet.' E se sa ki Samyel ti fer. Sa zour pou arive kan David pou vin lerwa Izrael.

**B**ANN Filisten ti vin lager ankor avek bann Izraelit. Sa trwa pli vye frer David ti aprezan form par larme Sail. En zour Zese ti dir avek David: ‘Pran enpe legren ek dipen anmenn kot ou bann frer. Gete si zot byen.’

Kan David ti ariv kot kan larme, i ti tay dan laliny batay pour rod son bann frer. Golyat, en zean Filisten ti sorti pour sikann bann Izraelit. I ti fer sa tou le bomaten e tou le swar pour 40 zour. I ti kriye: ‘Swazir enn ou zonn pour lager avek mwan. Si i ranport laviktwar e touy mwan, nou pou vin zot lesklav. Si ou oze, swazir en dimoun pour lager avek mwan.’

David ti demann avek serten bann larme: ‘Ki sa zonn ki pou touy sa Filisten e liber bann Izraelit dan laont pou gannyen?’

‘Sail pou donn sa zonn en ta larzan,’ en solda ti reponn. ‘E i pou donn li son fiy pour marye avek.’



Me tou bann Izraelit ti per Golyat akoz i ti telman gro. I ti mezir preski 3 met, e en lot solda ti anmenn son boukliye.

Serten solda ti al dir Sail ki David ti oule lager avek Golyat. Me Sail ti dir avek David: ‘Ou pa kapab lager avek sa Filisten. Ou ankor en pti garson, e sa Filisten in en larme tou son lavi.’ David ti reponn: ‘Mon’n touy en lours ek en lyon ki ti’n pran mouton mon papa. E sa Filisten pou vin parey

enn ant zot. Zeova pou ed mwan.’ Alor Sail ti dir: ‘Ale, e fotespere ki Zeova i avek ou.’

David ti al kot en larivyè e i ti anmas senk ros, i ti met zot dan son sak. Apre i ti pran son fles e i ti avans ver sa zean. Kan Golyat ti vwar li i pa ti oule krwar. I ti mazinen ki ti pou vreman fasil pour touy David.

‘Zis vin kot mwan,’ Golyat ti dir, ‘e mon pou donn ou lekor bann zwazo ek bann zannimo pour manze.’ Me David ti dir: ‘Ou’n vin kot mwan avek en sab, en lans, me mwan mon pe vin kot ou avek non Zeova. Ozordi Zeova pou donn ou dan mon lanmen e mon pou touy ou.’

Apre sa David ti tay ver Golyat. I ti pran en ros dan son sak, i ti met dan son fles e i ti tir son fles avek tou son lafors. Sa ros ti al drwat dan latet Golyat, e i ti tonm ater mor! Kan bann Filisten ti vwar ki zot sanpyon ti’n mor, zot tou zot ti vire e taye. Bann Izraelit ti tay deryer zot e ranport laviktwar.



**A**PRE ki David ti'n touy Golyat, sef larme Izrael Abner ti anmenn li kot Sail. Sail ti vreman dakor avek David. Sail ti fer David vin en sef dan son larme e i ti anmenn li reste dan son lakaz.

Plitar, kan bann Izraelit ti retournen sorti lager kont bann Filisten, bann madanm ti sante: 'Sail in touy milye e David dizenn milye.' Sa ti fer Sail zalou, akoz David ti pe ganny plis loner ki li.

Me garson Sail, Yonatann, pa ti zalou. I ti kontan David en kantite, e David ti kontan Yonatann li osi. Alor Yonatann ek David ti fer en promes avek kanmarad ki zot pou reste zanmi pour touzour.

David ti zwe byen laarp, e Sail ti kontan lanmizik ki David ti zwe. Me en zour Sail ti telman zalou ki i ti fer en keksoz terib. Pandan ki David ti pe zwe laarp, Sail ti pran son lans e anvoy li, an dizan: 'Mon pou klout David avek miray!' Me David ti dekile, e lans ti mank li. Plitar Sail ti mank David ankor avek son lans. Aprezan David ti konnen ki i ti pou bezwen fer atansyon.

Eski ou mazin sa promes ki Sail ti fer? I ti dir ki i ti pou donn son fiy pour vin madanm sa zonm ki touy Golyat. Finalman




Sail ti dir avek David ki i kapab pran son fiy Mikal, me avan i ti pou bezwen touy 100 Filisten. Zis mazin sa! Sail ti pe vreman swete ki bann Filisten i touy David. Me zot pa ti touy li, alor Sail ti donn son fiy David pour vin son madanm.

En zour Sail ti dir avek Yonatann ek tou son bann serviter ki i ti anv i touy David. Me Yonatann ti dir avek son Papa: 'Pa fer ditor David. I pa'n zanmen fer ou okenn keksoz mal. Plito, tou sa ki i'n fer in en gran led pour ou. I ti riske son lavi kan i ti touy Golyat, e kan ou ti vwar sa, ou ti vreman kontan.'

Sail ti ekout son garson, e i ti promet ki i pa ti pou fer ditor David. David ti retourn ankor dan lakaz Sail e i ti servi li zis parey i ti pe fer avan. En zour, toutfwa, pandan ki David ti pe zwe lanmizik, Sail ti ankor enn fwa anvoy son lans lo David. David ti dekile, e sa lans ti tap dan miray. Sa ti fer trwazyenm fwa! David ti konnen ki i ti pou bezwen sove!

Sa zour swar David ti al kot son lakaz. Me Sail ti anvoy serten zonn pour touy li. Mikal ti konn sa ki son papa ti'n deside fer. Alor i ti dir avek son msye: 'Si ou pa sove ozordi swar, demen ou pou mor.' Sa swar Mikal ti ed David pour sove par en lafnet. Pour apepre 7 an David ti bezwen kasyet dan en landrwa apre en lot afen ki Sail pa ti kapab trouv li.

1 Samyel 18:1-30; 19:1-18.



**E**SKI ou konnen lekel sa zoli madanm ki pe vin rankontre David? I ti apel Abigail. I ti entelizan, e i ti anpes David fer en move keksoz. Me avan ki nou aprann konsernan sa annou vwar ki ti arive avek David.

Aprè ki David ti'n sov Sail, i ti kasyet dan en kavern. Son bann frer ek larestan son fanmiy ti vin zwenn li laba. Apepre 400 zonn ti vin



kot li, e David ti vin zot sef. Apre sa, David ti al kot lerwa Moab e i ti dir li: ‘Silvouple les mon papa ek mon manman reste avek ou ziska mon konnen ki pou arive avek mwan.’ Plitar David ek son bann zonm ti kasyet dan montanny.

Se apre sa ki David ti rankontre Abigail. Msye Abigail, Nabal, ti en propriyeter ki ti ris. I ti annan 3,000 mouton ek 1,000 kabri. Nabal ti en move zonm. Me son madanm, Abigail, ti en zoli madanm. I ti konnen konman pour fer bann keksoz ki byen. En fwa i ti sov son fanmiy. Annou vwar konman.

David ek son bann zonm ti bon avek Nabal. Zot ti ede pour protez son bann mouton. Alor, en zour David ti anvoy enn de son bann zonm demann Nabal en led. Bann zonm David ti al kot Nabal pandan ki li ek son bann serviter ti pe koup lalenn bann mouton. Ti en zour festen, e Nabal ti annan en kantite bon keksoz pour manze. Bann zonm David ti dir avek li: ‘Nou’n azir byen anver ou. Nou pa’n vol okenn ou mouton, me nou’n ede pour pran swen avek zot. Aprezan, silvouple donn nou en pe manze.’

‘Mon pa pou donn mon manze bann zonm parey zot,’ Nabal ti dir. I ti koz dan en fason ki ti vreman mal, e i ti dir en kantite move keksoz lo David. Kan bann zonm ti retournen e rakont sa David, David ti vreman ankoler. ‘Pran zot sab!’ i ti dir avek son bann zonm. E zot ti al kot Nabal pour touy li ek son bann zonm.


Enn bann zonm Nabal ti’n antann sa bann move parol, e i ti rakont Abigail sa ki ti’n arive. Toudswit Abigail ti prepar en pe manze, i ti met lo bourik e i ti konmans son semen. Kan i ti rankontre David, i ti desann lo son bourik, i ti salye David e i ti dir: ‘Silvouple msye pa port latansyon lo mon msye Nabal. I en lenbesil, i fer bann keksoz bet. La en kado. Silvouple pran li, pardonn nou pour sa ki’n arive.’

‘Ou en madanm malen,’ David ti reponn. ‘Ou’n anpes mwan touy Nabal, pour fer li pey son mesanste. Aprezan al kot ou anpe.’ Plitar kan Nabal ti mor, Abigail ti vin enn madanm David.



# DAVID TI VIN LERWA

61



**A**NKOR enn fwa Sail ti esey atrap David. Parmi son bann solda i ti pran 3,000 ki ti pli bon e zot ti al rod David. Kan David ti antann sa, i ti anvoy bann espyon pour al gete kote ki Sail ek son bann zonm ti pe kanpe sa swar. Apre David ti demann avek de son bann zonm: ‘Lekel ant zot de ki pou al avek mwan kot kan Sail?’

Abisai ti reponn: ‘Mon pou al avek ou.’ Abisai ti garson Tserouiya, ser David. Pandan ki Sail ek son bann zonm ti pe dormi, David ek

Abisai ti antre dousman dan kan. Zot ti pran lans ek brok delo Sail ki ti zis akote son latet. Personn pa ti vwar oubyen antann zot akoz zot ti dan en profon sonmey.

Aprezan get David ek Abisai. Zot in sove, e zot sen e sof anler lo montanny. David ti kriy avek sef larme Izrael an dizan: ‘Abner, akoz ou pa pe protez ou sef lerwa? Gete! La son lans ek son brok delo?’

Sail ti leve. I ti rekonnet lavwa David, e i ti demande: ‘David ou sa?’ Ou vwar Sail ek Abner la anba?

‘Wi, mon senyer lerwa,’ David ti reponn Sail. E David ti

demande: ‘Akoz ou pe esey atrap mwan? Ki mon’n fer ou? La ou lans, O lerwa. Anvoy enn ou zonm vin serse.’

‘Mon’n mal azir,’ Sail ti admet. ‘Mon’n azir dan en fason bet.’ Apre sa David ti kontiny son semen, e Sail ti retourn kot li. Me David ti dir dan limenm: ‘En zour Sail pou touy mwan. Mon bezwen sove e al dan pei bann Filisten.’ E se sa ki i ti fer. David ti nobou anbet bann Filisten e fer zot krwar ki aprezan i ti dan zot kote.

En zour bann Filisten ti al lager kont Izrael. Pandan lager, Sail ek Yonatann ti ganny touye. Sa ti fer David vreman tris, i ti ekrir en zoli sanson, dan ki i ti sante: ‘Mon vreman tris pour ou, mon frer Yonatann. Konman ou ti presye pour mwan!’

Apre sa David ti retourn Izrael dan lavil Ebronn. Ti annan en lager ant bann zonm ki ti’n swazir garson Sail, Isboset, pour vin lerwa ek lezot zonm ki ti oule ki David i vin lerwa. Me finalman bann zonm David ti ranport laviktwar. David ti annan 30 an kan i ti vin lerwa. I ti dirize an Ebronn pour set an edmi. Serten son bann garson ki ti ne an Ebronn ti Amnonn, Absalonm, ek Adoniya.

En zour David ek son bann zonm ti al kaptir en zoli lavil ki ti apel Zerizalenm. Yoab, en lot garson Tserouiya, ser David, ti ansarz sa lager. Alor David ti rekonpans Yoab par fer li vin sef son larme. Aprezan David ti konmans dirize dan lavil Zerizalenm.

1 Samyel 26:1-25; 27:1-7; 31:1-6;

2 Samyel 1:26; 3:1-21; 5:1-10;

1 Kronik 11:1-9.



# PROBLENM DAN LAKOUR DAVID

**A**PRE ki David ti konmans dirize an Zerizalenm, Zeova ti fer son larme ranport en kantite laviktwar lo son bann lennmi. Zeova ti promet pour donn bann Izraelit pei Kanaan. Aprezan, avek led Zeova, tou sa pei ki Zeova ti'n promet zot ti finalman vin pour zot.

David ti en bon sef. I ti kontan Zeova. Premye keksoz ki i ti fer apre ki i ti'n kaptir Zerizalenm se ki i ti anmenn lars lalyans an Zerizalenm. I ti anvi konstri en tanp dan ki i ti pou met lars lalyans ladan.

Kan David ti'n vin pli vye i ti fer en fot grav. David ti konnen ki i ti mal pour pran en keksoz ki ti pour en lot dimoun. Me en zour swar, kan i ti lo twa son pale, i ti vwar en zoli madanm. I ti apel Batseba, e son msye ti enn bann solda David, ki ti apel Ouriya.

David ti telman anvi pran Batseba konman son madanm ki i ti fer anmenn li dan son pale. Msye Batseba ti'n al lager. David ti dormi avek Batseba e plitar i ti dekouver ki i ti pou ganny en pti baba. David ti vreman enkyet, i ti ekrir Yoab sef son larme en let, dan ki i ti dir li met Ouriya devan dan lager afen ki i ganny touye. Kan Ouriya ti'n mor, David ti marye avek Batseba.

Zeova ti vreman ankoler avek David. Alor i ti anvoy son serviter Natann pour dir li konsernan son pese. Ou kapab vwar Natann la pe koz avek David. David ti vreman regrete pour sa ki i ti'n fer, alor Zeova pa ti met li amor. Me Zeova ti dir: 'Akoz ou'n fer sa bann move keksoz, ou pou ganny en kantite problenm dan ou lakour.' Ki problenm David ti gannyen?

Premyerman, garson Batseba ti mor. Apre, premye garson David Amnonn ti fer fason ki i ti tousel avek son ser Tamar e la i ti fors li pour dormi avek li. Garson David, Absalonm, ti vreman ankoler aköz sa, ki i ti touy Amnonn. Plitar, Absalonm ti ganny faver bokou dimoun, e i ti fer li menm vin lerwa. Finalman, David ti ranport

laviktwar lo Absalonm, ki ti ganny touye. David ti vreman rankontre en kantite problemn.

Antretan, Batseba ti donn nesans en pti garson ki ti apel Salomon. Kan David ti'n vin vye e malad, son garson Adoniya ti esey vin lerwa. Alor David ti demann en pret ki ti apel Tsadok pour vid delwil lo latet Salomon pour montre ki se Salomon ki ti pou vin lerwa. Apre sa David ti mor, alaz 70 an. I ti dirize pour 40 an. Aprezan Salomon ti vin lerwa Izrael.

2 Samyel 11:1-27; 12:1-18; 1 Lerwa 1:1-48.



**S**ALOMON ti en zenn garson kan i ti vin lerwa. I ti kontan Zeova e i ti swiv bann bon konsey ki son papa David ti donn li. Zeova ti dakor avek Salomon, alor en zour swar i ti dir avek li dan en rev: ‘Salomon, ki ou ti a kontan mon donn ou?’

Salomon ti reponn: ‘Zeova mon Bondye, mon ankor zenn e mon pa konnen konman pour dirize. Alor donn mwan konnesans pour diriz ou pep dan en fason drwat.’



Zeova ti dakor avek sa ki Salomon ti demande. Alor I ti dir: ‘Akoz ou’n demann konnesans e non pa pour viv pour lontan oubyen vin ris, mon pou donn ou plis konnesans, plis ki okenn dimoun ki’n deza viv. Me mon pou donn ou osi bann keksoz ki ou pa’n demande, larises ek laglwar.’

En pe letan apre, de madanm ti vin kot Salomon avek en problemn difisil. ‘Sa madanm ek mwan nou reste dan menm lakaz,’ enn ant sa de madanm ti eksplike. ‘Mon ti ganny en pti garson, e de zour plitar li osi i ti ganny en pti garson. En zour swar son pti baba ti mor. Me pandan ki mon ti pe dormi, i ti met son pti baba mor obor mwan e i ti pran mon pti baba. Kan mon ti leve e get sa pti baba mor, mon ti remarke ki i pa ti mon pti baba.’

Apre sa, sa lot madanm ti dir: ‘Non! Sa pti baba ki vivan i mon piti, e sa enn ki’n mor i pour li!’ Sa premye madanm ti reponn: ‘Non! Sa pti baba ki’n mor i ou piti, e sa enn ki vivan i pour mwan!’ Sa de madanm ti kontinyen dispit. Ki Salomon ti pou fer?

I ti demann en sab, e kan i ti ganny en sab i ti dir: ‘Koup sa pti baba an de, e donn sakenn lanmwatye.’


‘Non!’ sa vre manman ti kriye. ‘Silvouple pa touy sa pti baba. Donn li sa madanm!’ Me sa lot madanm ti dir: ‘Pa donn personn ant nou; koup li an de.’

Finalman Salomon ti dir: ‘Pa touy sa pti baba! Donn li sa premye madanm. Se li ki manman sa pti baba.’ Salomon ti konn sa akoz sa vre manman ti kontan son pti baba en kantite ki i ti pare pour donn li sa lot madanm afen ki i pa ganny touye. Kan bann dimoun ti tande konman ki Salomon ti rezourd sa problemn, zot ti vreman kontan pour annan en lerwa ki ti malen.

Pandan ki Salomon ti pe dirize, Bondye ti beni bann dimoun par fer later prodwi en kantite sereal ek fri. Bann dimoun ti met bann zoli lenz e zot ti reste dan bann bon lakaz. Ti annan dekwa bon keksoz pour tou dimoun.

**A**VAN ki David ti mor, i ti donn Salomon bann plan pour konstri tanp Zeova. Salomon ti konstri tanp dan katriyenm lannen ki i ti pe dirize, e konstriksyon ti dire pour set an edmi. En dizenn milye zonn ti travay lo tanp, e sa konstriksyon ti kout en kantite larzan. Sa se akòz ti annan en kantite lor ek larzan ki ti ganny servi.

Sa tanp ti annan de lasanm prensipal, zis parey tabernak ti annan. Me sa de lasanm ti de fwa pli gran ki sa bann ki ti dan



tabernak. Salomon ti met lars lalyans dan sa enn lasanm ki ti dan fon, e lezot keksoz ki ti ganny garde dan tabernak ti ganny met dan sa lot lasanm.

Kan tanp ti fini ganny konstri, ti annan en gran lafet. Salomon ti azenou devan tanp e i ti priye, parey ou kapab vwar dan sa portre. ‘Ni menm lesyel pa ase gran pour tenir ou,’ Salomon ti dir avek Zeova, ‘aprezan, konbyen mwens, sa tanp i kapab tenir ou. Me, silvouple O mon Bondye ekout ou pep kan zot priy dan sa landrwa.’

Kan Salomon ti fini priye, dife ti desann sorti dan lesyel. I ti bril sa sakrifis zannimo ki ti’n ganny ofer. E en lalimyer briye sorti kot Zeova ti ranpli tanp. Sa ti montre ki Zeova ti pe ekoute, e ki i ti kontan sa tanp ek lapriyer Salomon. Aprezan plito ki zot ti ador Zeova dan tabernak bann dimoun ti ador li dan tanp.

Pour en bon pe letan Salomon ti diriz byen, e bann dimoun ti ere. Me Salomon ti marye avek en kantite madanm ki ti sorti dan lezot pei. Sa bann madanm pa ti ador Zeova. Eski ou kapab vwar enn sa bann madanm pe ador en zidol? Finalman, bann madanm Salomon ti nobou antrenn li pour ador lezot bondye. Eski ou konnen ki ti arive kan Salomon ti fer sa? I ti nepli tret bann dimoun byen. I ti vin kriyel, e bann dimoun ti nepli ere.

Zeova ti vreman ankoler avek Salomon, e i ti dir li: ‘Mon pou aras ou rwayonm e mon pou donn en lot zonn. Mon pa pou fer sa dan ou letan, me dan letan ki ou garson pou dirize. Me mon pa pou aras li tou dimoun dan sa rwayonm.’ Annou vwar konman ki sa ti arive.

1 Kronik 28:9-21; 29:1-9; 1 Lerwa 5:1-18;  
2 Kronik 6:12-42; 7:1-5; 1 Lerwa 11:9-13.





**E**SKI ou konnen akoz sa zonn pe desir son rob par morso? Se Zeova ki ti'n demann li pour fer sa. Sa zonn i en profet, i apel Aiya. Kisisa en profet? En profet i en dimoun ki Bondye i dir li bann keksoz ki pou arive dan lavenir.



Dan sa portre Aiya pe koz avek Yarobam, en zonn ki Salomon ti fer li sirvey serten son travay konstriksyon. Kan Aiya ti zwenn Yarobam la lo semen, Aiya ti fer en keksoz drol. I ti tir son nouvo rob ki ti lo li e i ti desir li an 12 morso. I ti dir avek Yarobam: ‘Pran 10 bout pour ou.’ Eski ou konnen akòz Aiya ti donn Yarobam 10 bout?

Aiya ti eksplike ki Zeova ti pe al pran rwayonnm avek Salomon. I ti dir ki Zeova ti pe al donn Yarobam 10 tribi. Sa i vadir ki garson Salomon, Reabam, ti pou ganny 2 tribi pour li dirize.

Kan Salomon ti antann sa ki Aiya ti’n dir Yarobam, i ti vremen ankoler. I ti esey touy Yarobam. Me Yarobam ti sove e al Lezip. En pe letan apre Salomon ti mor. I ti dirize pour 40 an, me aprezan son garson Reabam ti vin lerwa. Laba Lezip, Yarobam ti tandè ki Salomon ti’n mor, alor i ti retourn Izrael.

Reabam ti en move lerwa. I ti pli pa bon ki son papa Salomon. Yarobam ek serten lezot zonn enportan ti al kot lerwa Reabam e zot ti demann li pour pa tret bann dimoun dir. Me Reabam pa ti ekoute. Annefe, i ti vin pli pa bon ki avan. Alor bann dimoun ti fer Yarobam vin lerwa lo 10 tribi, me tribi Benzamen ek Zida ti kontinyen gard Reabam konman zot lerwa.

Yarobam pa ti oule ki son pep ti al Zerizalenm pour ador Zeova dan tanp. Alor i ti fer 2 bef annor e fer bann dimoun sa 10 tribi ador zot. Sa pei pa ti tarde pour ranpli avek vyolans ek krim.

Ti annan problemn osi dan rwayonnm sa 2 tribi. Dan mwens ki 5 an apre ki Reabam ti’n vin lerwa, lerwa Lezip ti vin lager kont Zerizalenm. I ti pran en kantite trezor dan tanp Zeova. Alor tanp ti nepli dan sa leta ki i ti ete letan i ti’n fek ganny konstri.

**A**PRE ki lerwa Yarobam ti mor, sak lerwa ki ti diriz sa 10 tribi dan nor Izrael ti move. Lerwa Aab ti pli move lerwa dan tou. Eski ou konnen akoz? En pli gran rezon se akoz son madanm Larenn Zezabel, ti move.

Zezabel pa ti en madanm Izraelit. I ti fiy lerwa Sidonn. I ti ador sa fo bondye Baal, e i ti osi fer Aab ek en kantite Izraelit ador Baal. Zezabel ti ay Zeova e i ti touy en kantite profet Zeova. Lezot ti bezwen kasyet dan bann lakav afen ki zot pa ganny touye. Si Zezabel ti oule en keksoz i ti pou menm touy en dimoun pour li ganny sa keksoz.

En zour lerwa Aab ti vreman tris. Alor Zezabel ti demann li: ‘Akoz ou tris ozordi?’

‘Akoz sa ki Nabot in dir mwan,’ Aab ti reponn. ‘Mon ti oule aste son plantasyon rezen. Me i’n dir mwan ki mon pa pou kapab aste.’

‘Pa trakase,’ Zezabel ti dir. ‘Mon pou pran sa plantasyon pour ou.’

Alor Zezabel ti ekrir en let serten zonn ki ti sef dan lavil kot Nabot ti reste. I ti dir zot: ‘Fer serten bann bon nanryen dir ki Nabot in donn malediksyon Bondye ek lerwa.’ I ti kontinyen: ‘Aprè fer Nabot al an deor lavil e anvoy ros lo li ziska ki i mor.’

Osito ki Zezabel ti antann ki Nabot ti’n mor, i ti dir avek Aab: ‘Aprèzan ale e pran son plantasyon.’ Eski pa ou dakor ki Zezabel ti merit ganny pini akoz i ti fer sa move keksoz?

Alor, plitar, Zeova ti anvoy Yeou pour pini li. Kan Zezabel ti antann ki Yeou ti pe vini, i ti penn son lizye e i ti esey aranz li pour fer li zoli. Me kan Yeou ti vini e i ti vwar Zezabel par lafnet, i ti kriy avek bann zonn ki ti dan pale: ‘Larg li anba!’ Sa bann zonn ti obei, parey ou kapab vwar dan sa portre. Zot ti anvoy li anba, e i ti mor. Sa ti lafen sa move Larenn Zezabel.



# YEOSAFAT TI MET KONFYANS DAN ZEOVA

67

**E**SKI ou konnen lekel sa bann zonm e ki zot pe fer? Zot pe al lager, e sa bann ki la devan zot pe sante. Petet ou kapab demande: 'Akoz sa bann ki pe sante napa sab ek lans pour lager avek?' Annou vwar.

Yeosafat ti lerwa 2 tribi Izrael. I ti viv dan menm letan ki lerwa Aab ek larenn Zezabel ti diriz sa 10 tribi dan nor. Me Yeosafat ti en bon lerwa, e son papa Aza ti osi en bon lerwa. Alor pour en kantite lannen bann dimoun dan sa 2 tribi dan sid ti pe viv dan lape ek trankilite.

Me apre sa, ti annan en keksoz ki ti arive ki ti fer bann dimoun per. Bann mesaze ti vin raport avek Yeosafat: 'En gran larme ki sorti dan pei Moab, Amonn ek Montanny Seir pe vin atak ou.' En kantite



Izraelit ti rasanble an Zerizalenm pour resers led Zeova. Zot ti al kot tanp, e laba Yeosafat ti priye: ‘O Zeova nou Bondye, nou pa konnen ki pour fer. Nou san defans kont sa gran larme. Nou pe resers ou led.’

Zeova ti ekoute, e i ti fer enn son serviter dir avek bann dimoun: ‘Pa zot ki pou lager, me Bondye. Zis gete, e vwar konman Zeova pou sov zot.’

Alor lanmen bomaten, Yeosafat ti dir avek bann dimoun: ‘Annan konfyans dan Zeova!’ Apre sa i ti met bann santer par devan son bann solda, e anmezir ki zot ti marse zot ti sant bann sanson louanz pour Zeova. Eski ou konnen ki ti arive kan zot ti ariv sa landrwa kot ti pou annan lager? Zeova ti fer zot bann lennmi lager antre zot. Kan bann Izraelit ti arive, tou zot bann lennmi ti’n mor!

Eski Yeosafat pa ti’n byen fer pour met konfyans dan Zeova? I pou byen si nou osi nou met konfyans dan Zeova.

1 Lerwa 22:41-53; 2 Kronik 20:1-30.





**S**IPOZE ou'n mor, konman ou manman ti pou santi si en dimoun ti redonn ou lavi? I ti pou vreman kontan! Me eski en dimoun ki'n mor i kapab reviv ankor? Eski sa in deza arive avan?

Get sa zonn la, ek sa madanm ek sa pti garson. Sa zonn i en profet, i apel Eliya. Sa madanm napa msye e i reste dan lavil Tsarfat, e sa i son pti garson. En zour sa pti garson ti tonm malad. Son maladi ti vin grav ziska ki finalman i ti mor. Eliya ti dir avek sa madanm: 'Donn mwan sa pti garson.'

Eliya ti anmenn sa pti garson dan lasanm anler dan letaz e i ti met li lo en lili. Apre i ti priye: 'O Zeova, fer sa pti garson viv ankor.' E sa pti garson ti konmans respire! Apre sa Eliya ti anmenn li kot son manman e i ti dir avek li: 'Gete, ou pti garson i vivan!' Son manman ti vreman kontan.

En lot profet enportan Zeova ti apel Elisa. Li osi i ti ganny pouvwar pour fer mirak. En zour Elisa ti al dan lavil Sounenm. Laba ti annan en madanm ki ti vreman zantiy avek li. Plitar sa madanm ti ganny en pti garson.

Sa pti garson ti grandi, e en zour bomaten, i ti al vwar son papa ki ti pe travay dan plantasyon. En pti moman i ti konmans plennyen: 'Mon latet i fer mal!' Apre ki i ti'n ganny anmennen kot li, sa pti garson ti mor. Son manman ti vreman sagren. Toudswit i ti al sers Elisa.

Kan Elisa ti arive, i ti al dan lasanm avek sa pti garson ki ti'n mor. I ti priy Zeova, e i ti dormi lo lekor sa pti garson. Lekor sa pti garson ti konmans sofe e i ti eternen 7 fwa. Son manman ti vreman kontan pour vwar son garson vivan ankor.

I annan en kantite, en kantite dimoun ki'n mor. Sa ti fer zot fanmiy ek zanmi vreman tris. Nou napa pouvwar pour resisit bann dimoun ki'n mor. Me Zeova i annan. Plitar nou pou aprann konman i pou fer plizyer milyon dimoun viv ankor.



**E**SKI ou konnen ki sa pti fiy pe dir? I pe rakont sa madanm konsernan profet Zeova, Elisa ek sa bann keksoz merveye ki Zeova in ed li pour fer. Sa madanm pa konn nanryen lo Zeova akoz i pa en Izraelit. Aprezan, annou vwar akoz ki sa pti fiy ti dan lakaz sa madanm.

Sa madanm ti en Siryen. Son msye ti apel Naamann, e i ti sef larme Siryen. Bann Siryen ti'n kaptir sa pti fiy, e zot ti'n anmenn li kot madanm Naamann pour vin son serviter.

Naamann ti annan en move maladi ki ti apel lalep. Sa kalite maladi ti kapab fer laser en dimoun sorti. Sa pti fiy ti pe dir avek madanm Naamann: 'Mon swete ki mon met ti kapab al kot profet Zeova an Izrael. I ti pou geri son lalep.' Plitar, sa ti ganny raporte avek msye sa madanm.



Naamann ti vreman anvi ganny geri; alor i ti deside pour al Izrael. Kan i ti ariv Izrael, i ti al kot lakaz Elisa. Elisa ti fer enn son serviter al kot Naamann e demann li pour lav li dan Larivyer Zourden set fwa. Sa ti fer Naamann vreman ankoler, e i ti dir: ‘Bann larivyer kot mon reste i pli meyer ki okenn larivyer an Izrael!’ Apre ki i ti’n fini dir sa, Naamann ti pe al retourn kot li.

Me enn son serviter ti dir avek li: ‘Msye, si Elisa ti dir ou fer en keksoz difisil, ou ti pou fer li. Aprezan akoz ou pa zis lav ou, parey i’n dir?’ Naamann ti ekout son serviter e i ti al tranp li set fwa dan Larivyer Zourden. Kan i ti fer sa, son laser ti vin ferm e i ti vin an bonn sante!

Naamann ti vreman kontan. I ti retourn kot Elisa e dir li: ‘Aprezan mon asire ki sa Bondye an Izrael i sa sel vre Bondye lo tou later. Alor silvouple pran sa kado avek mwan.’ Me Elisa ti reponn: ‘Non, mon pa pou pran li.’ Elisa ti konnen ki i ti pou mal pour li pran sa kado, akoz se Zeova ki ti’n geri Naamann. Me serviter Elisa, Geazi, ti oule sa kado.

Apre ki Naamann ti’n ale, Geazi ti taye pour zwenn li. ‘Elisa in anvoy mwan vin dir ou ki i oule serten sa bann kado pour donn bann zanmi ki’n fek vin vizite,’ Geazi ti dir. Byensir, sa ti lalang. Me Naamann pa ti konnen ki sa ti lalang; alor i ti donn Geazi serten sa bann keksoz.

Kan Geazi ti retourn kot li, Elisa ti konnen ki i ti’n fer. Zeova ti’n dir li. Alor i ti dir: ‘Akoz ou’n fer sa move keksoz, lalep Naamann pou vin lo ou.’ E se sa ki ti arive toudswit!

Ki nou kapab aprann atraver tousala? Premyerman, nou devret vin parey sa pti fiy e koz lo Zeova. I pou kapab fer en kantite dibyen. Dezyenmman, nou pa devret vin vantar parey Naamann ti ete okonmansman, me nou devret obei bann serviter Zeova. E trwazyenmman, nou pa devret koz lalang parey Geazi ti fer. Eski pa nou aprann en kantite keksoz ler nou lir Labib?

**G**ET sa zonn dan delo. Pa i dan en gran maler? Sa pwason pe al anval li! Eski ou konnen lekel sa zonn? I apel Yona. Annou vwar akoz ki i'n ganny sa maler.

Yona ti en profet Zeova. En pe letan apre ki Elisa ti'n mor, Zeova ti donn Yona sa lord: 'Al kot sa gran lavil Niniv. Bann dimoun laba pe fer en kantite move keksoz. Mon oule ki ou koz avek zot.'

Me Yona pa ti oule ale. Alor, i ti mont lo en bato ki ti pe al dan en lot direksyon avek Niniv. Zeova pa ti kontan ditou ki Yona ti pe sove. Alor, i ti fer en gro tanpet. Divan ti soufle telman for ki sa bato ti pros pour koule. Bann maren ti vreman per, e zot ti kriy zot bann bondye pour ed zot.

Finalman, Yona ti dir zot: 'Mon ador Zeova, sa Bondye ki'n kree lesyel ek later. Mon pe sove, akoz mon pa oule fer sa ki Bondye in demann mwan pour fer.' Alor bann maren ti demande: 'Ki nou pou fer avek ou pour ki sa tanpet i arete?'

'Anvoy mwan dan lanmer, e lanmer pou kalme,' Yona ti dir. Bann maren pa ti oule fer sa, me lefe ki sa tanpet ti pe vin pli pir zot ti finalman anvoy Yona dan lanmer. Toudswit sa tanpet ti arete, e lanmer ti revin kalm ankor.

Kan Yona ti koule, sa gro pwason ti anval li. Me i pa ti mor. Pour trwa zour e trwa lannwit i ti dan vant sa pwason. Yona ti regrete ki i pa ti'n obei Zeova e al Niniv. Eski ou konnen ki i ti fer?

Yona ti priy Zeova e demann li pour ed li. Apre sa Zeova ti fer sa pwason vomi Yona lo later sek. Apre sa Yona ti al Niniv. Eski sa pa i montre nou konman ki i enportan pour fer nenport keksoz ki Zeova i demande?




# BONDYE IN PROMET EN PARADI

71

**S**A I en portre en paradi ki Bondye ti'n kapab montre son profet Izai. Izai ti viv en pe letan apre Yona.

Sa mo paradi i vedir "zarden." Eski sa paradi ki ou vwar dan sa portre pa fer ou mazin okenn keksoz ki nou'n deza vwar dan sa liv? Pa i parey sa zoli zarden ki Zeova ti fer pour Adan ek Ev? Me eski en zour later antye pou vin en paradi?

Zeova ti demann son profet Izai pour ekrir konsernan sa nouvo paradi pour son pep. I ti dir: 'Loulou ek mouton pou viv ansanm dan lape.





Bann pti bef ek bann pti piti lyon pour manz ansanm, e bann pti zanfann pou pran swen avek zot. Menm en pti baba pa pou ganny ditor si i zwe pros avek en serpan anpwazonnen.’

‘Sa pa pou zanmen arive,’ en kantite dimoun i kapab dir. ‘I’n toultan annan problemm lo later e i pou toultan annan problemm.’ Me reflexir en kou: Ki kalite lakour ki Bondye ti donn Adan ek Ev?

Bondye ti met Adan ek Ev dan en paradi. Lefe ki zot ti dezobei Bondye zot ti perdi zot zoli lakour, zot ti vin vye e zot ti mor. Sepandan, Bondye ti promet ki i pou donn bann dimoun ki kontan li tou sa ki Adan ek Ev ti’n perdi.


Dan sa nouvo paradi pou napa nanryen ki pou fer nou dimal oubyen detri nou. Pou annan lape perfe. Tou dimoun pou an bonn sante e zot pou viv ere. Tou keksoz pou parey avek sa ki Bondye ti oule okonmansman. Plitar, nou pou aprann konman Bondye pou realiz son plan.

Izai 11:6-9; Revelasyon 21:3, 4.

**E**SKI ou konnen akoz sa zonm pe priy Zeova? Akoz i'n met sa bann let devan lotel Zeova? Sa zonm i apel Izkiya. I lerwa sa de tribi dan sid Izrael. I dan en kantite problemn. Akoz?

Akoz bann larme Asiryen ti'n deza detri sa 10 tribi dan nor. Zeova ti'n les sa arive akoz sa bann dimoun ti vremen move. Aprezan bann larme Asiryen ti'n vin lager kont sa 2 tribi dan sid.

Lerwa Lasiri ti'n fek anvoy bann let pour Lerwa Izkiya. Se sa bann let ki Izkiya ti'n met devan Bondye. Dan sa bann let lerwa Lasiri ti pe monk



Zeova, e i ti pe demann Izkiya pour abandonnen. Izkiya ti priye: 'O Zeova, sov nou dan lanmen lerwa Lasiri. Alor tou nasyon i ava konnen ki ou tousel ou Bondye.' Eski Zeova ti pou ekout Izkiya?

Izkiya ti en bon lerwa. I pa ti parey bann move lerwa sa 10 tribi dan nor Izrael oubyen parey son papa Aaz ki ti en move lerwa. Izkiya ti obzerv byen lalwa Zeova. Apre ki Izkiya ti fini priye, profet Izai ti anvoy li sa mesaz ki ti sorti kot Zeova: 'Lerwa Lasiri pa pou antre an Zerizalenm. Son bann solda pa pou apros avek sa lavil e zot pa pou tir okenn fles kont sa lavil.'

Get sa portre lo sa paz. Eski ou konnen lekel sa bann solda ki'n mor? Zot tou zot bann Asiryen. Zeova ti anvoy son bann lanz, e dan en lannwit 185,000 solda Asiryen ti mor. Alor lerwa Lasiri ti abandonnen e i ti retourn kot li.

Sa de tribi dan sid ti ganny sove, e pour en pe letan bann dimoun ti viv anpe. Me apre ki Izkiya ti mor son garson Manase ti vin lerwa. Manase ek son garson Amonn ki ti vin lerwa apre li, zot ti de move lerwa. Ankor enn fwa sa pei ti ranpli avek vyolans ek krim. Kan lerwa Amonn ti ganny touye par son prop serviter, son garson Yosiya ti vin lerwa sa 2 tribi dan sid.

2 Lerwa 18:1-36; 19:1-37; 21:1-25.







**Y**OSIYA ti annan selman 8 an kan i ti vin lerwa sa 2 tribi dan sid Izrael. I ti ankor byen zenn, alor i ti bezwen led bann dimoun ki ti pli vye ki li, pour li kapab diriz sa nasyon.

Setyenm lannen ki i ti pe dirize, Yosiya ti konmans resers Zeova. I ti swiv legzanp bann bon lerwa konman David, Yeosafat ek Izkiya. Kan i ti ankor en zenn garson, Yosiya ti fer en keksoz brav.

Pour en bon pe letan, laplipar bann Izraelit ti vremen move. Zot ti ador bann fo bondye. Zot ti salye bann zidol. Alor Yosiya ek son bann larme ti konmans retir

bann fo ladorasyon dan sa pei. Sa ti en gro travay akoz ti annan en kantite dimoun ki ti ador bann fo bondye. Ou kapab vwar Yosiya la ek son bann zonn pe kas bann zidol.

Aprè sa, Yosiya ti met trwa zonn ansarz reparasyon tanp Zeova. Zot ti anmas larzan avek bann dimoun e zot ti donn sa bann zonn pour pey sa travay ki ti pou bezwen ganny fer. Letan zot ti pe konstri tanp, gran pret Ilkya ti trouv en keksoz ki ti vremen enportan. Sa ti liv lalwa ki Zeova ti'n fer Moiz ekrir en kantite, kantite letan pase. Sa liv ti'n perdi pour plizyer lannen.

Zot ti anmenn sa liv kot Yosiya, e i ti demann zot pour lir avek

li. Anmezir ki Yosiya ti ekoute i ti rekonnèt ki bann dimoun pa ti pe gard lalwa Zeova. I ti vreman tris konsernan sa, alor i ti desir son lenz, parey ou kapab vwar la. I ti dir: ‘Zeova i ankoler avek nou, akòz nou zanset pa’n gard son bann lalwa ki’n ganny ekrir dan sa liv.’

Yosiya ti demann gran pret Ilkya pour gete ki Zeova ti pou fer avek zot. Ilkya ti al kot sa madanm ki ti apel Oulda, ki ti en profet, e i ti demann li ki pou arive avek zot. Sa madanm ti donn li sa mesaz ki ti sorti kot Zeova pour anmenn kot Yosiya: ‘Zerizalenm ek tou dimoun pou ganny pini akòz zot in ador bann fo bondye e sa pei in ranpli avek mesanste. Me akòz ou, Yosiya, ou’n fer sa ki byen, sa pinisyon pa pou vin letan ou ankòr vivan me apre ki ou’n mor.’

2 Kronik 34:1-28.



**G**ET sa bann dimoun pe sikann sa zennonm. Eski ou konnen lekel li? I apel Zeremi. I ti en profet vreman enportan pour Bondye.

Letan Yosiya ti konmans detri bann zidol, Zeova ti demann Zeremi pour vin Son profet. Toutfwa, Zeremi ti panse ki i ti ankor tro zenn pour vin en profet. Me Zeova ti dir li ki I pou ed li.

Zeremi ti demann bann Izraelit pour aret fer sa bann move keksoz. I ti dir: ‘Bann bondye ki bann dimoun pe adore i fo.’ Me en kantite Izraelit ti prefere ador bann zidol plito ki ador sa vre Bondye. Kan Zeremi ti dir avek bann dimoun ki Bondye ti pou pini zot akoz zot mesanste, zot ti riy li.

Bann lannen ti pase. Yosiya ti mor, e trwa mwan plitar son garson Yeoyakim ti vin lerwa. Zeremi ti kontinyen dir bann dimoun: ‘Zerizalenm pou ganny detri si zot pa sanz zot bann move fason.’ Bann pret ti tyonbo Zeremi e zot ti kriye: ‘Ou devret ganny touye akoz ou pe dir sa bann move keksoz.’ Apre zot ti dir avek bann prens Izrael: ‘Zeremi i devret ganny touye, akoz i’n koz kont nou lavil.’


Ki Zeremi ti pou fer? I pa ti per! I ti dir avek zot tou: ‘Zeova in anvoy mwan vin dir zot sa bann keksoz. Si zot pa sanz zot bann move fason viv, Zeova pou detri Zerizalenm. Me asire ki: Si zot touy mwan, zot pou touy en zonm ki pa’n fer nanryen mal.’

Bann prens ti les Zeremi viv, me bann Izraelit pa ti sanz zot bann move fason. Plitar, Neboukadnetsar, lerwa Babilonn, ti vin lager kont Zerizalenm. Finalman, Neboukadnetsar ti fer bann Izraelit vin son bann serviter. I ti anmenn en kantite Izraelit an Babilonn. Zis mazine konman ou ti pou santi si ou ti ganny anmennen dan en pei etranze!



**L**ERWA Neboukadnetsar ti anmenn tou bann Izraelit ki ti byen edike an Babilonn. Apre sa lerwa ti swazir parmi zot bann ki ti pli zoli e entelizan. Kat parmi zot ti sa bann garson ki ou vwar la. Enn ti apel Danyel, e sa trwa lezot ti apel Sadrak, Mesak ek Abednego.

Neboukadnetsar ti aranze pour form sa bann zenn pour servi dan son pale. Apre trwa an, ki zot ti pou'n fini ganny formen, selman bann ki ti pli entelizan ki ti pou ganny swazir pour ed lerwa rezourd son bann problemm. Lerwa ti oule ki sa bann garson i for e an bonn sante pandan ki zot ti pe ganny zot formasyon. Alor i ti donn lord son bann serviter pour donn zot menm kalite manze ek diven ki li ek son fanmiy ti gannyen.



Get Danyel. Eski ou konnen ki i ti pe dir avek Aspenaz, ki ti sef bann serviter Neboukadnetsar? Danyel ti pe dir li ki i pa oule manz sa bann manze ris lo latab lerwa. Me Aspenaz ti enkyet. ‘Lerwa in deside ki zot pou manze e bwar,’ i ti dir. ‘E si zot pa paret an bonn sante parey lezot zenn, i pou kapab touy mwan.’

Alor Danyel ti al kot sa gardyen ki Aspenaz ti’n met ansarz li ek son trwa zanmi. ‘Silvouple teste nou pour 10 zour,’ i ti dir. ‘Donn nou en pe legim pour manze ek delo pour bwar. Apre sa, konpar nou avek lezot zenn ki pe manz manze lerwa, e vwar lekel ki annan en pli bon laparans.’

Sa gardyen ti dakor pour fer sa. Apre 10 zour, Danyel ek son trwa zanmi ti pli an bonn sante ki lezot zenn. Alor sa gardyen ti les zot kontinyen manz bann legim plito ki manze ki lerwa ti donner.

Alafen trwa an, tou bann zenn ti ganny anmennen kot Neboukadnetsar. Apre ki i ti’n koz avek zot tou, lerwa ti vwar ki Danyel ek son trwa zanmi ti pli entelizan. Alor i ti gard zot pour ed li dan son pale. Nenport ki moman ki lerwa ti demann Danyel, Sadrak, Mesak ek Abednego bann kestyon oubyen donn zot bann problemn difisil, zot ti konn 10 fwa plis ki okenn son bann pret oubyen son bann zonn malen.

Danyel 1:1-21.





**T**I ANNAN plis ki 10 an depi ki lerwa Neboukadnetsar ti'n anmenn tou bann Izraelit ki ti pli byen edike an Babilonn. Aprezan gete ki pe arive! Lavil Zerizalenm pe brile. E bann Izraelit ki pa'n ganny touye pe ganny anmennen konman prizonyen an Babilonn.

Mazinen, ki se sa ki bann profet Zeova ti dir pour arive si bann dimoun pa sanz zot bann move fason. Me bann Izraelit pa ti ekout bann profet. Zot ti kontinyen ador bann fo bondye olye Zeova. Alor bann dimoun ti bezwen ganny pini. Nou konn sa akoz profet Bondye, Ezekyel, i dir nou konsernan bann move keksoz ki bann Izraelit ti pe fer.

Eski ou konnen lekel Ezekyel? I ti en zennonm ki Neboukadnetsar ti anmenn an Babilonn 10 an pase avan ki Zerizalenm ti ganny detri. Danyel ek son trwa zanmi Sadrak, Mesak ek Abednego, zot osi zot ti ganny anmennen an Babilonn sa menm letan.

Pandan ki Ezekyel ti ankor an Babilonn, Zeova ti montre li bann move keksoz ki ti pe arive an Zerizalenm kot tanp. Zeova ti fer sa atraver en mirak. Ezekyel ti ankor an Babilonn, me Zeova ti les li vwar tou sa bann keksoz ki ti pe arive kot tanp. E sa ki Ezekyel ti vwar ti sokan!

'Get sa bann keksoz degoutan ki bann dimoun pe fer kot tanp,' Zeova ti dir Ezekyel. 'Get bann miray ki'n ganny kouver avek portre bann serpan ek lezot zannimo. E get bann Izraelit pe ador zot!' Ezekyel ti kapab vwar sa bann keksoz, e i ti ekrir sa ki ti pe arive.

'Eski ou vwar ki bann sef Izraelit pe fer an sekre?' Zeova ti demann Ezekyel. Wi, i ti kapab vwar sa osi. Ti annan 70 zonm, e zot tou zot ti pe ador bann fo bondye. Zot ti pe dir: 'Zeova pa vwar nou. I'n kit pei.'



Aprè Zeova ti montre Ezekyel serten madanm kot baro tanp ki ti dan nor. Zot ti pe asiz la e pe ador fo bondye Tamouz. E get sa bann zonnm ki dan larantre tanp Zeova! I annan apepre 25 zot. Ezekyel ti vwar zot. Zot ti pe salye ver les e zot ti pe ador soley!

‘Sa bann dimoun napa respe pour mwan,’ Zeova ti dir. ‘Zot pa pe senpleman fer bann keksoz mal me zot vin fer sa bann keksoz kot mon tanp!’ Alor Zeova ti promet: ‘Zot pou santi lafors mon lakoler. Mon pa pou pran pitye pour zot kan zot pou ganny detri.’

Selman trwa an apre ki Zeova ti’n montre Ezekyel sa bann keksoz, ki bann Izraelit ti rebel kont lerwa Neboukadnetsar. Alor i ti al lager kont zot. Enn an edmi plitar, bann Babilonnyen ti kas miray Zerizalenm e bril sa lavil net. Laplipar bann dimoun ti ganny touye oubyen anmennen konman prizonnyen an Babilonn.

Akoz ki Zeova ti’n les sa destriksyon terib arive avek bann Izraelit? Wi, se akoz zot pa ti ekout Li e zot pa ti obei son bann lalwa. Sa i montre nou konman i enportan pour nou fer sa ki Bondye i demande.

En pti gin dimoun ti ganny permisyon pour reste an Zerizalenm. Lerwa Neboukadnetsar ti fer en Zwif ki ti apel Gedalya ansarz sa bann dimoun. Me apre, serten bann Izraelit ti touy Gedalya. Aprezan bann dimoun ti per ki bann Babilonnyen ti pou vin detri zot akoz sa move keksoz ki’n arive. Alor zot ti fors Zeremi pour vin avek zot, e zot ti sove e al Lezip.

Sa ti fer ki ti napa personn ki ti reste an Zerizalenm. Pour 70 lannen personn pa ti reste an Zerizalenm. I ti konpletman vid. Me Zeova ti promet ki i ti pou fer son pep retourn dan sa pei apre 70 lannen. Antretan, ki ti pe arive avek pep Bondye an Babilonn kot zot ti’n ganny anmennen? Annou vwar.

## *Lanprizonnman an Babilonn ziska Rekonstriksyon Miray Zerizalenm*

*Letan ki zot ti an Babilonn konman prizonnyen, lafwa bann Izraelit ti ganny teste plizyer fwa. Sadrak, Mesak ek Abednego ti ganny zete dan en four dife, me Bondye ti retir zot vivan. Plitar, apre ki Babilonn ti'n ganny defet par bann Med ek Pers, Danyel ti ganny zete dan en trou kot ti annan bann lyon, me Bondye ti sov li osi.*

*Finalman, lerwa Pers, Siris ti liber bann Izraelit. Zot ti retourn dan zot pei zis 70 an apre ki zot ti'n ganny anmennen konman prizonnyen an Babilonn. Kan zot ti ariv Zerizalenm premye keksoz ki zot ti fer se ki zot ti konmans konstri tanp Zeova. Toutfwa, zot bann lennmi pa ti tarde pour aret zot travay. Ti pran zot 22 an pour fini konstri tanp.*

*Apre nou pou aprann konsernan vwayaz ki Ezra ti fer pour retourn Zerizalenm pour anbelir tanp. Sa ti 47 an apre ki tanp ti'n fini ganny konstri. Trez an plitar, apre vwayaz Ezra, Neemya ti ede pour rekonstrir miray Zerizalenm. Dan sa senkyenm parti nou pou vwar listwar pour 152 lannen.*

**E**SKI ou mazin sa trwa zenn garson? Wi, zot bann zanmi Danyel ki ti refize manz bann manze ki pa ti bon pour zot. Bann Babilonnyen ti apel zot Sadrak, Mesak ek Abednego. Me get zot aprezan. Akoz zot pa pe salye sa gran stati parey lezot dimoun? Annou vwar.

Eski ou mazin sa bann lalwa ki Zeova limenm ti ekrir ki ti apel 10 Komannman? Premye dan sa bann komannman ti sa: ‘Ou pa devret ador okenn lezot bondye apard ki mwan.’ Sadrak, Mesak ek Abednego ti pe obei sa lalwa, menm si i pa ti en keksoz fasil pour fer.

Neboukadnetsar, lerwa Babilonn, ti apel en kantite dimoun enportan pour vin ador sa stati ki i ti’n fer. I ti’n fek fini dir avek bann dimoun: ‘Kan zot antann son bann tronpet, bann laarp ek lezot lenstriman, zot devret salye e ador sa stati annor. Okenn dimoun ki pa salye e ador sa stati pou osito ganny zete dan en four dife.’

Kan Neboukadnetsar ti aprann ki Sadrak, Mesak ek Abednego pa ti’n salye sa stati, i ti vreman ankoler. I ti fer anmenn zot kot li. I ti donn zot en lot sans pour salye sa stati. Me sa bann zenn garson ti met zot konfyans dan Zeova. ‘Nou Bondye ki nou servi i kapab sov nou,’ zot ti dir avek Neboukadnetsar. ‘Menm si i pa sov nou, nou pa pou salye ou stati annor.’

Neboukadnetsar ti vin pli ankoler. Ti annan en four pre lanmenm, alor i ti donn sa lord: ‘Sof sa four 7 fwa plis ki i ete!’ Apre i ti fer bann zonm ki ti pli for dan son larme anmar Sadrak, Mesak ek Abednego e zet zot dan four. Sa four ti telman so ki laflanm ti touy sa bann zonm for. Me ki ti arive avek sa trwa zenn garson?

Lerwa ti get dan four e i ti vremen per. 'Pa nou'n anmar trwa zom e zet zot dan four?' i ti demande.


'Wi, se sanmenm sa ki nou'n fer,' son bann serviter ti reponn.

'Me mon vwar kat zom pe marse dan milye dife,' i ti dir. 'Zot nepli anmare, e dife pa pe bril zot. E sa enn katriyenm i parey en bondye.' Lerwa ti avans pli pre avek laport four e kriye: 'Sadrak! Mesak! ek Abednego! Sorti, zot serviter Bondye Tre O!'

Kan zot ti sorti, tou dimoun ti vwar ki zot pa ti'n ganny okenn blesir. Apre lerwa ti dir: 'Beni Bondye Sadrak, Mesak ek Abednego! I'n anvoy son lanz e i'n sov zot parski zot pa salye e ador okenn bondye eksepte zot Bondye.'

Eski sa pa i en bon legzanp fidelite anver Zeova pour nou swiv?

Egzod 20:3; Danyel 3:1-30.



**K**I PE arive la? Bann dimoun pe fete. Lerwa Babilonn in envit en kantite dimoun enportan. Zot pe servi bann lakoup annor e an larzan ek bann bol ki zot ti pran dan Tanp Zeova an Zerizalenm. Me, toudenkou, lanmen en zonm ti aparet dan ler e i ti konmans ekrir lo miray. Tou dimoun ti per.

Sa letan Belsatsar, pti zanfan Neboukadnetsar, ki ti lerwa. I ti kriye pour fer anmenn son bann zonm malen. 'Okenn dimoun ki kapab lir sa bann lekritir e dir mwan ki zot oule dir,' lerwa ti dir, 'mon pou donn li en kantite kado e i pou vin trwazyenm dirizan pli enportan dan rwayonm.' Me ti napa enn son bann zonm malen ki ti kapab lir sa bann lekritir lo miray, ni menm dir ki zot vedir.

Manman lerwa ti antann sa bann tapaz e i ti antre dan sa gran lasal kot ti annan lafet. 'Silvouple pa bezwen per,' i ti dir avek



lerwa. 'I annan en zom dan ou rwayonm ki konn bann bondye sen. Kan ou granpapa Neboukadnetsar ti lerwa i ti fer li ansarz tou son bann zom malen. I apel Danyel. Anvoy sers li, e i pou dir ou ki sa bann lekritir i vedir.'

Toudswit Danyel ti ganny anmennen kot lerwa. Apre ki i ti'n refize pran okenn kado, Danyel ti konmans eksplike akoz ki Zeova ti retir granpapa Belsatsar, Neboukadnetsar konman lerwa. 'I ti vantar,' Danyel ti dir. 'E Zeova ti pini li.'

'Me ou,' Danyel ti kontinyen, 'ou konn tou sa ki'n arive avek ou granpapa Neboukadnetsar, me ou'n kontinyen fer vantar parey li. Ou'n anmenn bann lakoup ek bann bol ki ti dan tanp Zeova e ou'n bwat ladan. Ou'n onor bann bondye ki'n ganny fer avek dibwa ek ros, e ou pa'n onor nou Gran Kreater. Se pour sa rezon ki Bondye in anvoy sa lanmen ekrir sa bann parol.'

'Se sa ki'n ganny ekrir,' Danyel ti dir: 'MENE, MENE, TEKEL ek PARSIN.'

'MENE i vedir ki Bondye in kont bann zour ou rwayonm e i pe anmenn li ver en lafen. TEKEL i vedir ki ou'n ganny peze lo en balans e ou pa'n ganny trouve bon. PARSIN i vedir ki ou rwayonm in ganny donnen avek bann Med ek bann Pers.'

Letan ki Danyel ti pe koze, bann Med ek bann Pers ti'n konmans atak Babilonn. Zot ti atak sa lavil e touy Belsatsar. Sa bann lekritir lo miray ti vin vre sa zour swar! Me ki ti pou arive avek bann Izraelit aprezan? Plitar nou pou vwar, me pour konmanse annou vwar ki ti arive avek Danyel.

**I** PARET ki Danyel i dan en ta problemn. Me sa bann lyon pa pe fer li nanryen! Eski ou konnen akoz? Lekel ki'n met Danyel la avek sa bann lyon? Annou vwar.

Aprezan lerwa Babilonn ti apel Daris. I ti kontan Danyel en kantite akoz i ti en bon dimoun e i ti malen. Daris ti swazir Danyel pour vin en sef dan son rwayonm. Sa ti fer lezot zonn dan rwayonm zalou Danyel, alor gete ki zot ti fer.

Zot ti al kot Daris e zot ti dir li: 'Nou tou nou'n dakor, O lerwa, ki ou devret fer en lalwa ki dir ki pour 30 zour personn pa devret priy avek okenn bondye oubyen zonn eksepte ou, O lerwa. Si okenn dimoun i dezobei, alor i devret ganny zete dan en trou ki annan lyon.' Daris pa ti konnen akoz ki sa bann zonn ti oule fer sa lalwa. Me i ti panse ki ti en bon lide, alor i ti fer ekrir sa lalwa. Aprezan sa lalwa pa ti kapab sanze.





Kan Danyel ti antann konsernan sa lalwa, i ti al kot li e i ti priye, zis parey i ti abitye fer. Sa bann move zonnm ti konnen ki Danyel pa ti pou aret priy Zeova. Zot ti kontan, akoz i paret ki zot plan pour debaras zot avek Danyel ti pe marse.

Kan lerwa Daris ti konnen akoz ki sa bann zonnm ti anvi fer sa lalwa, i ti vreman regrete. Me i pa ti kapab sanz sa lalwa, alor i ti donn lord ki Danyel i ganny zete dan trou avek bann lyon. Me lerwa ti dir avek

Danyel: ‘Mon swete ki ou Bondye ki ou servi, pou sov ou.’

Daris ti vreman trakase ki sa swar i pa ti kapab dormi. Lannmen bomaten i ti tay kot trou ki ti annan bann lyon. Ou kapab vwar li la. I ti kriye: ‘Danyel, serviter Bondye vivan! Eski sa Bondye ki ou servi in kapab sov ou avek bann lyon?’

‘Bondye in anvoy son lanz,’ Danyel ti reponn, ‘e i’n ferm labous sa bann lyon afen ki zot pa kapab manz mwan.’

Lerwa ti vreman kontan. I ti donn lord pour retir Danyel dan sa trou. Apre i ti fer zet bann zonnm ki ti oule touy Danyel dan trou kot sa bann lyon ti ete. Zot pa ti ankor ariv anba dan trou nek bann lyon ti sot lo zot e kas tou zot lezo.

Apre lerwa Daris ti ekrir tou dimoun dan son rwayonn: ‘Mon donn sa lord ki tou dimoun i devret respekte Bondye Danyel. I fer bann gran mirak. I’n anpes bann lyon manz Danyel.’



**A** PEPRE de an ti'n pase depi ki Babilonn ti ganny atake par bann Med ek bann Pers. Gete ki pe arive aprezan! Wi, bann Izraelit pe kit Babilonn. Konman ki zot in ganny libere? Lekel ki'n les zot ale?

Se Siris, lerwa Pers ki'n fer sa. Byen lontan avan ki Siris ti ne, Zeova ti fer son profet Izai ekrir lo li: 'Ou pou fer parey ki mon oule ou fer. Bann baro pou reste ouver pour ou atak sa lavil.' E se li menm Siris ki ti ansarz kan Babilonn ti ganny atake. Bann Med ek bann Pers ti vin dan sa lavil aswar e zot ti antre par bann baro ki ti'n ganny kit ouver.

Me profet Zeova, Izai, ti osi dir ki Siris pou donn lord ki Zerizalenm ek son tanp i ganny konstri ankore. Eski Siris ti donn sa lord? Wi, i ti fer. La sa ki Siris ti dir avek bann Izraelit: 'Aprezan al Zerizalenm e konstri tanp Zeova, zot Bondye.' E se sa ki bann Izraelit ti al fer.

Me pa tou Izraelit ki ti an Babilonn ki ti kapab fer sa gran vwayaz pour retourn Zerizalenm. I ti en gran, gran vwayaz ki ti apepre 800 kilomet e en kantite dimoun ti'n tro vye oubyen zot ti malad pour fer sa gran vwayaz. E ti annan lezot rezon akoz



serten bann dimoun pa ti ale. Siris ti dir avek bann ki pa ti kapab ale: ‘Donn larzan ek lor e lezot kado bann dimoun ki pe retournen pour konstri Zerizalenm ek son tanp.’

Bann Izraelit ki ti pe retourn Zerizalenm ti ganny en ta kado. Siris ti donn zot bann bol ek bann lakoup ki lerwa Neboukadnetsar ti’n pran dan tanp Zeova kan i ti detri Zerizalenm. Bann dimoun ti annan en kantite keksoz pour anmenn avek zot.

Apre ki zot ti’n vwayaze pour 4 mwan, bann Izraelit ti ariv Zerizalenm zis atan. I ti zis 70 an depi ki sa lavil ti’n ganny detri, e ti napa personn ki ti pe reste dan sa lavil. Menm si aprezan bann Izraelit ti’n retourn dan zot pei, zot ti pou bezwen fer fas avek bann moman difisil, parey nou pou aprann dan lot zistwar.

Izai 44:28; 45:1-4; Ezra 1:1-11.



# ANNAN KONFYANS DAN ZEOVA

**P**lizyer milye dimoun ti fer sa gran vwayaz depi Babilonn ziska Zerizalenm. Me kan zot ti arive, zot ti vwar en ta dega dan sa lavil. Ti napa personn ki ti pe reste la. Bann Izraelit ti bezwen rearanz tou keksoz.

Premye keksoz ki zot ti fer ti en lotel. Sa ti en landrwa kot zot ti kapab ofer bann zannimo oubyen kado avek Zeova. Enn de mwan plitar bann Izraelit ti konmans konstri tanp. Me zot bann lennmi ki ti pe reste dan bann pei dan zalantour pa ti oule ki bann Izraelit i konstri sa tanp. Alor zot ti esey fer bann Izraelit per pour fer zot aret konstri sa tanp. Finalman, sa bann lennmi ti fer nouvo lerwa Pers fer en lalwa pour aret sa travay.

Bann lannen ti pase. Ti fer 17 an depi ki bann Izraelit ti'n retourn Zerizalenm. Zeova ti anvoy son profet Agai ek Zekarya pour demann bann dimoun pour rekonmans konstri tanp. Bann dimoun ti annan konfyans ki Bondye pou ed zot, e zot ti obei sa de profet. Zot ti konmans konstri ankor, menm si ti annan en lalwa ki ti dir ki zot pa ti merit konstri tanp.

Alor en zofisye Pers ki ti apel Tatenai ti vini e demann bann Izraelit ki drwa zot annan pour konstri sa tanp. Bann Izraelit ti dir li ki kan zot ti Babilonn, Lerwa Siris ti dir zot: 'Aprezan, al Zerizalenm e konstri tanp Zeova, zot Bondye.'

Tatenai ti anvoy en let Babilonn dan ki i ti demande si Siris, ki ti'n mor aprezan, ti'n vreman dir sa. Deswit nouvo lerwa Pers ti rann larepons e i ti dir ki Siris ti'n vreman dir sa. Lerwa ti ekrir: 'Les bann Izraelit konstri tanp zot Bondye. E mon donn zot lord pour ed zot.' Dan apepre 4 an tanp ti'n fini ganny konstri, e bann Izraelit ti vreman kontan.

Bokou lannen ti pase. Ti fer apepre 48 an depi ki tanp ti'n fini konstri. Bann dimoun an Zerizalenm ti mizer, e sa lavil ek tanp Bondye pa ti dan

en bon leta. Ezra en Izraelit ki ti an Babilonn ti aprann konsernan sa bezwen pour aranz tanp Bondye. Eski ou konnen ki i ti fer?

Ezra ti al kot Artazekses, lerwa Pers, e sa bon lerwa ti donn Ezra en kantite kado pour anmenn Zerizalenm. Ezra ti demann bann Izraelit ki ti an Babilonn pour ed li pour anmenn sa bann kado Zerizalenm. Apepre 6,000 dimoun ti dakor pour ale. Zot ti annan en kantite larzan ek lor ek lezot keksoz presye pour anmenn avek zot.

Ezra ti en pe enkyet, akoz ti annan bann move zonn dan semen. Sa bann zonn ti kapab pran zot larzan ek lor, e touy zot. Alor Ezra ti rasanble bann dimoun, parey ou kapab vwar dan sa portre. Apre zot ti priy Zeova pour protez zot pandan zot gran vwayaz pour retourn Zerizalenm.

Zeova ti protez zot. Apre ki zot ti'n vwayaze pour 4 mwan, zot ti ariv sen e sof an Zerizalenm. Eski sa pa i montre nou ki Zeova i kapab protez bann ki annan konfyans dan li?

Ezra sapit 2 ziska 8.




**A**NNOU vwar ki ti arive enn de lannen avan ki Ezra ti al Zerizalenn. Mordekai ek Ester ti de Izraelit pli enportan dan rwayonm Pers. Ester ti larenn, e son kouzen Mordekai ti dezyenm apre lerwa. Annou vwar konman ki sa ti arive.

Paran Ester ti mor letan i ti ankor pti pti, alor Mordekai ti pran swen avek li. Asweris, lerwa Pers, ti annan en pale dan lavil Siz, e Mordekai ti enn son serviter. Byen, en zour Vasti, madanm lerwa, pa ti obei li, alor lerwa ti swazir en lot madanm pour vin son larenn. Eski ou konnen lekel sa madanm ki i ti swazir. Wi, se Ester, sa zoli fiy.

Eski ou vwar sa zonm vantar ki bann dimoun pe salye li? Sa se Amann. I ti en zonm tre enportan an Pers. Amann ti oule ki Mordekai, ki ou kapab vwar li pe asize la, i salye li osi. Me Mordekai pa ti oule fer sa. I ti santi ki i pa ti byen pour salye en move zonm parey Amann. Sa ti fer Amann vreman ankoler. Gete ki i ti fer.

Amann ti rakont lerwa en ta lalang lo bann Izraelit. 'Zot bann move dimoun ki pa obei ou bann lalwa,' i ti dir. 'Zot devret ganny met amor.' Asweris pa ti konnen ki son madanm, Ester, ti en Izraelit.



Alor i ti ekout Amann, e i ti fer sorti en lalwa ki tel zour bann Izraelit ti pou ganny touye.

Kan Mordekai ti antann konsernan sa lalwa, i ti vreman enkyet. I ti anvoy en mesaz kot Ester: 'Ou bezwen dir lerwa, e enplor li pour sov nou.' Ti kont lalwa Pers pour al kot lerwa si ou pa ti'n ganny envite. Me Ester ti ale san ki i ti ganny envite. Lerwa ti avans son baton annor anver Ester, sa ti vedir ki i pa ti pou ganny touye. Ester ti envit lerwa ek Amann en gran repa. Pandan sa repa lerwa ti demann Ester ki faver ki i ti oule demann li. Ester ti dir ki i pou dir li si li ek Amann i vin en lot repa son lanmen.

Pandan sa repa Ester ti dir avek lerwa: 'Mon pep ek mwan nou pe al ganny touye.' Lerwa ti ankoler. 'Lekel ki anvi fer sa?' i ti demande.

'Se sa move zonn, Amann!' Ester ti dir.

Aprezan lerwa ti vreman ankoler. I ti donn lord pour touy Amann. Apre sa lerwa ti fer Mordekai vin dezyenm dan pouvwar apre li. Mordekai ti fer en nouvo lalwa ki ti permet bann Izraelit pour lager pour zot lavi sa zour ki zot ti sipoze ganny touye. Lefe ki Mordekai ti en zonn enportan aprezan, en kantite dimoun ti ed bann Izraelit, e zot ti sen e sof kont zot bann lenmi.

Liv Labib Ester 1-10.




**G**ET tou sa bann travay ki pe ganny fer la. Bann Izraelit i okipe pe konstri miray Zerizalenm. Kan lerwa Neboukadnetsar ti detri Zerizalenm 152 an pase, i ti kraz miray e bril bann baro sa lavil. Bann Izraelit pa ti konstri sa miray osito ki zot ti retourn Zerizalenm.

Konman bann dimoun ti santi letan zot ti pe reste la pandan tou sa lannen san en miray otour sa lavil? Zot pa ti santi zot an sekirite. Zot bann lennmi ti kapab atak zot fasilman. Aprezan sa zonm, Neemya, pe ed bann dimoun pour rekonstri bann miray. Eski ou konnen lekel Neemya?

Neemya ti en Izraelit ki ti sorti dan lavil Siz kot Mordekai ek Ester ti pe reste. Neemya ti travay





dan pale lerwa, alor i ti'n kapab en bon zanmi avek Mordekai ek Larenn Ester. Me Labib pa dir si Neemya ti pe travay avek msye Ester, Lerwa Asweris. I ti travay pour sa lot lerwa, lerwa Artazekzes.

Mazinen ki Artazekzes ti sa bon lerwa ki ti donn Ezra tou sa larzan pour anmenn Zerizalenm pour aranz tanp Zeova. Me Ezra pa ti konstri miray sa lavil ki ti'n tonbe. Annou vwar konman ki Neemya ti sa enn ki ti fer sa louvraz.

Ti fer apepre 13 an depi ki Artazekzes ti donn Ezra larzan pour aranz tanp. Neemya ti ansarz bann serviter ki ti servi lerwa diven. Ti son travay pour servi lerwa diven e fer sir ki personn pa esey met pwazon dan diven lerwa. Sa ti en travay tre enportan.

Byen, en zour frer Neemya, Anani, ek lezot bann zonn ki ti sorti dan pei Izrael ti vin vizit Neemya. Zot ti rakont li bann problem ki bann Izraelit ti pe



rankontre, e dir li ki miray Zerizalenm pa ti ankor rekonstri. Sa ti fer Neemya vreman tris, e i ti priy Zeova lo la.

En zour lerwa ti remarke ki Neemya ti tris, e i ti demande: ‘Akoz ou tris?’ Neemya ti dir li ki Zerizalenm ti dan en move kondisyon e ki miray pa ti ankor rekonstri. ‘Ki ou oule?’ lerwa ti demande.

‘Les mwan al Zerizalenm,’ Neemya ti dir, ‘afen ki mon a kapab rekonstri miray.’ Lerwa Artazekzes ti zantiy. I ti dir avek Neemya ki i kapab ale, e i ti ed li pour ganny dibwa pour li kapab fer serten travay. Deswit apre ki Neemya ti retourn Zerizalenm, i ti fer bann dimoun konn son plan. Bann dimoun ti kontan sa lide, e zot ti dir: ‘Annou konmans travay.’

Kan bann lennmi ti vwar sa miray pe monte, zot ti dir: ‘Nou pou al touy zot, e aret sa travay.’ Me Neemya ti antann konsernan sa, e i ti donn bann travayer sab ek lans. E i ti dir: ‘Pa bezwen per nou bann lennmi. Lager pour zot frer, pour zot zanfan, pour zot madanm e pour zot lakaz.’

Bann dimoun ti vreman brav. Zot ti gard zot bann zarm pare lizour konman aswar, e zot ti kontinyen konstri miray. Alor dan zis 52 zour miray ti’n fini konstri. Aprezan bann dimoun ti kapab santi zot sen e sof anndan lavil. Neemya ek Ezra ti ansenny bann dimoun lalwa Bondye, e bann dimoun ti ere.

Me keksoz pa ti ankor parey i ti ete avan ki bann Izraelit ti ganny anmennen konman prizonnyen an Babilonn. Se lerwa Pers ki ti pe diriz bann dimoun e zot ti bezwen servi li. Me Zeova ti promet ki i ti pou anvoy en lot lerwa, e sa lerwa ti pou anmenn lape pour bann dimoun. Lekel sa lerwa? Konman i pou anmenn lape lo later? Apepre 450 lannen ti pase avan ki okenn keksoz anplis ti ganny devwale lo sa lerwa. Apre ti annan en pti baba ki ti ne e sa nesans ti tre enportan. Nou pou aprann plis konsernan li dan bann zistwar ki pou swiv.

## *Nesans Zezi ziska son Lanmor*

*Lanz Gabriyel ti ganny anvoye kot en zenn fiy ki ti apel Mari. I ti dir li ki i pou ganny en pti baba ki pou dirize konman lerwa pour touzour. Sa pti baba, Zezi, ti ne dan en park bef, kot bann berze ti vizit li. Plitar, en zetwal ti gid bann zonm dan Les pour al kot sa pti baba. Nou pou vwar lekel ki ti ed zot pour vwar sa zetwal, e konman Zezi ti ganny sove dan sa leseye pour touy li.*

*Apre, nou pou vwar Zezi, letan i ti annan 12 an, pe koz avek bann ansennyan dan tanp. Dizwit an plitar Zezi ti ganny batize, e apre sa i ti fer sa travay ki Bondye ti'n anvoy li pour fer lo later, sa travay pres lo rwayonm e ansennyen. Pour ed li dan son travay, Zezi ti swazir 12 zonm e i ti fer zot vin son bann zapot.*

*Zezi ti osi fer en kantite mirak. I ti noury plizyer milye dimoun avek selman en pti gin pwason ek en pti gin dipen. I ti geri bann ki ti malad e i ti menm lev bann ki ti'n mor. Finalman, nou pou aprann en kantite keksoz ki ti arive avek Zezi pandan bann dernyen zour son lavi, e konman i ti ganny touye. Zezi ti prese pour apepre 3 an edmi, alor parti 6 i kouver listwar pour apepre plis ki 34 lannen.*

**S**A ZOLI madanm i apel Mari. I en Izraelit, ki ti reste dan lavil Nazaret. Bondye ti konnen ki i ti en bon dimoun. Se pour sa rezon ki i ti anvoy son lanz, Gabriyel, pour koz avek li. Eski ou konnen ki lanz Gabriyel ti vin dir Mari? Annou vwar.

‘Rezwir, ou ki’n ganny faver Bondye,’ lanz Gabriyel ti dir. ‘Zeova i avek ou.’ Mari pa ti’n zanmen vwar sa dimoun avan. I ti enkyet, akoz i pa ti konnen ki sa lanz ti oule dir. Me toudswit lanz Gabriyel ti kalme li.

‘Pa bezwen per, Mari,’ i ti dir. ‘Zeova i kontan ou. Se pour sa ki i pe al fer en keksoz merveye pour ou. Ou pou ganny en pti baba. E ou pou apel li Zezi.’

Gabriyel ti kontinyen eksplike: ‘Sa pti baba pou gran, e i pou ganny apele Garson Bondye Tre O. Zeova pou fer li vin lerwa, parey David ti ete. Me Zezi pou vin lerwa pour touzour, e son rwayonm pa pou zanmen fini!’

‘Ki mannyer sa pou arive?’ Mari ti demande. ‘Mon pa ankor marye. Mon pa’n deza reste avek en msye, alor konman ki mon kapab ganny en pti baba?’

‘Lespri sen pou desann lo ou,’ Gabriyel ti reponn. ‘Alor sa pti baba pou apel Garson Bondye.’ Apre sa, i ti dir avek Mari: ‘Mazin ou fanmiy Elizabet. Dimoun ti pe dir ki i tro vye pour ganny en pti baba. Me dan en pe letan i pou ganny en pti garson. Alor ou vwar, napa nanryen ki Bondye pa kapab fer.’

Deswit Mari ti dir: ‘Mwan, mon serviter Zeova, les ariv avek mwan parey ou’n dir.’ Apre sa lanz ti ale.

Mari ti degaze e al vizit Elizabet. Kan Elizabet ti antann lavwa Mari, sa pti baba dan son vant ti sote avek lazwa. Elizabet ti ranpli avek lespri sen Bondye, e i ti dir avek Mari: ‘Ou’n ganny beni parmi bann madanm.’ Mari ti reste avek Elizabet pour apepre 3 mwan, e apre i ti retourn kot li Nazaret.

Mari ti pros pour marye avek en zonn ki ti apel Zozef. Me kan Zozef ti aprann ki Mari ti pe al ganny en pti baba, i ti panse ki i pa merit marye avek li. Apre lanz Bondye ti dir avek li: 'Pa bezwen per pour pran Mari konman ou madanm. Akoz se Bondye ki'n donn li sa garson.' Alor Mari ek Zozef ti marye, e zot ti esper Zezi ne.

Lik 1:26-56; Matye 1:18-25.



**E**SKI ou konnen lekel sa pti baba? Wi, se Zezi. I'n fek ne dan en park bef. Mari pe met Zezi dan en manzwar. En manzwar i en landrwa kot i met manze pour bann bourik ek lezot zannimo vin manze. Me akoz Mari ek Zozef ti la avek bann zannimo? Sa pa en landrwa pour en pti baba ne, pa i vre?

Wi, sa i vre me selman zot ti la dan sa landrwa akoz Sezar Ogis ki ti diriz Ronm ti fer sorti en lalwa ki tou dimoun ti devret retourn



dan zot lavil kot zot ti'n ne pour ekrir zot non dan en liv. Zozef ti ne an Betleenm, se pour sa ki i ti bezwen al laba. Me kan li ek Mari ti ariv Betleenm ti napa okenn lasanm pour zot reste. Alor zot ti bezwen vin la avek bann zannimo. E sa menm zour Mari ti ganny Zezi! Me, parey ou kapab vwar, Zezi ti byen.



Eski ou vwar bann berze pe vin vizit Zezi? Sa zour swar zot ti dan laplenn e zot ti pe okip zot mouton, e en lalimyer ti ekler zot. Ti en lanz! Bann berze ti vreman per. Me lanz ti dir avek zot: 'Pa bezwen per! Mon annan bon nouvel pour zot. Ozordi, an Betleenm, en Senyer, Kris, in ne. I pou sov bann dimoun! Zot pou trouv li anvlope dan en dra e pe alonze dan en manzwar.' Deswit en kantite lanz ti vini e zot ti konmans loue Bondye. Alor bann berze ti depese pour al vwar Zezi, e zot ti vwar li.

Eski ou konnen akoz Zezi ti spesyal? Eski ou konnen ki i ti ete *vreman*? Mazinen, ki dan premye zistwar dan sa liv nou ti lir lo premye Garson Bondye. I ti travay avek Zeova pour kree lesyel ek later ek lezot keksoz. Se sa ki Zezi ti ete!

Wi, Zeova ti pran lavi son Garson dan lesyel e met li dan vant Mari. En pti baba ti konmans grandi dan vant Mari zis parey lezot pti baba i grandi dan vant zot manman. Me sa pti baba ti Garson Bondye. Finalman, Zezi ti ne la dan en park bef an Betleenm. Eski ou vwar aprezan akoz bann lanz ti vreman kontan pour dir avek bann dimoun ki Zezi ti'n ne?


# BANN ZONM TI GANNY GIDE PAR EN ZETWAL

86

**E**SKI ou kapab vwar sa zetwal briyan ki sa zonm pe montre ledwa lo la? Kan zot ti kit Zerizalenm, sa zetwal ti aparet. Sa bann zonm ti sorti dan les, e zot ti etidye bann zetwal. Zot ti krwar ki sa nouvo zetwal ti pe gid zot ver en dimoun enportan.

Kan sa bann zonm ti ariv Zerizalenm zot ti demande: 'Oli sa pti baba ki pe vin sef bann Zwif?' "Zwif" i en lot non pour bann Izraelit. 'Premye fwa ki nou ti vwar son zetwal se letan nou ti dan les,' sa bann zonm ti dir, 'e nou'n vin ador li.'

Kan Erod ki ti lerwa Zerizalenm ti antann sa, i ti trakase. I pa ti oule ki en lot lerwa i pran son plas. Alor Erod ti apel bann sef pret





e i ti demande: 'Kote sa nouvo lerwa pou ne?'  
Zot ti reponn: 'Labib ti dir an Betleenm.'

Alor Erod ti apel bann zonn ki ti sorti dan les, e i ti dir: 'Al rod sa pti baba. Kan zot trouv li, fer mwan konnen. Mon oule al ador li mwan osi.' Me Erod ti oule trouv sa pti baba pour touy li!

Aprè sa zetwal ti al par devan sa bann zonn ziska Betleenm, e i ti aret parlao sa landrwa kot sa pti baba ti ete. Kan sa bann zonn ti antre dan lakaz, zot ti vwar Mari ek Zezi. Zot ti donn Zezi bann kado. Me plitar, dan en rev Zeova ti averti sa bann zonn pour pa retourn kot Erod. Alor zot ti retourn dan zot pei par en lot semen.

Kan Erod ti konnen ki sa bann zonn ki ti sorti dan les ti'n al se zot, i ti vreman ankoler. Alor i ti donn lord pour touy tou bann pti garson an Betleenm ki ti annan 2 an oubyen ki ti par anba 2 an. Me avan ki sa ti ganny fer, dan en rev Zeova ti demann Zozef pour pran son fanmiy e al Lezip. Plitar, kan Zozef ti tande ki Erod ti'n mor, i ti pran Mari ek Zezi e zot ti retourn Nazaret. Se la ki Zezi ti grandi.

Lekel ki ou krwar ti fer sa nouvo zetwal briye? Mazinen, ki sa bann zonn ti al Zerizalenm letan zot ti'n fek vwar sa zetwal. Satan Dyab ti oule touy Garson Bondye, e i ti konnen ki lerwa Erod osi ti oule touy Zezi. Alor Satan ti sa enn ki ti fer sa zetwal briye.

Matye 2:1-23; Mika 5:2.



**G**ET sa zenn garson pe koz avek sa bann msye. Zot bann ansennyman dan tanp Bondye an Zerizalenm. E sa garson se Zezi. I'n grandi en pe. Aprezan i annan 12 an.

Sa bann ansennyman ti vreman etonnen akoz Zezi ti konn en kantite lo Bondye ek bann keksoz ki'n ganny ekri dan Labib. Me akoz ki Zozef ek Mari pa la zot osi? Oli zot? Annou vwar.

Tou-le-zan Zozef ti anmenn son fanmiy Zerizalenm pour en lafet spesyal ki ti apel Lapak. Zot ti bezwen fer en gran vwayaz depi Nazaret ziska Zerizalenm. Ti napa personn ki ti annan loto, e ti napa ni tren. Dan sa letan zot ti napa sa bann keksoz. Laplipar dimoun ti marse, e ti pran zot apepre 3 zour pour ariv Zerizalenm.

Sa letan Zozef ti annan en gran fanmiy. E zot ti bezwen pran swen avek bann pti frer ek pti ser Zezi. Byen, sa lannen Zozef ek Mari ti'n kit Zerizalenm pour retourn kot zot an Nazaret avek zot bann zanfan. Zot ti krwar ki Zezi ti ansanm avek lezot. Me alafen lazournen kan zot ti arete, zot pa ti trouv Zezi. Zot ti rod li parmi bann fanmiy ek zanmi, me i pa ti avek zot! Alor zot ti retourn Zerizalenm pour rod li.

Finalman, zot ti trouv li la avek bann ansennyman. I ti pe ekout zot e i ti pe demann zot kestyon. E tou dimoun ti etonnen pour vwar ki Zezi ti vreman malen. Me Mari ti dir: 'Zezi akoz ou'n fer sa avek nou? Mwan ek ou Papa nou'n enkyet, e nou pe rod ou.'

'Akoz zot bezwen rod mwan?' Zezi ti reponn. 'Eski pa zot konnen ki mon bezwen dan lakaz mon Papa?'

Wi, Zezi ti kontan pour dan en landrwa kot i ti kapab aprann lo Bondye. Eski pa nou osi nou devret santi parey? Kot i ti pe reste an Nazaret, Zezi ti kapab al bann renyon tou le semenn. Lefe ki i ti toultan ekout byen, i ti kapab aprann en kantite keksoz dan Labib. Annou vin parey Zezi e swiv son legzanp.



**O**U VWAR sa pizon pe desann lo latet sa zonn? Sa zonn se Zezi. I ti annan 30 an la. E sa zonn ki avek li se Zan. Nou'n deza vwar serten keksoz lo li. Ou mazine ler Mari ti al vizit son fanmiy Elizabet, sa pti baba dan vant Elizabet ti sote avek lazwa? Sa pti baba ti Zan. Me ki Zan ek Zezi pe fer la?

Zan in fek plonz Zezi dan Larivyer Zourden. Se sa fason ki en dimoun i batize. Pour konmanse sa dimoun i ganny plonze anba delo, apre i ganny retire. Lefe ki Zan ti batiz bann dimoun i ti ganny apele Zan Batizer. Me akoz Zan ti batiz Zezi?



Byen, Zan in fer li akoz Zezi ti vin demann Zan pour batiz li. Zan ti batiz bann dimoun ki ti anvi montre ki zot ti regrete pour sa bann keksoz mal ki zot ti'n fer. Eski Zezi ti'n deza fer keksoz mal ki apre i ti regrete? Non, Zezi pa'n zanmen fer okenn keksoz mal, akoz i ti Garson Bondye e i ti sorti dan lesyel. Alor i ti demann Zan pour batiz li pour en lot rezon. Annou vwar sa rezon.

Avan ki Zezi ti vin kot Zan i ti en sarpantye. En sarpantye i en dimoun ki fer bann keksoz avek dibwa, tel parey latab, sez ek ban. Msye Mari, Zozef, ti en sarpantye, e i ti montre Zezi konman pour fer sarpantye. Zeova pa ti'n anvoy son Garson lo later pour vin en sarpantye. I ti annan en travay spesyal pour fer, e sa letan ti'n arive pour Zezi konmans fer sa travay. Alor pour montre ki i ti'n pare pour fer sa ki son Papa ti'n anvoy li fer, Zezi ti demann Zan pour batiz li. Eski Bondye ti dakor avek sa?

Wi, akoz apre ki Zezi ti sorti dan delo, en lavwa sorti dan lesyel ti dir: 'Sa i mon Garson, ki mon kontan.' I sanble ki lesyel ti ouver e sa pizon ti desann lo Zezi. Me i pa ti en vre pizon. I ti parey enn. Ti lespri sen Bondye.

Aprezan, Zezi ti annan en kantite keksoz pour mazin lo la, alor i ti al dan en landrwa trankil pour 40 zour. Laba, Satan ti vin kot li. Trwa fwa Satan ti esey fer Zezi fer bann keksoz ki ti kont lalwa Bondye. Me Zezi pa ti pou fer sa.

Apre sa, Zezi ti retournen e i ti rankontre bann zonn ki ti pou vin son bann premye disip. Zot ti apel Andre, Pyer (ki ti osi apel Simon), Filip ek Natanael (ki ti osi apel Bartelemi). Zezi ansanm avek son bann nouvo disip ti al dan distrik Galile. An Galile, zot ti aret Kana, lavil kot Natanael ti ne. Laba, Zezi ti asiste en gro selebrasyon maryaz, e la i ti fer son premye mirak. Ou konnen ki sa mirak ki i ti fer? I ti fer delo vin diven.

**D**AN sa portre ou kapab vwar ki Zezi i vreman ankoler, pa i vre? Eski ou konnen akoz i ti ankoler? Akoz sa bann zonn ki ti kot



tanp an Zerizalenm ti vremen voras. Zot ti pe esey fer profi lo bann dimoun ki vin la dan tanp pour ador Bondye.

Eski ou vwar tou sa bann zenn toro, mouton ek bann pizon? Byen, sa bann zonm pe vann sa bann zannimo la dan tanp. Eski ou konnen akoz? Akoz bann Izraelit ti bezwen sa bann zannimo ek bann zwazo pour ofer avek Bondye.

Lalwa Bondye ti dir ki kan en Izraelit ti fer en keksoz mal, i ti devret ofer Bondye en kado. E ti annan lezot moman osi ki bann Izraelit ti bezwen ofer bann kado. Me kote ki en Izraelit ti pou ganny bann zwazo ek bann zannimo pour ofer Bondye?

Serten Izraelit ti annan bann zwazo ek bann zannimo. Alor zot ti kapab ofer zot. Me ti annan en kantite Izraelit ki ti napa zannimo ek zwazo. E lezot ti reste lwen avek Zerizalenm, alor zot pa ti kapab anmenn en zannimo kot tanp. Alor bann dimoun ti vin la e zot ti aste bann zannimo oubyen bann zwazo ki zot ti bezwen. Me sa bann zonm ti pe vann sa bann zannimo tro ser. Zot ti pe vol bann dimoun. Deplis, zot pa ti devret pe vann bann zannimo la dan tanp Bondye.

Se sa ki ti fer Zezi ankoler. Alor i ti savir zot latib ek larzan ki ti lo la. I ti pran en lakord e i ti fwet bann zannimo e fer zot sorti dan tanp. I ti dir avek sa bann zonm ki ti pe vann bann pizon: ‘Tir sa bann zafer la! Aret fer lakaz mon Papa en landrwa pour profi.’

Serten bann disip Zezi ti la avek li dan tanp. Zot ti sirprann pour vwar Zezi fer sa. Apre sa, zot ti mazin sa landrwa dan Labib kot i dir sa lo Garson Bondye: ‘Lanmour pour lakaz Bondye pou brile dan li parey en dife.’

Pandan ki i ti la an Zerizalenm pe esper lafet Pak, Zezi ti fer en kantite mirak. Apre sa, i ti kit Zida e i ti konmans fer son vwayaz e retourn an Galile. Me pandan ki i ti lo semen pe al Galile i ti al dan en distrik ki ti apel Samari. Annou vwar ki ti arive laba.

# ZEZI AVEK EN MADANM KOT PWI

**Z**EZI ti arete pour poze kot en pwi an Samari. Son bann disip ti al dan lavil pour aste manze. Sa madanm ki Zezi pe koz avek in vin sers delo. Zezi ti dir avek sa madanm: ‘Donn mwan en pe delo.’

Sa ti sirprann sa madanm en kantite. Eski ou konnen akoz? Se akoz Zezi ti en Zwif, e sa madanm ti en Samariten. E laplipar Zwif pa ti kontan bann Samariten. Zot ti menm pa koz avek zot! Me Zezi ti kontan tou sort kalite dimoun. Alor i ti dir: ‘Si ou ti konnen lekel ki pe demann ou en pe delo, ou ti pou demann li e i ti pou donn ou delo ki donn lavi.’

‘Msye,’ sa madanm ti dir, ‘sa pwi i fon, e ou menm napa en seo. Kote ou pou ganny sa delo ki donn lavi?’

‘Si ou bwar delo dan sa pwi ou pou swaf ankor,’ Zezi ti eksplike. ‘Me delo ki mon pou donner i kapab fer en dimoun viv pour touzour.’

‘Msye,’ sa madanm ti dir, ‘donn mwan sa delo! Apre sa mon pou nepli swaf ankor. E mon pou nepli bezwen vin la pour vin sers delo.’

Sa madanm ti panse ki Zezi ti pe koz lo vre delo. Me Zezi ti pe koz lo laverite konsernan Bondye ek son rwayonm. Sa laverite i parey delo ki donn lavi. I kapab donn en dimoun lavi eternel.

Apre Zezi ti dir avek sa madanm: ‘Ale e apel ou msye e retournen.’

‘Mon napa en msye,’ sa madanm ti reponn.

‘Ou’n byen reponn,’ Zezi ti dir. ‘Me ou ti annan 5 msye, e sa zonm ki ou pe reste avek i pa ou msye.’


Sa madanm ti sirprann, akoz sa ki Zezi ti pe dir li ti laverite. Me konman ki Zezi ti konn tousala? Wi, akoz Zezi ti sa Enn ki ti’n ganny promet, e se Bondye ki ti’n anvoy li, alor Bondye ti fer li

konn sa. Dan sa menm moman, bann disip Zezi ti retournen e zot ti sirprann pour vwar li pe koz avek sa madanm Samariten.

Ki nou aprann par tousala? I montre ki Zezi ti bon avek tou dimoun dan nenport pei. E nou osi nou devret fer parey. Nou pa devret krwar ki serten dimoun pa bon akoz zot sorti dan en lot pei.

Zezi ti oule ki tou dimoun i konn laverite ki anmenn ver lavi eternel. E nou osi nou devret anvi ed bann dimoun pour aprann laverite.

Zan 4:5-43; 17:3.





**G**ET Zezi pe asize la. I anler lo en montanny an Galile e i pe ansenny tou sa bann dimoun. Sa bann ki pe asiz pre avek li i son bann disip. I ti'n swazir 12 parmi zot pour vin son bann zapot. Sa bann zapot ti son bann disip spesyal. Eski ou konn zot non?

Ti annan Simon Pyer ek son frer Andre. Apre ti annan Zak ek Zan, zot osi zot ti de frer. Ti annan en lot zapot ki ti apel Zak, e en lot ki ti apel Simon osi. De zapot ti apel Zida. Enn ti Zida Iskaryot, e lot Zida ti osi ganny apele par sa non Tade. Apre ti annan Filip ek Natanael (ki ti osi apel Bartelemi), e answit Matye ek Toma.

Apre ki i ti'n kit Samari, Zezi ti konmans prese pour premye fwa: 'Rwayonm lesyel i pros.' Eski ou konnen kisisa sa rwayonm?



I gouvènmàn Bondye e i en vre gouvènmàn. Se Zezi ki lerwa dan sa rwayonm. I pou dirize dan lesyel e i pou anmenn lape lo later. Rwayonm Bondye pou fer later antye vin en zoli paradi.

La lo montanny, Zezi ti pe ansenny bann dimoun lo sa rwayonm. Zezi ti pe eksplik zot konman zot devret priye: 'Nou Papa ki dan lesyel, ki ou non i ganny glorifye. Ki ou rwayonm i vini. Ki ou lavolonte i ganny fer lo later, parey dan lesyel.' En kantite dimoun i apel sa 'Lapriyer Senyer.' Lezot i apel li lapriyer '*Notre Père.*' Eski ou kapab resit sa lapriyer antye?

Zezi ti pe osi ansenny bann dimoun konman ki zot devret tret lezot. 'Fer pour lezot sa ki ou ti a kontan lezot i fer pour ou,' i ti dir. Eski pa ou kontan kan lezot i tret ou byen? Alor, Zezi ti pe dir, ki nou devret tret lezot dimoun byen. Eski pa i pou gou pour viv lo later ler i pou vin en paradi kot tou dimoun pou swiv sa konsey?

Matye sapit 5 ziska 7; 10:1-4.



**S**A PTI fiy ki ou vwar la i annan 12 an. Zezi pe atrap son lanmen, e son manman ek son papa pe debout lanmenm la obor. Eski ou konnen akoz ki zot vreman kontan? Annou vwar.

Papa sa pti fiy ti en zomm enportan, i ti apel Zairis. En zour son pti fiy ti tonm malad, e zot ti met li lo lili. Me i pa ti vin byen. I ti malad plis ankor. Zairis ek son madanm ti enkyet en kantite, akoz i paret ki zot pti fiy ti pe al mor. I ti sel fiy ki zot ti annan. Alor Zairis ti al sers Zezi. I ti'n antann sa bann mirak ki Zezi ti'n fer.



Kan Zairis ti trouv Zezi, ti annan en gran lafoul dimoun otour li. Me Zairis ti antre dan lafoul e i ti tonm ater obor lipye Zezi. ‘Mon pti fiy i byen, byen malad,’ i ti dir. ‘Silvouple, vin geri li,’ i ti sipliye. Zezi ti dir ki i pou vini.

Pandan ki zot ti pe ale, lafoul ti kontinyen pouse pour apros pli pre. Toudenkou, Zezi ti arete. ‘Lekel ki’n tous mwan?’ i ti demande. Zezi ti santi ki en lafors ti’n sorti avek li, alor i ti konnen ki ti annan en dimoun ki ti’n tous li. Me lekel? Ti en madanm ki ti annan en maladi grav pour 12 an. I ti zis tous lenz Zezi, e i ti geri!

Sa ti fer Zairis santi li pli byen, akoz i ti kapab vwar konman i ti fasil pour Zezi geri en dimoun. Me apre sa en mesaze ti vini. ‘Pa fatig Zezi plis ki sa,’ i ti dir avek Zairis. ‘Ou pti fiy in mor.’ Zezi ti antann sa konversasyon e i ti dir avek Zairis: ‘Pa bezwen enkyet, ou pti fiy pou byen.’

Finalman zot ti ariv kot lakaz Zairis, bann dimoun ti pe plere akoz zot ti vreman sagren. Me Zezi ti dir: ‘Pa bezwen plere. Sa pti fiy pa ankor mor. I pe dormi.’ Me zot ti riye e zot ti sikann Zezi, akoz zot ti konnen ki sa pti fiy ti’n mor.

Apre sa Zezi ti pran papa ek manman sa pti fiy ek trwa son bann zapot e zot ti al dan lasanm kot sa pti fiy ti pe alonze. Zezi ti atrap son lanmen e i ti dir: ‘Leve!’ E sa pti fiy ti leve, zis parey ou kapab vwar dan sa portre. I ti leve e i ti konmans marse! Se pour sa rezon ki son manman ek son papa ti vreman kontan.

Sa pa ti premye dimoun ki Zezi ti resisite. Labib i dir nou ki premye dimoun ki Zezi ti resisite ti garson en madanm ki ti’n perdi son msye, sa madanm ti reste dan lavil Nain. Plitar, Zezi ti osi resisit Lazar, frer Mari ek Mart. Kan Zezi pou dirize konman lerwa, i pou resisit en kantite, kantite dimoun. Eski pa nou kontan ki Zezi pou fer sa?

**E**N KEKSOZ terib in arive. Zan Batis fek ganny touye. Eroद्या, madanm lerwa, pa ti kontan li. E i ti nobou fer lerwa fer solda koup latet Zan.

Kan Zezi ti antann sa, i ti vreman tris. I ti al dan en landrwa dezer. Me bann dimoun ti swiv li. Kan Zezi ti vwar sa lafoul dimoun, i ti pran pitye pour zot. Alor i ti koz avek zot lo rwayonm Bondye, e i ti geri bann ki ti malad.

Ler fernwanr ti pe fer son bann disip ti vin kot li e zot ti dir li: 'I deza tar, e sa landrwa i dezer. Fer bann dimoun ale pour zot kapab al dan bann vilaz e aste manze.'

'Pa nesaser ki nou fer zot ale,' Zezi ti reponn. 'Zot menm donn sa bann dimoun keksoz pour manze.' Zezi ti demann Filip: 'Kote nou pou ganny dekwa manze pour nouru sa gran lafoul dimoun?'

'I pou kout en kantite kantite larzan pour aste dekwa manze afen ki tou dimoun i kapab ganny en pti gin,' Filip ti reponn. Andre ti dir: 'Sa pti garson, ki pe anmenn nou manze, i annan selman senk dipen ek de pwason. Me i pa pou ase pour sa lafoul dimoun.'

'Dir avek bann dimoun asiz lo zerb,' Zezi ti dir. Apre i ti remersye Bondye pour sa manze, e i ti konmans kas sa senk dipen an morso. Apre, bann disip ti donn sa lafoul dimoun sa bann dipen ek pwason. Ti annan 5,000 zonn, e plizyer milye madanm ek zannan. Zot tou zot ti manze ziska ki zot vant ti plen. E kan bann disip ti anmas sa ki ti'n reste, ti annan douz pannyen plen!

Zezi ti fer son bann disip an bark lo en bato pour travers Lanmer Galile. Pandan lannwit ti annan en gro divan, e bato ti balote avek laroul. Bann disip ti vreman per. Apre, dan milye lannwit, zot ti vwar en dimoun pe marse lo delo pe vin kot zot. Zot ti kriye avek lafreyer, aköz zot pa ti konnen lekel ki ti pe vini.

'Pa bezwen per,' Zezi ti dir. 'Mwan sa!' Zot pa ti krwar. Alor

Pyer ti dir: 'Si se vreman ou, Senyer, dir mwan mars lo delo pour vin kot ou.' Zezi ti reponn: 'Vini!' E Pyer ti sorti dan bato e mars lo delo! Apre i ti konmans per e i ti konmans anfonse, me Zezi ti sov li.

Plitar, Zezi ti ankorenn fwa nouri en kantite dimoun. Safwasi avek set dipen ek en pti gin pwason. E ankorenn fwa tou dimoun ti manze ziska zot vant ti plen. Eski pa nou vreman kontan pour vwar konman ki Zezi i pran swen avek bann dimoun? Kan i pou dirize konman lerwa nou pa pou mank nanryen!

Matye 14:1-32; 15:29-38; Zan 6:1-21.



# ZEZI TI KONTAN BANN PTI ZANFAN

**G**ET Zezi la, i'n ser sa pti garson dan son lebra. Zezi ti vreman kontan bann pti zanfan. Sa bann zonm ki pe gete i son bann zapot. Ki Zezi pe dir zot? Annou vwar.

Zezi ek son bann disip ti fek arive sorti lo en gran vwayaz. Letan ki zot ti dan semen, bann zapot ti pe diskite antre zot. Apre ki zot ti'n fini vwayaze Zezi ti demann zot: 'Ki zot ti pe diskite dan semen?' Zezi ti konnen ki zot ti pe diskite. Me i ti demann zot kestyon pour vwar si zot ti pou dir li.

Bann zapot pa ti reponn, akoz zot ti pe diskite avek kanmarad lekel ki pli enportan parmi zot. Serten zapot ti anvi vin pli enportan ki lezot. Konman Zezi ti pou fer zot vwar ki i mal pour pans koumsa?

I ti apel sa pti garson, e i ti met li devan zot. Apre i ti dir avek son bann disip: 'Mon oule ki zot konn sa, si zot pa sanze e vin parey bann pti zanfan, zot pa pou zanmen antre dan rwayonm Bondye. Sa dimoun ki pli enportan dan rwayonm i sa enn ki vin parey sa zanfan.' Eski ou konnen akoz Zezi ti dir sa?

Akoz bann pti zanfan pa trakase pour mazine si zot pli enportan ki lezot. Alor, bann zapot ti devret aprann pour vin parey bann zanfan dan sa fason e pa diskite pour vwar lekel ki pli enportan.

Ti annan lezot moman osi ki Zezi ti montre ki i ti kontan bann zanfan en kantite. Enn de mwan plitar bann dimoun ti anmenn zot zanfan kot Zezi. Bann zapot ti esey anpes sa bann dimoun fer sa. Me Zezi ti dir zot: 'Les sa bann zanfan vin kot mwan, pa anpes zot, akoz rwayonm Bondye i pour bann dimoun parey zot.' Apre Zezi ti pran sa bann zanfan dan son lebra, e i ti beni zot. Eski pa i gou pour konnen ki Zezi i kontan bann pti zanfan?





**E**N ZOUR Zezi ti dir avek en zonm ki i devret kontan son prosen. Sa zonm ti demann Zezi: ‘Lekel mon prosen?’ Byen, Zezi ti konnen ki sa zonm ti pe mazine. Sa zonm ti krwar ki zis dimoun ki reste dan menm pei avek li e ki dan menm larelizyon avek li ki son prosen. Annou vwar ki Zezi ti dir li.

Parfwa Zezi ti ansennyen par rakont en zistwar. Se sa ki i ti fer la. I ti rakont en zistwar lo en Zwif ek en Samariten. Nou’n deza vwar ki bann Zwif pa ti kontan bann Samariten. Alor la zistwar ki Zezi ti rakonte:

En zour ti annan en Zwif ki ti lo son semen pe al Zeriko. Me bann bandi ti sot lo li. Zot ti pran son larzan e zot ti bat li ziska ki i ti pros pour mor.

Plitar, en pret Zwif ti pe pase lo sa semen. I ti vwar sa zonm ki’n ganny bate. Ki ou krwar i ti fer? I ti koup lo lot kote semen e kontiny son semen. Apre en lot zonm ki li osi i ti relizye ti vini. I ti en Levit. Eski i ti arete? Non, li osi i pa ti arete pour ed sa zonm ki ti’n ganny bate. Ou kapab vwar sa pret ek sa Levit ki pe kontiny zot semen.

Me gete lekel ki la avek sa zonm ki’n ganny bate. I en Samariten. I pe ed sa Zwif. I pe met en pe latizann lo son blesir. Apre sa, i ti anmenn sa Zwif dan en landrwa kot i ti kapab repoze e geri.

Apre ki i ti’n fini rakont sa zistwar, Zezi ti dir avek sa zonm ki ti’n demann li




sa kestyon: 'Lekel parmi sa trwa zonn ki ou krwar in reazir konman prosen sa zonn ki'n ganny bate? Eski ti sa pret, sa Levit oubyen sa Samariten?'

Sa zonn ti reponn: 'Sa zonn Samariten. I ti bon avek sa zonn ki'n ganny bate.'

Zezi ti dir: 'Ou'n reponn byen. Alor ale e tret lezot parey sa zonn Samariten in fer.'

Pa ou kontan fason ki Zezi ti ansennyen? Nou pou kapab aprann en kantite keksoz si nou ekout sa ki Zezi ti dir dan Labib.

Lik 10:25-37.





**Z**EZI ti vwayaz partou dan pei e i ti geri bann dimoun malad. Partou dan bann vilaz ek lavil dimoun ti tandé ki Zezi ti pe fer bann mirak. Alor bann dimoun ti anmenn kot li bann ki pa ti kapab marse, ki pa ti vwar kler, ki ti sourd ek en kantite lezot ankor ki ti malad. Zezi ti geri zot.

Trwa an ti'n pase depi ki Zan ti'n batiz Zezi. E Zezi ti dir avek son bann disip ki tre byento i pou al Zerizalenm, kot i pou ganny touye, e apre leve dan lanmor. Antretan, Zezi ti kontinyen geri bann ki ti malad.

En zour Saba, Zezi ti pe ansennyen. Saba ti en zour kot bann Zwif ti repoze. Sa madanm ki ou vwar la i vremen malad. Pour 18 an i'n reste kourbe, e i pa'n kapab debout drwat. Alor Zezi ti met son lanmen lo li, e i ti debout drwat. I ti'n geri!

Sa ti fer bann sef relizye vremen ankoler. Enn parmi zot ti kriy avek lafoul: 'I annan sis zour ki nou devret travay. Vin sa bann zour pour zot ganny geri, me pa zour Saba!'

Me Zezi ti reponn: 'Bann move zonm. Sakenn parmi zot, zot delarg zot bef oubyen zot bourik zour Saba pour anmenn bwar. Eski sa pov madanm, ki'n malad pour 18 an pa devret ganny geri zour Saba?' Larepons Zezi ti fer sa bann zonm kanmi.

Plitar Zezi ek son bann zapot ti al Zerizalenm. Kan zot ti an deor lavil Zeriko, de zonm ki pa ti vwar kler ti tandé ki Zezi ti pe pase. Alor zot ti kriye: 'Zezi, ed nou!'

Zezi ti apel sa de zonm e i ti demann zot: 'Ki zot oule mon fer pour zot?' Zot ti reponn: 'Senyer, fer nou vwar kler.' Zezi ti tous zot lizye, e deswit zot ti kapab vwar kler! Eski ou konnen akoz Zezi ti fer sa bann mirak merveye? Akoz i ti kontan bann dimoun e i ti oule ki zot annan lafwa dan li. Alor nou kapab asire ki ler i pou dirize konman lerwa pou napa personn lo later ki pou malad ankor.

**A**PRE ki i ti'n geri sa de zonn ki pa ti vwar kler, Zezi ti al kot en pti vilaz ki ti pros avek Zerizalenm. I ti dir avek de son disip: 'Al dan sa vilaz e zot pou trouv en pti bourik. Delarg li e anmenn li kot mwan.'

Kan zot ti anmenn sa pti bourik kot li, Zezi ti asiz lo li. Apre i ti al Zerizalenm. Kan i ti ariv pre avek sa lavil, en gran lafoul dimoun ti vin zwenn li. Laplipar zot ti tir zot lenz e tal lo semen. Lezot ti koup bann brans palm e tal lo semen, e zot ti kriye: 'Beni sa lerwa ki'n vin lo non Zeova!'

Lontan an Zerizalenm bann nouvo lerwa ti mont lo en pti bourik pour antre Zerizalenm pour ki bann dimoun ti kapab vwar zot. Se sa ki Zezi ti pe fer. Sa bann dimoun ti pe montre ki zot oule Zezi konman zot



lerwa. Me pa tou dimoun ki ti oule li konman lerwa. Nou kapab vwar sa par sa ki ti arive kan Zezi ti al kot tanp.


Kot tanp Zezi ti geri bann dimoun ki pa ti vwar kler ek bann ki pa ti marse. Kan bann zanfan ti vwar sa, zot ti loue Zezi. Me sa ti fer bann pret ankoler, e zot ti dir avek Zezi: ‘Eski ou tande ki sa bann zanfan pe dir?’

‘Wi, mon tande,’ Zezi ti reponn. ‘Eski zot pa’n zanmen lir dan Labib kot i dir: “Dan labous bann zanfan Bondye pou fer sorti louanz?”’ Alor bann zanfan ti kontinyen loue lerwa ki Bondye ti’n anvoye.

Eski pa nou anvi vin parey sa bann zanfan? Serten dimoun i kapab esey anpes nou koz lo rwayonm Bondye. Me nou pou kontinyen koz avek lezot lo sa bann keksoz merveye ki Zezi pou fer pour bann dimoun.

Pa ti ankor ler pour Zezi konmans dirize konman lerwa kan i ti lo later. Kan sa letan pou arive? Bann disip Zezi ti anvi konnen. Nou pou aprann sa dan sa lot zistwar.

Matye 21:1-17; Zan 12:12-16.



**S**A SE Zezi lo montanny Zolivye. Sa kat zonm ki avek li i son bann zapot. Andre i frer Pyer, e Zak i frer Zan. Sa ki ou vwar dan lwen se tanp Bondye an Zerizalenm.

De zour ti'n pase depi ki Zezi ti'n al Zerizalenm lo en pti bourik. Ti Mardi. Pli boner dan lazournen Zezi ti kot tanp. Laba bann pret ti esey atrap li pour touy li. Me zot ti per pour fer sa akoz bann dimoun ti kontan Zezi.

'Zot bann serpan ek bann piti serpan!' Zezi ti dir avek bann sef relizye. Zezi ti dir ki Bondye pou pini zot akoz zot in fer en kantite move keksoz. Apre sa, Zezi ti al lo Montanny Zolivye, e sa kat zapot ti konmans demann li kestyon. Eski ou konnen ki zot ti pe demann Zezi?

Bann zapot ti pe demann kestyon lo bann keksoz ki pou arive dan lavenir. Zot ti konnen ki Zezi pou met en lafen avek bann move keksoz lo later. Me zot ti anvi konnen *kan* sa pou arive. Kan ki Zezi pou vin ankor pour dirize konman Lerwa?

Zezi ti konnen ki bann ki pe swiv li lo later pa pou kapab vwar li kan i vin ankor. Sa se akoz i pou dan lesyel, e zot pa pou kapab vwar li. Alor Zezi ti dir avek son bann zapot serten keksoz ki pou arive lo later pandan ki i pou dirize konman Lerwa dan lesyel. Kwa sa bann keksoz?

Zezi ti dir ki pou annan gran lager, en kantite dimoun pou malad e lafen, pou annan krim, e pou annan gran tranbleman-d-ter. Zezi ti osi dir ki sa bon nouvel lo rwayonm Bondye pou ganny prese lo later antye. Eski ou vwar sa bann keksoz pe arive dan nou letan? Wi! Alor nou kapab asire ki Zezi pe aprezan dirize dan lesyel. Byento i pou met en lafen avek tou sa bann move keksoz ki pe arive lo later.





# DAN EN LASANM ANLER DAN LETAZ

99

**A**PREZAN i Zedi swar, de zour plitar. Zezi ek son douz zapot ti'n vin la dan sa lasanm anler dan letaz pour manz repa Lapak. Sa zonm ki ou vwar pe ale se Zida Iskaryot. I ti pe al dir avek bann pret konman zot pou kapab atrap Zezi.

Son lavey, Zida ti al kot zot e i ti demann zot: 'Ki zot pou donn mwan si mon ed zot atrap Zezi?' Zot ti dir: 'Trant pyes larzan.' Alor Zida ti pe al kot sa bann zonm afen ki i ti kapab anmenn zot kot Zezi. Eski sa pa i en move keksoz pour fer?

Zot ti fini pran zot repa Lapak. Apre Zezi ti konmans en nouvo repa spesyal. I ti donn son bann zapot en dipen e i ti dir: 'Manze, sa i



reprezant mon lekor ki pou ganny ofer pour zot.’ Apre i ti donn zot en ver diven e i ti dir: ‘Bwar li, akoz sa i reprezant mon disan, ki pou ganny verse pour zot.’ Labib i apel sa ‘repa Senyer.’

Bann Izraelit ti manz repa Lapak pour rapel zot kan lanz Bondye ti ‘pas parlao’ zot lakaz an Lezip, me ti touy tou bann premye ne dan lakaz bann Eziptyen. Me aprezan Zezi ti oule ki bann ki swiv li i mazin li, e konman ki i’n donn son lavi pour zot. Se pour sa rezon ki i ti demann zot pour selebre sa repa spesyal toulezan.

Apre ki zot ti’n fini manz Repa Senyer, Zezi ti demann son bann zapot pour vin brav e for dan lafwa. Finalman, zot ti sant bann kantik pour Bondye e zot ti ale. Ti’n vreman tar aprezan, petet minwi ti’n sonnen. Annou vwar kote zot ti ale.

Matye 26:14-30; Lik 22:1-39; Zan sapit 13 ziska 17; 1 Korentyen 11:20.





**A**PRE ki zot ti'n kit sa lasanm anler dan letaz, Zezi ek son bann zapot ti al dan zarden Zetsemene. Zot ti'n deza vin la plizyer fwa. Aprezan Zezi ti demann zot pour pa dormi, me pour priye. I ti al en pti pe pli lwen, i ti tonm ater, bes son latet e priye.

Plitar, Zezi ti retourn kot son bann zapot ti ete. Ki ou krwar zot ti pe fer? Zot ti pe dormi! Trwa fwa Zezi ti demann zot pour pa dormi, me sak fwa ki i ti retournen i ti trouv zot pe dormi. 'Konman ki zot kapab dormi dan en letan koumsa?' Dernyen fwa ki i ti retournen Zezi ti dir: 'Ler in arive pour mon bann lennmi pran mwan.'

Sa menm moman, zot ti antann en gran lafoul dimoun pe fer tapaz. Gete! Sa bann zonm pe vini avek sab ek baton! Zot pe anmenn bann tors pour kler zot. Kan zot ti ariv pli pre, en dimoun ti sorti dan sa lafoul e i ti vin drwat kot Zezi. I ti anbras Zezi, parey ou kapab vwar la. Sa zonm se Zida Iskaryot! Akoz i ti anbras Zezi?

Zezi ti demann li: 'Zida, ou pe trai mwan par anbras mwan?' Wi, sa anbrase ti en siny. I ti fer sa bann zonm ki ti'n vin avek Zida konnen ki sa ti Zezi, sa zonm ki zot ti oule. Alor bann lennmi Zezi ti avans devan e tyonbo li. Me Pyer pa ti pou les zot pran Zezi san ki i lager. I ti pran son sab ki i ti'n anmennen e tap sa zonm ki ti obor li. Sa sab ti mank latet sa zonm e koup son zorey drwat. Me Zezi ti tous zorey sa zonm e geri li.

Zezi ti dir avek Pyer: 'Met ou sab laba. Eski ou pa krwar ki mon kapab demann mon Papa pour anvoy en milye lanz pour sov mwan?' Wi, i ti kapab! Me Zezi pa ti demann Bondye pour anvoy okenn lanz, akoz i ti konnen ki letan ti'n arive pour son bann lennmi pran li. Alor i ti les zot anmenn li. Annou vwar ki ti arive avek Zezi.



**G**ETE ki pe arive avek Zezi. Zot in met li lo en potò, e zot in klout son lanmen ek son lipye. Akoz zot in fer en keksoz parey avek Zezi?

Akoz serten dimoun ti ay Zezi. Eski ou konnen lekel zot? Enn parmi ti sa move lanz Satan Dyab. I ti sa enn ki ti reisi fer Adan ek Ev dezobei Zeova. E se li menm ki'n fer bann lennmi Zezi fer sa krim terib.

Menm avan ki Zezi ti ganny kloute lo sa potò, son bann lennmi ti fer li en ta keksoz mal. Ou mazine konman zot ti vin pran li dan zarden Zetsemame? Lekel sa bann lennmi? Wi, zot ti bann sef relizye. Annou vwar ki ti arive apre.

Kan bann sef relizye ti atrap Zezi, son bann zapot ti taye. Zot ti kit Zezi tousel avek son bann lennmi, akoz zot ti per. Me zapot Pyer ek Zan pa ti al lwen. Zot ti swiv pour vwar ki ti pe al arive avek Zezi.

Bann pret ti anmenn Zezi kot Ann, ki ti gran pret avan. Sa lafoul pa ti reste la pour lontan. Apre zot ti anmenn Zezi kot lakaz Kaif, ki ti gran pret sa letan. En kantite sef relizye ti'n rasanble kot son lakaz.

La kot lakaz Kaif zot ti ziz Zezi. Zot ti fer en kantite dimoun koz lalang lo Zezi. Tou bann sef relizye ti dir: 'Zezi i devret ganny touye.' Apre zot ti kras dan son figir, e zot ti donn li kou-d-pwen.

Pandan ki tousala ti pe pase, Pyer ti pe asize deor dan lari. Ti fer fre sa zour swar, alor bann dimoun ti alim en dife. Ler zot ti pe sof zot otour dife, en servant ti get Pyer e i ti dir: 'Sa zonnm osi ti avek Zezi.'

'Non, pa vre!' Pyer ti reponn.

Trwa fwa bann dimoun ti dir avek Pyer ki i ti avek Zezi. Me tou le trwa fwa Pyer ti dir ki sa pa ti vre. Trwazyenm fwa ki Pyer ti dir sa, Zezi ti vire e get li. Pyer ti vreman regrete akoz i ti'n koz lalang, i ti ale an pleran.

Vandredi gran maten, bann pret ti pran Zezi e anmenn li dan gran lakour konsey Zwif ki ti apel Sannedren. Laba, zot ti diskite ki zot pou fer avek Zezi. Zot ti anmenn li kot Pilat, ki ti ansarz distrik Zide.

'I en move zonn,' bann pret ti dir avek Pilat. 'I devret ganny touye.' Apre ki i ti'n fini demann Zezi keston, Pilat ti dir: 'Mon pa vwar nanryen mal ki i'n fer.' Apre Pilat ti anvoy Zezi kot Erod Antipas. Erod ti dirize an Galile, me i ti pe reste an Zerizalenm sa letan. Erod osi pa ti vwar okenn keksoz mal ki Zezi ti'n fer, alor i ti anvoy li ankor kot Pilat.

Pilat ti anvi les Zezi ale. Me bann lennmi Zezi ti oule ki en lot prizonnyen i ganny large dan plas Zezi. Sa zonn ti en bandi, i ti apel Barabas. Ti apepre midi kan Pilat ti anmenn Zezi deor. I ti dir avek bann dimoun: 'La zot lerwa!' Bann sef pret ti kriye: 'Touy li! Touy li!' Alor Pilat ti larg Barabas e gard Zezi pour ganny touye.

Vandredi apremidi, Zezi ti ganny kloute lo en potu. Lo sak kote Zezi ti annan en bandi ki zot osi zot ti'n ganny kloute lo en potu. Avan ki Zezi ti mor, enn ant sa de bandi ti dir avek li: 'Mazin mwan kan ou antre dan ou rwayonn.' Zezi ti reponn: 'Mon promet ou ki ou pou avek mwan dan paradi.'

Eski sa pa i en promes merveye? Eski ou konnen ki sa paradi ki Zezi ti pe koz lo la? Kote sa paradi ki Bondye ti fer okonmansman ti ete? Wi, lo later. Kan Zezi pou dirize konman lerwa dan lesyel, i pou fer sa zonn reviv ankor dan sa nouvo paradi lo later. Eski pa sa i fer nou kontan!

## *Rezireksyon Zezi ziska ki Pol ti ganny met dan Prizon*


*Trwazyenm zour apre ki Zezi ti'n mor, i ti leve dan lanmor. Sa zour i ti aparet avek son bann disip dan senk diferan lokazyon. Zezi ti kontinyen aparet avek zot pour karant zour. Apre, anmezir ki son bann disip ti pe gete, Zezi ti mont dan lesyel. Dis zour plitar, Bondye ti fer lespri sen desann lo bann disip Zezi ki ti pe espere an Zerizalenm.*

*Plitar, bann lennmi Zezi ti met bann zapot dan prizon, me en lanz ti sov zot. Bann dimoun ki pa ti kontan bann disip ti saboul Etyenn avek ros ziska ki i ti mor. Me nou pou aprann konman ki Zezi ti swazir enn sa bann dimoun pour vin son serviter spesyal, e i ti vin zapot Pol. Apre trwa an edmi ki Zezi ti'n mor, Bondye ti anvoy zapot Pyer pres avek Korney ek son fanmiy, zot pa ti bann Zwif.*

*Trez an apre, Pol ti fer son premye vwayaz pour li al koz lo rwayonm Bondye. Lo son dezyenm vwayaz Timote ti al avek li. Nou pou aprann konman Pol ek son zanmi ti annan en kantite moman eksitan letan zot ti pe servi Bondye. Finalman, Pol ti ganny met dan prizon an Ronm. De an plitar i ti ganny large, me apre i ti ganny met dan prizon ankor e ganny touye. Dan setyenm parti nou pou vwar listwar pour 32 lannen.*



**E**SKI ou konnen lekel sa madanm ek sa de zonn ki la? Sa madanm i apel Mari Madlenn. I ti en zanmi Zezi. E sa de zonn ki dan lenz blan i de lanz. Sa pti lasanm ki Mari pe get ladan i sa landrwa



kot lekor Zezi ti ganny mete apre ki i ti'n mor. I apel en tonbo. Me aprezan lekor Zezi nepli la! Lekel ki'n pran li? Annou vwar.

Apre ki Zezi ti'n mor, bann pret ti dir avek Pilat: 'Kan Zezi ti ankor vivan i ti dir ki i pou leve son trwazyenm zour. Alor donn lord bann solda pour vey sa tonbo. Son bann disip pa pou kapab vol son lekor e dir ki i'n leve dan lanmor!' Pilat ti dir avek bann pret anvoy bann solda vey sa tonbo.

Me granmaten son trwazyenm zour apre ki Zezi ti'n mor, en lanz Zeova ti aparet. I ti roul sa ros. Bann solda ti telman per ki zot pa ti kapab bouze. Finalman, kan zot ti get dan tonbo, sa lekor ti nepli la! Serten bann solda ti al dan lavil e rakont bann pret. Eski ou konnen ki sa bann move pret ti fer? Zot ti pey bann solda pour koz lalang. Bann pret ti dir avek bann solda: 'Dir ki bann disip ti vini dan lannwit pandan ki nou ti pe dormi, e vol sa lekor.'

Antretan, serten bann madanm ki ti zanmi Zezi ti vizit sa tonbo. Zot ti sirprann pour vwar tonbo vid. Deswit de lanz dan lenz klate ti aparet. 'Akoz zot pe rod Zezi la?' sa de lanz ti demande. 'I'n leve. Ale vitman e rakont son bann disip.' Sa bann madanm ti tay vit. Me dan semen en zonn ti aret zot. Ou konnen lekel sa zonn? Ti Zezi! 'Ale rakont mon bann disip,' i ti dir.

Kan bann madanm ti rakont bann disip ki Zezi ti vivan e ki zot ti'n vwar li, bann disip pa ti oule krwar. Pyer ek Zan ti taye ziska kot tonbo pour vwar pour zot menm, me tonbo ti vid! Kan Pyer ek Zan ti ale, Mari Madlenn ti reste. Sa se kan i ti get anndan e vwar sa de lanz.

Eski ou konnen ki ti'n arive avek lekor Zezi? Bondye ti'n fer li disparet. Bondye pa ti fer Zezi lev dan sa lekor zonn dan ki i ti mor. I ti donn Zezi en nouvo lekor spirityel parey bann lanz dan lesyel i annan. Me pour montre son bann disip ki i ti vivan, Zezi ti kapab pran en lekor ki dimoun ti kapab vwar, parey nou pou aprann dan lot zistwar.

**A**PRE ki Pyer ek Zan ti kit tonbo kot lekor Zezi ti ete, Mari ti reste la li tousel. I ti konmans plere. Apre i ti avanse e get dan tonbo, parey ou kapab vwar dan sa portre. I ti vwar de lanz dan tonbo! Zot ti demann li: ‘Akoz ou pe plere?’

Mari ti reponn: ‘Zot in pran mon Senyer, e mon pa konnen kote zot in met li.’ Apre Mari ti vire e i ti vwar en zonn. Sa zonn ti demann li: ‘Lekel ki ou pe rode?’

Mari ti krwar ki sa zonn ti en zardinyen, e ki i ti’n kapab pran lekor Zezi. Alor i ti dir: ‘Si ou’n pran li, dir mwan kote ou’n met li.’ Me sa zonn ti Zezi li menm. I ti annan en nouvo lekor ki Mari pa ti kapab rekonnèt. Me kan Zezi ti apel Mari par son non, i ti konnen ki se Zezi ki ti pe koz avek li. I ti taye e rakont bann disip: ‘Mon’n vwar Senyer!’

Plitar dan lazournen, pandan ki de disip ti pe al dan vilaz Emais, en zonn ti aproz e mars avek zot. Sa de disip ti vremen tris aköz Zezi ti’n ganny touye. Me pandan ki zot ti pe marse, sa zonn ti eksplik zot en ta keksoz dan Labib ki ti fer zot santi zot pli byen. Finalman, kan zot ti arete pour pran en repa, bann disip ti rekonnèt ki sa zonn ti Zezi. Apre, Zezi ti disparet, e sa de disip ti retourn Zerizalenm pour rakont bann zapot lo Zezi.

Pandan ki sa ti pe deroule, Zezi ti osi aparet avek Pyer. Lezot ti eksite kan zot ti antann sa. Apre sa de disip ti al Zerizalenm e trouv bann zapot. Zot ti rakonte konman ki Zezi ti’n aparet avek zot lo semen. Pandan ki zot ti pe rakont sa, en keksoz merveye ti arive. Ou konnen kwa?

Get sa portre. Zezi ti aparet la dan sa lasanm, menm si laport ti fermen. Bann disip ti vremen kontan. Pa i ti en zour eksitan? Eski ou rapel ki kantite fwa Zezi ti’n aparet avek son bann disip ziska prezan? Senk fwa, non?

Zapot Toma pa ti avek zot kan Zezi ti aparet. Alor bann disip ti dir

avek li: 'Nou'n vwar Senyer!' Me Toma ti dir ki i bezwen vwar Zezi li menm avan ki i krwar. Byen, wit zour plitar bann disip ti ansanm dan en lasanm ki ti fermen, e safwasi Toma ti avek zot. Toudenkou, Zezi ti aparet la dan sa lasanm. Aprezan Toma ti krwar.

Zan 20:11-29; Lik 24:13-43.





# ZEZI TI RETOURN DAN LESYEL

104

**A**NMEZIR ki bann zour ti pase, Zezi ti fer son bann disip vwar li plizyer fwa. En zour, apepre 500 son bann disip ti vwar li. Kan i ti aparet avek zot, eski ou konnen lo kwa ki Zezi ti koze? Rwayonm Bondye. Zeova ti anvoy Zezi lo later pour ansenny lo rwayonm. E i ti kontinyen fer sa menm apre ki i ti'n leve dan lanmor.

Eski ou mazine kisisa rwayonm Bondye? Wi, rwayonm i gouvènmàn Bondye dan lesyel, e Zezi i sa Enn ki Bondye in swazir pour vin lerwa. Parey nou'n vwar, Zezi ti montre ki i pou vin en bon lerwa par nouri bann ki ti lafen, geri bann ki ti malad, e menm lev bann ki ti'n mor!





Konman later pou ete, kan Zezi pou dirize konman lerwa dan lesyel pour mil an? Later antye pou vin en zoli paradi. Pou napa lager oubyen krim, ni maladi ni menm lanmor. Nou konnen ki sa i vre akoz Bondye ti'n kree later pour vin en paradi pour dimoun viv ere lo la. Se pour sa ki okonmansman i ti kree zarden Edenn. E Zezi pou fer sir ki sa ki Bondye i anv i arive pou finalman arive.

Letan ti'n arive aprezan pour Zezi retourn dan lesyel. Pour 40 zour Zezi ti fer son bann disip vwar li. Alor, zot ti asire ki i ti vivan ankor. Me avan ki i ti kit son bann disip i ti dir avek zot: 'Reste an Zerizalenm ziska ki zot resevwar lespri sen.' Lespri sen i lafors aktif Bondye, ki kapab ganny konpare avek divan, ki pou ed son bann disip pour fer lavolonte Bondye. Finalman, Zezi ti dir: 'Zot devret koz lo mwan lo later antye.'

Aprè ki Zezi ti'n dir sa, en keksoz merveye ti arive. I ti konmans mont dan lesyel, parey ou kapab vwar la dan sa portre. Apre, en nyaz ti kasyet li, e son bann disip pa ti vwar li ankor. Zezi ti al dan lesyel, e i ti konmans dirize lo son bann disip ki ti isi lo later.

1 Korentyen 15:3-8; Revelasyon 21:3, 4; Akt 1:1-11.



# BANN DISIP TI PE ESPERE AN ZERIZALENM

**S**A BANN dimoun ki la i bann disip Zezi. Zot ti obeir Zezi e zot ti reste Zerizalenm. E pandan ki zot tou zot ti pe espere, en gro tapaz ti ranpli sa lakaz antye. Ti parey tapaz en gro divan. E apre bann lalang dife ti konmans aparet lo latet sakenn sa bann disip. Eski ou vwar dife lo latet sa bann disip? Ki savedir tousala?

Ti en mirak! Zezi i dan lesyel avek son Papa, e i ti pe fer lespri sen desann lo son bann disip. Ki sa lespri ti fer sa bann disip fer? Zot tou zot ti konmans koz dan diferan langaz.

En kantite dimoun an Zerizalenm ti antann sa tapaz ki ti parey en gro divan, e zot ti vin gete ki ti pe arive. Serten sa bann dimoun ti sorti dan en lot pei, zot ti'n vin Zerizalenm pour lafet Lapannkot. Sa bann viziter ti vreman etonnen. Zot ti antann bann disip pe koz dan zot prop langaz lo bann keksoz merveye ki Bondye in fer.

‘Sa bann dimoun pa zot tou zot sorti Galile,’ bann viziter ti dir. ‘Konman ki aprezan zot kapab koz dan sa bann diferan langaz ki nou koze dan nou pei?’

Pyer ti debout pour eksplik zot. Avek en lavwa byen for i ti eksplik bann dimoun konman Zezi ti ganny touye e ki Zeova ti lev li dan lanmor. ‘Aprezan Zezi i dan lesyel lo kote drwat Bondye,’ Pyer ti dir. ‘E i'n fer lespri sen desann lo nou parey i ti promet. Se pour sa rezon ki zot in vwar e antann sa bann mirak.’

Kan Pyer ti dir sa bann keksoz, en kantite dimoun ti regrete sa ki ti arive avek Zezi. ‘Ki nou devret fer?’ zot ti demande. Pyer ti dir zot: ‘Zot devret sanz zot lavi e batize.’ Alor sa menm zour apepre 3,000 dimoun ti ganny batize e ti vin disip Zezi.



# ZOT TI GANNY LARGE DAN PRIZON

**G**ET sa lanz la pe ouver laport prizon. Sa bann zonn ki i pe les ale i bann zapot Zezi. Annou vwar akoz ki zot in ganny met dan prizon.

Pa bokou letan apre ki lespri sen ti desann lo bann disip Zezi, sa ti arrive: Ti en zour apremidi, Pyer ek Zan ti pe al dan tanp an Zerizalenm. La, obor laport ti annan en zonn ki pa ti kapab marse depi son nesans. Toulezour bann dimoun ti met li la obor laport afen ki i ti kapab mandyan larzan bann dimoun ki ti pe al dan tanp. Kan i ti vwar Pyer ek Zan, i ti sipliy zot pour donn li keksoz. Ki sa de zapot ti pou fer?

Zot ti arete e get sa pov zonn. 'Mon napa larzan,' Pyer ti dir, 'me mon pou donn ou sa ki mon annan. Lo non Zezi, leve e marse!' Pyer ti atrap lanmen sa zonn, e deswit sa zonn ti leve e i ti konmans marse.



Kan dimoun ti vwar sa, zot ti etonnen e zot ti vreman kontan sa mirak merveye.

‘Se par lafors Bondye, ki ti lev Zezi dan lanmor, ki nou’n fer sa mirak,’ Pyer ti dir. Pandan ki li avek Zan ti pe koze, serten sef relizye ti vini. Zot ti ankoler akoz Pyer ek Zan ti pe dir avek bann dimoun ki Zezi ti’n leve dan lanmor. Alor bann sef relizye ti atrap zot e met zot dan prizon.

Lannmen, bann sef relizye ti fer en gran renyon. Pyer ek Zan, ansanm avek sa zonm ki zot ti’n geri, ti ganny anmennen. ‘Par ki lafors ki zot in fer sa mirak?’ bann sef relizye ti demande.

Pyer ti dir zot ki par lafors Bondye, ki ti lev Zezi dan lanmor. Bann pret pa ti konnen ki pou fer, akoz zot pa ti kapab dir ki sa mirak pa ti’n arive. Alor zot ti averti bann zapot pour pa koz lo Zezi ankor, e apre zot ti les zot ale.

Anmezir ki bann zour ti pase bann zapot ti kontinyen koz lo Zezi e geri bann ki ti malad. Nouvel lo sa bann mirak ti fann partou. Menm bann dimoun ki ti sorti dan lavil otour Zerizalenm ti anmenn bann dimoun ki ti malad pour bann zapot geri. Sa ti fer bann sef relizye zalou, alor zot ti atrap bann zapot e met zot dan prizon. Me zot pa ti reste dan prizon pour lontan.

Pandan lannwit, lanz Bondye ti ouver laport prizon, parey ou kapab vwar la. Lanz ti dir: ‘Al dan tanp, e kontinyen koz avek bann dimoun.’ Lannmen bomaten, kan bann sef relizye ti anvoy bann zonm sers bann zapot dan prizon, bann zapot ti’n fini ale. Plitar, sa bann zonm ti vwar zot dan tanp pe ansennyen. Sa bann zonm ti anmenn zot kot Lasal Sannedren devan Konsey Zwif.

‘Nou’n donn zot lord pour pa koz lo Zezi ankor,’ bann sef relizye ti dir. ‘Me zot in ranpli Zerizalenm avek zot lansennyman.’ Bann zapot ti reponn: ‘Nou bezwen obeir Bondye konman dirizan plito ki zonm.’ Alor zot ti kontinyen koz lo sa “bon nouvel.” Eski sa pa i en bon legzanp pour nou swiv?

**S**A ZONM ki pe azenou la i apel Etyenn. I ti en disip fidel Zezi. Me gete ki pe arive avek li la! Sa bann zonm pe saboul li avek bann gro ros. Eski zot pe fer sa move keksoz akoz zot ti ay Etyenn en kantite? Annou vwar.

Bondye ti ed Etyenn pour fer bann mirak merveye. Sa bann zonm pa ti kontan sa, alor zot ti konmans dispit avek li akoz i ti pe ansenny bann dimoun laverite. Me Bondye ti donn Etyenn konnesans, e Etyenn ti dir ki sa bann zonm pa ti pe ansenny laverite. Sa ti fer zot pli ankoler. Alor zot ti atrap li, e zot ti fer bann dimoun vin koz lalang lo li.

Gran pret ti demann avek Etyenn: ‘Eski sa bann keksoz i vre?’ Etyenn ti reponn par fer en gran diskour lo Labib. Alafen son diskour, i ti fer resorti konman ki lontan bann zonm pa ti kontan bann profet Zeova. Apre i ti dir: ‘Zot parey sa bann zonm. Zot in touy serviter Bondye, Zezi, e zot pa’n obeir lalwa Bondye.’

Sa ti fer sa bann sef relizye vreman ankoler! Zot ti grens zot ledan. Me apre Etyenn ti lev son latet, e i ti dir: ‘Gete! Mon vwar Zezi pe debout lo kote drwat Bondye dan lesyel.’ Sa bann zonm ti bous zot zorey e lans lo Etyenn. Zot ti tyonbo li e trenn li an deor lavil.

Zot ti tir zot lenz e donn Sol pour veye. Eski ou vwar Sol? Apre, serten sa bann zonm ti konmans saboul Etyenn avek ros. Etyenn ti azenou, parey ou vwar li la, e i ti priy Bondye: ‘Zeova pa pini zot pour sa move keksoz.’ Etyenn ti konnen ki serten sa bann zonm ti’n ganny anbete par bann sef relizye. Apre sa, Etyenn ti mor.

Kan en dimoun i fer ou keksoz mal, eski ou esey fer parey avek zot, oubyen eski ou demann Bondye pour fer zot ditor? Etyenn ek Zezi pa ti fer sa. Zot ti bon menm avek bann dimoun ki pa ti azir byen avek zot. Annou esey fer parey zot.



**O**U KONNEN lekel sa zonn ki'n tonm ater e ki'n met son lanmen devan son lizye. Se Sol, ki ti vey lenz sa bann zonn ki ti saboul Etyenn avek ros. Get sa lalimyer ki pe klere! Ki pe arive?


Aprè ki Etyenn ti'n mor, Sol ti konmans persekit bann disip Zezi. I ti antre dan bann lakaz enn aprè lot e trenn sa bann dimoun e zet zot dan prizon. En kantite disip ti al dan lezot lavil e konmans koz lo sa "bonn nouvel." Me Sol ti al dan lezot lavil pour rod bann disip Zezi. Aprezan i ti pe al Damas. Me pandan ki i ti pe ale, en keksoz merveye ti arive.

Toudenkou, en lalimyer sorti dan lesyel ti kler Sol. I ti tonm ater, parey nou vwar la. Aprè en lavwa ti dir: 'Sol, Sol! Akoz ou pe persekit mwan?' Sa bann zonn ki ti avek Sol ti vwar sa lalimyer e antann sa lavwa, me zot pa ti konpran ki i ti pe dir.

'Lekel ou, Senyer?' Sol ti demande.

'Mwan Zezi ki ou pe persekite,' sa lavwa ti dir. Zezi ti dir sa akoz kan Sol ti pe persekit son bann disip, Zezi ti santi konmsi Sol ti pe persekit li.

Sol ti demande: 'Ki mon devret fer, Senyer?'



‘Leve e al Damas,’ Zezi ti dir. ‘Laba ou pou ganny dir ki ou devret fer.’ Kan Sol ti leve e ouver son lizye, i pa ti kapab vwar nanryen. I pa ti vwar kler! Alor sa bann zonn ki ti avek li ti atrap son lanmen e anmenn li Damas.

Aprezan, Zezi ti koz avek enn son disip an Damas. I ti dir li: ‘Leve Ananyas. Al dan sa semen ki apel Drwat. Demande pour vwar en zonn ki apel Sol dan lakaz Zida. Mon’n swazir li pour vin enn mon serviter spesyal.’

Ananyas ti obeir. Kan i ti trouv Sol, i ti met son lanmen lo li e i ti dir: ‘Senyer in anvoy mwan kot ou pour ki ou revwar kler e ki ou ranpli avek lespri sen.’ Toudswit en keksoz ki ti resanble bann lekay ti sorti dan lizye Sol, e i ti kapab revwar kler ankore.

Avek tou son lafors Sol ti konmans koz lo sa “bonn nouvel” avek bann dimoun dan plizyer pei. I ti konmans ganny apele zapot Pol. Nou pou aprann en kantite lo li plitar. Me pour konmanse, annou vwar kote ki Bondye ti anvoy Pyer.

Akt 8:1-4; 9:1-20; 22:6-16; 26:8-20.



**S**A SE zapot Pyer ki pe debout la, e sa ki pe debout deryer li se son bann zanmi. Me akoz sa zonn pe salye Pyer? Eski i devret fer sa? Ou konnen lekel sa zonn?

Sa zonn se Korney. I ti en zofisye larme Romen. Korney pa ti konn Pyer, me i ti ganny demande pour envit Pyer dan son lakaz. Annou vwar konman ki sa ti arive.

Bann premye disip Zezi ti bann Zwif, Korney pa ti en Zwif. Me i ti kontan Bondye, i ti priy avek li, e i ti fer en kantite bon keksoz pour bann dimoun. Byen, en zour apremidi, en lanz ti aparet avek li e i ti dir: 'Bondye i kontan ou, e i pou reponn ou lapriyer. Anvoy



detrwa zonn pour al sers en serten zonn ki apel Pyer. I pe reste an Zope dan lakaz Simon ki obor lanmer.’

Toudswit, Korney ti anvoy detrwa zonn al sers Pyer. Lanmen, kan sa bann zonn ti pe ariv pre avek Zope, Pyer ti lo twa lakaz Simon. Anler lo twa, Bondye ti fer Pyer mazin en ki i vwar en gran tapi sorti dan lesyel. Dan sa tapi ti annan tou sort kalite zannimo. Dapre lalwa Bondye, sa bann zannimo pa ti bon pour manze, kantmenm sa en lavwa ti dir: ‘Leve, Pyer. Touye e manze.’

‘Non!’ Pyer ti reponn. ‘Mon pa’n zanmen manz nanryen ki pa prop.’ Me sa lavwa ti dir avek Pyer: ‘Aret apel sal bann keksoz ki Bondye i dir i prop.’ Sa ti arive trwa fwa. Pandan ki Pyer ti pe mazin en ki tousala i vdir, sa bann zonn ki Korney ti’n anvoy zot ti ariv kot lakaz e demande pour vwar Pyer.

Pyer ti desann e i ti dir: ‘Mwan menm sa zonn ki zot pe rode. Akoz zot in vin isi?’ Kan sa bann zonn ti eksplike ki en lanz ti’n dir avek Korney envit Pyer kot son lakaz, Pyer ti dakor pour al avek zot. Lanmen, Pyer ek son bann zanmi ti al vizit Korney an Sezare.

Korney ti rasanble son fanmi ek son bann zanmi pros. Kan Pyer ti arive, Korney ti vin zwenn li. I ti bese e azenou obor lipye Pyer, parey ou vwar la. Me Pyer ti dir: ‘Leve, akoz mwan osi mon zis en zonn.’ Wi, Labib i montre ki i pa byen pour azenou e ador en zonn. Nou devret ador selman Zeova.

Aprezan Pyer ti koz avek bann ki ti’n rasanble la. ‘Mon vwar ki Bondye i aksepte tou dimoun ki oule servi li,’ Pyer ti dir. E pandan ki i ti pe koze, Bondye ti anvoy son lespri sen, e bann dimoun ti konmans koz dan diferan langaz. Sa ti sirprann bann disip Zwif ki ti’n vin avek Pyer, akoz zot ti mazin en ki Bondye i kontan selman bann Zwif. Alor sa ti montre zot ki Bondye pa konsider okenn pei pli bon oubyen pli enportan ki en lot pei. Eski sa pa i en bon keksoz pour nou tou mazin en?

Akt 10:1-48; 11:1-18; Revelasyon 19:10.



**S** A ZENNONM ki ou vwar la avek zapot Pol i apel Timote. Timote ti reste avek son fanmiy dan lavil Lis. Son manman ti apel Enis e son granmanman Lois.


Sa ti trwazyenm fwa ki Pol ti pe vizit Lis. Apepre enn an avan, Pol ek Barnabas ti vin la pour premye fwa pour koz lo rwayonm. E aprezan Pol in retourn ankor avek son zanmi Silas.

Eski ou konnen ki Pol ti pe dir avek Timote? ‘Eski ou ti a kontan al avek Silas ek mwan?’ i ti pe demande. ‘Ansanm nou a kapab al koz avek bann dimoun ki reste dan bann landrwa lwen.’

‘Wi,’ Timote ti reponn, ‘Mon ti a kontan ale.’ Deswit apre, Timote ti kit son fanmiy e al avek Pol ek Silas. Me avan ki nou aprann lo zot vwayaz, annou vwar ki ti arive avek Pol. Ti apepre diset an depi ki Zezi ti aparet avek li lo semen ki al Damas.

Mazinen, Pol ti vin Damas pour persekit bann disip Zezi, me aprezan li menm i ti en disip! Plitar, detrwa lennmi ti fer plan pour touy Pol akoz zot pa ti kontan ki i ti pe koz lo Zezi. Me bann disip ti ed Pol pour sove. Zot ti met li dan en pannyen e fer li desann an deor miray lavil.

Apre, Pol ti al Antyos pour koz lo rwayonm. Se la Antyos ki bann disip Zezi ti konmans ganny apele Kreyen. Pol ek Barnabas ti ganny anvoye dan bann pei pli lwen pour





koz lo rwayonm. Enn bann lavil ki zot ti vizite ti Lis, landrwa kot Timote ti reste.

Aprezan, apepre enn an plitar, Pol ti retourn Lis lo en dezyenm vwayaz. Kan Timote ti al avek Pol ek Silas, eski ou konnen kote zot ti ale? Get sa map, e annou aprann detrwa landrwa.

Pour konmanse, zot ti al Ikonyonm, apre dan en dezyenm lavil ki ti apel Antyos. Apre sa zot ti vwayaz ziska Troas, apre zot ti al dan lavil Filip, Tesalonik ek Bere. Eski ou vwar Atenn lo sa map? Pol ti koz lo mesaz rwayonm laba. Apre sa, zot ti pas enn an edmi an Korent. Finalman, zot ti aret en pti moman an Efez. Apre, zot ti retourn an Sezare par bato, e vwayaze ziska Antyos, kot Pol ti reste.

Alor Timote ti vwayaz en kantite, kantite kilomet pour ed Pol koz lo 'bon nouvel' e pour form en kantite kongregasyon Kreyen. Ler ou pou gran, eski ou pou vin en serviter fidel Bondye parey Timote?

Akt 9:19-30; 11:19-26; sapit 13 ziska 17; 18:1-22.

# EN GARSON TI GANNY SONMEY

111

**K**I PE arive la? Eski sa garson ki pe dormi la ater in ganny dimal? Gete! enn sa bann zonm ki pe sorti deor i Pol! Eski ou vwar Timote osi? Eski sa pti garson in tonm par lafnet?

Wi, se sa ki'n arive. Pol ti pe fer en diskour avek bann disip an Troas. I ti konnen ki i pa ti pou vwar zot ankor pour en bon pe letan akoz i ti bezwen ale lannmen. Alor i ti kontinyen koze ziska minwi.

Sa garson ki apel Etikis ti pe asiz obor lafnet, e i ti ganny sonmey. I ti baskile e tonbe sorti lo trwazyenm letaz! Alor ou kapab vwar akoz sa bann dimoun ti enkyet. Kan sa zonm ti anmas sa garson, i ti zis parey zot ti pe mazine. I ti'n fini mor!

Kan Pol ti vwar ki sa garson ti'n mor, i ti dormi lo li e anmay li. Apre i ti dir: 'Pa bezwen trakase. I ankor vivan!' E i ti ankor vivan! Ti en mirak! Pol ti'n fer li reviv ankor! Tou dimoun ti vremen kontan.


Zot tou zot ti retourn anler ankor e manze. Pol ti kontinyen koze ziska lannmen bomaten. Me Etikis pa ti dormi ankor. Apre, Pol, Timote ek bann ki ti pe vwayaz avek zot ti anbark lo bato. Eski ou konnen kote zot ti pe ale?

Pol ti pe termin son trwazyenm vwayaz, e i ti pe al kot li. Pandan sa vwayaz Pol ti'n reste trwa an dan lavil Efez li tousel. Sa ti en pli gran vwayaz ki sa enn dezyenm.

Apre ki sa bato ti'n kit Troas i ti aret Mile pour en pe letan. Lefe ki Efez pa ti tro lwen, Pol ti anvoy sers bann ansyen dan kongregasyon pour vin Mile afen ki i kapab koz avek zot pour dernyen fwa. Apre sa, kan ti'n ariv ler pour bato kite, zot ti vremen sagren pour vwar Pol ale!

Alafen, bato ti retourn Sezare. Letan ki Pol ti pe reste la kot Filip, profet Agabis ti averti Pol ki i pou ganny met dan prizon letan i ariv Zerizalenm. E se sa ki ti arive. Apre ki i ti dan prizon pour de zan Sezare, Pol ti ganny anvoye Ronm pour ganny zize devan Sezar, ki ti dirizan Romen. Annou vwar ki ti arive pandan son vwayaz an Ronm.

Akt sapit 19 ziska 26.



# BATO TI KOULE PROS AVEK EN ZIL

112

**G**ET sa bato i dan difikilte! I pe kas an morso! Eski ou vwar bann dimoun ki'n sot dan delo? Detrwa in deza ariv ater. Eski Pol ki la? Annou vwar ki'n arive avek li.

Mazinen, ki pour de zan Pol ti dan prizon Sezare. Apre, li ek detrwa lezot prizonnyen ti ganny mete lo en bato, e zot ti al Ronm. Kan zot ti pas pre avek zil Kret, en tanpet ti tap zot. Divan ti pe soufle sitan for ki sa bann zonn pa ti kapab kondwir bato. E zot pa ti



kapab vwar soley pandan lazournen oubyen zetwal aswar. Finalman, apre plizyer zour, bann dimoun ki ti lo bato ti panse ki zot pa ti pou ganny sove.


Apre, Pol ti debout e dir: ‘Personn parmi zot pa pou perdi zot lavi; zis bato ki pou perdi. Pandan lannwit, en lanz Bondye ti vin kot mwan e dir, “Pa bezwen per, Pol! Fodre ki ou prezant devan Sezar, dirizan Romen. E Bondye pou sov sa bann dimoun ki pe navig avek ou.” ’

Apepre minwi katorzyenm swar, apre ki sa tanpet ti’n konmanse, bann maren ti remarke ki delo ti pe desann! Lefe ki zot ti per ki zot a tap avek bann ros dan fernwar, zot ti zet bann lank. Lannmen bomaten zot ti vwar en labe. Zot ti deside anmenn bato lo lans.

Kan zot ti ariv pre avek ater, bato ti tap en ban disab e i ti pri lanmenm. Apre laroul ti konmans kraz li, e bato ti konmans kas an morso. Sa zofisye larme ki ti ansarz ti dir: ‘Tou sa ki kapab naze sot dan delo premye, apre naze ziska ater. Lezot i devre swiv zot lo plans ek debri bato.’ E se sa ki zot ti fer. Dan sa fason tou sa 276 dimoun ki ti lo bato ti ariv ater sen e sof, zis parey lanz ti’n promet.

Sa zil ti apel Malt. Bann dimoun lo sa zil ti zantiy, e zot ti pran swen avek bann dimoun ki ti abor sa bato. Kan letan ti’n kalmi, Pol ti ganny mete lo en lot bato e ganny anmennen an Ronm.

Akt 27:1-44; 28:1-14.





ΜΥΣΤΗΡΕΩΣΑΝΑ ΠΙΤΑΡΑΝΤΟΝΑΝΝΟΥ  
ΗΠΟΛΚΡΟΝΟΙΚΕ ΣΕΝΟΥΕΥΕΤΗΝΙΟΥ  
ΗΝΕΡΑΝΝΕΣΙΕΝ ΕΝΘΩΑ ΙΧΥΕΥΑ

**O**U VWAR sa lasenn otour lanmen Pol. Get sa solda Romen pe vey li. La, Pol i en prizonyen an Ronm. I pe espere ziska ki Sezar i deside ki pour fer avek li. Kantmenm i en prizonyen, bann dimoun ti ganny permisyon pour vizit li.

Trwa zour apre ki Pol ti'n ariv an Ronm i ti ekrir bann sef Zwif pour vin vizit li. En kantite Zwif an Ronm ti vini. Pol ti koz avek zot lo Zezi ek rwayonm Bondye. Serten ti krwar e vin Kreyen, me lezot pa ti krwar.

Pol ti osi koz avek diferan solda ki ti vin vey li. Pour sa de zan ki i ti'n ganny garde konman en prizonyen, Pol ti koz avek tou dimoun ki i ti kapab. Rezilta, se ki menm fanmiy Sezar ti antann sa bon nouvel lo rwayonm, e serten parmi zot ti vin Kreyen.

Me lekel sa viziter ki la pe ekrir lo latav? Eski ou kapab devinen? Wi, se Timote. Timote osi ti dan prizon aköz i ti koz lo Rwayonm, me aprezan i lib. I'n vin la pour ed Pol. Eski ou konnen ki Timote pe ekrir? Annou vwar.

Eski ou mazin sa de lavil Filip ek Efez dan Zistwar 110? Pol ti ede pour konmans kongregasyon Kreyen dan sa de lavil. Aprezan, letan ki i ti dan prizon, Pol ti ekrir sa bann Kreyen. Sa bann let i dan Labib, e zot apel Efezyen ek Filipyen. Pol ti pe dir Timote ki pour dir avek zot bann zanmi Kreyen an Filip.

Bann Filipyen ti'n azir byen avek Pol. Zot ti'n anvoy en kado pour li la dan prizon, e alor Pol ti pe remersye zot pour sa kado. Epafrodit ti'n vin anmenn sa kado. Me Epafrodit ti tonm malad e i ti pros pour mor. Apre i ti byen ankor e i ti pare pour al kot li. I ti pou anmenn sa let ki sorti kot Pol ek Timote avek li kan i retourn Filip.



Letan ki i ti dan prizon, Pol ti ekrir de lezot let ki nou annan dan Labib. Enn ti pour bann Kreyen ki ti pe reste dan lavil Kolos. Eski ou konnen konman i apele? Kolosyen. Lot ti en let personnel pour en zanmi pros ki ti apel Filemon ki ti osi reste Kolos. Sa let ti konsern serviter Filemon, Onezim.

Onezim ti sov Filemon e al an Ronm. Onezim ti tande ki Pol ti dan prizon an Ronm. I ti vizit Pol, e Pol ti koz avek li. Deswit Onezim osi ti vin en Kreyen. Aprezan, Onezim ti regrete ki i ti'n sove. Eski ou konnen ki Pol ti ekrir dan sa let pour Filemon?

Pol ti demann Filemon pour pardonn Onezim. 'Mon pe fer li retourn kot ou,' Pol ti ekrir. 'Me aprezan i pa zis ou serviter. Me i en bon frer Kreyen.' Kan Onezim ti retourn an Kolos i ti anmenn avek li sa de let, enn pour bann Kolosyen e lot pour Filemon. Filemon ti vreman kontan pour aprann ki son serviter in vin en Kreyen.

Kan Pol ti ekrir bann Filipyen ek Filemon, i ti annan bann bon nouvel. 'Mon pe anvoy Timote kot zot,' Pol ti dir avek bann Filipyen. 'Me mwan osi mon pou vizit zot tre byento.' E avek Filemon i ti dir: 'Prepar en plas pour mwan reste.'

Kan Pol ti ganny large i ti vizit son bann frer ek ser Kreyen dan plizyer landrwa. Me plitar, Pol ti ganny met ankor dan prizon an Ronm. Safwasi i ti konnen ki i ti pou ganny touye. Alor i ti ekrir Timote e demann li pour vin vitman. 'Mon'n reste fidel avek Bondye,' Pol ti ekrir, 'e Bondye pou rekonpans mwan.' Detrwa lannen plitar apre ki Pol ti ganny touye, Zerizalenn ti ganny detrir ankor, safwasi par bann Romen.

Me i annan plis keksoz ankor dan Labib. Zeova Bondye ti fer zapot Zan ekrir son bann dernyen liv, enkli liv Revelasyon. Sa liv Labib i koz lo lavenir. Annou vwar ki pou arive dan lavenir.

Akt 28:16-31; Filipyen 1:13; 2:19-30; 4:18-23; Ebre 13:23;  
Filemon 1-25; Kolosyen 4:7-9; 2 Timote 4:7-9.

## *Sa ki Labib i dir i vin vre*

*Labib pa selman rakont bann vre zistwar ki'n arive dan lepase me i osi dir ki pou arive dan lavenir. Imen pa kapab dir ki pou arive dan lavenir. Se pour sa rezon ki nou konnen ki se Bondye ki'n dir sa bann keksoz ki annan dan Labib. Ki Labib i dir lo lavenir?*

*I koz lo gran lager Bondye. Dan sa lager, Bondye pou retir tou bann move keksoz ek bann move dimoun, me i pou protez bann ki servi li. Lerwa Bondye, Zezi Kri, pou fer tou serviter Bondye viv ere, e zot pa pou zanmen malad ankor e mor.*

*Pa nou vreman kontan ki Bondye pou fer en nouvo paradi lo later? Me nou bezwen fer serten keksoz si nou anvi viv dan sa paradi. Dan dernyen zistwar dan sa liv nou pou aprann ki nou devret fer pour rezwir sa bann keksoz merveye ki Bondye in anmase pour bann ki servi li. Alor lir parti 8 e uwar ki Labib i dir pou arive dan lavenir.*

**K**I OU vwar la? Wi, bann larme lo seval blan. Me get byen kote ki zot sorti. Bann seval pe galope sorti dan lesyel lo bann nyaz! Eski i vremen annan seval dan lesyel?

Non, zot pa bann vre seval. Bann seval pa kapab galop lo nyaz, pa i vre? Me Labib i koz lo bann seval dan lesyel. Eski ou konnen akoz?

Akoz lontan bann seval ti ganny servi en kantite dan lager. Alor, Labib i koz lo bann dimoun ki mont seval sorti dan lesyel pour montre ki Bondye pou lager avek bann dimoun lo later. Eski ou konnen kote sa lager pour deroule? Dan en landrwa ki apel Armagedon. Sa lager pou detrir tou move keksoz lo later.

Zezi i sa Enn ki pou ansarz sa lager kot Armagedon. Mazinen, Zezi i sa enn ki Zeova in swazir pour vin lerwa Son gouvernman. Se pour sa rezon ki i annan en kouronn lo son latet. E sa sab i montre ki i pou touy tou lennmi Bondye. Lefe ki nou konnen ki Bondye pou detri tou move dimoun, eski sa i devret sirprann nou?

Get zistwar 10. Ki ou vwar la? Wi, sa gran deliz ki ti detri tou move dimoun. Lekel ki ti fer sa deliz? Zeova Bondye. Aprezan get zistwar 15. Ki pe arive la? Sodonm ek Gomor pe ganny detrir par dife ki Zeova ti anvoye.

Vir lo zistwar 33. Gete ki pe arive avek bann seval ek saret lager bann Ezipsyen. Lekel ki ti fer zot noye? Zeova. I ti fer sa pour protez son pep. Get zistwar 76. Ou pou vwar ki Zeova ti menm les son pep, bann Izraelit, ganny detrir akoz zot ti move.

Alor, nou pa merit sirprann ki Zeova pou anvoy son larme ki sorti dan lesyel pour met en lafen avek bann move keksoz lo later. Me zis mazinen ki sa pou vedir! Vir paz e annou vwar.



**G**ET sa bann gro pye dibwa, sa bann zoli fler ek sa gran montanny. Pa la i zoli? Gete konman sa serf pe manz dan lanmen sa pti garson. Get bann lyon ek bann seval pe debout laba dan laplenn. Eski ou ti a kontan reste dan en landrwa parey sa?

Bondye i oule ki ou viv pour touzour dan en paradi lo later. E i pa oule ki ou annan okenn douler ek soufrans ki dimoun pe gannyen ozordi. Sa se promes ki Labib in fer avek bann dimoun ki pou viv dan sa nouvo paradi: 'Bondye pou avek zot. Pou nepli annan ni lanmor, ni plere, ni soufrans. Sa bann vye keksoz pou'n disparet.'


Zezi pou fer sir ki sa bann keksoz merveye i arive. Eski ou konnen kan sa pou arive? Wi, apre ki i pou'n tir tou bann move



keksoz ek bann move dimoun lo later. Mazinen, ki letan Zezi ti lo later i ti geri bann dimoun ki ti annan tou sort maladi, e i ti menm lev bann ki ti'n mor. Zezi ti fer sa pour montre ki i pou fer lo later antye kan i vin Lerwa rwayonm Bondye.

Zis mazinen konman i pou gou dan sa nouvo paradi lo later! Zezi ansanm avek bann ki i'n swazir, pou dirize dan lesyel. Sa bann dirizan pou pran swen avek tou dimoun lo later e fer sir ki zot ere. Annou vwar ki nou devret fer pour Bondye donn nou lavi eternel dan son nouvo paradi.

Revelasyon 21:3, 4; 5:9, 10; 14:1-3.





Mon liv  
ZISTWAR  
LABIB

Labib  
sen

# KI NOU KAPAB FER POUR VIV 116 POUR TOUZOUR

**E**SKI ou kapab dir ki sa pti fiy ek son bann zanmi pe lir? Wi, i sa menm liv ki ou pe lir—*Mon Liv Zistwar Labib*. E zot pe lir menm zistwar ki ou pe lir—“Ki nou kapab fer pour viv pour touzour.”

Eski ou konnen ki zot pe aprann? Premyerman, ki nou bezwen konn Zeova ek son Garson Zezi si nou anvi viv pour touzour. Labib i dir: ‘Vwala konman pour viv pour touzour. Aprann lo sa sel vre Bondye, ek son Garson ki i’n anvoy lo later, Zezi Kri.’

Konman ki nou kapab aprann lo Zeova ek son Garson Zezi? En fason se par lir *Mon Liv Zistwar Labib* depi konmansman ziska finisyon. I rakont en kantite keksoz lo Zeova ek Zezi, pa i vre? E i koz lo en kantite keksoz ki zot in fer e ki zot pou fer. Me nou bezwen fer plis ki zis lir sa liv.

Eski ou vwar sa lot liv ater? Sa i en Labib. Fer en dimoun lir avek ou en parti dan Labib dan ki sa bann zistwar sa liv i baze. Labib i dir nou tou keksoz ki nou bezwen afen ki nou tou nou kapab servi Zeova dan sa bon fason e ganny lavi eternal. Alor nou devret fer li en labitid pour etidye Labib souvan.

Me i pa ase pour zis aprann lo Zeova Bondye ek Zezi Kri. Nou kapab konn en kantite en kantite keksoz lo zot ek zot lansennyman, me kantmenm sa pa ganny lavi eternal. Eski ou konnen ki nou devret fer anplis?

Nou bezwen viv dapre bann keksoz ki nou’n aprann. Eski ou mazin Zida Iskaryot? I ti enn sa 12 dimoun ki Zezi ti swazir pour vin son zapot. Zida ti konn en kantite keksoz lo Zeova ek Zezi. Me ki ti arive avek li? Apre en serten letan, i ti vin egois, e i ti trai Zezi pour 30 pyes larzan avek son bann lennmi. Alor Zida pa pou ganny lavi eternal.



Eski ou mazin Geazi, sa zonn ki nou ti aprann lo li dan Zistwar 69? I ti oule en pe lenz ek larzan ki pa ti pour li. Alor i ti koz lalang pour ganny sa bann keksoz. Me Zeova ti pini li. E Zeova pou pini nou osi si nou pa obei son bann lalwa.

Me i annan en kantite bon dimoun ki toultan servi Zeova fidelman. Nou anvi vin parey zot, pa i vre? Samyel i en bon legzanp pour nou swiv. Mazinen, kan nou ti lir Zistwar 55, i ti annan selman 4 oubyen 5 an kan i ti konmans servi Zeova dan son tabernak. Menm si ou ankor zenn, ou kapab servi Zeova.

Byensir, sa dimoun ki nou tou nou anvi swiv i Zezi Kri. Menm kan i ti ankor en pti garson, parey i montre dan Zistwar 87, i ti la dan tanp pe koz avek lezot lo son Papa seles. Annou swiv son legzanp. Annou rakont en kantite dimoun otan ki nou kapab lo nou Bondye merveye Zeova ek son Garson, Zezi Kri. Si nou fer sa bann keksoz, nou pou alor kapab viv pour touzour dan nouvo paradi Bondye lo later.

Zan 17:3; Psonm 145:1-21.



# Kestyon letid pour *Mon liv zistwar Labib*

## Zistwar 1

### Bondye ti kree bann Keksoz

1. Kote tou bann bon keksoz i sorti, eski ou kapab donn en legzanp?
2. Lekel premye keksoz Bondye ti kree?
3. Akoz sa premye lanz ti spesyal?
4. Dekrir ki mannyer later ti ete o konmansman. (Get portre.)
5. Ki mannyer Bondye ti konmans prepar later pour zannimo ek dimoun reste lo la?

#### Lezot kestyon:

1. *Lir Zeremi 10:12.*

Ki bann kalite ki Bondye i annan ki ganny demontre dan son travay kreasyon? (Iza. 40:26; Rom. 11:33)

2. *Lir Kolosyen 1:15-17.*

Ki rol Zezi ti zwe dan travay kreasyon e ki lefe sa i annan lo lafason ki nou vwar li? (Kol. 1:15-17)

3. *Lir Zenez 1:1-10.*

(a) Ki mannyer later in vin an egzistans? (Zen. 1:1)

(b) Ki ti arive premye zour kreasyon? (Zen. 1:3-5)

(c) Dekrir ki ti arive dezyenm zour kreasyon. (Zen. 1:7, 8)

## Zistwar 2

### En zoli Zarden

1. Ki mannyer Bondye ti prepar later pour nou kapab reste lo la?
2. Dekrir sa bann diferan kalite zannimo ki Bondye ti kree. (Get portre.)
3. Akoz zarden Edenn ti spesyal?
4. Ki mannyer Bondye ti anvi later antye i vini?

#### Lezot kestyon:

1. *Lir Zenez 1:11-25.*

(a) Ki Bondye ti kree pandan trwazyenm zour kreasyon? (Zen. 1:12)

(b) Ki ti arive pandan katriyenm zour kreasyon? (Zen. 1:16)

(c) Ki bann kalite zannimo Bondye ti kree lo senkyenm ek sizyenm zour? (Zen. 1:20, 21, 25)

2. *Lir Zenez 2:8, 9.*

Ki sa de pye dibwa spesyal ki Bondye ti met dan sa zarden e ki zot ti reprezante?

## Zistwar 3

### Adan ek Ev

1. Kwa ki diferan avek portre Zistwar 3 ek portre Zistwar 2?
2. Lekel ki ti kree sa premye zonn e ki mannyer sa zonn ti apele?
3. Ki louvraz Bondye ti donn Adan pour fer?
4. Akoz Bondye ti andormi Adan?
5. Pour ki kantite letan Adan ek Ev ti kapab viv e ki travay Zeova ti anvi zot fer?

#### Lezot kestyon:

1. *Lir Psonm 83:18.*

Ki mannyer Bondye i apele e ki pozisyon zis li toussel ki annan lo later? (Zer. 16:21; Dan. 4:17)

2. *Lir Zenez 1:26-31.*

(a) Ki sa dernyen keksoz ki Bondye ti kree si-zyenm zour e ki mannyer i ti diferan avek bann zannimo? (Zen. 1:26)

(b) Ki provizyon Bondye ti fer pour sa zonn ek bann zannimo? (Zen. 1:30)

3. *Lir Zenez 2:7-25.*

(a) Adan ti annan sa travay pour donn non bann zannimo, ki sa ti enkli? (Zen. 2:19)

(b) Ki mannyer Zenez 2:24 i ed nou pour konpran pwennvi Bondye lo maryaz, separasyon ek divors? (Mat. 19:4-6, 9)

## Zistwar 4

### Zot an deur Zarden

1. Ki pe arive avek Adan ek Ev dan sa portre?
2. Akoz Zeova ti pini zot?
3. Ki sa serpan ti dir Ev fer?
4. Lekel ki ti fer sa serpan koz avek Ev?
5. Akoz Adan ek Ev ti an deur sa zoli zarden?

#### Lezot kestyon:

1. *Lir Zenez 2:16, 17 e osi 3:1-13, 24.*

(a) Ki mannyer kestyon ki sa serpan ti demann Ev ti mal reprezant Zeova? (Zen. 3:1-5; 1 Zan 5:3)

(b) Ki mannyer legzanp Ev i en lavertisman pour nou? (Fili. 4:8; Zak 1:14, 15; 1 Zan 2:16)

(c) Dan ki fason Adan ek Ev pa ti aksepte responsabilite pour zot aksyon? (Zen. 3:12, 13)

(d) Ki mannyer sa bann seriben ki ti debout dan les zarden Edenn ti siport souvrennte Zeova? (Zen. 3:24)

2. *Lir Revelasyon 12:9.*

Ki mannyer Satan in reisi detourn imen kont dominasyon Bondye? (1 Zan 5:19)

## Zistwar 5

### En Lavi difisil ti konmanse

1. Ki mannyer lavi ti ete pour Adan ek Ev an deor zarden Edenn?
2. Ki ti konmans arive avek Adan ek Ev e akoz?
3. Akoz bann zanfan Adan ek Ev ti pou vin vye e mor?
4. Si Adan ek Ev ti'n obeir Zeova, ki mannyer zot lavi ek lavi zot zanfan ti pou ete?
5. Ki mannyer dezobeisans Ev ti anmenn soufrans pour li?
6. Ki mannyer sa de premye garson Adan ek Ev ti apele?
7. Lekel sa bann lezot zanfan dan sa portre?

#### Lezot kestyon:

1. *Lir Zenez 3:16-23 e osi 4:1, 2.*

(a) Lefet ki later ti ganny modi, ki mannyer sa ti afekte lavi Adan? (Zen. 3:17-19; Rom. 8:20, 22)

(b) Akoz non Ev ki vedir "Enn Vivan" ti apropiye? (Zen. 3:20)

(c) Ki mannyer Zeova ti montre konsiderasyon pour Adan ek Ev menm apre ki zot ti'n fer pese? (Zen. 3:7, 21)

2. *Lir Revelasyon 21:3, 4.*

Ki keksoz dan sa "lemonn ansyen" ki ou ti a kon-tan i ganny detrir?

## Zistwar 6

### En bon ek en move Garson

1. Ki travay Kaen ek Abel ti fer?
2. Ki kado Kaen ek Abel ti anmenn pour Zeova?
3. Akoz Zeova ti dakor avek kado Abel e akoz i pa ti dakor avek kado Kaen?
4. Ki kalite dimoun Kaen ti ete e ki mannyer Zeova ti esey koriz li?
5. Ki Kaen ti fer ler i ti dan laplenn li tousel avek son frer?
6. Eksplik ki ti arive avek Kaen apre ki i ti'n touy son frer.

#### Lezot kestyon:

1. *Lir Zenez 4:2-26.*

(a) Ki mannyer Zeova ti dekrir sa move kondisyon ki Kaen ti ladan? (Zen. 4:7)

(b) Ki mannyer Kaen ti revel sa ki i ti annan dan son leker? (Zen. 4:9)

(c) Ki pwennvi Zeova anver versman disan bann inosan? (Zen. 4:10; Iza. 26:21)

2. *Lir 1 Zan 3:11, 12.*

(a) Akoz Kaen ti vreman ankoler e ki mannyer sa i en lavertisman pour nou ozordi? (Zen. 4:4, 5; Prov. 14:30; 28:22)

(b) Ki mannyer Labib i montre ki menm si tou nou fanmir i opoz Zeova, nou kapab kontinyen reste for dan lafwa? (Ps. 27:10; Mat. 10:21, 22)

3. *Lir Zan 11:25.*

Ki lasirans Zeova i donnen konsernan sa bann ki mor akoz ladrwatir? (Zan 5:24)

## Zistwar 7

### En Zonn brav

1. Ki mannyer Enok ti diferan avek lezot dimoun?
2. Akoz bann dimoun dan letan Enok ti fer bokou move keksoz?
3. Ki move keksoz bann dimoun ti pe fer? (Get portre.)
4. Akoz Enok ti bezwen brav?
5. Ki kantite letan bann dimoun dan letan Enok ti kapab viv e konbyen letan Enok ti viv?
6. Ki ti arive apre ki Enok ti mor?

#### Lezot kestyon:

1. *Lir Zenez 5:21-24, 27.*

(a) Ki kalite relasyon Enok ti annan avek Zeova? (Zen. 5:24)

(b) Dapre Labib, lekel sa zonn ki'n vin pli lontan lo later e ki laz i ti annan letan i ti mor? (Zen. 5:27)

2. *Lir Zenez 6:5.*

Apre ki Enok ti mor, ki mannyer later ti ete e ki mannyer denozour i parey avek sa letan? (2 Tim. 3:13)

3. *Lir Ebre 11:5.*

Ki kalite Enok ti annan ki ti "fer plezir Bondye" e avek ki rezilta? (Zen. 5:22)

4. *Lir Zid 14, 15.*

Ki mannyer bann Kretyen ozordi i kapab imit kou-raz Enok kan zot pe averti bann dimoun lo lager Armagedon ki pe vini? (2 Tim. 4:2; Ebr. 13:6)

## Zistwar 8

### Bann Zean lo Later

1. Ki ti arive ler serten lanz Bondye ti ekout Satan?
2. Akoz serten lanz ti aret zot travay dan lesyel e vin lo later?
3. Akoz i ti mal pour bann lanz vin lo later e vin bann imen?
4. Kwa ki ti diferan avek piti bann lanz?
5. Parey ou kapab vwar dan portre, ki piti bann lanz ti fer ler zot ti vin bann zean?

6. Apre Enok, lekel sa lot zonn ki ti bon e akoz Bondye ti kontan li?

### **Lezot keston:**

1. *Lir Zenez 6:1-8.*

Ki Zenez 6:6 i revele lo lafason ki nou kondwit i kapab annan lefe lo santiman Zeova? (Ps. 78:40, 41; Prov. 27:11)

2. *Lir Zid 6.*

Ki mannyer sa bann lanz ki “pa ti satisfè avek lotorite ki zot ti’n gannyen” dan letan Noe i vin en rapel pour nou ozordi? (1 Kor. 3:5-9; 2 Pyer 2:4, 9, 10)

## **Zistwar 9**

### **Noe ti konstri en Lars**

1. Konbyen dimoun ti annan dan fanmiy Noe e ki mannyer son trwa garson ti apele?
2. Ki keksoz drol Bondye ti demann Noe pour fer e akoz?
3. Ki mannyer bann dimoun ti reazir ler Noe ti koz avek zot lo sa lars?
4. Ki Bondye ti dir Noe fer avek bann zannimo?
5. Apre ki Bondye ti ferm laport sa lars, ki Noe ek son fanmiy ti bezwen fer?

### **Lezot keston:**

1. *Lir Zenez 6:9-22.*

(a) Kwa ki ti fer Noe en bon serviter sa vre Bondye? (Zen. 6:9, 22)

(b) Ki mannyer Zeova i santi anver vyolans e ki lefe sa i devret annan lo bann divertisman ki nou swazir? (Zen. 6:11, 12; Ps. 11:5)

(c) Ki mannyer nou kapab imit Noe kan nou ganny gidans atraver lorganizasyon Zeova? (Zen. 6:22; 1 Zan 5:3)

2. *Lir Zenez 7:1-9.*

Ki mannyer lefet ki Zeova ti vwar Noe ki ti enparfe konman en dimoun drwat i ankouraz nou ozordi? (Zen. 7:1; Prov. 10:16; Iza. 26:7)

## **Zistwar 10**

### **Gran Deliz**

1. Akoz personn pa ti kapab antre dan lars enn fwa ki lapli ti konmans tonbe?
2. Pour konbyen zour ek lannwit Zeova ti fer lapli tonbe e ki degre fon delo ti ete?
3. Ki ti arive avek lars pandan ki delo ti konmans kouver later?
4. Eski bann zean ti sirviv sa Deliz e ki ti arive avek zot papa?
5. Ki ti arive avek sa lars apre senk mwan?
6. Akoz Noe ti larg en korbo an deor lars?
7. Ki mannyer Noe ti konnen ki nivo delo lo later ti’n desann?

8. Ki Bondye ti dir avek Noe ek son fanmiy apre ki zot ti’n reste dan lars pour plis ki enn an?

### **Lezot keston:**

1. *Lir Zenez 7:10-24.*

(a) Ziska ki degre destriksyon lavi lo later ti ete? (Zen. 7:23)

(b) Ki kantite letan ti pran pour delo sek lo later? (Zen. 7:24)

2. *Lir Zenez 8:1-17.*

Ki mannyer Zenez 8:17 i montre ki plan Zeova pour later pa ti sanze? (Zen. 1:22)

3. *Lir 1 Pyer 3:19, 20.*

(a) Ler sa bann lanz rebel ti retourn dan lesyel, ki zizman zot ti gannyen? (Zid 6)

(b) Ki mannyer sa resi lo Noe ek son fanmiy i fortifye nou konfyans dan abilite Zeova pour delivre son pep? (2 Pyer 2:9)

## **Zistwar 11**

### **Premye Larkansyel**

1. Parey i ganny montre dan sa portre, ki premye keksoz ki Noe ti fer ler i ti sorti dan lars?
2. Ki komannman Bondye ti donn Noe ek son fanmiy apre Deliz?
3. Ki promes Bondye ti fer?
4. Ler nou vwar en larkansyel, ki sa i devret fer nou mazinen?

### **Lezot keston:**

1. *Lir Zenez 8:18-22.*

(a) Ki mannyer nou ozordi nou kapab prodwir “en loder agreab” pour Zeova? (Zen. 8:21; Ebr. 13:15, 16)

(b) Ki remark Zeova ti fer konsernan kondisyon leker bann imen e ki nou devret fer atansyon? (Zen. 8:21; Mat. 15:18, 19)

2. *Lir Zenez 9:9-17.*

(a) Ki lalyans Zeova ti fer avek tou bann kreatir lo later? (Zen. 9:10, 11)

(b) Pour ki kantite letan lalyans larkansyel pou dire? (Zen. 9:16)

## **Zistwar 12**

### **Bann Zonn ti fer en Latour**

1. Lekel Nimrod e ki mannyer Bondye ti santi anver li?
2. Dan sa portre, akoz bann dimoun pe fer blok?
3. Akoz Zeova pa ti dakor avek sa travay konstriksyon?
4. Ki mannyer Bondye ti aret konstriksyon sa latour?
5. Ki mannyer sa lavil ti apele e ki son non ti ve-dir?

6. Ki ti arive avek sa bann dimoun apre ki Bondye ti fer zot koz diferan langaz?

**Lezot kestyon:**

1. *Lir Zenez 10:1, 8-10.*

Ki kalite zonn Nimrod ti ete e ki mannyer sa i en lavertisman pour nou? (Prov. 3:31)

2. *Lir Zenez 11:1-9.*

Ki motivasyon par deryer konstriksyon sa latour e akoz sa proze pa ti reisi? (Zen. 11:4; Prov. 16:18; Zan 5:44)

**Zistwar 13**

**Abraam, Zanmi Bondye**

1. Ki kalite dimoun ki ti reste dan lavil Our?
2. Lekel sa zonn lo sa portre, kan ki i ti ne e kote i ti reste?
3. Ki Bondye ti demann Abraam pour fer?
4. Akoz Abraam ti ganny apele zanmi Bondye?
5. Lekel ki ti al avek Abraam kan i ti kit lavil Our?
6. Ki Bondye ti dir Abraam ler i ti ariv dan pei Kanaan?
7. Ki promes Bondye ti fer avek Abraam ler i ti ganny 99 an?

**Lezot kestyon:**

1. *Lir Zenez 11:27-32.*

(a) Dan ki fason Abraam ek Lot ti fanmiy? (Zen. 11:27)

(b) Menm si Labib i dir ki Tera ki ti pran son fanmiy e al Kanaan, ki mannyer nou konnen ki se Abraam ki ti demann li e akoz Abraam ti fer sa? (Zen. 11:31; Akt 7:2-4)

2. *Lir Zenez 12:1-7.*

Ki lagrandisman dan lalyans avek Abraam ki Zeova ti fer apre ki Abraam ti ariv Kanaan? (Zen. 12:7)

3. *Lir Zenez 17:1-8, 15-17.*

(a) Ki mannyer non Abram ti sanze ler i ti ganny 99 an e akoz? (Zen. 17:5)

(b) Ki benediksyon Zeova ti promet Sara? (Zen. 17:15, 16)

4. *Lir Zenez 18:9-19.*

(a) Dan Zenez 18:19, ki responsabilite bann papa i annan? (Det. 6:6, 7; Efe. 6:4)

(b) Ki ti arive dan lavi Sara ki montre ki nou pa kapab kasyet Zeova nanryen? (Zen. 18:12, 15; Ps. 44:21)

**Zistwar 14**

**Lafwa Abraam ti ganny teste**

1. Ki promes Bondye ti fer avek Abraam e ki mannyer Bondye ti gard son promes?
2. Parey sa portre i montre, ki mannyer Bondye ti teste lafwa Abraam?

3. Ki Abraam ti fer menm si i pa ti konn rezon akoz Bondye ti demann li pour fer sa?

4. Ki ti arive ler Abraam ti pran kouto pour touy son garson?

5. Ki degre for lafwa Abraam ti ete dan Bondye?

6. Ki Bondye ti donn Abraam pour ofer konman sakrifis e ki mannyer?

**Lezot kestyon:**

1. *Lir Zenez 21:1-7.*

Akoz lo wityenm zour Abraam ti sirkonsi son garson? (Zen. 17:10-12; 21:4)

2. *Lir Zenez 22:1-18.*

Ki mannyer Izaak ti montre ki i ti soumet avek son papa Abraam e ki mannyer sa ti pe predir en levennman a lavenir ki ti pou pli enportan ki sa enn? (Zen. 22:7-9; 1 Kor. 5:7; Fili. 2:8, 9)

**Zistwar 15**

**Madanm Lot ti get deryer**

1. Akoz Abraam ek Lot ti separe?
2. Akoz Lot ti swazir pour li al viv Sodonm?
3. Ki mannyer bann dimoun Sodonm ti ete?
4. Ki lavertisman de lanz ti donn Lot?
5. Akoz madanm Lot ti vin en pilye disel?
6. Ki leson nou kapab aprann atraver legzanp madanm Lot?

**Lezot kestyon:**

1. *Lir Zenez 13:5-13.*

Kan nou get legzanp Abraam, ki leson nou kapab aprann konsernan rezourd problemn ant de dimoun? (Zen. 13:8, 9; Rom. 12:10; Fili. 2:3, 4)

2. *Lir Zenez 18:20-33.*

Ki mannyer fason ki Zeova ti azir avek Abraam i donn nou konfyans ki Zeova ek Zezi pou ziz avek lazistis? (Zen. 18:25, 26; Mat. 25:31-33)

3. *Lir Zenez 19:1-29.*

(a) Ki sa resi Labib i montre nou lo pwennvi Bondye an rapor avek omoseksyalite? (Zen. 19:5, 13; Lev. 20:13)

(b) Ki diferans nou vwar dan lafason ki Lot ek Abraam ti reakte anver gidans Bondye e ki leson nou kapab aprann atraver sa? (Zen. 19:15, 16, 19, 20; 22:3)

4. *Lir Lik 17:28-32.*

Ki mannyer madanm Lot ti santi anver bann keksoz materyel ofon son leker e ki mannyer sa i vin en lavertisman pour nou? (Lik 12:15; 17:31, 32; Mat. 6:19-21, 25)

5. *Lir 2 Pyer 2:6-8.*

Si nou pe imit Lot, ki latitud nou devret annan anver sa lemonn ki lwen avek Bondye otour nou? (Ezek. 9:4; 1 Zan 2:15-17)

## Zistwar 16

### Izaak ti ganny en Madanm

1. Lekel sa zonn ek sa madanm dan sa portre?
2. Ki Abraam ti fer pour ganny en madanm pour son garson e akoz?
3. Ki mannyer lapriyer servant Abraam ti ganny reponn?
4. Ki larepons Rebeka ti donner kan i ti ganny demande si i ti anv marye avek Izaak?
5. Kwa ki ti fer Izaak vin ere ankor?

#### Lezot kestyon:

1. *Lir Zenez 24:1-67.*  
(a) Ki bon kalite Rebeka ti demontre ler i ti zwenn serviter Abraam obor pwi delo? (Zen. 24:17-20; Prov. 31:17, 31)  
(b) Ki mannyer sa laranzman ki Abraam ti fer pour Izaak i en bon legzanp pour bann Kreyen ozordi? (Zen. 24:37, 38; 1 Kor. 7:39; 2 Kor. 6:14)  
(c) Akoz nou devret rod letan pour medite zis parey Izaak ti fer? (Zen. 24:63; Ps. 77:12; Fili. 4:8)

## Zistwar 17

### De Zimo byen diferan

1. Lekel Ezai ek Zakob e ki mannyer zot ti diferan?
2. Ki laz Ezai ek Zakob ti annan kan zot granpa-pa Abraam ti mor?
3. Ki Ezai ti fer ki son manman ek son papa ti byen tris?
4. Akoz Ezai ti ankoler avek son frer Zakob?
5. Ki lenstriksyon Izaak ti donn son garson Zakob?

#### Lezot kestyon:

1. *Lir Zenez 25:5-11, 20-34.*  
(a) Ki Zeova ti profetize konsernan sa de garson Rebeka? (Zen. 25:23)  
(b) Ki diferans ti annan ant latitud Ezai ek latitud Zakob anver drwa premye ne? (Zen. 25:31-34)
2. *Lir Zenez 26:34, 35; 27:1-46; e osi 28:1-5.*  
(a) Ki mannyer mankman lapresyasyon pour bann keksoz spirityel ti evidan dan Ezai? (Zen. 26:34, 35; 27:46)  
(b) Pour ki Zakob ti arive ganny benediksyon Bondye, ki Izaak ti dir li i bezwen fer? (Zen. 28:1-4)
3. *Lir Ebre 12:16, 17.*  
Dapre legzanp Ezai, ki arive avek bann ki pa kontan keksoz sakre?

## Zistwar 18

### Zakob ti al an Arann

1. Lekel sa zenn fiy dan sa portre e ki Zakob ti fer pour li?
2. Ki Zakob ti pare pour fer pour li kapab marye avek Rasel?

3. Ki Labann ti fer ler ti'n ariv ler pour Zakob marye avek Rasel?

4. Ki Zakob ti dakor pour fer pour li kapab ganny Rasel konman son madanm?

#### Lezot kestyon:

1. *Lir Zenez 29:1-30.*  
(a) Menm si Labann ti fer trik avek li, ki mannyer Zakob ti montre ki i ti onorab e ki nou kapab aprann par sa? (Zen. 25:27; 29:26-28; Mat. 5:37)  
(b) Ki mannyer legzanp Zakob i montre diferans ant vre lanmour ek senpleman dakor avek en dimoun? (Zen. 29:18, 20, 30; Sal. 8:6)  
(c) Lekel sa kat madanm ki ti form parti fanmiy Zakob ki ti donn li bann garson pli tar? (Zen. 29:23, 24, 28, 29)

## Zistwar 19

### Gran Fanmiy Zakob

1. Ki mannyer sa sis garson ki Lea, premye madanm Zakob, ti gannyen ti apele?
2. Ki mannyer sa de garson ki Zilpa, servant Lea, ti gannyen pour Zakob ti apele?
3. Ki mannyer sa de garson Bila, servant Rasel, ti apele?
4. Lekel sa de garson ki Rasel ti gannyen e ki ti arive ler sa dezyenn garson ti ne?
5. Dapre sa portre, konbyen garson Zakob ti annan e kwa ki ti vin atraver zot?

#### Lezot kestyon:

1. *Lir Zenez 29:32-35 e osi 30:1-26.*  
Parey ti leka avek sa 12 garson Zakob, ki mannyer bann garson Ebre ti ganny zot non dan letan lontan?
2. *Lir Zenez 35:16-19 e osi 37:35.*  
Menm si zis Dina ki ganny mansyonnen dan Labib, ki mannyer nou konnen ki Zakob ti annan plis ki en fiy? (Zen. 37:34, 35)

## Zistwar 20

### Dina ti dan Problemm

1. Akoz Abraam ek Izaak pa ti oule ki zot zannan i marye avek bann dimoun dan pei Kanaan?
2. Eski Zakob ti dakor ki son fiy i fer zanmi avek bann fiy Kananeen?
3. Dan sa portre, lekel sa zonn ki pe get Dina e ki keksoz mal i ti fer?
4. Ki sa de frer Dina, Simeon ek Levi, ti fer kan zot ti tann sa ki ti'n arive?
5. Eski Zakob ti dakor avek sa ki Simeon ek Levi ti'n fer?
6. Ki mannyer tou sa problemm fanmiy ti konmanse?

## **Lezot kestyon:**

1. *Lir Zenez 34:1-31.*

(a) Eski ti premye fwa ki Dina ti asosye avek bann fiy Kananeen? Eksplike. (Zen. 34:1)

(b) Akoz Dina ti osi responsab pour nepli vyerz? (Gal. 6:7)

(c) Ki mannyer bann zenn ozordi i montre ki zot pran akter legzanp Dina? (Prov. 13:20; 1 Kor. 15:33; 1 Zan 5:19)

## **Zistwar 21**

### **Bann move Frer Zozef**

1. Akoz bann frer Zozef ti zalou li e ki zot ti fer?

2. Ki bann frer Zozef ti anvi fer avek li, me ki Ribenn ti dir?

3. Ki ti arive kan bann marsan Ismaelit ti pase?

4. Ki bann frer Zozef ti fer pour fer zot papa krwar ki Zozef ti'n mor?

## **Lezot kestyon:**

1. *Lir Zenez 37:1-35.*

(a) Ki mannyer bann Kreyen i kapab imit legzanp Zozef par raport bann keksoz mal ki pe ganny fer dan kongregasyon? (Zen. 37:2; Lev. 5:1; 1 Kor. 1:11)

(b) Kwa ki ti fer bann frer Zozef azir dan en move fason anver li? (Zen. 37:11, 18; Prov. 27:4; Zak 3:14-16)

(c) Ki Zakob ti fer ki toutafe normal ler en dimoun i dan latristes? (Zen. 37:35)

## **Zistwar 22**

### **Zozef ti ganny met dan Prizon**

1. Ki laz Zozef ti annan kan i ti ganny anmennen Lezip e ki ti pase kan i ti ariv laba?

2. Akoz Zozef ti ganny met dan prizon?

3. Ki responsabilite Zozef ti gannyen dan prizon?

4. Dan prizon, ki Zozef ti fer pour sa zonn ki ti servi diven Faraon e pour sa boulanze?

5. Ki ti arive avek sa zonn ki ti servi diven Faraon apre ki i ti'n ganny large dan prizon?

## **Lezot kestyon:**

1. *Lir Zenez 39:1-23.*

Vi ki ti napa okenn lalwa ki ti'n ganny ekrir lo adilter dan letan Zozef, kwa ki ti pous li pour tay lwen avek madanm Potifar? (Zen. 2:24; 20:3; 39:9)

2. *Lir Zenez 40:1-23.*

(a) An bref, dekrir rev sa zonn ki ti servi diven Faraon ek enterpretasyon ki Zeova ti donn Zozef lo sa rev. (Zen. 40:9-13)

(b) Ki sa boulanze ti reve e ki son rev ti vedir? (Zen. 40:16-19)

(c) Ki mannyer lesklav fidel e pridan i imit latitud

Zozef ozordi? (Zen. 40:8; Ps. 36:9; Zan 17:17; Akt 17:2, 3)

(d) Ki mannyer Zenez 40:20 i eklersi pwennvi bann Kreyen lo selebrasyon lanniverser? (Ekle. 7:1; Mark 6:21-28)

## **Zistwar 23**

### **Bann Rev Faraon**

1. Ki ti arive avek Faraon en zour swar?

2. Akoz sa zonn ki ti servi diven lerwa ti mazin Zozef?

3. Parey i ganny montre dan portre, ki sa de rev Faraon ti reve?

4. Ki Zozef ti dir sa rev i vedir?

5. Ki mannyer Zozef ti vin sa zonn pli enportan Lezip apre Faraon?

6. Akoz bann frer Zozef ti vin Lezip e akoz zot pa ti rekonnnet li?

7. Ki rev Zozef ti mazin e ki sa ti ed li pour konpran?

## **Lezot kestyon:**

1. *Lir Zenez 41:1-57.*

(a) Ki mannyer Zozef ti diriz latansyon lo Zeova e dan ki fason bann Kreyen i kapab imit son legzanp ozordi? (Zen. 41:16, 25, 28; Mat. 5:16; 1 Pyer 2:12)

(b) Ki mannyer bann lannen kot i ti annan bokou manze Lezip swivi par lafamin i byen montre sa diferans dan kondisyon spirityel pep Zeova ozordi ek lezot Kreyen? (Zen. 41:29, 30; Amos 8:11, 12) 2. *Lir Zenez 42:1-8 e osi 50:20.*

Si sa i dan koutim en pei, eski i mal pour en adorer Zeova salye en zonn an siny loner ek respe pour son pozisyon? (Zen. 42:6)

## **Zistwar 24**

### **Zozef ti teste son bann Frer**

1. Akoz Zozef ti akiz son bann frer konmkwa zot ti bann espyon?

2. Akoz Zakob ti les son dernyen garson Benzamen al Lezip?

3. Ki mannyer lakoup an larzan Zozef ti ariv dan sak Benzamen?

4. Ki Zida ti ofer pour fer pour ki Benzamen i ganny large?

5. Dan ki fason bann frer Zozef ti'n sanze?

## **Lezot kestyon:**

1. *Lir Zenez 42:9-38.*

Ki mannyer sa ki Zozef ti dir dan Zenez 42:18 i en bon rapel pour bann ki annan responsabilite dan lorganizasyon Zeova ozordi? (Nee. 5:15; 2 Kor. 7:1, 2)

2. *Lir Zenez 43:1-34.*

(a) Menm si Ribenn ti premye ne, ki mannyer i evidan ki Zida ki ti koz pour son bann frer? (Zen. 43:3, 8, 9; 44:14, 18; 1 Kron. 5:2)

(b) Ki mannyer Zozef ti teste son bann frer e aköz? (Zen. 43:33, 34)

3. *Lir Zenez 44:1-34.*

(a) Pour kasyet son lidantite avek son bann frer, ki mannyer Zozef ti prezant son lekor? (Zen. 44: 5, 15; Lev. 19:26)

(b) Ki mannyer bann frer Zozef ti montre ki zalouzi ki zot ti annan oparavan pour zot frer ti'n disparet? (Zen. 44:13, 33, 34)

## Zistwar 25

### Sa Fanmiy ti al Lezip

1. Ki ti arive ler Zozef ti dir son bann frer lekel li?

2. Ki Zozef ti zantiman eksplik son bann frer?

3. Ki Faraon ti dir kan i ti tann nouvel lo bann frer Zozef?

4. Ki grander fanmiy Zakob ti ete kan zot ti al Lezip?

5. Ki mannyer fanmiy Zakob ti ganny apele e aköz?

#### Lezot kestyon:

1. *Lir Zenez 45:1-28.*

Ki mannyer sa resi Labib lo Zozef i montre ki Zeova i kapab fer en keksoz ki ti'n ganny fer avek bi pour fer dimal son serviter, finalman vin dan lavantaz son serviter? (Zen. 45:5-8; Iza. 8:10; Fili. 1: 12-14)

2. *Lir Zenez 46:1-27.*

Ki lasirans Zeova ti donn Zakob lo son vwayaz pour al Lezip? (Zen. 46:1-4, not anba lo paz)

## Zistwar 26

### Zob ti fidel avek Bondye

1. Lekel Zob?

2. Ki Satan ti esey fer, eski i ti reisi?

3. Ki Zeova ti donn Satan permisyon pour fer e aköz?

4. Aköz madanm Zob ti dir li "modi Bondye e mor"? (Get portre.)

5. Parey ou kapab vwar dan dezyenm portre, ki mannyer Zeova ti beni Zob e aköz?

6. Si nou osi parey Zob nou reste fidel avek Zeova ki benediksyon nou pou gannyen?

#### Lezot kestyon:

1. *Lir Zob 1:1-22.*

Ki mannyer bann Kreyen ozordi i kapab imit Zob? (Zob 1:1; Fili. 2:15; 2 Pyer 3:14)

2. *Lir Zob 2:1-13.*

Ki diferans i annan ant lafason ki Zob ek son madanm ti reazir anver persekisyon Satan? (Zob 2: 9, 10; Prov. 19:3; Mik. 7:7; Mal. 3:14)

3. *Lir Zob 42:10-17.*

(a) Kwa ki ti parey ant rekonpans ki Zob ti gannyen ek sa ki Zezi ti gannyen lefet ki i ti anmenn en lavi fidel isi lo later? (Zob 42:12; Fili. 2:9-11)

(b) Ki mannyer nou ganny ankouraze atraver bann benediksyon ki Zob ti gannyen pour son fidelite anver Bondye? (Zob 42:10, 12; Ebr. 6:10; Zak 1:2-4, 12; 5:11)

## Zistwar 27

### En move Lerwa ti pe domin Lezip

1. Dan sa portre, lekel sa zonm ki annan en fwet dan son lanmen e lekel ki i pe bate?

2. Apre ki Zozef ti mor ki ti arive avek bann Izraelit?

3. Aköz bann Ezipsyen ti per bann Izraelit?

4. Ki lord Faraon ti donn bann madanm ki ti ed bann madanm Izraelit donn nesans zot pti baba?

#### Lezot kestyon:

1. *Lir Egzod 1:6-22.*

(a) Dan ki fason Zeova ti konmans akonplir son promes ki i ti fer avek Abraam? (Egz. 1:7; Zen. 12:2; Akt 7:17)

(b) Ki mannyer bann fanm saz Ebre ti montre respe pour lavi ki sakre? (Egz. 1:17; Zen. 9:6)

(c) Ki mannyer sa bann fanm saz ti ganny rekonpanse pour zot fidelite anver Zeova? (Egz. 1:20, 21; Prov. 19:17)

(d) Ki mannyer Satan ti esey anpes plan Zeova konsernan sa desandans promiz Abraam ganny realize? (Egz. 1:22; Mat. 2:16)

## Zistwar 28

### Konman ki Moiz ti ganny sove

1. Lekel sa pti baba dan sa portre e ledwa lekel i pe tyonbo?

2. Ki manman Moiz ti fer pour son pti baba pa ganny touye?

3. Lekel sa pti fiy dan sa portre e ki i ti fer?

4. Ler fiy Faraon ti vwar sa pti baba, ki sizesyon Miryam ti donnen?

5. Ki sa prenses ti dir avek manman Moiz?

#### Lezot kestyon:

1. *Lir Egzod 2:1-10.*

Ki loportinite manman Moiz ti gannyen pour ansenny Moiz depi ler i ti ankor pti e ki legzanp sa i donn bann paran ozordi? (Egz. 2:9, 10; Det. 6: 6-9; Prov. 22:6; Efe. 6:4; 2 Tim. 3:15)



## Akoz Moiz ti pe taye

1. Kote Moiz ti grandi me ki i ti konnen lo son paran?
2. Ki Moiz ti fer kan i ti annan 40 an?
3. Ki Moiz ti dir avek en zonn Izraelit ki ti pe lager e ki larepons sa zonn ti donn li?
4. Akoz Moiz ti tay lwen avek Lezip?
5. Kote Moiz ti taye pour ale e lekel i ti zwenn laba?
6. Ki Moiz ti fer pandan 40 an apre ki i ti'n sove Lezip?

### Lezot kestyon:

1. *Lir Egzod 2:11-25.*

Menm si pour bokou lannen i ti aprann lasazes bann Eziptyen, ki mannyer Moiz ti montre son fidelite anver Zeova ek son pep? (Egz. 2:11, 12; Ebr. 11:24)

2. *Lir Akt 7:22-29.*

Ki leson nou kapab aprann avek Moiz kan i ti pe esey delivre pep Izrael dan lesklavaz Lezip li tousel? (Akt 7:23-25; 1 Pyer 5:6, 10)

## Brousay ti pe brile

1. Ki mannyer sa montanny dan sa portre i apele?
2. Dekrir sa keksoz drol ki Moiz ti vwar kan i ti al lo montanny avek son bann mouton.
3. Lavwa lekel ki ti pe koze dan sa brousay ki ti pe brile e ki i ti dir?
4. Ki Moiz ti reponn kan Bondye ti dir li ki se li ki pou delivre pep Izrael Lezip?
5. Ki Bondye ti dir Moiz dir si bann dimoun ti demann li lekel ki'n anvoy li?
6. Ki mannyer Moiz ti pou prouve ki se Bondye ki ti'n anvoy li?

### Lezot kestyon:

1. *Lir Egzod 3:1-22.*

Ki mannyer legzanp Moiz i donn nou konfyans ki menm si nou santi nou pa kalifye pour akonplir bann travay teokratik, Zeova pou soutenir nou? (Egz. 3:11, 13; 2 Kor. 3:5, 6)

2. *Lir Egzod 4:1-20.*

(a) Ki sanzman dan son latitid Moiz ti fer pandan son 40 an ki i ti pase Madyann e ki leson sa i annan pour bann ki pe anvi servi dan kongregasyon? (Egz. 2:11, 12; 4:10, 13; Mik. 6:8; 1 Tim. 3:1, 6, 10)

(b) Menm si nou ganny disiplinen par Zeova atraver son lorganizasyon, ki konfyans legzanp Moiz i kapab donn nou? (Egz. 4:12-14; Ps. 103:14; Ebr. 12:4-11)

## Moiz ek Aaron ti al vwar Faraon

1. Ki lefe bann mirak ki Moiz ek Aaron ti fer ti annan lo bann Izraelit?
2. Ki Moiz ek Aaron ti dir Faraon e ki i ti reponn zot?
3. Parey sa portre i montre, ki ti arive kan Aaron ti zet son baton ater?
4. Ki mannyer Zeova ti fer Faraon aprann en leson e ki mannyer Faraon ti reazir?
5. Ki ti arive apre sa dizyenm fleo?

### Lezot kestyon:

1. *Lir Egzod 4:27-31 e osi 5:1-23.*

Ki Faraon ti oule dir par sa parol: "Mon pa konn Zeova ditou?" (Egz. 5:2; 1 Sam. 2:12; Rom. 1:21)

2. *Lir Egzod 6:1-13, 26-30.*

(a) Dan ki sans Zeova pa ti fer Abraam, Izaak ek Zakob konn li? (Egz. 3:13, 14; 6:3; Zen. 12:8)

(b) Ki mannyer nou santi kan nou konnen ki Zeova ti servi Moiz, menm si Moiz ti santi li pa kalifye pour fer sa travay ki Bondye ti'n demann li pour fer? (Egz. 6:12, 30; Lik 21:13-15)

3. *Lir Egzod 7:1-13.*

(a) Kan Moiz ek Aaron ti anons mesaz zizman Zeova avek kouraz devan Faraon, ki legzanp zot in kite pour bann serviter Bondye ozordi? (Egz. 7:2, 3, 6; Akt 4:29-31)

(b) Ki mannyer Zeova ti montre ki i ti pli for ki bann bondye Lezip? (Egz. 7:12; 1 Kron. 29:12)

## Sa dis Fleo

1. Par servi sa bann portre, dekrir sa premye trwa fleo ki Zeova ti anvoy lo Lezip.
2. Ki diferans ti annan ant sa trwa premye fleo ek larestan fleo?
3. Lekel katriyenm, senkyenm ek sizyenm fleo?
4. Dekrir setyenm, wityenm ek nevyenm fleo.
5. Ki Zeova ti dir bann Izraelit fer avan dizyenm fleo?
6. Lekel dizyenm fleo e ki ti arive apre sa?

### Lezot kestyon:

1. *Lir Egzod 7:19-8:23.*

(a) Menm si bann mazisyen Lezip osi ti kapab fer sa de premye fleo ki Zeova ti fer, kwa ki zot ti forse admet ler trwazyenm fleo ti arive? (Egz. 8:18, 19; Mat. 12:24-28)

(b) Ki mannyer katriyenm fleo ti demontre sa abilité ki Zeova i annan pour protez son pep e ki mannyer pep Zeova ozordi i santi anver sa "gran ladetres" ki'n ganny predir? (Egz. 8:22, 23; Rev. 7:13, 14, NW; 2 Kron. 16:9)

2. *Lir Egzod 8:24; 9:3, 6, 10, 11, 14, 16, 23-25; e osi 10:13-15, 21-23.*

(a) Lekel sa de group ki ti eksperyans sa Dis Fleo e ki lefe sa i annan lo nou pwennvi vizavi sa bann group ozordi? (Egz. 8:10, 18, 19; 9:14)

(b) Ki manner Egzod 9:16 i ed nou konpran akoz Zeova in les Satan viv ziska konmela? (Rom. 9: 21, 22)

3. *Lir Egzod 12:21-32.*

Ki manner Lapak ti fer li posib pour bokou dimoun ganny sove e avek kwa sa Lapak ti pe refer? (Egz. 12:21-23; Zan 1:29; Rom. 5:18, 19, 21; 1 Kor. 5:7)

### Zistwar 33

#### Travers Lanmer Rouz

1. Konbyen msye, ensi ki madanm ek zanfan ki ti kit Lezip e lekel ki ti al avek zot?

2. Ki manner Faraon ti santi apre ki i ti'n les bann Izraelit ale e ki i ti fer?

3. Ki Zeova ti fer pour anpes bann Ezipsyen atak son pep?

4. Ki ti arive kan Moiz ti avans son baton ver direksyon Lanmer Rouz e ki bann Izraelit ti fer?

5. Ki ti arive kan bann Ezipsyen ti tay deryer bann Izraelit dan Lanmer Rouz?

6. Ki manner bann Izraelit ti montre ki zot ti vremen kontan e remersye Zeova pour lapenn i ti'n sov zot?

#### Lezot kestyon:

1. *Lir Egzod 12:33-36.*

Ki manner Zeova ti fer sir ki son pep ti ganny rekonpanse pour tou sa lannen ki zot ti lesklav bann Ezipsyen? (Egz. 3:21, 22; 12:35, 36)

2. *Lir Egzod 14:1-31.*

Ki manner parol Moiz dan Egzod 14:13, 14 i annan lefe lo bann serviter Zeova ozordi pandan ki zot pe esper lager Armagedon ? (2 Kron. 20:17; Ps. 91:8)

3. *Lir Egzod 15:1-8, 20, 21.*

(a) Akoz bann serviter Zeova i devret loue Zeova avek bann kantik? (Egz. 15:1, 2; Ps. 105:2, 3; Rev. 15:3, 4)

(b) Ki legzanp konsernan loue Zeova, Miryam ek bann madanm kot Lanmer Rouz in kite pour bann madanm Kretyen ozordi? (Egz. 15:20, 21; Ps. 68:11)

### Zistwar 34

#### En nouvo Kalite Manze

1. Dan sa portre, ki bann dimoun pe anmase ater e ki manner sa i apele?

2. Ki lenstriksyon Moiz ti donn bann dimoun konsernan anmas lamann?

3. Ki Zeova ti dir son pep fer sizyenm zour e akoz?

4. Ki mirak Zeova ti fer kan lamann ti ganny anmase pour setyenm zour?

5. Pour ki kantite letan Zeova ti fourni son pep avek lamann?

#### Lezot kestyon:

1. *Lir Egzod 16:1-36 ek Nonm 11:7-9.*

(a) Dapre Egzod 16:8 akoz i enportan pour nou respekste sa bann ki'n ganny apwente dan en fason teokratik dan kongregasyon Kretyen? (Ebr. 13:17)

(b) Dan dezer, ki manner bann Izraelit ti ganny rapele tou le zour ki zot ti bezwen depan lo Zeova? (Egz. 16:14-16, 35; Det. 8:2, 3)

(c) Dapre Zezi ki sinifikasyon senbolik lamann ti annan e ki manner nou benefisye avek sa "dipen sorti dan lesyel"? (Zan 6:31-35, 40)

2. *Lir Zozye 5:10-12.*

Pour ki kantite lannen bann Izraelit ti manz lamann, ki manner sa ti teste zot e ki nou kapab aprann avek sa resi? (Egz. 16:35; Nom. 11:4-6; 1 Kor. 10:10, 11)

### Zistwar 35

#### Zeova ti donn son bann Lalwa

1. Apre de mwan ki zot ti'n kit Lezip, kote bann Izraelit ti al reste pour en pe letan?

2. Ki Zeova ti dir i anv'i son pep i fer e ki zot ti dir?

3. Akoz Zeova ti donn Moiz de ros plat?

4. Apard sa dis komannman, ki lezot lalwa Zeova ti donn bann Izraelit?

5. Lekel sa de lalwa ki Zezi Kri ti dir i pli gran?

#### Lezot kestyon:

1. *Lir Egzod 19:1-25; 20:1-21; 24:12-18; e osi 31:18.*

Ki manner sa bann parol dan Egzod 19:8 i ed nou konpran kwa ki enplike dan dedikasyon ki en Kretyen i fer? (Mat. 16:24; 1 Pyer 4:1-3)

2. *Lir Deterononm 6:4-6; Levitik 19:18; ek Matye 22:36-40.*

Ki manner bann Kretyen i demontre lanmour pour Bondye e pour zot prosen? (Mark 6:34; Akt 4:20; Rom. 15:2)

### Zistwar 36

#### Bef annor

1. Dan sa portre, ki bann dimoun pe fer e akoz?

2. Akoz Zeova ti ankoler e ki Moiz ti fer kan i ti vwar sa ki sa pep ti pe fer?

3. Ki Moiz ti dir serten sa bann zonm fer?
4. Ki leson nou kapab aprann atraver sa zistwar?

### Lezot kestyon:

1. *Lir Egzod 32:1-35.*

- (a) Ki mannyer sa resi i montre nou konman Zeova i santi anver melanz fo larelizyon avek vre ladorasyon? (Egz. 32:4-6, 10; 1 Kor. 10:7, 11)
- (b) Ki prekosyon bann Kreyen i devret pran konsernan swa divertisman ki zot fer tel parey sanson ek ladans? (Egz. 32:18, 19; Efe. 5:15, 16; 1 Zan 2:15-17)
- (c) Ki mannyer tribi Levi ti demontre en bon legzanp konsernan siport ladrwatir? (Egz. 32:25-28; Ps. 18:25)

### Zistwar 37

#### En Latant kot pour adore

1. Ki mannyer sa batiman ki lo sa portre i apele e i ganny servi pour fer kwa?
2. Akoz Zeova ti dir Moiz fer sa latant dan en fason ki i ti pou fasil pour demonte?
3. Kwa sa bwat ki dan sa pti lasanm lo bout latant e ki i annan ladan?
4. Lekel ki Zeova ti swazir konman gran pret e ki en gran pret ti fer?
5. Nonm sa trwa keksoz ki dan sa pli gran lasanm dan latant.
6. Ki sa de keksoz ki dan lakour tabernak e zot ganny servi pour fer kwa avek?

### Lezot kestyon:

1. *Lir Egzod 25:8-40; 26:1-37; 27:1-8; e osi 28:1.* Ki sa bann seriben lo “lars lalyans” ti reprezante? (Egz. 25:20, 22; Nom. 7:89; 2 Rwa. 19:15)
2. *Lir Egzod 30:1-10, 17-21; 34:1, 2; ek Ebre 9:1-5.* (a) Akoz Zeova ti met lanfaz lo lapropte fizik ki bann pret ti devret annan pour zot kapab servi dan tabernak e ki mannyer sa i devret annan lefe lo nou ozordi? (Egz. 30:18-21; 40:30, 31; Ebr. 10:22)
- (b) Ki mannyer zapot Pol ti montre ki tabernak ek lalyans Lalwa ti nepli an mars pandan letan ki i ti ekrir son let pour bann Kreyen Ebre? (Ebr. 9:1, 9; 10:1)

### Zistwar 38

#### Sa douz Espyon

1. Ki ou remarke avek sa grap rezen dan sa portre e kote i ti sorti?
2. Akoz Moiz ti anvoy 12 espyon Kanaan?

3. Ki sa dis espyon ti rakonte kan zot ti retourn kot Moiz?

4. Ki mannyer de Espyon ti montre ki zot ti annan konfyans dan Zeova e ki mannyer zot ti apele?

5. Akoz Zeova ti ankoler e ki i ti dir Moiz?

### Lezot kestyon:

1. *Lir Nonm 13:1-33.*

(a) Lekel ki ti ganny swazir pour al espyonn sa pei e ki gran loportinite zot ti gannyen? (Nom. 13:2, 3, 18-20)

(b) Ki mannyer pwennvi Zozye ek Kaleb ti dife-ran avek lezot espyon e ki sa i ansenny nou? (Nom. 13:28-30; Mat. 17:20; 2 Kor. 5:7)

2. *Lir Nonm 14:1-38.*

(a) Ki lavertisman konsernan mirmire kont bann reprezantan Zeova lo later nou merit pran aker? (Nom. 14:2, 3, 27; Mat. 25:40, 45; 1 Kor. 10:10)

(b) Ki mannyer Nonm 14:24 i montre ki Zeova i montre lentere personnel dan sakenn son bann serviter? (1 Rwa. 19:18; Prov. 15:3)

### Zistwar 39

#### Baton Aaron ti pous bann Fler

1. Lekel ki ti rebel kont lotorite Moiz ek Aaron e ki zot ti dir Moiz?
2. Ki Moiz ti demann Kora ek sa 250 dimoun ki ti pe swiv li pour fer?
3. Ki Moiz ti dir sa pep e ki ti arive deswit apre ki i ti aret koze?
4. Ki ti arive avek Kora ek sa 250 dimoun ki ti swiv li?
5. Ki Eleazar, garson Aaron ti fer avek resipyann dife sa bann zonm ki ti'n mor e akoz?
6. Akoz Zeova ti fer baton Aaron pous fler? (Get sa portre.)

### Lezot kestyon:

1. *Lir Nonm 16:1-49.*

(a) Ki Kora ek bann ki ti swiv li ti fer e akoz sa ti en rebelyon kont Zeova? (Nom. 16:9, 10, 18; Lev. 10:1, 2; Prov. 11:2)

(b) Ki move pwennvi Kora ek sa 250 “sef bann lasanble” ti devlope? (Nom. 16:1-3; Prov. 15:33; Iza. 49:7)

2. *Lir Nonm 17:1-11 e osi 26:10.*

(a) Kan baton Aaron ti pous fler, ki sa ti pe montre e akoz Zeova ti donn lord ki i ti devret ganny garde dan lars? (Nom. 17:5, 8, 10)

(b) Ki leson enportan nou kapab aprann par lefet ki baton Aaron ti pous fler? (Nom. 17:10; Akt 20:28; Fili. 2:14; Ebr. 13:17)

## Moiz ti tap Ros

1. Ki manner Zeova ti pran swen avek bann Izraelit pandan ki zot ti dan dezer?
2. Ki konplent bann Izraelit ti fer kan zot ti pe kanpe Kades?
3. Ki manner Zeova ti donn zot ek bann zannimo delo?
4. Dan sa portre, lekel sa zonn ki pe montre ledwa lo son lekor e aköz i pe fer sa?
5. Aköz Zeova ti ankoler avek Moiz ek Aaron e ki manner zot ti ganny pini?
6. Ki ti arive lo Montanny Or e lekel ki ti vin gran pret pour nasyon Izrael?

### Lezot kestyon:

1. *Lir Nonm 20:1-13, 22-29 ek Deterononm 29:5.*  
(a) Ki nou aprann avek lafason ki Zeova ti pran swen avek bann Izraelit dan dezer? (Det. 29:5; Mat. 6:31; Ebr. 13:5; Zak 1:17)
- (b) Ki manner Zeova ti santi lefet ki Moiz ek Aaron pa ti glorifye li devan nasyon Izrael? (Nom. 20:12; 1 Kor. 10:12; Rev. 4:11)
- (c) Ki nou kapab aprann lo fason ki Moiz ti reazir anver disiplin ki i ti gannyen avek Zeova? (Nom. 12:3; 20:12, 27, 28; Det. 32:4; Ebr. 12:7-11)

## Serpan an kwiv

1. Dan sa portre kwa ki anpaye toultour sa potö e aköz Zeova ti dir Moiz met li la?
2. Ki manner sa pep pa ti rekonesan pour tou sa ki Bondye ti'n fer pour zot?
3. Ki sa pep ti demann Moiz pour fer apre ki Zeova ti'n anvoy sa bann serpan anpwazonnen pour pini zot?
4. Aköz Zeova ti dir Moiz fer en serpan an kwiv?
5. Ki lesö nou kapab aprann atraver sa zistwar?

### Lezot kestyon:

1. *Lir Nonm 21:4-9.*  
(a) Vi ki bann Izraelit ti konplent an rapor avek sa ki Zeova ti donn zot, ki lavertisman sa i donn nou? (Nom. 21:5, 6; Rom. 2:4)
- (b) Dan bann syek pli tar, ki manner bann Izraelit ti servi sa serpan an kwiv e ki aksyon Lerwa Izkiya ti pran? (Nom. 21:9; 2 Rwa. 18:1-4)
2. *Lir Zan 3:14, 15.*  
Ki manner sa serpan an kwiv lo potö i byen reprezant Zezi kan i ti ganny kloute lo potö? (Gal. 3:13; 1 Pyer 2:24)

## En bourik ti koze

1. Lekel Balak e aköz i ti anvoy sers Balaam?
2. Aköz bourik Balaam ti dormi lo semen?
3. Ki Balaam ti tann sa bourik dir?
4. Ki en lanz ti dir avek Balaam?
5. Ki ti arive kan Balaam ti esey modi Izrael?

### Lezot kestyon:

1. *Lir Nonm 21:21-35.*  
Aköz bann Izraelit ti defet Siönn, lerwa bann Amorit ek Og, lerwa sorti Basann? (Nom. 21:21, 23, 33, 34)
2. *Lir Nonm 22:1-40.*  
Pour ki rezon Balaam ti anvi modi Izrael e ki lesö nou kapab aprann atraver sa? (Nom. 22:16, 17; Prov. 6:16, 18; 2 Pyer 2:15; Zid 11)
3. *Lir Nonm 23:1-30.*  
Menm si Balaam ti koz konmsi i ti en adorater Zeova, ki manner son aksyon ti montre tou lekontrer? (Nom. 23:3, 11-14; 1 Sam. 15:22)
4. *Lir Nonm 24:1-25.*  
Ki manner sa resi Labib i fortifye nou lafwa konsernan lakonplisman plan Zeova? (Nom. 24:10; Iza. 54:17)

## Zoeye ti vin Sef

1. Lekel sa de zonn ki pe debout obor Moiz dan sa portre?
2. Ki Zeova ti dir Zoeye?
3. Aköz Moiz ti mont anler lo Montanny Nebo e ki Zeova ti dir li?
4. Ki laz Moiz ti annan kan i ti mor?
5. Aköz sa pep ti sagren, me ki rezon zot ti annan pour zot ere?

### Lezot kestyon:

1. *Lir Nonm 27:12-23.*  
Ki gro responsabilite Zoeye ti gannyen avek Zeova e ki manner Zeova i montre ki i pran swen avek Son pep ozordi? (Nom. 27:15-19; Akt 20:28; Ebr. 13:7)
2. *Lir Deterononm 3:23-29.*  
Aköz Zeova pa ti permet ki Moiz ek Aaron ti antre dan later promiz e ki lesö nou kapab aprann atraver sa? (Det. 3:25-27; Nom. 20:12, 13)
3. *Lir Deterononm 31:1-8, 14-23.*  
Ki manner bann parol adye ki Moiz ti dir avek bann Izraelit ti montre ki i ti aksepte disiplin sorti kot Zeova avek limilite? (Det. 31:6-8, 23)

4. *Lir Deterononm 32:45-52.*

Ki lefe Parol Bondye i devret annan lo nou lavi?  
(Det. 32:47; Lev. 18:5; Ebr. 4:12)

5. *Lir Deterononm 34:1-12.*

Menm si Moiz pa ti zanmen vwar Zeova avek son lize, ki Deterononm 34:10 i fer resorti konsernan son relasyon avek Zeova? (Egz. 33:11, 20; Nom. 12:8)

## Zistwar 44

### Raab ti kasyet de Espyon

1. Kote Raab ti reste?
2. Lekel sa de zonn dan sa portre e aköz zot ti Zeriko?
3. Ki lerwa Zeriko ti donn lord Raab pour fer e ki mannyer Raab ti reponn?
4. Ki mannyer Raab ti ed sa de zonn e ki faver i ti demann zot?
5. Ki promes sa de zonn ti fer avek Raab?

#### Lezot kestyon:

1. *Lir Zozye 2:1-24.*

Ki mannyer promes Zeova dan Egzod 23:28 ti ganny akonplir kan bann Izraelit ti lager kont Zeriko? (Zoz. 2:9-11)

2. *Lir Ebre 11:31.*

Ki mannyer legzanp Raab i met lanfaz lo lenportans ki lafwa i annan? (Rom. 1:17; Ebr. 10:39; Zak 2:25)

## Zistwar 45

### Travers Larivyier Zourden

1. Ki mirak Zeova ti fer pour bann Izraelit kapab travers Larivyier Zourden?
2. Ki bann Izraelit ti bezwen fer pour demontre zot lafwa pour ki zot kapab travers Larivyier Zourden?
3. Aköz Zeova ti demann Zozye pour anmas 12 ros ater dan sa Larivyier?
4. Ki ti arive deswit apre ki bann pret ti sorti dan Larivyier Zourden?

#### Lezot kestyon:

1. *Lir Zozye 3:1-17.*

(a) Parey in ganny dekrir dan sa resi, ki nou devret fer pour nou kapab ganny led ek benediksyon Zeova? (Zoz. 3:13, 15; Prov. 3:5; Zak 2:22, 26)

(b) Ki mannyer Larivyier Zourden ti ete kan bann Izraelit ti travers li pour al dan Later Promiz e ki mannyer sa ti glorifye non Zeova? (Zoz. 3:15; 4:18; Ps. 66:5-7)

2. *Lir Zozye 4:1-18.*

Sa 12 ros ki zot ti pran dan Larivyier Zourden e

ganny mete Gilgal ti ganny servi pour ki rezon?  
(Zoz. 4:4-7)

## Zistwar 46

### Miray Zeriko

1. Ki Zeova ti dir bann zonn ki ti pe al lager ek bann pret fer pour sis zour?
2. Ki sa bann zonn ti devret fer setyenm zour?
3. Parey ou kapab vwar dan portre ki pe arive avek miray Zeriko?
4. Aköz i annan en lakord rouz anmare avek lafnet?
5. Ki Zozye ti dir sa bann zonn fer avek bann dimoun ek sa lavil, me ki i ti dir zot fer avek larzan, lor, kwiv ek feray?
6. Ki sa de espyon ti ganny demande pour fer?

#### Lezot kestyon:

1. *Lir Zozye 6:1-25.*

(a) Ki mannyer lamars otour Zeriko par bann Izraelit son setyenm zour i parey avek travay predikasyon bann Temwen Zeova dan sa letan lafen? (Zoz. 6:15, 16; Iza. 60:22; Mat. 24:14; 1 Kor. 9:16)

(b) Ki mannyer sa profesi dan Zozye 6:26 ti ganny akonplir 500-z-an pli tar e ki sa i ansenny nou lo parol Zeova? (1 Rwa. 16:34; Iza. 55:11)

## Zistwar 47

### En Voler an Izrael

1. Dan sa portre, lekel sa zonn ki pe kasyet bann keksoz ki annan valer sorti Zeriko anba later e lekel sa bann ki pe ed li?
2. Aköz sa ki Akan ek son fanmiy ti fer ti serye?
3. Ki Zeova ti dir kan Zozye ti demann li aköz bann Izraelit ti perdi lager dan lavil Ai?
4. Apre ki Akan ek son fanmiy ti ganny anmenen devan Zozye ki ti arive avek zot?
5. Ki leson enportan zizman ki Akan ti gannyen i ansenny nou?

#### Lezot kestyon:

1. *Lir Zozye 7:1-26.*

(a) Ki lapriyer Zozye ti revele konsernan son relasyon avek son Kreater? (Zoz. 7:7-9; Ps. 119:145; 1 Zan 5:14)

(b) Ki legzanp Akan i montre e ki mannyer sa i en lavertisman pour nou? (Zoz. 7:11, 14, 15; Prov. 15:3; 1 Tim. 5:24; Ebr. 4:13)

2. *Lir Zozye 8:1-29.*

Ki responsabilite nou tou endividuelman nou annan anver kongregasyon Kretyen ozordi? (Zoz. 7:13; Lev. 5:1; Prov. 28:13)

## Zistwar 48

### Bann Gibeonnit ti malen

1. Ki mannyer bann Gibeonnit ti diferan avek bann Kananeen?
2. Parey nou kapab vwar dan portre, ki bann Gibeonnit ti fer e akoz?
3. Ki promes Zozye ek bann sef Izraelit ti fer avek bann Gibeonnit, me ki zot ti dekouver trwa zour pli tar?
4. Ki ti arive kan bann lerwa dan lezot lavil ti tande ki bann Gibeonnit ti'n fer lape avek Izrael?

#### Lezot kestyon:

##### 1. *Lir Zozye 9:1-27.*

(a) Vi ki Zeova ti donn lord nasyon Izrael "pour detrir tou bann zabitan sa pei," ki kalite i ti demontre kan i ti eparny bann Gibeonnit? (Zoz. 9: 22, 24; Mat. 9:13; Akt 10:34, 35; 2 Pyer 3:9)

(b) Par gard sa lalyans ki i ti fer avek bann Gibeonnit, ki mannyer Zozye in kit en bon legzanp pour bann Kreyen ozordi? (Zoz. 9:18, 19; Mat. 5: 37; Efe. 4:25)

##### 2. *Lir Zozye 10:1-5.*

Ki mannyer sa gran lafoul i imit bann Gibeonnit ozordi, me kantmenm sa zot en target pour lekel? (Zoz. 10:4; Zeka. 8:23; Mat. 25:35-40; Rev. 12:17)

## Zistwar 49

### Soley pa ti bouze

1. Dan sa portre ki Zozye ti pe dir e akoz?
2. Ki mannyer Zeova ti ed Zozye ek son bann zonn lager?
3. Ki kantite move lerwa Zozye ti ranport laviktwar lo la e ki kantite letan sa ti pran?
4. Akoz Zozye ti diviz lavil Kanaan?
5. Ki laz Zozye ti annan kan i ti mor e ki ti arive avek bann dimoun apre?

#### Lezot kestyon:

##### 1. *Lir Zozye 10:6-15.*

Lefet ki nou konnen ki Zeova ti fer soley ek lalin pa bouze pour Izrael, ki konfyans nou annan ozordi? (Zoz. 10:8, 10, 12, 13; Ps. 18:3; Prov. 18:10)

##### 2. *Lir Zozye 12:7-24.*

Lekel ki ti responsab pour defet sa 31 lerwa an Kanaan e akoz sa i enportan pour nou ozordi? (Zoz. 12:7; 24:11-13; Det. 31:8; Lik 21:9, 25-28)

##### 3. *Lir Zozye 14:1-5.*

Ki mannyer bann pei ti ganny divize ant bann tribi Izrael e ki sa i endike konsernan bann leritaz dan paradi? (Zoz. 14:2; Iza. 65:21; Ezek. 47:21-23; 1 Kor. 14:33)

##### 4. *Lir Ziz 2:8-13.*

Parey Zozye an Izrael, lekel ozordi ki parey en miray kont bann aposta? (Ziz 2:8, 10, 11; Mat. 24:45-47; 2 Tesa. 2:3-6; Tit 1:7-9; Rev. 1:1; 2:1, 2)

## Zistwar 50

### De Madanm brav

1. Lekel bann ziz e ki mannyer sa enn premye ti apele?
2. Ki privez spesyal Debora ti annan e ki sa ti enkli?
3. Kan Izrael ti ganny menase par Lerwa Yabin ek sef son larme ki ti apel Sisera, ki mesaz sorti kot Zeova Debora ti donn Ziz Barak e lekel i dir ti pou ganny loue pour laviktwar?
4. Ki mannyer Yael ti montre ki i ti en madanm brav?
5. Ki ti arive apre lanmor lerwa Yabin?

#### Lezot kestyon:

##### 1. *Lir Ziz 2:14-22.*

Ki mannyer bann Izraelit ti fer Zeova ankoler avek zot e ki lesou nou kapab aprann atraver sa? (Ziz 2:20; Prov. 3:1, 2; Ezek. 18:21-23)

##### 2. *Lir Ziz 4:1-24.*

Ki lesou konsernan lafwa ek kouraz bann madanm Kreyen i kapab aprann atraver legzanp Debora ek Yael? (Ziz 4:4, 8, 9, 14, 21, 22; Prov. 31:30; 1 Kor. 16:13)

##### 3. *Lir Ziz 5:1-31.*

Ki mannyer kantik laviktwar Barak ek Debora i kapab ganny vwar konman en lapriyer an rapor avek sa lager Armagedon ki pe vini? (Ziz 5:3, 31; 1 Kron. 16:8-10; Rev. 7:9, 10; 16:16; 19:19-21)

## Zistwar 51

### Rit ek Naomi

1. Akoz Naomi ti al reste dan Moab?
2. Lekel Rit ek Orpa?
3. Ki mannyer Rit ek Orpa ti reazir kan Naomi ti dir zot retourn kot zot pep?
4. Lekel Boaz e ki mannyer i ti ed Rit ek Naomi?
5. Ki mannyer zanfand Rit ek Boaz ti apele e akoz nou devret mazin li?

#### Lezot kestyon:

##### 1. *Lir Rit 1:1-17.*

(a) Ki mannyer Rit ti eksprim son lanmour fidel? (Rit 1:16, 17)

(b) Ki mannyer bon latitud Rit i byen demontre

latitid “lezot mouton” anver bann Kretyen swazir lo later ozordi? (Zan 10:16; Zeka. 8:23)

2. *Lir Rit 2:1-23.*

Ki mannyer Rit i en bon legzanp pour bann zenn madanm ozordi? (Rit 2:17, 18; Prov. 23:22; 31:15)

3. *Lir Rit 3:5-13.*

(a) Ki mannyer Boaz ti vwar Rit lefet ki i ti anvi marye avek li olye marye avek en pli zenn zonn?

(b) Ki latitid Rit i ansenny nou lo lanmour fidel? (Rit 3:10; 1 Kor. 13:4, 5)

4. *Lir Rit 4:7-17.*

Ki mannyer bann zonn Kretyen ozordi i kapab imit Boaz? (Rit 4:9, 10; 1 Tim. 3:1, 12, 13; 5:8)

## Zistwar 52

### Gideonn ek son 300 Zonn

1. Konman e akoz bann Izraelit ti dan bokou problem?

2. Akoz Zeova ti dir Gideonn ki i ti annan tro bokou zonn dan son larme?

3. Konbyen zonn ti reste apre ki Gideonn ti dir bann zonn ki ti per retourn kot zot?

4. Dapre sa portre, eksplike ki mannyer Zeova ti redwir lakantite larme Gideonn pour vin selman 300 zonn.

5. Ki mannyer Gideonn ti organiz son 300 zonn e ki mannyer Izrael ti ranport laviktwar?

#### Lezot kestyon:

1. *Lir Ziz 6:36-40.*

(a) Ki mannyer Gideonn ti fer sir ki lavolonte Zeova ti ganny fer?

(b) Ki mannyer nou konnen ki si sa lavolonte Zeova ozordi? (Prov. 2:3-6; Mat. 7:7-11; 2 Tim. 3:16, 17)

2. *Lir Ziz 7:1-25.*

(a) Ki leson nou kapab aprann avek sa 300 zonn ki ti alert kontrerman avek bann ki ti neglizan? (Ziz 7:3, 6; Rom. 13:11, 12; Efe. 5:15-17)

(b) Zis parey sa 300 zonn ti aprann par obzerv Gideonn, ki mannyer nou kapab aprann par obzerv sa pli Gran Gideonn, Zezi Kri? (Ziz 7:17; Mat. 11:29, 30; 28:19, 20; 1 Pyer 2:21)

(c) Ki mannyer Ziz 7:21 i ed nou pour kontant nou pour servi dan nenport ki landrwa lorganizasyon Zeova i demann nou pour servi? (1 Kor. 4:2; 12:14-18; Zak 4:10)

3. *Lir Ziz 8:1-3.*

Kan i ariev ler pour rezourd en problem ki nou annan avek en frer oubyen en ser, ki nou kapab aprann par lafason ki Gideonn ti rezourd dispit avek bann dimoun Efraim? (Prov. 15:1; Mat. 5:23, 24; Lik 9:48)

## Zistwar 53

### Promes Yifta

1. Lekel Yifta e pandan ki letan i ti viv?

2. Ki promises Yifta ti fer avek Zeova?

3. Akoz Yifta ti sagren kan i ti retourn kot li apre son laviktwar lo bann Amonit?

4. Ki fiy Yifta ti dir apre ki i ti'n aprann promises ki son papa ti'n fer?

5. Akoz bann dimoun ti kontan fiy Yifta?

#### Lezot kestyon:

1. *Lir Ziz 10:6-18.*

Ki lavertisman nou devret pran aker atraver sa resi lo bann Izraelit ki ti enfidel anver Zeova? (Ziz 10:6, 15, 16; Rom. 15:4; Rev. 2:10)

2. *Lir Ziz 11:1-11, 29-40.*

(a) Ki mannyer nou konnen ki kan Yifta ti donn son fiy konman “lofrann brile” sa pa ti vedir ki i ti fer li pas par dife konman en sakrifis? (Ziz 11:31; Lev. 16:24; Det. 18:10, 12)

(b) Dan ki fason Yifta ti ofer son fiy konman en sakrifis?

(c) Ki nou kapab aprann atraver latitid Yifta anver sa promises ki i ti fer avek Zeova? (Ziz 11:35, 39; Ekle. 5:4, 5; Mat. 16:24)

(d) Ki mannyer fiy Yifta i en legzanp pour bann zenn Kretyen pouswiv en karyer dan servis applantan? (Ziz 11:36; Mat. 6:33; Fili. 3:8)

## Zistwar 54

### Sa Zonn pli for

1. Ki mannyer sa zonn pli for ki ti'n deza egziste ti apele e lekel ki ti donn li son lafors?

2. Parey ou kapab vwar dan portre, ki Sanmson ti fer avek en gro lyon?

3. Ki sekre Sanmson ti pe rakont Dalila dan sa portre e ki mannyer sa ti fer li ganny tyonbo par bann Filisten?

4. Sa zour ki i ti mor, ki mannyer Sanmson ti touy 3,000 son lennmi Filisten?

#### Lezot kestyon:

1. *Lir Ziz 13:1-14.*

Ki mannyer Manoa ek son madanm i furni en bon legzanp pour bann paran elve zot zanfan? (Ziz 13:8; Ps. 127:3; Efe. 6:4)

2. *Lir Ziz 14:5-9 e osi 15:9-16.*

(a) Ki sa resi lo Sanmson letan i ti touy sa lyon, kas lakord ki ti anmar li e servi lezo lanmaswar en bourik pour touy 1,000 zonn i ansenny nou lo travay lespri sen Zeova?

(b) Ki mannyer lespri sen i ed nou ozordi? (Ziz 14:6; 15:14; Zeka. 4:6; Akt 4:31)

3. *Lir Ziz 16:18-31.*

Ki mannyer Samson ti ganny afekte par son move lasosyasyon e ki nou kapab aprann atraver sa? (*Ziz 16:18, 19; 1 Kor. 15:33*)

### Zistwar 55

#### En pti Garson ti servi Bondye

1. Ki mannyer sa pti garson ki dan sa portre i apele e lekel sa bann lezot dimoun?
2. Ki lapriyer Ana ti fer en zour kan i ti pe vizit tabernak Zeova e ki mannyer Zeova ti reponn li?
3. Ki laz Samyel ti annan kan i ti ganny anmennen pour servi dan latant Zeova e ki son manman ti fer pour li tou le-z-an?
4. Ki mannyer bann garson Eli ti apele e ki kalite zonn zot ti ete?
5. Ki mannyer Zeova ti kriy Samyel e ki mesaz I ti donn li?
6. Ki Samyel ti vini ler i ti gran e ki ti arive avek li ler i ti vye?

#### Lezot kestyon:

1. *Lir 1 Samyel 1:1-28.*
  - (a) Ki bon legzanp Elkana in kite pour bann sef fanmiy kan i ti gid lezot dan vre ladorasyon? (1 Sam. 1:3, 21; Mat. 6:33; Fili. 1:10)
  - (b) Ki leson nou kapab aprann atraver legzanp Elkana lo lafason ki i ti rezourd bann problem drol? (1 Sam. 1:10, 11; Ps. 55:22; Rom. 12:12)
2. *Lir 1 Samyel 2:11-36.*

Ki mannyer Eli ti onor son bann garson plis ki Zeova e ki mannyer sa i servi konman en legzanp lavertisman pour nou? (1 Sam. 2:22-24, 27, 29; Det. 21:18-21; Mat. 10:36, 37)
3. *Lir 1 Samyel 4:16-18.*

Ki sa kat mesaz maler ki sa enn ki ti sorti kot laliny batay ti anonse e ki lefe sa ti annan lo Eli?
4. *Lir 1 Samyel 8:4-9.*

Ki mannyer Izrael ti ofans Zeova en kantite e ki mannyer nou kapab fidelman siport son Rwayonn ozordi? (1 Sam. 8:5, 7; Zan 17:16; Zak 4:4)

### Zistwar 56

#### Sail, premye Lerwa Izrael

1. Dan sa portre, ki Samyel pe fer e akoz?
2. Akoz Zeova ti kontan Sail e ki kalite zonn i ti ete?
3. Ki mannyer garson Sail ti apele e ki sa garson ti fer?
4. Akoz Sail ti ofer sakrifis olye esper Samyel vini pour fer li?
5. Ki leson nou kapab aprann atraver sa resi lo Sail?

### Lezot kestyon:

1. *Lir 1 Samyel 9:15-21 e 10:17-27.*

Ki mannyer modesti Sail ti ed li pour evite reakte vitman kan en zonn ti koz san okenn respe anver li? (1 Sam. 9:21; 10:21, 22, 27; Prov. 17:27)
2. *Lir 1 Samyel 13:5-14.*

Ki pese Sail ti komet Gilgal? (1 Sam. 10:8; 13:8, 9, 13)
3. *Lir 1 Samyel 15:1-35.*
  - (a) Ki pese serye Sail ti komet an konneksyon avek Agag lerwa Amalek? (1 Sam. 15:2, 3, 8, 9, 22)
  - (b) Ki mannyer Sail ti esey zistifye son aksyon pour pa aksepte koreksyon? (1 Sam. 15:24)
  - (c) Ki lavertisman nou devret pran aker ozordi kan nou ganny en konsey? (1 Sam. 15:19-21; Ps. 141:5; Prov. 9:8, 9; 11:2)

### Zistwar 57

#### Bondye ti swazir David

1. Ki mannyer sa garson dan sa portre i apele e ki mannyer nou konnen ki i ti brav?
2. Kote David ti reste e ki mannyer son papa ek granpapa ti apele?
3. Akoz Zeova ti demann Samyel pour al kot lakour Zese Betleenm?
4. Ki ti arive kan Zese ti anmenn set son bann garson kot Samyel?
5. Kan David ti ganny anmennen, ki Zeova ti dir Samyel?

#### Lezot kestyon:

1. *Lir 1 Samyel 17:34, 35.*

Ki mannyer sa bann levennman i met lanfaz lo kouraz David ek son konfyans dan Zeova? (1 Sam. 17:37)
2. *Lir 1 Samyel 16:1-14.*
  - (a) Ki mannyer parol Zeova dan 1 Samyel 16:7 i ed nou pour pa fer lapliferans e pour evite ziz lezot par laparans? (Akt 10:34, 35; 1 Tim. 2:4)
  - (b) Ki mannyer legzanp Sail i montre ki kan Zeova i retir son lespri sen lo en dimoun sa i kapab posib ki en move lespri ouswa en move dezir i anrasinen dan sa dimoun? (1 Sam. 16:14; Mat. 12:43-45; Gal. 5:16)

### Zistwar 58

#### David ek Golyat

1. Ki defi Golyat ti met devan bann larme Izraelit?
2. Ki grander Golyat ti ete e ki Lerwa Sail ti promet sa zonn ki ti pou touy Golyat?
3. Ki David ti dir kan Sail ti dir li ki i pa ti pou kapab lager avek Golyat akoz i ti zis en pti garson?



4. Dan son larepons avek Golyat, ki mannyer David ti demontre son konfyans dan Zeova?

5. Parey ou kapab vwar dan sa portre, ki David ti servi pour touy Golyat e ki ti arive avek bann Filisten apre sa?

### **Lezot kestyon:**

1. *Lir 1 Samyel 17:1-54.*

(a) Akoz David pa ti per e ki mannyer nou kapab imit son legzanp? (1 Sam. 17:37, 45; Efe. 6:10, 11)

(b) Akoz bann Kretyen i devret evite annan sa leta lespri konpetitif ki Golyat ti annan kan zot angaz zot dan bann zwe ouswa aktivite lwazir? (1 Sam. 17:8; Gal. 5:26; 1 Tim. 4:8)

(c) Ki mannyer parol David i montre ki i ti annan konfyans ki Bondye ti pe siport li? (1 Sam. 17:45-47; 2 Kron. 20:15)

(d) Olye zis dekrir sa konman en lager ant de group larme, ki mannyer sa resi i montre nou ki sa batay ti vreman ant bann fo bondye ek sa vre Bondye, Zeova? (1 Sam. 17:43, 46, 47)

(e) Ki mannyer sa larestan Kretyen swazir i imit legzanp konfyans ki David ti annan dan Zeova? (1 Sam. 17:37; Zer. 1:17-19; Rev. 12:17)

### **Zistwar 59**

#### **Akoz David ti bezwen sove**

1. Akoz Sail ti zalou David e ki mannyer son garson Yonatann ti diferan?

2. Ki ti arive en zour kan David ti pe zwe laarp pour Sail?

3. Ki Sail ti dir David i devret fer avan pran Mikal son fiy konman son madanm e akoz Sail ti dir sa?

4. Parey portre i montre, kan David ti pe zwe laarp pour Sail, ki ti arive pour trwazyenm fwa?

5. Ki mannyer Mikal ti ede pour sov lavi David e ki David ti bezwen fer pour set an?

### **Lezot kestyon:**

1. *Lir 1 Samyel 18:1-30.*

(a) Ki mannyer lanmour ki Yonatann ti annan pour David i reprezant sa lanmour ki “lezot mouton” ek “pti troupo” i annan pour kanmarad? (1 Sam. 18:1; Zan 10:16; Lik 12:32; Zeka. 8:23)

(b) Lefet ki se Yonatann ki ti pou normalman vin zeritye Sail, ki mannyer 1 Samyel 18:4 i montre ki Yonatann ti demontre vre soumisyon anver sa enn ki ti ganny swazir pour vin lerwa?

(c) Ki mannyer legzanp Sail i montre ki zalouzi i kapab anmenn ver en pese grav e ki lavertisman sa i annan pour nou? (1 Sam. 18:7-9, 25; Zak 3:14-16)

2. *Lir 1 Samyel 19:1-17.*

Ki mannyer Yonatann ti met son prop lavi an dan-

ze kan i ti pronons sa parol ki ganny rikorde dan 1 Samyel 19:4, 5? (1 Sam. 19:1, 6)

### **Zistwar 60**

#### **Abigail ek David**

1. Ki mannyer sa madanm ki pe vin zwenn David dan sa portre i apele e ki kalite dimoun i ti ete?

2. Lekel Nabal?

3. Akoz David ti anvoy son bann zonn pour al demann Nabal en faver?

4. Ki Nabal ti dir bann zonn David e ki mannyer David ti reakte?

5. Ki mannyer Abigail ti montre ki i ti en madanm malen?

### **Lezot kestyon:**

1. *Lir 1 Samyel 22:1-4.*

Ki mannyer fanmir David i en bon legzanp lo fason nou devret siport kanmarad dan kongregasyon? (Prov. 17:17; 1 Tesa. 5:14)

2. *Lir 1 Samyel 25:1-43.*

(a) Akoz Nabal ti ganny dekrir konman arogan? (1 Sam. 25:2-5, 10, 14, 21, 25)

(b) Ki bann madanm Kretyen denozour i kapab aprann atraver legzanp Abigail? (1 Sam. 25:32, 33; Prov. 31:26; Efe. 5:24)

(c) Lekel sa de move keksoz ki Abigail ti anpes David fer? (1 Sam. 25:31, 33; Rom. 12:19; Efe. 4:26)

(d) Ki mannyer reaksyon David anver parol Abigail i ed bann zonn pour annan menm pwennvi avek Zeova lo bann madanm? (Akt 21:8, 9; Rom. 2:11; 1 Pyer 3:7)

### **Zistwar 61**

#### **David ti vin Lerwa**

1. Ki David ek Abisai ti fer kan Sail ti pe dormi dan son kan?

2. Ki kestyon David ti demann Sail?

3. Apre ki i ti kit Sail, kote David ti ale?

4. Kwa ki ti fer David vreman tris e ekrir en zoli sanson?

5. Ki laz David ti annan kan i ti vin lerwa an Ebronn e ki mannyer serten son bann garson ti apele?

6. Kote David ti dirize konman lerwa pli tar?

### **Lezot kestyon:**

1. *Lir 1 Samyel 26:1-25.*

(a) Dapre sa parol ki David ti dir dan 1 Samyel 26:11 ki latitid nou devret annan anver lord teokratik? (Ps. 37:7; Rom. 13:2)

(b) Kan nou fer en gran zefor pour eksprim nou labonte me nou rankontre enn ki pa apresye li, ki mannyer parol David dan 1 Samyel 26:23 i kapab

ed nou pour gard en bon pwennvi? (1 Rwa. 8:32; Ps. 18:20)

2. *Lir 2 Samyel 1:26.*

Ki mannyer bann Kretyen ozordi i kapab devlop sa “gran lanmour pour kanmarad” parey David ek Yonatann? (1 Pyer 4:8; Kol. 3:14; 1 Zan 4:12)

3. *Lir 2 Samyel 5:1-10.*

(a) Pour ki kantite letan David ti dirize konman lerwa e ki mannyer sa letan ti ganny divize? (2 Sam. 5:4, 5)

(b) Avek lekel David ti ganny pwisans e ki mannyer sa i en rapel pour nou ozordi? (2 Sam. 5:10; 1 Sam. 16:13; 1 Kor. 1:31; Fili. 4:13)

## Zistwar 62

### Problenm dan Lakour David

1. Avek led Zeova, ki ti finalman arive avek pei Kanaan?

2. Ki ti arive en zour swar ler David ti lo twa son pale?

3. Akoz Zeova ti ankoler avek David?

4. Dan sa portre, lekel ki Zeova ti anvoye pour koz avek David lo son pese e ki sa zonm ti dir pou arive avek David?

5. Ki problenm David ti annan?

6. Apre David, lekel ki ti vin lerwa Izrael?

### Lezot kestyon:

1. *Lir 2 Samyel 11:1-27.*

(a) Ki mannyer reste okipe dan servis Zeova i en proteksyon pour nou?

(b) Ki mannyer David ti ganny antrennen pour fer pese e ki mannyer sa i en legzanp pour nou ozordi? (2 Sam. 11:2; Mat. 5:27-29; 1 Kor. 10:12; Zak 1:14, 15)

2. *Lir 2 Samyel 12:1-18.*

(a) Ki leson bann ansyen ek paran i kapab aprann lo lafason ki Natann ti apros David pour donn li konsey? (2 Sam. 12:1-4; Prov. 12:18; Mat. 13:34)

(b) Akoz Zeova ti demontre mizerikord anver David? (2 Sam. 12:13; Ps. 32:5; 2 Kor. 7:9, 10)

## Zistwar 63

### Lerwa Salomon ti malen

1. Ki Zeova ti demann Salomon e ki i ti reponn?

2. Vi ki i ti kontan sa ki Salomon ti demann li, ki Zeova ti promet pour donn li?

3. Ki problenm difisil de madanm ti prezant devan Salomon?

4. Parey ou kapab vwar dan sa portre, ki mannyer Salomon ti rezourdan sa problenm?

5. Ki mannyer dominasyon Salomon ti ete e akoz?

### Lezot kestyon:

1. *Lir 1 Lerwa 3:3-28.*

(a) Atraver santiman Salomon dan 1 Lerwa 3:7 ki bann ki annan responsabilite dan kongregasyon ozordi i kapab aprann? (Ps. 119:105; Prov. 3:5, 6)

(b) Ki mannyer sa ki Salomon ti demande i en bon legzanp bann bon kekoz ki nou kapab priy lo la? (1 Rwa. 3:9, 11; Prov. 30:8, 9; 1 Zan 5:14)

(c) Ki konfyans dan lafason ki Salomon ti rezourdan sa dispit ant sa de madanm i donn nou konsernan lavenir anba dominasyon sa pli Gran Salomon, Zezi Kri? (1 Rwa. 3:28; Iza. 9:6, 7; 11:2-4)

2. *Lir 1 Lerwa 4:29-34.*

(a) Ki mannyer Zeova ti reazir anver sa ki Salomon ti demann li an rapor avek en leker obeisan? (1 Rwa. 4:29)

(b) Par vwar zefor ki bokou dimoun ti fer pour ekout lasazes Salomon, ki mannyer nou latitid i devret ete anver etidye Parol Bondye? (1 Rwa. 4:29, 34; Zan 17:3; 2 Tim. 3:16)

## Zistwar 64

### Salomon ti konstri Tanp

1. Konbyen letan ti pran pour Salomon konplet konstriksyon tanp e akoz i ti kout en kantite larzan?

2. Konbyen lasanm prensipal ti annan dan tanp e kwa ki ti ganny met dan lasanm ki ti dan fon?

3. Ki Salomon ti dir dan son lapriyer kan tanp ti fini ganny konstri?

4. Ki mannyer Zeova ti montre ki i ti apresye lapriyer Salomon?

5. Ki bann madanm Salomon ti fer li fer e ki ti arive avek Salomon?

6. Akoz Zeova ti ankoler avek Salomon, e ki Zeova ti dir li?

### Lezot kestyon:

1. *Lir 1 Kronik 28:9, 10.*

Par egzamin parol David dan 1 Kronik 28:9, 10, ki zefor nou devret fer dan nou lavi tou le zour? (Ps. 19:14; Fili. 4:8, 9)

2. *Lir 2 Kronik 6:12-21, 32-42.*

(a) Ki mannyer Salomon ti montre ki sa Bondye Tre O pa kapab reste dan okenn batiman ki imen in fer? (2 Kron. 6:18; Akt 17:24, 25)

(b) Ki parol Salomon dan 2 Kronik 6:32, 33 i montre lo Zeova? (Akt 10:34, 35; Gal. 2:6)

3. *Lir 2 Kronik 7:1-5.*

Zis parey bann garson Izrael ti ganny motive pour loue Zeova kan zot ti vwar son laglwar, ki mannyer nou kapab benefisye ozordi kan nou medit lo benediksyon ki Zeova i donn son pep? (2 Kron. 7:3; Ps. 22:22; 34:1; 96:2)

#### 4. *Lir 1 Lerwa 11:9-13.*

Ki mannyer lavi Salomon i montre ki i enportan pour reste fidel ziska lafen? (1 Rwa. 11:4, 9; Mat. 10:22; Rev. 2:10)

### Zistwar 65

#### Rwayonm ti divize

1. Ki mannyer sa de zonn dan sa portre i apele e lekel zot?
2. Ki Aiya ti fer avek sa lenz ki ti lo li e ki sa aksyon ti vedir?
3. Ki Salomon ti esey fer avek Yarobam?
4. Akoz bann dimoun ti fer Yarobam vin lerwa sa dis tribi?
5. Akoz Yarobam ti fer de pti bef annor e ki ti arive avek sa pei apre?
6. Ki ti arive avek rwayonm sa de tribi ek tanp Zeova an Zerizalenm?

#### Lezot kestyon:

##### 1. *Lir 1 Lerwa 11:26-43.*

Ki kalite dimoun Yarobam ti ete e ki Zeova ti promet li si i ti obeir son lalwa? (1 Rwa. 11:28, 38)

##### 2. *Lir 1 Lerwa 12:1-33.*

(a) Ki move legzanp Yarobam i kapab ansenny bann paran ek bann ansyen an rapor avek abiz lotorite? (1 Rwa. 12:13; Ekle. 7:7; 1 Pyer 5:2, 3)

(b) Avek lekel bann zenn denozour i merit rod gidans kan zot annan en desizyon serye pour fer dan zot lavi? (1 Rwa. 12:6, 7; Prov. 1:8, 9; 2 Tim. 3:16, 17; Ebr. 13:7)

(c) Kwa ki ti pous Yarobam pour konstrir de sant pour ladorasyon pti bef e ki mannyer sa ti montre en mank lafwa dan Zeova? (1 Rwa. 11:37; 12:26-28)

(d) Lekel ki ti diriz bann dimoun dan rwayonm sa dis tribi pour rebel kont vre ladorasyon? (1 Rwa. 12:32, 33)

### Zistwar 66

#### Zezebel, en move Larenn

1. Lekel Zezebel?
2. Akoz en zour lerwa Aab ti tris?
3. Ki Zezebel ti fer pour son msye Aab ganny plantasyon rezen Nabot?
4. Lekel ki Zeova ti anvoy pini Zezebel?
5. Parey ou kapab vwar dan sa portre, ki ti arive ler Yeou ti ariv kot pale Zezebel?

#### Lezot kestyon:

##### 1. *Lir 1 Lerwa 16:29-33 e osi 18:3, 4.*

Ki mannyer kondisyon Izrael ti ete pandan letan Lerwa Aab? (1 Rwa. 14:9)

#### 2. *Lir 1 Lerwa 21:1-16.*

(a) Ki mannyer Nabot ti demontre kouraz ek fidelite anver Zeova? (1 Rwa. 21:1-3; Lev. 25:23-28)

(b) Dapre legzanp Aab, ki nou kapab aprann konsernan fer fas avek dekourazman? (1 Rwa. 21:4; Rom. 5:3-5)

##### 3. *Lir 2 Lerwa 9:30-37.*

Ki nou kapab aprann atraver devouman ki Yeou ti annan pour fer lavolonte Zeova? (2 Rwa. 9:4-10; 2 Kor. 9:1, 2; 2 Tim. 4:2)

### Zistwar 67

#### Yeosafat ti met Konfyans dan Zeova

1. Lekel Yeosafat e dan ki letan i ti viv?
2. Akoz bann Izraelit ti per e ki bokou parmi zot ti fer?
3. Ki larepons Zeova ti donnen an rapor avek la-priyer Yeosafat?
4. Ki Zeova ti fer arive avan lager?
5. Ki lesion nou kapab aprann avek Yeosafat?

#### Lezot kestyon:

##### 1. *Lir 2 Kronik 20:1-30.*

(a) Ki mannyer Yeosafat ti demontre sa ki en servir fidel Bondye i merit fer kan i ganny menase? (2 Kron. 20:12; Ps. 25:15; 62:1)

(b) Vi ki Zeova in touzour servi en mwayen pour kominik avek son pep, ki mwayen i pe servi ozordi? (2 Kron. 20:14, 15; Mat. 24:45-47; Zan 15:15)

(c) Kan Bondye pou lans sa lager oubyen "konbat kan sa gran zour Bondye Toupisan pou arive," ki mannyer nou sitiasyon pou parey avek sa ki pour Yeosafat? (2 Kron. 20:15, 17; 32:8; Rev. 16:14, 16)

(d) Par imit bann Levit, ki bann pionye ek misyonner i fer pour kontribye anver sa travay predikasyon ki pe ganny fer dan lemond antye ozordi? (2 Kron. 20:19; Rom. 10:13-15; 2 Tim. 4:2)

### Zistwar 68

#### De Garson ki ti resisite

1. Lekel sa trwa dimoun dan sa portre e ki ti arive avek sa pti garson?
2. Ki Eliya ti priye konsernan sa pti garson e ki ti arive apre?
3. Ki mannyer sa zonn ki ti ed Eliya ti apele?
4. Akoz Elisa ti ganny apele kot lakaz en mandanm ki ti reste Sounenm?
5. Ki Elisa ti fer e ki ti arive avek sa pti garson ki ti'n mor?
6. Parey i'n ganny demontre atraver Eliya ek Elisa, ki pouvwar Zeova i annan?

## Lezot kestyon:

1. *Lir 1 Lerwa 17:8-24.*

(a) Dan ki fason lobeisans ek lafwa Eliya ti ganny teste? (1 Rwa. 17:9; 19:1-4, 10)

(b) Akoz lafwa sa vev Tsarfati ti vreman remar-kab? (1 Rwa. 17:12-16; Lik 4:25, 26)

(c) Ki mannyer leksperyans sa vev ki ti reste Tsarfati i montre ki sa parol ki Zezi ti dir dan Matye 10:41, 42 i vre? (1 Rwa. 17:10-12, 17, 23, 24)

2. *Lir 2 Lerwa 4:8-37.*

(a) Ki sa madanm Sounenm i ansenny nou lo lo-spitalite? (2 Rwa. 4:8; Lik 6:38; Rom. 12:13; 1 Zan 3:17)

(b) Dan ki fason nou kapab demontre bann akt labonte anver bann serviter Bondye ozordi? (Akt 20:35; 28:1, 2; Gal. 6:9, 10; Ebr. 6:10)

## Zistwar 69

### En pti Fiy ti ed en Zonm for

1. Ki sa pti fiy pe dir sa madanm dan sa portre?  
2. Lekel sa madanm dan sa portre e ki sa pti fiy ti pe fer dan son lakaz?

3. Ki Elisa ti dir son serviter dir Naamann fer e akoz Naamann ti ankoler?

4. Ki ti arive kan Naamann ti ekout son serviter?

5. Akoz Elisa ti refize pran sa kado ki Naamann ti ofer li, me ki Geazi ti fer?

6. Ki ti arive avek Geazi e ki nou kapab aprann par sa?

## Lezot kestyon:

1. *Lir 2 Lerwa 5:1-27.*

(a) Ki mannyer legzanp ki sa pti fiy Izraelit in kite i kapab ankouraz bann zenn ozordi? (2 Rwa. 5:3; Ps. 8:2; 148:12, 13)

(b) Akoz i bon gard legzanp Naamann antet kan nou ganny bann konsey sorti dan Labib? (2 Rwa. 5:15; Ebr. 12:5, 6; Zak 4:6)

(c) Ki leson nou kapab aprann kan nou konpar diferans ant legzanp Elisa ek legzanp Geazi? (2 Rwa. 5:9, 10, 14-16, 20; Mat. 10:8; Akt 5:1-5; 2 Kor. 2:17)

## Zistwar 70

### Yona ek sa gro Pwason

1. Lekel Yona e ki Zeova ti dir li fer?

2. Ki Yona ti fer vi ki i pa ti anvi al kot Zeova ti'n anvoy li?

3. Ki Yona ti dir bann maren fer pour ki tanpet i arete?

4. Parey ou kapab vwar dan sa portre, ki ti ari-ve kan Yona ti koule?

5. Pour ki kantite letan Yona ti dan vant sa pwason e ki i ti fer ladan?

6. Kote Yona ti ale apre ki i ti'n sorti dan vant sa pwason e ki sa i ansenny nou?

## Lezot kestyon:

1. *Lir Yona 1:1-17.*

Ki mannyer Yona ti santi anver son misyon ki i ti'n gannyen pour pres avek bann zabitan Niniv? (Yona 1:2, 3; Prov. 3:7; Ekle. 8:12)

2. *Lir Yona 2:1, 2, 10.*

Ki mannyer leksperyans Yona i donn nou konfyans ki Zeova pou reponn nou lapriyer? (Ps. 22:24; 34:6; 1 Zan 5:14)

3. *Lir Yona 3:1-10.*

(a) Ki lankourazman nou gannyen lefet ki Zeova ti kontinyen servi Yona malgre i pa ti reisi akonplir son misyon o konmansman? (Ps. 103:14; 1 Pyer 5:10)

(b) Leksperyans Yona avek bann zabitan Niniv i ansenny nou kwa an rapor avek ziz bann dimoun davans dan teritwar? (Yona 3:6-9; Ekle. 11:6; Akt 13:48)

## Zistwar 71

### Bondye in promet en Paradi

1. Lekel Izai, dan ki letan i ti viv e ki Zeova ti montre li?

2. Ki sa mo "paradi" i vedir e ki i fer ou mazinien?

3. Ki Zeova ti dir Izai ekrir konsernan sa nouvo Paradi?

4. Akoz Adan ek Ev ti perdi zot zoli lakour?

5. Ki Zeova in promet bann ki kontan li?

## Lezot kestyon:

1. *Lir Izai 11:6-9.*

(a) Ki mannyer Parol Bondye i dekrir sa lape ki pou egziste ant bann zannimo ek bann imen dan nouvo lemond? (Ps. 148:10, 13; Iza. 65:25; Ezek. 34:25)

(b) Ki parol dan liv Izai ki pe trouv son lakonplisman ozordi dan domenn spirityel parmi pep Zeova? (Rom. 12:2; Efe. 4:23, 24)

(c) Lekel ki merit ganny loner pour sa sanzman dan personalite ki bann imen i fer la konmela e dan nouvo lemond? (Iza. 48:17, 18; Gal. 5:22, 23; Fili. 4:7)

2. *Lir Revelasyon 21:3, 4.*

(a) Ki mannyer Labib i montre ki Zeova i reste parmi bann imen lo later dan en sans senbolik e non pa dan en sans fizik? (Lev. 26:11, 12; 2 Kron. 6:18; Iza. 66:1; Rev. 21:2, 3, 22-24)

(b) Ki kalite larm ek soufrans ki pou nepli egziste? (Lik 8:49-52; Rom. 8:21, 22; Rev. 21:4)

## Zistwar 72

### Bondye ti ed Lerwa Izkiya

1. Lekel sa zonn dan sa portre e akoz i dan en kantite problemn?
2. Ki kalite let Izkiya ti met devan Zeova e ki i ti priy lo la?
3. Ki kalite lerwa Izkiya ti ete e ki mesaz Zeova ti anvoy pour li atraver profet Izai?
4. Parey ou vwar dan sa portre ki lanz Zeova ti fer avek bann Asiryen?
5. Menm si rwayonn sa de tribi ti anpe pour en pe letan, ki ti arive apre ki Izkiya ti'n mor?

#### Lezot keston:

1. *Lir 2 Lerwa 18:1-36.*

(a) Ki mannyer Rabsake ki ti portparol bann Asiryen ti rod fason pour afeblir lafwa bann Izraelit? (2 Rwa. 18:19, 21; Egz. 5:2; Ps. 64:3)

(b) Kan zot pe fer fas avek lopoziyon, ki mannyer Temwen Zeova i swiv legzanp Izkiya? (2 Rwa. 18:36; Ps. 39:1; Prov. 26:4; 2 Tim. 2:24)

2. *Lir 2 Lerwa 19:1-37.*

(a) Ki mannyer pep Zeova ozordi i imit Izkiya kan zot dan problemn? (2 Rwa. 19:1, 2; Prov. 3:5, 6; Ebr. 10:24, 25; Zak 5:14, 15)

(b) Ki sa trwa defet Lerwa Senakerib ti gannyen e i reprezant lekel dan en sans profetik? (2 Rwa. 19:32, 35, 37; Rev. 20:2, 3)

3. *Lir 2 Lerwa 21:1-6, 16.*

Akoz i kapab ganny dir ki Manase ti enn parmi sa pli move lerwa ki ti diriz Zerizalenm? (2 Kron. 33:4-6, 9)

## Zistwar 73

### Dernyen bon Lerwa Izrael

1. Ki laz Yosiya ti annan kan i ti vin lerwa e ki i ti fer pandan setyenm lannen ki i ti pe dirize?
2. Ki Yosiya pe fer dan sa premye portre?
3. Ki gran pret ti vwar kan bann zonn ti pe repar tanp?
4. Akoz Yosiya ti desir son lenz?
5. Ki mesaz sorti kot Zeova profet Oulda ti pas avek Yosiya?

#### Lezot keston:

1. *Lir 2 Kronik 34:1-28.*

(a) Ki legzanp Yosiya in kite pour bann ki'n pas atraver en lanfans difisil? (2 Kron. 33:21-25; 34:1, 2; Ps. 27:10)

(b) Ki aksyon enportan Yosiya ti pran pour promot vre ladorasyon pandan wityenn, douzyenn ek dizwityenn lannen ki i ti pe dirize konman lerwa? (2 Kron. 34:3, 8)

(c) Ki lesou nou kapab aprann avek Lerwa Yosiya ek Gran Pret Ilkya an sa ki konsern pran swen avek nou landrwa ladorasyon? (2 Kron. 34:9-13; Prov. 11:14; 1 Kor. 10:31)

## Zistwar 74

### En Zonn ki pa ti per

1. Lekel sa zennonn dan sa portre?
2. Ki Zeremi ti panse lo sa lide vin en profet e ki Zeova ti dir li?
3. Ki mesaz Zeremi ti kontinyen anons bann dimoun?
4. Ki mannyer bann pret ti esey aret Zeremi e ki mannyer i ti montre ki i pa ti per?
5. Ki ti arive kan bann Izraelit pa ti sanz zot bann move fason viv?

#### Lezot keston:

1. *Lir Zeremi 1:1-8.*

(a) Parey legzanp Zeremi i montre, kwa ki fer en dimoun kalifye pour fer travay Zeova? (2 Kor. 3:5, 6)

(b) Ki mannyer legzanp Zeremi i ankouraz bann zenn Kreyen ozordi? (Ekle. 12:1; 1 Tim. 4:12)

2. *Lir Zeremi 10:1-5.*

Ki legzanp tousan Zeremi ti servi pour montre ki i pa fer sans pour annan konfyans dan bann zidol? (Zer. 10:5; Iza. 46:7; Aba. 2:19)

3. *Lir Zeremi 26:1-16.*

(a) Kan pe anons sa mesaz lavertisman ozordi, ki mannyer larestan Kreyen swazir i pran aker sa komann ki Zeova ti donn Zeremi pour li "pa evite dir tou parol"? (Zer. 26:2; Det. 4:2; Akt 20:27)

(b) Ki bon legzanp Zeremi in kite pour bann Temwen Zeova ozordi kan zot pe anons sa bon nouvel avek bann nasyon? (Zer. 26:8, 12, 14, 15; 2 Tim. 4:1-5)

4. *Lir 2 Lerwa 24:1-17.*

Ki konsekans Zida ti sibir pour son enfidelite anver Zeova? (2 Rwa. 24:2-4, 14)

## Zistwar 75

### Kat Garson an Babilonn

1. Lekel sa kat garson dan sa portre e akoz zot Babilonn?
2. Ki plan Nedoukadnetsar ti annan pour sa kat garson e ki lord i ti donn son bann serviter?
3. Ki Danyel ti demande an rapor avek manze ek bwar ki li ek son trwa zanmi ti pou gannyen?
4. Apre ki zot ti'n manz legim pour dis zour, ki mannyer Danyel ek son trwa zanmi ti ete konpare avek lezot zenn garson?

5. Akoz Danyel ek son trwa zanmi ti dan pale lerwa e dan ki fason zot ti pli entelizan ki bann pret ek bann zonn malen?

### **Lezot kestyon:**

1. *Lir Danyel 1:1-21.*

(a) Ki kalite zefor nou bezwen fer si nou anvi reziste tantasyon e sirmont nou bann febles? (Dan. 1:8; Zen. 39:7, 10; Gal. 6:9)

(b) Dan ki fason bann zenn denozour i kapab ganny tante oubyen ganny presyon pour partisip dan bann keksoz ki serten i vwar li bon? (Dan. 1:8; Prov. 20:1; 2 Kor. 6:17-7:1)

(c) Ki sa resi Labib lo sa kat zenn Ebre i ed nou pour apresye an rapor avek en bon konnesans? (Dan. 1:20; Iza. 54:13; 1 Kor. 3:18-20)

### **Zistwar 76**

## **Zerizalenm ti ganny detri**

1. Dan sa portre, ki pe arive avek Zerizalenm ek bann Izraelit?

2. Lekel Ezekyel e ki keksoz soka Zeova ti montre li?

3. Vi ki bann Izraelit ti napa respe pour li, ki promes Zeova ti fer?

4. Ki Lerwa Neboukadnetsar ti fer apre ki bann Izraelit ti rebel kont li?

5. Akoz Zeova ti les sa destriksyon terib ariv avek bann Izraelit?

6. Konman pei Izrael ti reste san okenn zabitan e pour ki kantite letan?

### **Lezot kestyon:**

1. *Lir 2 Lerwa 25:1-26.*

(a) Lekel Sidkya, ki ti arive avek li e ki mannyer sa ti akonplir en profesi Labib? (2 Rwa. 25:5-7; Ezek. 12:13-15)

(b) Lekel ki Zeova ti dir i responsab pour enfidelite ki Izrael ti'n komet? (2 Rwa. 25:9, 11, 12, 18, 19; 2 Kron. 36:14, 17)

2. *Lir Ezekyel 8:1-18.*

Dan ki fason bann swadizan Kreyen in imit Izrael enfidel ki ti ador soley? (Ezek. 8:16; Iza. 5:20, 21; Zan 3:19-21; 2 Tim. 4:3)

### **Zistwar 77**

## **Zot pa ti oule salye**

1. Ki lord Neboukadnetsar, lerwa Babilonn ti donn bann dimoun?

2. Akoz sa trwa zanmi Danyel pa pe salye sa stati annor?

3. Kan Neboukadnetsar ti donn sa trwa Ebre ankor en sans pour salye sa stati, ki mannyer zot ti montre ki zot ti annan konfyans dan Zeova?

4. Ki Neboukadnetsar ti dir son bann zonn fer avek Sadrak, Mesak ek Abednego?

5. Ki Neboukadnetsar ti vwar kan i ti get dan four?

6. Akoz sa lerwa ti loue Bondye Sadrak, Mesak ek Abednego e ki legzanp zot in kite pour nou?

### **Lezot kestyon:**

1. *Lir Danyel 3:1-30.*

(a) Ki latitud sa trwa zenn Ebre, bann serviter Bondye i kapab imite kan zot rankontre bann tes an rapor avek zot fidelite? (Dan. 3:17, 18; Mat. 10:28; Rom. 14:7, 8)

(b) Ki lesan enportan Zeova ti ansenny Neboukadnetsar? (Dan. 3:28, 29; 4:34, 35)

### **Zistwar 78**

## **Lekritir lo Miray**

1. Ki ti arive kan lerwa Babilonn ti fer en gro parti e servi bann lakoup ek bol ki ti'n ganny pran dan tanp Zeova Zerizalenm?

2. Ki Beltsatsar ti dir son bann zonn malen e ki zot pa ti kapab fer?

3. Ki manman sa lerwa ti dir li fer?

4. Dapre sa ki Danyel ti dir sa lerwa, akoz Bondye ti'n anvoy sa lanmen pour ekrir lo miray?

5. Ki mannyer Danyel ti eksplik sinifikasyon sa bann lekritir lo miray?

6. Ki ti arive pandan ki Danyel ti ankor pe koze?

### **Lezot kestyon:**

1. *Lir Danyel 5:1-31.*

(a) Ki diferans i annan ant lakrent pour Bondye ek sa lafreyer ki Belsatsar ti annan apre ki i ti vwar sa lekritir lo miray? (Dan. 5:6, 7; Ps. 19:9; Rom. 8:35-39)

(b) Ki mannyer Danyel ti montre ki i ti kouraze kan i ti pe koz avek Belsatsar ek bann dimoun o plase dan lasosyete? (Dan. 5:17, 18, 22, 26-28; Akt 4:29)

(c) Dan ki fason Danyel sapit 5 i met lanfaz lo souvrennte Zeova? (Dan. 4:17, 25; 5:21)

### **Zistwar 79**

## **Danyel dan Trou Lyon**

1. Lekel Daris e ki mannyer i ti vwar Danyel?

2. Ki serten zonn ki ti zalou ti fer Daris fer?

3. Ki Danyel ti fer kan i ti antann koz lo sa nouvo lalwa?

4. Akoz Daris ti sitan ankoler ki i pa ti kapab dormi e ki i ti fer lannmen bomaten?

5. Ki mannyer Danyel ti reponn Daris?

6. Ki ti arive avek sa bann move zonn ki ti esey touy Danyel e ki Daris ti ekriy pour tou bann dimoun dan son rwayonn?

### **Lezot keston:**

1. *Lir Danyel 6:1-28.*

(a) Ki mannyer sa konplo kont Danyel i fer nou mazin sa ki bann opozan in esey fer pour aret sa travay ki Temwen Zeova pe fer denozour? (Dan. 6:7; Ps. 94:20; Iza. 10:1; Rom. 8:31)

(b) Ki mannyer bann serviter Bondye ozordi i kapab imit Danyel par soumet avek “bann lotorite ki gouvènen”? (Dan. 6:5, 10; Rom. 13:1; Akt 5:29)

(c) Ki mannyer nou kapab imit legzanp Danyel lefet ki i ti “kontinyen” servi Zeova? (Dan. 6:16, 20; Fili. 3:16; Rev. 7:15)

## **Zistwar 80**

### **Pep Bondye ti kit Babilonn**

1. Parey i montre dan sa portre, ki bann Izraelit pe fer?

2. Ki mannyer Siris ti akonplir sa profes i Zeova ti donnen atraver Izai?

3. Ki Siris ti dir bann Izraelit ki pa ti kapab retourn Zerizalenm?

4. Ki Siris ti donn bann dimoun pour al avek Zerizalenm?

5. Konbyen letan ti pran pour bann Izraelit retourn Zerizalenm?

6. Ki kantite letan ti'n pase depi ki sa pei ti'n reste san zabitan?

### **Lezot keston:**

1. *Lir Izai 44:28 e osi 45:1-4.*

(a) Ki mannyer Zeova ti met lanfaz lo lasirans lakonplisman sa profes konsernan Siris? (Iza. 55:10, 11; Rom. 4:17)

(b) Ki Izai ti profetize konsernan Siris ki montre sa abilite ki Zeova i annan pour predir lavenir? (Iza. 42:9; 45:21; 46:10, 11; 2 Pyer 1:20)

2. *Lir Ezra 1:1-11.*

Kan nou swiv legzanp bann ki pa ti kapab retourn Zerizalenm, ki mannyer nou osi ozordi nou kapab ‘fortifye lanmen’ bann ki kapab fer servis apentan? (Ezra 1:4, 6; Rom. 12:13; Kol. 4:12)

## **Zistwar 81**

### **Annan Konfyans dan Zeova**

1. Konbyen dimoun ki ti fer sa gran vwayaz depi Babilonn ziska Zerizalenm e ki zot ti vwar kan zot ti arive?

2. Ki bann Izraelit ti konmans konstru kan zot ti arive e ki zot lennmi ti fer?

3. Lekel Agai ek Zekarya e ki zot ti dir sa pep? 4. Akoz Tatenai ti anvoy en let Babilonn e ki larepons i ti gannnen?

5. Ki Ezra ti fer kan i ti tann koz lo sa nesessite pour konstru tanp Bondye?

6. Ki Ezra pe priy lo la dan sa portre, ki mannyer son lapriyer ti ganny reponn e ki sa i ansenny nou?

### **Lezot keston:**

1. *Lir Ezra 3:1-13.*

Si nou vwar nou dan en landrwa kot napa okenn kongregasyon pep Bondye, ki nou devret kontinyen fer? (Ezra 3:3, 6; Akt 17:16, 17; Ebr. 13:15)

2. *Lir Ezra 4:1-7.*

Ki legzanp Zorobabel in kite pour pep Zeova an rapor avek asosye avek lezot larelizyon? (Egz. 34:12; 1 Kor. 15:33; 2 Kor. 6:14-17)

3. *Lir Ezra 5:1-5, 17 e osi 6:1-22.*

(a) Akoz bann lennmi pa ti kapab aret sa travay konstruksyon lo tanp? (Ezra 5:5; Iza. 54:17)

(b) Ki mannyer bann ansyen i kapab swiv legzanp bann zonn aze parmi bann Zwif, an rapor avek rod gidans avek Zeova kan zot pe rankontre bann ki opoz zot? (Ezra 6:14; Ps. 32:8; Rom. 8:31; Zak 1:5)

4. *Lir Ezra 8:21-23, 28-36.*

Ki legzanp Ezra in kite ki nou kapab imite kan nou annan serten desizyon pour pran? (Ezra 8:23; Ps. 127:1; Prov. 10:22; Zak 4:13-15)

## **Zistwar 82**

### **Mordekai ek Ester**

1. Lekel Mordekai ek Ester?

2. Akoz Lerwa Asweris ti anvi en nouvo madanm e lekel i ti swazir?

3. Lekel Amann e kwa ki ti fer li ankoler?

4. Ki lalwa ki ti ganny fer e ki Ester ti fer apre ki i ti'n ganny en mesaz avek Mordekai?

5. Ki ti arive avek Amann e avek Mordekai?

6. Ki mannyer bann Izraelit ti ganny sove kont zot lennmi?

### **Lezot keston:**

1. *Lir Ester 2:12-18.*

Ki mannyer Ester ti montre valer ki i annan kan en dimoun i annan “en lespri bon e trankil”? (Ester 2:15; 1 Pyer 3:1-5)

2. *Lir Ester 4:1-17.*

Zis parey Ester ti ganny loportinite pour azir an favor ladorasyon pir, ki loportinite nou annan pour eksprim nou latasman ek fidelite anver Zeova? (Ester 4:13, 14; Mat. 5:14-16; 24:14)

3. *Lir Ester 7:1-6.*

Ki mannyer bokou dimoun parmi pep Bondye ozordi i dan risk ganny persekute zis parey Ester? (Ester 7:4; Mat. 10:16-22; 1 Pyer 2:12)

### Zistwar 83

#### Miray Zerizalenm

1. Ki mannyer bann Izraelit ti santi vi ki ti napa en miray toultour Zerizalenm?
2. Lekel Neemya?
3. Ki travay Neemya ti fer e akoz i ti enportan?
4. Ki nouvel ki ti fer Neemya tris e ki i ti fer?
5. Ki mannyer Lerwa Artazekzes ti montre ki i ti bon anver Neemya?
6. Ki mannyer Neemya ti aranz travay pour ki zot lennmi pa ti pou kapab aret li?

#### Lezot kestyon:

1. *Lir Neemya 1:4-6 e osi 2:1-20.*

Ki mannyer Neemya ti rod gidans Zeova? (Nee. 2:4, 5; Rom. 12:12; 1 Pyer 4:7)

2. *Lir Neemya 3:3-5.*

Ki bann ansyen ek asistan ministryel i kapab aprann dan diferans ant bann Tekoit ek bann "dimoun enportan"? (Nee. 3:5, 27; 2 Tesa. 3:7-10; 1 Pyer 5:5)

3. *Lir Neemya 4:1-23.*

(a) Kwa ki ti motiv bann Izraelit pour kontinyen konstrir miray malgre bann lopoziyon sever? (Nee. 4:6, 8, 9; Ps. 50:15; Iza. 65:13, 14)

(b) Dan ki fason legzanp bann Izraelit i ankou-raz nou ozordi?

4. *Lir Neemya 6:15.*

Lefet ki miray Zerizalenm ti ganny konstrir pandan de mwan, ki sa i montre konsernan pwisans ki lafwa i annan? (Ps. 56:3, 4; Mat. 17:20; 19:26)

### Zistwar 84

#### En Lanz ti vizit Mari

1. Lekel sa madanm dan sa portre?
2. Ki lanz Gabriyel ti dir Mari?
3. Ki mannyer lanz Gabriyel ti eksplik Mari ki i pou ganny en pti baba menm si i pa ti reste avek en msye?
4. Ki ti arive kan Mari ti al vizit Elizabet?
5. Ki Zozef ti panse kan i ti aprann ki Mari ti pe al ganny en pti baba e akoz i ti sanz son lide?

#### Lezot kestyon:

1. *Lir Lik 1:26-56.*

(a) Ki Lik 1:35 i endike konsernan lenperfeksyon Mari kan lavi Garson Bondye ti ganny transfer dan son vant sorti dan lesyel? (Aga. 2:11-13; Zan 6:69; Ebr. 7:26; 10:5)

(b) Ki mannyer Zezi ti ganny loner menm avan i ne? (Lik 1:41-43)

(c) Ki zoli legzanp Mari in kite pour bann Kretyen ozordi ki ganny en privez spesyal dan servis? (Lik 1:38, 46-49; 17:10; Prov. 11:2)

2. *Lir Matye 1:18-25.*

Menm si Zezi pa ti ganny apele Emanyol, ki mannyer i ti akonplir sinifikasyon sa non dan son rol konman en imen? (Mat. 1:22, 23; Zan 14:8-10; Ebr. 1:1-3)

### Zistwar 85

#### Zezi ti ne dan en Park Bef

1. Lekel sa pti baba dan sa portre e kote Mari pe al met li?
2. Akoz Zezi ti ne dan en park ki ti annan zannimo ladan?
3. Dan sa portre, lekel sa bann zonn ki pe antre dan sa park e ki en lanz ti'n dir zot?
4. Akoz Zezi ti spesyal?
5. Akoz Zezi i kapab ganny apele Garson Bondye?

#### Lezot kestyon:

1. *Lir Lik 2:1-20.*

(a) Ki rol Sezar Ogis ti zve dan lakonplisman sa profesi lo nesans Zezi? (Lik 2:1-4; Mik. 5:2)

(b) Ki mannyer en dimoun i kapab ganny enkli parmi bann ki ganny refer konman "bann byennenme" Zezi? (Lik 2:14; Mat. 16:24; Zan 17:3; Akt 3:19; Ebr. 11:6)

(c) Si sa bann senp berze Zida ti annan tou rezon pour zot rezwir nesans en sover, ki pli gran rezon bann serviter Bondye i annan pour zot dan lazwa ozordi? (Lik 2:10, 11; Efe. 3:8, 9; Rev. 11:15; 14:6)

### Zistwar 86

#### Bann Zonn ti ganny gide par en Zetwal

1. Lekel sa bann zonn dan sa portre e akoz enn parmi zot pe montre ledwa lo en zetwal briyan?
2. Akoz Lerwa Erod ti trakase e ki i ti fer?
3. Kote sa zetwal briyan ti diriz sa bann zonn e akoz zot ti retourn se zot par en lot semen?
4. Ki lord Erod ti donnen e akoz?
5. Ki Zeova ti dir Zozef fer?
6. Lekel ki ti fer sa zetwal briye e akoz?

#### Lezot kestyon:

1. *Lir Matye 2:1-23.*

Ki laz Zezi ti annan e kote i ti pe reste kan bann savan ti vin vwar li? (Mat. 2:1, 11, 16)



## Zistwar 87

### Zezi ti al dan Tanp

1. Ki laz Zezi ti annan dan sa portre e kote i ete?
2. Ki Zozef ek son fanmiy ti fer tou le-z-an?
3. Akoz Zozef ek Mari ti retourn Zerizalenm en zour apre ki zot ti'n vwayaze pour retourn se zot?
4. Kote Zozef ek Mari ti vwar Zezi e akoz bann dimoun laba ti etonnen?
5. Ki Zezi ti dir son manman?
6. Ki manner nou kapab vin parey Zezi kan nou pe aprann lo Bondye?

#### Lezot kestyon:

1. *Lir Lik 2:41-52.*

(a) Menm si Lalwa ti dir ki zis bann msye ki ti devret al asiste festival tou le-z-an, ki bon legzanp Mari ek Zozef in kite pour bann paran ozordi? (Lik 2:41; Det. 16:16; 31:12; Prov. 22:6)

(b) Ki manner Zezi in kit en bon legzanp pour bann zenn ozordi soumet avek zot paran? (Lik 2:51; Det. 5:16; Prov. 23:22; Kol. 3:20)

2. *Lir Matye 13:53-56.*

Lekel sa kat frer Zezi ki ganny mansyonnen dan Labib e ki manner de parmi ti ganny servi dan kongregasyon Kreyen? (Mat. 13:55; Akt 12:17; 15:6, 13; 21:18; Gal. 1:19; Zak 1:1; Zid 1)

## Zistwar 88

### Zan ti batiz Zezi

1. Lekel sa de zonn dan sa portre?
2. Ki manner en dimoun i ganny batize?
3. Lekel ki Zan ti normalman batize?
4. Pour ki rezon spesyal Zezi ti demann Zan pour batiz li?
5. Ki manner Bondye ti montre ki I ti kontan ki Zezi ti'n batize?
6. Ki ti arive kan Zezi ti al dan en landrwa tou-sel pour 40 zour?
7. Lekel ki ti bann premye disip Zezi e ki premye mirak Zezi ti fer?

#### Lezot kestyon:

1. *Lir Matye 3:13-17.*

Ki model Zezi in kite an rapor avek batenm son bann disip? (Ps. 40:7, 8; Mat. 28:19, 20; Lik 3: 21, 22)

2. *Lir Matye 4:1-11.*

Lefet ki Zezi ti byen servi Lekritir, ki manner sa i devret ankouraz nou pour etidye Labib regilyerman? (Mat. 4:5-7; 2 Pyer 3:17, 18; 1 Zan 4:1)

3. *Lir Zan 1:29-51.*

Ver lekel Zan Batis ti diriz son bann disip e ki

manner nou kapab imit li ozordi? (Zan 1:29, 35, 36; 3:30; Mat. 23:10)

4. *Lir Zan 2:1-12.*

Ki manner premye mirak Zezi i montre ki Ze-ova pa priv Son pep bann bon keksoz? (Zan 2:9, 10; Ps. 84:11; Zak 1:17)

## Zistwar 89

### Zezi ti pous zot dan Tanp

1. Akoz zannimo ti pe ganny vann dan tanp?
2. Kwa ki ti fer Zezi ankoler?
3. Parey ou kapab vwar dan sa portre, ki Zezi ti fer e ki i ti dir sa bann zonn ki ti pe vann pizon?
4. Ki bann disip Zezi ti mazine kan zot ti vwar tou sa ki ti pe arive?
5. Kan Zezi ti pe al Galile, ki distrik i ti pas ladan?

#### Lezot kestyon:

1. *Lir Zan 2:13-25.*

Kan ou get lakoler ki Zezi ti annan anver bann ki ti pe fer biznes dan tanp, ki manner nou devret vwar bann tranzaksyon biznes ki ganny fer dan Lasal Rwayonn? (Zan 2:15, 16; 1 Kor. 10:24, 31-33)

## Zistwar 90

### Zezi avek en Madanm kot pwi

1. Akoz Zezi ti aret obor en pwi Samari e ki i ti dir en madanm laba?
2. Akoz sa madanm ti sirprann, ki Zezi ti dir li e akoz?
3. Ki kalite delo sa madanm ti krwar Zezi ti pe koz lo la me ki i ti pe vreman dir?
4. Akoz sa madanm ti sirprann par lefet ki Zezi ti konn keksoz lo li e kote Zezi ti'n ganny tou sa lenformasyon?
5. Ki lesou nou kapab aprann avek resi sa madanm kot pwi?

#### Lezot kestyon:

1. *Lir Zan 4:5-43.*

(a) An swivan legzanp Zezi, ki latid nou devret annan anver bann dimoun ki zot ras ek kiltir i diferan avek sa ki pour nou? (Zan 4:9; 1 Kor. 9: 22; 1 Tim. 2:3, 4; Tit 2:11)

(b) Ki byenfe spirityel en dimoun ki vin disip Zezi i kapab gannnen? (Zan 4:14; Iza. 58:11; 2 Kor. 4:16)

(c) Ki manner nou kapab demontre lapresyasyon parey sa madanm Samariten ki ti eksite pour partaz sa ki i ti'n aprann? (Zan 4:7, 28; Mat. 6:33; Lik 10:40-42)

## Zistwar 91

### Zezi lo en Montanny

1. Dan sa portre kote Zezi pe ansennyen e lekel ki pe asiz pros avek li?
2. Ki mannyer sa 12 zapot Zezi ti apele?
3. Ki Rwayonm Zezi ti pe pres lo la?
4. Ki Zezi ti ansenny bann dimoun pour priy lo la?
5. Ki Zezi ti dir bann dimoun lo lafason zot devret tret lezot?

#### Lezot keston:

1. *Lir Matye 5:1-12.*

Dan ki fason nou kapab montre ki nou konsyan nou bezwen spirityel? (Mat. 5:3; Rom. 10:13-15; 1 Tim. 4:13, 15, 16)

2. *Lir Matye 5:21-26.*

Ki mannyer Matye 5:23, 24 i montre ki nou relasyon avek lezot i annan lefe lo nou relasyon avek Zeova? (Mat. 6:14, 15; Ps. 133:1; Kol. 3:13; 1 Zan 4:20)

3. *Lir Matye 6:1-8.*

Ki mannyer bann Kretyen i kapab evite krwar ki zot tro zis? (Lik 18:11, 12; 1 Kor. 4:6, 7; 2 Kor. 9:7)

4. *Lir Matye 6:25-34.*

Ki Zezi ti ansennyen an rapor avek lenportans pour met nou konfyans dan Zeova konsernan sa ki nou bezwen materyelman? (Egz. 16:4; Ps. 37:25; Fili. 4:6)

5. *Lir Matye 7:1-11.*

Ki sa legzanp dan Matye 7:5 i ansenny nou? (Prov. 26:12; Rom. 2:1; 14:10; Zak 4:11, 12)

## Zistwar 92

### Zezi ti resisit bann Mor

1. Lekel papa sa pti fiy dan sa portre e akoz li ek son madanm ti enkyet en kantite?
2. Ki Zairis ti fer kan i ti vwar Zezi?
3. Ki ti arive pandan ki Zezi ti pe al kot lakour Zairis e ki mesaz Zairis ti gannyen ler i ti pe retournen?
4. Akoz bann dimoun kot lakaz Zairis ti riy Zezi?
5. Ki Zezi ti fer apre ki i ti'n pran manman ek papa sa pti fiy ek trwa son zapot e al dan lasanm sa pti fiy?
6. Lekel osi Zezi ti resisite e ki sa i montre?

#### Lezot keston:

1. *Lir Lik 8:40-56.*

Ki mannyer Zezi ti demontre ki i ti annan konpasyon e i ti rezonnab avek sa madanm ki ti ganny en desarz disan e ki bann ansyen dan kon-

gregasyon i kapab aprann atraver sa? (Lik 8:43, 44, 47, 48; Lev. 15:25-27; Mat. 9:12, 13; Kol. 3:12-14)

2. *Lir Lik 7:11-17.*

Akoz bann ki'n perdi bann dimoun ki zot kontan dan lanmor i kapab ganny rekonforte par sa parol ki Zezi ti dir avek sa vev Nain? (Lik 7:13; 2 Kor. 1:3, 4; Ebr. 4:15)

3. *Lir Zan 11:17-44.*

Ki mannyer Zezi ti montre ki i normal pour sigrinen kan en dimoun ki nou kontan i mor? (Zan 11:33-36, 38; 2 Sam. 18:33; 19:1-4)

## Zistwar 93

### Zezi ti nouri en Lafoul

1. Ki keksoz terib ti'n ariv Zan Batis e ki mannyer Zezi ti santi?
2. Ki mannyer Zezi ti nouri sa gran lafoul ki ti'n swiv li e ki kantite manze ti reste?
3. Akoz bann disip ti per pandan lannwit e ki ti arive avek Pyer?
4. Ki mannyer Zezi ti nouri en kantite dimoun ankor enn fwa?
5. Akoz i pou gou kan Zezi pou diriz later konman Lerwa?

#### Lezot keston:

1. *Lir Matye 14:1-32.*

(a) Ki konprezon lo personalite Pyer sa resi dan Matye 14:23-32 i donnen?

(b) Ki mannyer Lekritir i montre ki Pyer ti vin pli matir e sirmont son labitid pour reakte vitman? (Mat. 14:27-30; Zan 18:10; 21:7; Akt 2:14, 37-40; 1 Pyer 5:6, 10)

2. *Lir Matye 15:29-38.*

Ki mannyer Zezi ti demontre respe pour bann provizyon materyel ki i ti gannyen sorti kot son Papa? (Mat. 15:37; Zan 6:12; Kol. 3:15)

3. *Lir Zan 6:1-21.*

Ki mannyer bann Kretyen ozordi i kapab swiv legzanp Zezi par respekte gouvrenman? (Zan 6:15; Mat. 22:21; Rom. 12:2; 13:1-4)

## Zistwar 94

### Zezi ti kontan bann pti Zanfan

1. Ki bann zapot ti pe diskite antre zot kan zot ti retournen sorti lo en gran vwayaz?
2. Akoz Zezi ti dir en pti zanfan vini e met li debout devan son bann zapot?
3. Dan ki fason bann zapot ti devret aprann pour vin parey en zanfan?
4. Ki mannyer Zezi ti montre ki i ti kontan bann zanfan enn de mwan pli tar?

## Lezot kestyon:

1. *Lir Matye 18:1-4.*

Akoz Zezi ti servi bann parabol pour ansennyen? (Mat. 13:34, 36; Mark 4:33, 34)

2. *Lir Matye 19:13-15.*

Si nou anvi benefisyé avek sa Rwayonm, kwa ki en zanfan i annan nou merit imite? (Ps. 25:9; 138:6; 1 Kor. 14:20)

3. *Lir Mark 9:33-37.*

Ki Zezi ti ansenny son bann zapot konsernan lanvi pour vin enportan? (Mark 9:35; Mat. 20:25, 26; Gal. 6:3; Fili. 2:5-8)

4. *Lir Mark 10:13-16.*

Akoz ti fasil pour apros Zezi e ki bann ansyen i kapab aprann par sa? (Mark 6:30-34; Fili. 2:1-4; 1 Tim. 4:12)

## Zistwar 95

### Fason ki Zezi ti Ansennyen

1. Ki en zonn ti demann Zezi e akoz?
2. Ki Zezi ti servi parfwa pour ansenyen e ki nou'n deza aprann lo bann Zwif ek Samariten?
3. Dan sa zistwar ki Zezi ti rakonte, ki ti arive avek sa Zwif kan i ti pe al Zeriko?
4. Ki ti arive kan en pret Zwif ek en Levit ti pas lo sa menm semen?
5. Dan sa portre, lekel ki pe ed sa Zwif ki ti'n ganny bate?
6. Apre ki Zezi ti'n fini rakont sa zistwar ki kestyon i ti demande e ki larepons sa zonn ti donn li?

## Lezot kestyon:

1. *Lir Lik 10:25-37.*

(a) Olye donn en larepons direk pour sa kestyon, ki mannyer Zezi ti ed sa zonn ki ti familye avek Lalwa pour li rezonn lo sa sitiasyon? (Lik 10:26; Mat. 16:13-16)

(b) Ki mannyer Zezi ti servi ilustrasyon pour ki bann ki ti pe ekout li i evite fer lapliferans? (Lik 10:36, 37; 18:9-14; Tit 1:9)

## Zistwar 96

### Zezi ti geri bann Malad

1. Ki Zezi ti fer pandan ki i ti pe vwayaz partou dan pei?
2. Ki Zezi ti dir son bann disip apre apepre trwa-z-an ki i ti'n batize?
3. Lekel sa bann dimoun dan sa portre e ki Zezi ti fer pour sa madanm?

4. Akoz bann sef relizye ti vreman onte kan Zezi ti reponn zot lobzeksyon?

5. Kan i ti an deor lavil Zeriko, ki Zezi ti fer pour de zonn ki pa ti vwar kler?

6. Akoz Zezi ti fer mirak?

## Lezot kestyon:

1. *Lir Matye 15:30, 31.*

Ki mannyer pouvwar Zeova ti ganny demontre atraver Zezi e ki lefe sa i annan lo nou vi ki nou konnen Zeova in promet en paradi? (Ps. 37:29; Iza. 33:24)

2. *Lir Lik 13:10-17.*

Lefet ki Zezi ti fer bann mirak ekstraordiner zour Saba, ki mannyer sa i montre sa kalite rekonfor ki i pou anmennen dan lavenir pandan sa mil an ki i pou dirize? (Lik 13:10-13; Ps. 46:9; Mat. 12:8; Kol. 2:16, 17; Rev. 21:1-4)

3. *Lir Matye 20:29-34.*

Ki mannyer sa resi i montre ki Zezi pa ti zannen tro okipe pour ed lezot e ki nou kapab aprann par sa? (Det. 15:7; Zak 2:15, 16; 1 Zan 3:17)

## Zistwar 97

### Zezi ti vin konman Lerwa

1. Ki Zezi ti dir son bann disip fer kan zot ti ariv kot en pti vilaz obor Zerizalenm?
2. Dan sa portre, ki ti arive kan Zezi ti pre avek lavil Zerizalenm?
3. Ki bann zanfan ti fer kan zot ti vwar Zezi geri bann dimoun ki pa ti vwar kler ek bann ki pa ti marse?
4. Ki Zezi ti dir avek bann pret ki ti ankoler?
5. Ki mannyer nou kapab vin parey sa bann zanfan ki ti loue Zezi?
6. Ki bann disip ti anvi konnen?

## Lezot kestyon:

1. *Lir Matye 21:1-17.*

(a) Ki mannyer larantre Zezi Zerizalenm konman Lerwa ti diferan avek bann zeneral ki ti ganny laviktwar dan letan Romen? (Mat. 21:4, 5; Zeka. 9:9; Fili. 2:5-8; Kol. 2:15)

(b) Ki lesan bann zenn i kapab aprann avek sa garson Izraelit ki ti sit Psonm 118 pandan ki Zezi ti antre dan tanp? (Mat. 21:9, 15; Ps. 118:25, 26; 2 Tim. 3:15; 2 Pyer 3:18)

2. *Lir Zan 12:12-16.*

Lefet ki bann dimoun ti servi brans palm pour loue Zezi, ki sa ti senbolize? (Zan 12:13; Fili. 2:10; Rev. 7:9, 10)

## Zistwar 98

### Lo Montanny Zolivyè

1. Lekel Zezi parmi sa bann zonn dan sa portre e lekel ki avek li?
2. Ki bann pret ti esey fer avek Zezi dan tanp e ki zot ti dir li?
3. Ki bann zapot ti demann Zezi?
4. Akoz Zezi ti dir son bann zapot serten kek-  
soz ki ti pou arive lo later kan i pou dirize kon-  
man Lerwa dan lesyel?
5. Ki Zezi ti dir pou arive avan ki i met en la-  
fen avek mesanste lo later?

#### Lezot kestyon:

1. *Lir Matye 23:1-39.*  
(a) Menm si Lekritir i endike ki bann tit ki  
napa nanryen pour fer avek larelizyon i kapab  
apropriye, ki parol Zezi dan Matye 23:8-11 i  
montre konsernan servi bann tit ki flat le-  
zot dan kongregasyon? (Akt 26:25; Rom. 13:7;  
1 Pyer 2:13, 14)  
(b) Ki bann Farizyen ti servi pour esey anpes  
bann dimoun pour vin Kreyen e ki mannyer  
bann sef relizye i servi menm taktik denozour?  
(Mat. 23:13; Lik 11:52; Zan 9:22; 12:42; 1 Tesa.  
2:16)
2. *Lir Matye 24:1-14.*  
(a) Ki mannyer Matye 24:13 i met lanfaz lo len-  
portans pour andire?  
(b) Ki sa lekspresyon “lafen” dan Matye 24:13  
i vedir? (Mat. 16:27; Rom. 14:10-12; 2 Kor. 5:10)
3. *Lir Mark 13:3-10.*  
Ki lekspresyon dan Mark 13:10 ki montre akoz  
i irzan pour pres sa bon nouvel e ki mannyer  
parol Zezi i kapab annan lefe lo nou? (Rom. 13:  
11, 12; 1 Kor. 7:29-31; 2 Tim. 4:2)

## Zistwar 99

### Dan en Lasanm anler dan Letaz

1. Parey sa portre i montre, akoz Zezi ek son  
12 zapot ti dan en gran lasanm anler dan letaz?
2. Lekel sa zonn ki pe ale e ki i pe al fer?
3. Ki repa spesyal Zezi ti konmans fer apre ki  
zot ti'n fini manz repa Lapak?
4. Ki levennman Lapak ti fer bann Izraelit rap-  
pel e ki sa repa spesyal ti fer son bann zapot  
rapel?
5. Ki Zezi ti dir son bann disip apre Repa Se-  
nyer e ki zot ti fer?

## Lezot kestyon:

1. *Lir Matye 26:14-30.*  
(a) Ki mannyer Matye 26:15 i montre ki traizon  
Zida ti enn ki ti'n ganny plàn?  
(b) Ki sa de rezon ki disan Zezi ti ganny verse?  
(Mat. 26:27, 28; Zer. 31:31-33; Efe. 1:7; Ebr. 9:  
19, 20)
2. *Lir Lik 22:1-39.*  
Dan ki sans Satan ti antre dan Zida? (Lik 22:3;  
Zan 13:2; Akt 1:24, 25)
3. *Lir Zan 13:1-20.*  
(a) An rapor avek sa ki Zan 13:2 i dir, eski Zida  
ti responsab pour son aksyon e ki leson bann  
serviter Bondye i kapab aprann atraver sa? (Zen.  
4:7; 2 Kor. 2:11; Gal. 6:1; Zak 1:13, 14)  
(b) Ki model ekstrordiner Zezi in kite pour nou?  
(Zan 13:15; Mat. 23:11; 1 Pyer 2:21)
4. *Lir Zan 17:1-26.*  
Dan ki sans Zezi ti priye pour son bann disip  
vin “en sel”? (Zan 17:11, 21-23; Rom. 13:8; 14:19;  
Kol. 3:14)

## Zistwar 100

### Zezi dan Zarden

1. Kote Zezi ek son bann zapot ti ale apre ki zot  
ti'n kit lasanm anler dan letaz e ki Zezi ti de-  
mann zot pour fer?
2. Ki Zezi ti vwar kan i ti retourn kot son bann  
disip ti ete e konbyen fwa sa ti arive?
3. Lekel ki ti antre dan zarden e parey sa por-  
tre i montre ki Zida Iskaryot ti fer?
4. Akoz Zida ti anbras Zezi e ki Pyer ti fer?
5. Ki Zezi ti dir Pyer e akoz i pa ti demann Bon-  
dye pour anvoy okenn lanz pour sov li?

#### Lezot kestyon:

1. *Lir Matye 26:36-56.*  
(a) Ki mannyer lafason Zezi ti konsey son bann  
zapot i en bon legzanp pour bann ansyen ozor-  
di? (Mat. 20:25-28; 26:40, 41; Gal. 5:17; Efe. 4:  
29, 31, 32)  
(b) Ki mannyer Zezi ti konsider servi zouti lager  
kont en lot dimoun? (Mat. 26:52; Lik 6:27, 28;  
Zan 18:36)
2. *Lir Lik 22:39-53.*  
Kan en lanz ti aparet avek Zezi pour donn li la-  
fors dan zarden Zetsemene, eski sa ti endike ki  
lafwa Zezi ti pe afeblir? Eksplik. (Lik 22:41-43;  
Iza. 49:8; Mat. 4:10, 11; Ebr. 5:7)
3. *Lir Zan 18:1-12.*  
Ki mannyer Zezi ti protez son bann disip kont  
bann ki opoz zot e ki nou kapab aprann atraver  
sa legzanp? (Zan 10:11, 12; 18:1, 6-9; Ebr. 13:6;  
Zak 2:25)

## Zistwar 101

### Zezi ti ganny touye

1. Lekel ki premyerman responsab pour lanmor Zezi?
2. Ki bann zapot ti fer kan bann sef relizye ti atrap Zezi?
3. Ki ti arive dan lakaz gran pret Kaif?
4. Akoz Pyer ti ale an pleran?
5. Ki bann sef pret ti kriye kan Zezi ti retourn kot Pilat?
6. Ki ti arive avek Zezi Vandredi apremidi e ki promes i ti fer avek en bandi ki ti'n ganny kloute obor li?
7. Kote sa Paradi ki Zezi ti koz lo la pou ete?

#### Lezot kestyon:

1. *Lir Matye 26:57-75.*

Dan ki fason bann manm dan gran lakour Zwif ti montre ki zot ti annan en move leker? (Mat. 26:59, 67, 68)

2. *Lir Matye 27:1-50.*

Akoz nou kapab dir ki sa regre ki Zida ti santi pa ti senser? (Mat. 27:3, 4; Mark 3:29; 14:21; 2 Kor. 7:10, 11)

3. *Lir Lik 22:54-71.*

Lefet ki Pyer ti dir i pa konn Zezi zour i ti ganny trai e arete, ki nou kapab aprann par sa? (Lik 22:60-62; Mat. 26:31-35; 1 Kor. 10:12)

4. *Lir Lik 23:1-49.*

Ki mannyer Zezi ti reazir anver sa lenzistis ki i ti pe sibir e ki lesou nou kapab aprann par sa? (Lik 23:33, 34; Rom. 12:17-19; 1 Pyer 2:23)

5. *Lir Zan 18:12-40.*

Lefet ki pour en moman Pyer ti annan lafreyer pour zonn e pli tar sirmont li par vin en zapot remarkab, ki sa i montre? (Zan 18:25-27; 1 Kor. 4:2; 1 Pyer 3:14, 15; 5:8, 9)

6. *Lir Zan 19:1-30.*

(a) Ki pwennvi balanse Zezi ti annan an rapor avek bann keksoz materyel? (Zan 2:1, 2, 9, 10; 19:23, 24; Mat. 6:31, 32; 8:20)

(b) Ki mannyer parol Zezi pandan ki i ti pe mor i en deklarasyon ki i ti'n siport souvrennte Zeova? (Zan 16:33; 19:30; 2 Pyer 3:14; 1 Zan 5:4)

## Zistwar 102

### Zezi ti vivan

1. Lekel sa madanm dan sa portre, lekel sa de zonn e ki bor zot ete?
2. Akoz Pilat ti dir avek bann pret anvoy solda vey sa tonbo?
3. Ki en lanz ti fer sa trwazyenm zour gran maten apre ki Zezi ti'n mor e ki sa bann pret ti fer?

4. Akoz sa bann madanm ti soke ler zot ti al get tonbo Zezi?

5. Akoz Pyer ek Zan ti tay kot tonbo Zezi e ki zot ti vwar?

6. Ki ti'n arive avek lekor Zezi e ki i ti fer pour montre son bann disip ki i ti ankor vivan?

#### Lezot kestyon:

1. *Lir Matye 27:62-66 e osi 28:1-15.*

Dan letan ki Zezi ti'n resisite, ki mannyer bann sef pret, Farizyen ek bann ansyen ti fer pese kont lespri sen? (Mat. 12:24, 31, 32; 28:11-15)

2. *Lir Lik 24:1-12.*

Ki mannyer sa zistwar lo rezireksyon Zezi i montre nou ki Zeova i vwar bann madanm konman bann bon temwen ki i kapab depan lo la? (Lik 24:4, 9, 10; Mat. 28:1-7)

3. *Lir Zan 20:1-12.*

Ki mannyer Zan 20:8, 9 i ed nou pour vwar lenportans pour annan pasyans menm si nou pa konpran en profesyon Labib antyerman? (Prov. 4:18; Mat. 17:22, 23; Lik 24:5-8; Zan 16:12)

## Zistwar 103

### Dan en Lasanm fermen

1. Ki Mari ti dir avek sa zonn ki i ti kwar ti en zardinyen e kwa ki ti fer li realize ki sa zonn ti vreman Zezi?

2. Ki ti arive avek sa de disip ki ti pe al dan vilaz Emais?

3. Ki keksoz merveye ti arive letan sa de disip ti pe dir bann zapot ki zot ti'n vwar Zezi?

4. Ziska prezan, konbyen fwa Zezi ti'n aparet avek son bann disip?

5. Ki Toma ti dir ler i ti tande ki bann disip ti'n vwar Senyer e ki ti arive wit zour apre?

#### Lezot kestyon:

1. *Lir Zan 20:11-29.*

Eski dan Zan 20:23 Zezi ti pe dir ki zonn i annan drwa pardonn pese? Eksplike. (Ps. 49:2, 7; Iza. 55:7; 1 Tim. 2:5, 6; 1 Zan 2:1, 2)

2. *Lir Lik 24:13-43.*

Ki mannyer nou kapab prepar nou leker pour fer li fasil pour resevwar laverite ki dan Labib? (Lik 24:32, 33; Ezra 7:10; Mat. 5:3; Akt 16:14; Ebr. 5:11-14)

## Zistwar 104

### Zezi ti retourn dan Lesyel

1. Dan en lokasyon konbyen disip ki ti vwar Zezi?
2. Ki si sa Rwayonm Bondye e ki mannyer lavi

lo later pou ete kan Zezi pou pe dirize konman Lerwa pour mil an?

3. Pour konbyen zour Zezi ti aparet avek son bann disip e letan ti'n arive pour li fer kwa?

4. Ki Zezi ti dir son bann disip fer zis avan i ti kit zot?

5. Ki pe arive dan sa portre e kwa ki ti fer son bann disip pa vwar li?

### **Lezot kestyon:**

1. *Lir 1 Korentyen 15:3-8.*

Akoz zapot Pol ti kapab koz avek konfyans konsernan rezireksyon Zezi e lo ki keksoz bann Kretyen i kapab koz lo la avek konfyans dan nou letan? (1 Kor. 15:4, 7, 8; Iza. 2:2, 3; Mat. 24:14; 2 Tim. 3:1-5)

2. *Lir Akt 1:1-11.*

Parey ti ganny predir dan Akt 1:8 ziska ki degre travay predikasyon in propaze? (Akt 6:7; 9:31; 11:19-21; Kol. 1:23)

## **Zistwar 105**

### **Bann Disip ti pe espere an Zerizalenm**

1. Parey sa portre i montre, ki ti arive avek bann disip Zezi ki ti pe espere an Zerizalenm?

2. Ki sirpriz bann viziter ki ti vin Zerizalenm ti gannyen?

3. Ki Pyer ti eksplik bann dimoun?

4. Ki mannyer bann dimoun ti santi apre ki zot ti'n ekout Pyer e ki i ti dir zot fer?

5. Konbyen dimoun ti ganny batize zour Lapannkot 33 N.L?

### **Lezot kestyon:**

1. *Lir Akt 2:1-47.*

(a) Ki mannyer parol Pyer dan Akt 2:23, 36 i montre ki nasyon Zwif an antye ti responsab pour lanmor Zezi? (1 Tesa. 2:14, 15)

(b) Ki mannyer ler Pyer ti servi Lekritir pour rezonnen sa i en bon legzanp pour nou? (Akt 2:16, 17, 29, 31, 36, 39; Kol. 4:6)

(c) Ki mannyer Pyer ti servi sa premye "lakle Rwayonm lesyel" ki Zezi ti'n promet li? (Akt 2:14, 22-24, 37, 38; Mat. 16:19)

## **Zistwar 106**

### **Zot ti ganny large dan Prizon**

1. Ki ti arive en zour apremidi kan Pyer ek Zan ti pe al dan tanp?

2. Ki Pyer ti dir avek en zonm ki pa ti kapab marse e ki Pyer ti donn li ki ti annan plis valer ki larzan?

3. Akoz bann sef relizye ti ankoler e ki zot ti fer avek Pyer ek Zan?

4. Ki Pyer ti dir avek bann sef relizye e ki laver-tisman bann zapot ti gannyen?

5. Akoz bann sef relizye ti zalou e ki ti arive kan bann zapot ti ganny met dan prizon pour dezyenm fwa?

6. Ki larepons bann zapot ti donner kan zot ti ganny anmennen kot lasal Sannedren?

### **Lezot kestyon:**

1. *Lir Akt 3:1-10.*

Menm si ozordi nou napa pouvwar pour fer mirak, ki mannyer parol Pyer dan Akt 3:6 i kapab ed nou pour apresye valer ki sa mesaz Rwayonm i annan? (Zan 17:3; 2 Kor. 5:18-20; Fili. 3:8)

2. *Lir Akt 4:1-31.*

Dan ki fason nou devret imit nou bann frer dan premye syek kan nou rankontre lopoziyon dan minister? (Akt 4:29, 31; Efe. 6:18-20; 1 Tesa. 2:2)

3. *Lir Akt 5:17-42.*

Ki mannyer bann ki pa Temwen swa dan leparse e konmela i demontre ki zot rezonnab an rapor avek sa travay predikasyon? (Akt 5:34-39)

## **Zistwar 107**

### **Etyenn ti ganny saboule**

1. Lekel Etyenn e ki Bondye ti ed li fer?

2. Ki Etyenn ti dir ki ti fer bann sef relizye vreman ankoler?

3. Ki bann zonm ti fer avek Etyenn apre ki zot ti'n trenn li an deor lavil?

4. Dan sa portre, lekel sa zennonm ki pe debout obor bann lenz ki ater?

5. Ki Etyenn ti priy lo la avek Zeova avan i ti mor?

6. Par imit Etyenn, ki nou devret fer kan en dimoun i fer nou en keksoz mal?

### **Lezot kestyon:**

1. *Lir Akt 6:8-15.*

Ki trik bann sef relizye in servi pour zot esey anpes travay predikasyon bann Temwen Zeova? (Akt 6:9, 11, 13)

2. *Lir Akt 7:1-60.*

(a) Kwa ki ti ed Etyenn pour defann sa bon nouvel avek lefikasite devan bann Sannedren e ki nou kapab aprann par son legzanp? (Akt 7:51-53; Rom. 15:4; 2 Tim. 3:14-17; 1 Pyer 3:15)

(b) Ki latitid nou devret annan anver bann ki opoz nou travay? (Akt 7:58-60; Mat. 5:44; Lik 23:33, 34)

## Lo Semen ki al Damas

1. Ki Sol ti fer apre ki Etyenn ti'n mor?
2. Ki keksoz merveye ti arive kan Pol ti pe al Damas?
3. Ki Zezi ti dir Sol fer?
4. Ki Zezi ti dir Ananyas fer e ki manner Sol ti kapab vwar kler ankor?
5. Ki manner Sol ti ganny apele e ganny servi pli tar?

### Lezot kestyon:

#### 1. *Lir Akt 8:1-4.*

Ki lefe persekasyon ti annan lo kongregasyon Kretyen ki ti fek ganny formen e konman sa in ede pour propaz lafwa Kretyen e ki levennman parey pe arive dan nou letan? (Akt 8:4; Iza. 54:17)

#### 2. *Lir Akt 9:1-20.*

Ki sa trwa misyon Zezi ti dir i annan pour Sol? (Akt 9:15; 13:5; 26:1; 27:24; Rom. 11:13)

#### 3. *Lir Akt 22:6-16.*

Ki manner nou kapab parey Ananyas e akoz sa i enportan? (Akt 22:12; 1 Tim. 3:7; 1 Pyer 1:14-16; 2:12)

#### 4. *Lir Akt 26:8-20.*

Lefet ki Sol ti konverti pour vin en Kretyen, ki manner sa i kapab vin en lankourazman ozordi pour bann ki zot konzwen i pa Temwen? (Akt 26:11; 1 Tim. 1:14-16; 2 Tim. 4:2; 1 Pyer 3:1-3)

## Pyer ti vizit Korney

1. Lekel sa zonm ki pe salye dan sa portre?
2. Ki en lanz ti dir Korney?
3. Ki Bondye ti fer Pyer vwar kan i ti Zope lo twa lakaz Simon?
4. Akoz Pyer ti dir Korney ki i pa devret salye e ador li?
5. Akoz bann disip Zwif ki ti avek Pyer ti sirprann?
6. Ki lesan enportan nou kapab aprann avek vizit Pyer kot Korney?

### Lezot kestyon:

#### 1. *Lir Akt 10:1-48.*

Ki parol Pyer dan Akt 10:42 i montre konsernan pres sa bon nouvel lo Rwayonm? (Mat. 28:19; Mark 13:10; Akt 1:8)

#### 2. *Lir Akt 11:1-18.*

Ki latitud Pyer ti annan kan direksyon Zeova ti vin evidan an rapor avek bann non Zwif e ki manner nou kapab imit li? (Akt 11:17, 18; 2 Kor. 10:5; Efe. 5:17)

## Timote, nouvo Zanmi Pol

1. Lekel sa zennonm dan sa portre, kote i reste e ki manner son manman ek granmanman ti apele?
2. Ki Timote ti dir kan Pol ti demann li pour al ansanm avek li ek Silas pour pres avek bann dimoun ki reste dan bann landrwa lwen?
3. Kote bann premye disip Zezi ti ganny apele Kretyen pour premye fwa?
4. Ki serten lavil Pol, Silas ek Timote ti vizite apre ki zot ti sorti Antyos?
5. Ki manner Timote ti ed Pol e ki kestyon bann zenn i devret demann zot lekor?

### Lezot kestyon:

#### 1. *Lir Akt 9:19-30.*

Ki manner zapot Pol ti montre ki i ti pridan kan i ti pe fer fas avek bann ki ti opoz sa bon nouvel? (Akt 9:22-25, 29, 30; Mat. 10:16)

#### 2. *Lir Akt 11:19-26.*

Ki manner sa resi dan Akt 11:19-21, 26 i montre ki lespri sen Zeova ki pe gid e diriz sa travay predikasyon?

#### 3. *Lir Akt 13:13-16, 42-52.*

Ki manner Akt 13:51, 52 i montre ki bann disip pa ti les lopoziyon dekouraz zot? (Mat. 10:14; Akt 18:6; 1 Pyer 4:14)

#### 4. *Lir Akt 14:1-6, 19-28.*

Ki manner sa lekspresyon "konfye zot dan lanmen Bondye" i liber nou kont okenn lenkyetid inital pandan ki nou ed bann nouvo disip? (Akt 14:21-23; 20:32; Zan 6:44)

#### 5. *Lir Akt 16:1-5.*

Lefet ki Timote ti pare pour ganny sirkonsi, ki manner sa i met lanfaz lo lenportans pour fer tou keksoz "pour levanzil"? (Akt 16:3; 1 Kor. 9:23; 1 Tesa. 2:8)

#### 6. *Lir Akt 18:1-11, 18-22.*

Ki Akt 18:9, 10 i endike konsernan rol ki Zezi pe zwe pour diriz sa travay predikasyon e ki konfyans sa i donn nou ozordi? (Mat. 28:20)

## En Garson ti ganny sonmey

1. Lekel sa garson ki pe dormi ater dan sa portre e ki ti'n arive avek li?
2. Ki Pol ti fer kan i ti vwar ki sa garson ti'n mor?
3. Kote Pol, Timote e bann ki ti pe vwayaz avek li ti pe ale e ki ti arive kan zot ti aret Mile?
4. Ki lavertisman profet Agabis ti donn Pol e ki manner sa ki sa profet ti dir ti vin vre?

### **Lezot kestyon:**

1. *Lir Akt 20:7-38.*

(a) Dapre parol Pol dan Akt 20:26, 27, dan ki fason nou “pa responsab” disan bann dimoun? (Ezek. 33:8; Akt 18:6, 7)

(b) Akoz bann ansyen i bezwen “reste ferm dan sa mesaz sir” kan zot pe ansennyen? (Akt 20:17, 29, 30; Tit 1:7-9; 2 Tim. 1:13)

2. *Lir Akt 26:24-32.*

Ki mannyer Pol ti servi son sitwayennte konman en Romen pour obeir sa konmann ki i ti’n gannyen avek Zezi? (Akt 9:15; 16:37, 38; 25:11, 12; 26:32; Lik 21:12, 13)

### **Zistwar 112**

#### **Bato ti koule pros avek en Zil**

1. Ki ti arive avek sa bato ki Pol ti lo la kan i ti pas obor zil Kret?

2. Ki Pol ti dir avek bann dimoun ki ti lo sa bato?

3. Ki ti arive ki ti fer bato ganny kas an morso?

4. Ki lenstriksyon sa zofisye larme abor ti donnen e konbyen dimoun ti ariv ater sen e sof?

5. Ki mannyer sa zil ki zot ti tonm lo la ti apele e ki ti arive avek Pol kan letan ti’n kalmi?

### **Lezot kestyon:**

1. *Lir Akt 27:1-44.*

Ki mannyer sa resi konsernan vwayaz Pol an Ronm i kapab ranforsi nou lafwa dan sa ki Labib i dir? (Akt 27:16-19, 27-32; Lik 1:3; 2 Tim. 3:16, 17)

2. *Lir Akt 28:1-14.*

Si bann payen lo zil Malt ti “tre bon” anver zapot Pol ek son bann zanmi vwayazer, alors ki bann Kreyen i devret ganny pouse pour fer e sirtou dan ki fason? (Akt 28:1, 2; Ebr. 13:1, 2; 1 Pyer 4:9)

### **Zistwar 113**

#### **Pol an Ronm**

1. Kan Pol ti en prizonnen, lekel i ti pres avek?

2. Lekel sa viziter kot latab dan sa portre e ki i pe fer pour Pol?

3. Lekel Epafrodit e ki i ti pran pour al avek kan i ti retourn Filip?

4. Akoz Pol ti ekrir son zanmi Filemon en let?

5. Ki Pol ti fer kan i ti ganny large dan prizon e ki ti arive avek li apre?

6. Lekel Zeova ti servi pour ekrir bann deryen liv Labib e ki liv Revelasyon i koz lo la?

### **Lezot kestyon:**

1. *Lir Akt 28:16-31 ek Filipyen 1:13.*

Ki mannyer Pol ti servi son letan kan i ti dan

prizon an Ronm e ki lefe son lafwa ferm ti annan lo bann kongregasyon Kreyen? (Akt 28:23, 30; Fili. 1:14)

2. *Lir Filipyen 2:19-30.*

Dan ki fason Pol ti demontre lapresyasyon pour Timote ek Epafrodit e ki mannyer nou kapab imit son legzant? (Fili. 2:20, 22, 25, 29, 30; 1 Kor. 16:18; 1 Tesa. 5:12, 13)

3. *Lir Filemon 1-25.*

(a) Dan ki domenn Pol ti ankouraz Filemon pour fer sa ki apropiye e ki mannyer sa i vin konman en gid pour bann ansyen ozordi? (Filem. 9; 2 Kor. 8:8; Gal. 5:13)

(b) Ki mannyer Pol ti montre dan Filemon 13, 14 ki i ti annan respe pour konsyans lezot dan kongregasyon? (1 Kor. 8:7, 13; 10:31-33)

4. *Lir 2 Timote 4:7-9.*

Parey zapot Pol, ki mannyer nou kapab annan konfyans ki Zeova pou rekonpans nou si nou reste fidel ziska lafen? (Mat. 24:13; Ebr. 6:10)

### **Zistwar 114**

#### **Lafen tou move Keksoz**

1. Akoz Labib i koz lo bann seval dan lesyel?

2. Ki mannyer sa lager ant Bondye avek bann move dimoun lo later pou apele e ki bi sa lager?

3. Lekel sa Enn ki pou diriz sa lager dapre sa portre, akoz i annan en kouronn e ki sa sab i ve-dir?

4. Kan nou mazin Zistwar 10 ek 15, akoz nou pa devret sirprann ki Bondye pou detrir bann move dimoun?

5. Ki mannyer Zistwar 33, 36 ek 76 i montre ki Bondye pou detrir bann move dimoun menm si zot dir ki zot ador li?

### **Lezot kestyon:**

1. *Lir Revelasyon 19:11-16.*

(a) Ki mannyer Lekritir i montre ki se Zezi ki kavalye lo sa seval blan? (Rev. 1:5; 3:14; 19:11; Iza. 11:4)

(b) Ki mannyer bann tas disan lo lenz Zezi i konfirmen ki i pou vremen ranport laviktwar konplet? (Rev. 14:18-20; 19:13)

(c) Lekel ki parmi sa bann larme ki swiv Zezi lo son seval blan? (Rev. 12:7; 19:14; Mat. 25:31, 32)

### **Zistwar 115**

#### **En nouvo Paradi lo Later**

1. Ki bann kondisyon Labib i dir nou pou rezwir dan en Paradi lo later?

2. Ki promes Labib in fer pour bann ki pou viv dan Paradi?



3. Kan ki Zezi pou fer sir ki vreman sa bann sanzman pou arive?

4. Kan Zezi ti lo later, ki i ti fer pour montre sa ki i pou fer kan i vin Lerwa dan Rwayonm Bondye?

5. Ki Zezi ek bann ki i'n swazir pou fer sir kan zot pou dirize dan lesyel?

### **Lezot kestasyon:**

1. *Lir Revelasyon 5:9, 10.*

Akoz nou kapab annan konfyans ki bann ki pou diriz lo later pandan Renny Milener Kris pou bann lerwa ek Pret ki dous e annan mizerikord? (Efe. 4:20-24; 1 Pyer 1:7; 3:8; 5:6-10)

2. *Lir Revelasyon 14:1-3.*

Lefet ki non Papa ek Lanyo i ganny ekrir lo fron sa 144,000, ki sa i vedir? (1 Kor. 3:23; 2 Tim. 2:19; Rev. 3:12)

### **Zistwar 116**

#### **Ki nou kapab fer pour viv pour touzour**

1. Ki nou devret fer si nou anvi viv pour touzour?

2. Parey sa pti fiy ek son bann zanmi pe fer dan

sa portre, ki mannyer nou kapab aprann lo Zeova ek Zezi?

3. Ki lezot liv ou vwar dan sa portre e aköz nou bezwen annan labitid lir zot?

4. Apard ki aprann lo Zeova ek Zezi ki lezot kek-öz nou bezwen fer pour ganny lavi eternal?

5. Ki leson nou aprann avek Zistwar 69?

6. Ki nou kapab aprann avek bon legzanp Samyel ler i ti ankor ptipti dan Zistwar 55?

7. Ki mannyer nou kapab swiv legzanp Zezi e si nou fer li, ki nou pou kapab fer alavenir?

### **Lezot kestasyon:**

1. *Lir Zan 17:3.*

Ki mannyer Lekritir i montre ki aprann lo Zeova ek Zezi Kri i plis ki zis konn bann fe? (Mat. 7:21; Zak 2:18-20; 1 Zan 2:17)

2. *Lir Psonm 145:1-21.*

(a) Nonm serten bon rezon nou annan pour loue Zeova. (Ps. 145:8-11; Rev. 4:11)

(b) Dan ki fason Zeova i "bon avek tou dimoun" e ki mannyer sa i atir nou pour vin pli pros avek li? (Ps. 145:9; Mat. 5:43-45)

(c) Si Zeova i presye pour ou, ki ou pou ganny pouse pour fer? (Ps. 119:171, 172, 175; 145:11, 12, 21)

Eski ou ti a kontan ganny plis lenformasyon?

Silvouple al lo sit Temwen Zeova lo [www.jw.org](http://www.jw.org).